


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagũer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 4 Mar 2019 from source files dated 14 Dec 2018
c27c2d97-c359-59f5-b367-83efb2e33739

Contents

SAN MATEO	1
SAN MARCOS	49
SAN LUCAS	78
SAN JUAN	129
LOS HECHOS	166
ROMANOS	211
1 CORINTIOS	231
2 CORINTIOS	251
GALATAS	263
EFESIOS	270
FILIPENSES	276
COLOSENSES	281
1 TESALONICENSES	286
2 TESALONICENSES	290
1 TIMOTEO	292
2 TIMOTEO	298
TITO	302
FILEMÓN	305
HEBREOS	306
SANTIAGO	321
1 SAN PEDRO	326
2 SAN PEDRO	332
1 SAN JUAN	335
2 SAN JUAN	340
3 SAN JUAN	341
SAN JUDAS	342
APOCALIPSIS	344

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pìpe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acáz, Acáz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús si seci. Ahe imembri Tüpa Rembiporavo Poropĩsiosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pìpe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropĩsiosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiẽhi viteseve rumo, Espíritu Santo pĩratasa pìpe imembri. ¹⁹ Evocoyase José, imevi, ahe ava seco catupri vahe, “Tapoiño ayase ava icuaẽhisa pìpe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pìpe. ²⁰ Aipo opihañemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda ãgua. Esepia, Espíritu Santo sui ou imembirã. ²¹ María virecose omembri, pemondora sererguã Jesús. Esepia, ahe opĩsirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(“Tüpa yande rese ité seci’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sãsa cotindar yuviraso pĩtani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sãsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboetei âgua —ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei ěgüe ehi pāve yuvireco. ⁴ Iyavei cūrteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Porop̄sirosar? —ehi.

⁵ Ahe omboyeve yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehusar Miqueas rembicuachiagüer pipe aipo ehi:

⁶ ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osēra mborerecuar che recua iguar Israel yocuai âgua’ ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. ⁸ Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca âgua. Che avei evocoyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe riru pipe yuvireco oicuavēhe vahe rã oporerecosa sepirusu vahe oro, itaisi, ambuae mbahe s̄iâcua vahe mirra serer vahe avei. ¹² Yuviroyeve güecuave yuviraso, ndoyuviroyeve iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyeve âgua.

Jesús pītani seroñemisa Egipto ve

¹³ Aipo ava yepēpi pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi âgua. Esepia, mborerecuar Herodes osecara pītani yuca âgua oico” ehi chupe.

¹⁴ Ahe p̄itu pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rãro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

Herodes oyuca uca chihivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chihivahe cuimbahemi yuvireco opacatu ñuvirío araviter ovireco vahe, chihivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūrtei. ¹⁷ ěgüe ehi yaviye Tūpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ “Eñarapuha, eroyeve pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso âgua. Coiyemi tēi iquerve Tūpa, “Peso Galilea ivi rese” ehi chupe. Ichui

yuviraso tecua Nazaret ve. Aheve opita yuvireco cute. Ëgüe ehi yaviye Tüpa ñehe mombehugar remimombehugüer: “ ‘Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirëhisa rupi secoi

¹ Ipare Juan Oporoãpiramo vahe Tüpa recocuer rese oñehe oico Judea ivi rupi ava yemboerecuaëhisave ² aipo ehi: “¡Pemboasi pe angaipa; peyevi Tüpa upe! Esepia, co Tüpa mborerecuasa cõimi secoi yandeu” ehi.

³ Co Juan rese niha oñehe yipive Tüpa ñehe mombehugar Isaías aipo ehi güembicuachi-agüer pipe:

“Oyeendu ñehesa ava yemboerecuaëhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴ Juan turucuar ahese camello ragüer apopri, sumbicusasa mbahe pirer, sembihi evocoyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso ñehe rendu ⁶ oangaipagüer mombehu ãgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetasa tõi peico! ¿Ava vo, ‘Pesëra Tüpa ñemoirosa ou vaherã sui’ ehi tupri tõi pëu? ⁸ Yipindar toyecua tupri rane Tüpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tõi pe ñepisiro ãgua. Esepia, Tüpa oicatuño ité co ita sui Abraham suindar nungar tupri apo ãgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. ¹¹ Che i pipe tõi opoãpiramo Tüpa upe pe yevi ãgua. Oura rumo ambuae che raquicuei, ahe pe ãpiramora Espiritu Santo tata nungar pipe. Ahe seco pírata catu vahe secoi che sui. Sese cheu ndiyai eté ahe ipitaquisã yora ãgua ichui. ¹² Ahe oipehara mbahe rãhii ihigüer sui. Sãhii evocoyase oyapocatura, ihigüer rumo omondora tata apirëhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

¹⁵ —Ëgüe tehiño aipo. Iyacatu yayapora Tüpa porocuita —ehi Juan upe.

Evocoyase Juan, “Aviye” ehi chupe. ¹⁶ Oãpiramo pare, osë ive sui. Ahe pipeve voi ìva oyemboi tupri, aheseve avei osepia Tüpa Espiritu ogüeyise ou iharive apicasu nungar. ¹⁷ Iyavei oyeendu ñehesa ìva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoãhasa

¹ Ipare Tüpa Espiritu viraso Jesús ava yemboerecuaëhisave ‘tosecoãha Carugar’ ohesa pipe.

² Aheve cuarenta ari, cuarenta pïtu ndocarui. Sese ndasiepoi eté oico. ³ Evocoyase oyemboya Carugar sese secoãha ãgua, aipo ehi chupe:

—Tüpa Rahir ité nde recose, co ita sui eyapo pan cüritei —ehi.

⁴ Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tüpa Ñehengagüer reroya pipe ava yuvirecovera yepi’ ehi — ehiño chupe.

⁵ Ichui Carugar viraso Jesús Jerusalén maranehi pipendar tüparo torre apiterve.

⁶ Aheve aipo ehi chupe:

—Tūpa Rahir ité nde recose, eviapi cohave sui. Esepia niha, icuachiapri pipe: ‘Tūpa oyocuirai güembigui eta nde rãro ãgua. Ahe nde mopuhara yuvireco que ñepe ita nde momara rãgüer sui’ ehi —ehi Carugar chupe.

⁷ Evocoyase omboyevi Carugar upe:

—Icuachiapri pipe rumo aipo ehi avei no: ‘Ndereseoãhai chira nde Yar Tūpa’ ehi —ehi chupe.

⁸ Ipare Carugar viraso iri ivitri ivate vahe apiterve secoãha ãgua. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepepi che sui cūrítei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipare Tūpa rembiguai yuvirogüeyi Jesús rese hañeco ãgua yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve. ¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei. ¹⁴ Na ehi yaviye Tūpa ñehe mombehusar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar,

para guasu ivirindar, ïai Jordán rovaindar iyavei Galilea pipendar ndahei vahe judío,

¹⁶ ahe aviye pñtumimbisave yuvirecoi vahe,

osepia ramo vahe tesapesa yuvireco; iyavei mano rãgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cõimi eté Tūpa mborerecuasa secoi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoyase:

—Pe pira recasar peico. Perio che rupi. Na peye aveira ava reca ãgua cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramoseve, opaño oporaviquisa sui opoi yuvireco, oseyañe oyesupa, yuviraso supi.

Jesús ombohe ava rehii

²³ Jesús evocoyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa aviye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. ²⁴ Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, carugar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

²⁵ Ëgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, ïai Jordán rovaindar avei no.

¹ Ñepei ari pipe, ava rehii repiase, Jesús oyeupi ivitri rese. Aheve oguapi oĩ. Aheve semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicuase mbahe ipane vahe Tūpa rese ité güeco tupri ãgua. Esepia niha, chupe nara ité Tūpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tūpa omboura viharetesa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

¹¹ “Perorivete catura pe acoi ava iñehe-ñehe tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco.

¹² Pe rumo peyembovihanora. Esepia, ivave tuvichá vahe porerecosa peipisira curi. Ëgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucri iyavei tesapesa yuvirecoi ava upe

¹³ “Co ivi pipe pe aviye yucri peico opacatu ava upe. Yucri rumo nasehe irise, ndayaicatui imoehe iri ãgua, ndiporusai chietera; imombopasara ava pirunga ãgua yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi ãgua. ¹⁵ Iyavei ndayamoendii chira tataendi mbahevrive tẽi. Iyacatu rumo yasupi ivate sendave opacatu oi pipendar ava resape ãgua. ¹⁶ Pe ãgüe peye aveira pemboyecua ava eta upe pe recocuer aviye vahe. Ipipe sui tomboetei yande Ru Tūpa iva pendar yuvireco” ehi ava rehii upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tūpa ñehe mombehusar rembicuachía mboyeroyaẽhi ãgua iyavei Moisés porocuita cuachiapri mboyeroyaẽhi ãgua avei no’ peye tẽi cheu. Ëgüe ehi rumo che ayu imboaviye ãgua. ¹⁸ Supi eté co iva, ivi avei yandeu oime vitemiseve, ndipoi chietera que ñepei yepe Moisés porocuita, que ambuae Tūpa ñehe mombehusar rembicuachiagüer ocañi tẽi vaherã; ñepei-pe porocuita imombepri imboaviyesaño itera. ¹⁹ Sese acoi ava ndoviroyai vahe que ñepei mborocuitamira viña, ombohe avei ava seroyaẽhi ãgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi. ²⁰ Iyavei amombehu pẽu: acoi pe reco ivi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, aheve ndapeiquei chietera Tūpa mborerecuasave” ehi.

Jesús oporombohe ñemoiroẽhi ãgua rese

²¹ “Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi. ²² Che rumo aipo ahe pẽu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ãgüe ere tẽi vahe eico’ ehi vahe ambuae ava upe, ahe serasosara porandu ãgua mborerecuar ivate catu vahe rovai.

Acoi ava rumo oñehe marase seroĩrosave ambuae ava upe, ahe iyacatu imondosa ité tata guasuve.

²³ “Sese Tũpa upe pe porerecosa reropovẽhesave tũparo pipe pemahenduhase ava pe amotarẽhimbar rese, ²⁴ peseya rane pe porerecosa aheve; peyevi rane pe amotarẽhimbar upe pẽu iñero ãgua rese. Acoi peñerose oyeupe, ahese voi peyevi, tapeicuavẽhe pe porerecosa Tũpa upe.

²⁵ “Iyavei peyemotarẽhise, peñero voi oyeupe peyoepiase. Anise, aviyeteramo coiyecatu tẽise pe mombehu tẽira pe amotarẽhimbar mborerecuar upe pe reraso ãgua. Ichui aviyeteramo ahe pe roquenda ucara. ²⁶ Supi eté aipo ahe pẽu: Ndapesẽi chietera acoi peyemboepipase voi eté pesẽra ichui” ehi.

Jesús oporombohe yemboaguasaẽhi ãgua rese

²⁷ “Peicua niha Moisés porocuita yipindar: ‘Peaguasai rene ambuae ava rembireco rese’ ehi vahe. ²⁸ Che rumo aipo ahe pẽu: Acoi ava omahese cuña rese ipotasa pipe, ahe inungar oyapo vahe ité mbahe sese opĩha pipe yepi.

²⁹ “Iyavei inungar que pe resa pe acato cotindar oipota rai ucase mbahe pẽu pe mboangaipa ãgua tẽi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiẽhi ãgua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pẽu: ava opoise güembireco sui, cuña ndoyaviise mbahe, ahese ombopihañemoñeta tiẽtera güembireco mboaguasa uca ãgua. Iyavei cuimbahe omendase cuña omenda vahecuer rese, oyemboaguasa tẽi avei sese” ehi.

Jesús oporombohe Vu Tũpa rer poru tẽiẽhi ãgua rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tũpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tẽi avei’ ahe pẽu. Esepia, ahe niha Tũpa renda; ³⁵ ivi rer pipe tẽi avei ndapeñehei chira. Esepia, ahe Tũpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe ãca rer pipe avei ndapeñehei chira. Esepia, ndapeicatui chira que ñepei pe ha momorochi ãgua, imou ãgua avei. ³⁷ Sese niha peñehese, ñepei reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tẽi” ehi.

Jesús oporombohe yande amotarẽhisar upe mbahe tẽi mboyeviẽhi ãgua

³⁸ “Peicua acoi Moisés porocuita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãi ichui, sãi avei senosesara’ ehi vahe. ³⁹ Che rumo aipo ahe pẽu: Aní chira pemboyevi pẽu mbahe tẽi aposar upe. Acoi que pe amotarẽhisar pe rovapetese yuvireco, ambuae coti pe rova avei pemoporẽhiñora chupe. ⁴⁰ Porandusave pe rerasose pe camisa rerocua ãgua yuvireco pe sui, pe saco avei pemondoñora chupe. ⁴¹ ‘Ñepei legua rupi evosii co mbahe rese cheu’ ehise que ava pẽu, pe rumo perasoñora ñuvirio legua rupi chupe. ⁴² Iyavei oporanduse que pe mbahe rese yuvireco pẽu, pemondoño avei chupe. Aní chira perecatẽhi sese” ehi.

Pesaisu pe amotarẽhimbar

⁴³ “Iyavei pesendu ñehesa yipindar: ‘Pesepia potai rene pe amotarẽhimbar, pe mboripar güeraño pesaisu’ ehi vahe. ⁴⁴ Che rumo aipo ahe pẽu: Pesaisu catu pe amotarẽhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tũpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco põrai vahe upe avei. ⁴⁶ Pe raisupar güeraño pesaisu catu tẽise, ndapeipisii chietera porerecosa

evocoi nungar sui. Esepia niha, ava guarepochi rerocuasar ndipihai vahe guaisupar tēi osaisu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tūpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tūpa iva pendar seco catupri vahe nungar” ehi.

6

Jesús oporombohe mbahe aviye vahe apo āgua rese

¹ “Tūpa upe mbahe peyapo potase, ‘Tache repia ava yuvireco’ ndapeyei chira. Esepia, ēgüe peyese, ndapeipisii chietera pe Ru Tūpa iva pendar porerecosa. ² Evocoyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbī omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: Ēgüe ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiañhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure āgua rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opūha-pūha catu tūparo pipe oyerogui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porerecosa yuvireco. ⁶ Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui āgua pe Ru Tūpa upe. Evocoyase pe Ru Tūpa oicua vahe mbahe pe rembiapo, iporerecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroya voirá’ ohesave yuvireco viña. ⁸ Aní chira inungar tēi peico. Esepia, pe Ru Tūpa oicua pe porandu renondeva mbahe ipane vahe pēu. ⁹ Sese aipo peyera peyeroqui:

‘Ore Ru Tūpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihi ari yacatundar oreu co ari pipe.

¹² Iyavei ñeñero ore angaipa rese oreu inungar ore oreñero ore amotarēhimbar upe.

¹³ Ore mboangaipa ucai rene eve; eipeha mbahe naporai vahe ore sui’ peyera.

¹⁴ “Esepia, pe amotarēhimbar upe peñerose, pe Ru iva pendar avei iñerora pēu;

¹⁵ ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco. ¹⁷ Pe rumo peyecuacuse, peñeaca mondoro tuprira, peyovai tupri aveira. ¹⁸ Evocoyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepiai vahe, güeraño oicuara pe yecuacusa. Ahe evocoyase iporerecora pe rese curi” ehi.

Mbahe porañeté vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sãve-sãve tēi opochi ati-ati oapocatusave, imonda vahe avei evocoyase imondaño sese pēu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe

reco mocañi água. ²¹ Esepia, pe mbahe pe rembiereco setá catu vahesa rupi-rupi pe pïhañemoñeta yepi, yepera que co ivi pïpe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoyase yande resa aviýese, opacatu yande retecuer upe osesape; ²³ acoi imarase rumo, opacatu yande retecuer pïtumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pïtumimbi nungar opacatu yande recocuer upe” ehi.

*Guarepochi pota raisa; Tüpa mboyeroya*ēhisa

²⁴ “Iyavei ndipoi chietera que ava ñuvirío güerecuar omboyeroya vahe. Esepia, ñepei oyamotarēhira imboyeroya potaēhisa pïpe, ambuae evocoyase osaisu catura imboyeroysa pïpe. Ēgüe peye avei, ndapeicatui Tüpa mboyeroya guarepochi pota raisa pïpe” ehi.

Tüpa osãro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove água, pe ihu água rese, pe turucuarã rese tēi avei no. Esepia, yande recovesa aviýe catu vahe tembihu sui, yande retecuer avei aviýe catu turucuar sui no. ²⁶ Pesepia vïrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tüpa iva pendar ité niha omoime mbahe itohu. ¡Pe rumo ivate catu vahe ité peico vïrai sui! ²⁷ Ndipoi que ñepei pe pãhu pendar oicatu vahe opïhañemoñetasa pïpe tēi güecocuer mopucu iri água.

²⁸ “Ndahei chira pe turucuarã rese tēi peyemomahenduha guasu ai. Pemahecua ru mbahe potri caha pïpendar rese: ndoporaviquii eté iyavei ndoipiai oturucuarã. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰ Tüpa niha omboporañete raimi tēi mbahe potri caha pïpendar, moviro ari tēi yasepia, ichui sapisapaño horno pïpe. ¡Ahe rumo omondo catura turucuar pëu, pe ava nimbahe reroya tuprii vahe! ³¹ Sese, ‘¿Mbahe pïha yahura, yaïhura?’ Iyavei, ¿mbahe pïha yamondera?’ ndapeyei chira pe yemomahenduha guasu aisa pïpe. ³² Ava Tüpa reroyasarēhi aipo nungar reseño tēi ipïhañemoñeta yuvireco yepi. Pe Ru Tüpa iva pendar rumo oicua ité pëu mbahe ipane vahe. ³³ Pemahenduha rane Tüpa rese pe recocuer tupri pïpe ipovrive mbahe pe yapo água semimbotar rupi, ahese omboura opacatu co mbahe ipane vahe pëu. ³⁴ Peyemomahenduha guasa ai eme mbahe peyapo vahe rã rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vahe rã yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tēi ambuae ava upe; evocoyase Tüpa, ‘Oyavi mbahe’ ndehi chira pëu. ² Esepia, inungar pe ambuae ava upe peico, ēgüe ehi aveira niha Tüpa pëu. ³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pëu, ‘Che toropïtivii mbahe nde rembiavi rese’ peye vahe rã chupe. Esepia, ¡pe peyavi guasu catu mbahe ichui! ⁵ ¡Pe Tüpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pëu” ehi.

Peporandu Tüpa upe pëu mbahe ipane vahe rese

⁷ “Peporandu mbahe rese Tüpa upe, ahese omboura pëu; peseca ahe mbahe, ahese peyosura; inungar pemota oquenda, ēgüe peyera pe yeroquisa pïpe Tüpa upe, ahese

imbousara pe porandusa pëu. ⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeriquisa pipe omota vahe oquenda Tūpa upe, chupe imboisara.

⁹ “Ndipoi eté revo que ñepei pe pāhu pendar omondo vahe rã ita tēi guahir upe pan rese oyeupe poranduse. ¹⁰ Que pira rese oyeupe poranduse revo, ndomondo chiaveira mboi tēi chupe. ¹¹ Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vahe rã pëu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coie yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sãchi ati vahe sui. ¹⁷ Evocoyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹ Sese opacatu ivira iha naporai vahe yasiasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriehisa pipe omopuha vahe ivi cuhi harive tēi güetarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¡Mara ehi rutei?” ehi tēi yuvireco chupe. ²⁹ Esepia, ndahei Moisés porocuita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahí upe. Ipape eicuavēhe nde porerecosa nde cuera agüer resendar Moisés porocuita rupi. Ipape sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipape Jesús oguataño, ãgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pīpe nde reique āgua; iyacatu niha cohapeve ereñeheño tēi icuera āgua. Evocoyase nde ñehe pīpe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūrítei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pīpendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiyé. ¹² Judío eta rumo, oyeupe ñehesa reroyāñhi pīpe setá pītumimisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pīpe yaposa nde remimbotar ndeu —ehi.

Ahe pīpeve semimboacua ocuera tupri ité.

Jesús ombogüera Pedro rembireco si

¹⁴ Ipape Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

Jesús ombogüera setá ava imbaheasi vahe

¹⁶ Ipape pītū ramose setá carugar vireco vahe ogüeru yuvireco chupe. Jesús rumo ñepeí reseve oñehe pīpe tēi omombopa carugar ava rehii sui, iyavei opacatu imbaheasi vahe ombogüera avei no. ¹⁷ ãgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae vírocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so āgua” ehi. ¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyeví chupe:

—Yavaira rumo ndeu. Esepia, vīraí vireco guaiti, iyavei aguara vireco oquesa; che rumo, Ava Riquehir, ndarecoi que che rēta ité che pītuhu āgua yepi —ehi.

²¹ Ipape ñepeí ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūrítei voi eyu che rupi —ehi—. ãgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ İpa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayii eté, seni-seni carite oyopi. ²⁵ Evocoyase semimbohe yuviraso voi imomahe:

—İOre Yar, yande rerasora mo co carite ipive! İYande pĩsıro eve! —ehi yuvireco chupe.

²⁶ Evocoyase aipo ehi:

—İMahera pesiquiye! İNdapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷ —İMara ehi rutei pĩha co? —ehi tēi semimbohe yuvireco chupe—. İMara ehi vahe pĩha co ava secoi?

Esepia niha, ivitu, para guasu avei omboyeroa yuvireco no —ehi.

Jesús omboyepipipa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovaĩchi. Ahe ava tehögüer ruvípa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. ²⁹ Jesús repia ramoseve rumo, oñehe pĩrata yuvireco chupe aipo ehi:

—İJesús, Tūpa Rahir, eyepipi ore sui! Esepia niha, ndoyepota vitei ari nde ore mombaraısu āgua oreu —ehi tēi yuvireco.

³⁰ Namombriimi cuchi rehii yuvirecoi ichui. ³¹ Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

³² —Aviye, peso —ehi carugareta upe.

Aipo hese, carugar opa yuvınose ava sui, yuviroique cuchi rehii avıterve. İpare rumo cuchi ndayaracua iri yuvireco; iivi socuer rupi yuvinoña yuviraso, opa ipa pipe ocañi tēi yuvireco.

³³ Yuvinoña evocoyase cuchi rārosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvınose ati Jesús upe, “İEso cohava sui!” ehi yuvireco chupe.

9

Jesús ombogüera ava ndoguatai vahe

¹ İpare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicua se co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopase, che ñero nde angaipa rese ndeu —ehi.

³ “İCo mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—İMahera pepihañemoñeta rai pe yapisacasa rereco! ⁵ İUma rupi vo ñehesa ndayavaimi catu: ‘Nde angaipa rese che ñero ndeu’ hesa pĩha, anise, ‘Epūha, eguata’ hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipa upe che ñero āgua —ehi.

Evocoyase aipo ehi imbaheasi vahe upe:

—Epūha, esupi nde rupa seraso nde rētave —ehi.

⁷ Ahese opūha voi, oso güētave. ⁸ “İToo! İMara ehi rutei vo?” ehi ava rehii yuvireco imboeteisave. “Esepia, ahe niha ombou opĩratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi rero cuasa mesave che rēise. İpare aipo ehi cheu:

—Erio che rupi —ehi.

Evocoyase apūha, aso voi supi.

¹⁰ Ahe ari pīpeve Jesús güemimbohe reseve yuviroique che rētave. Ambocaru setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pāhuve tēi? —ehi seroñrosa pīpe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ñgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¿Ndiyai eté ichohopri mendasave ndoyembovīhai yuvireco imer oicovese ipāhuve! Oimera rumo ari imer reraso āgua ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pīpe. Esepia niha, yapetesa ipiasu vahe oichohoño turucuar cuacua imondoro. Ichorosa evocoyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pīper cuacua vahe pīpe. Ñgüe ehise, mbahe pīper opura viña, ocañi tēira, uva ricuer avei evocoyase ocañi tēi aveira viña no. Acoi uva ricuer ipiasu vahe mbahe pīper ipiasu vahe pīpe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe vīteseve, ou mborerecuar oñenopiha sovai aipo ehi chupe:

—Che rayri mo cūrītei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoyase opūha yuviraso güemimbohe reseve supi. ²⁰ Ahe pīpeve cuña doce aravīter rupi suvi ndopai vahe opoco saquīcui coti iturucuar popi rese. ²¹ Esepia, ahe aipo ehi opiha pīpe: “Yepe que iturucuar popi rese tēi apocora, acuerara rumo” ehi. ²² Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrītei nde yeroyasa pīpe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbī vahe iyemoingatupase omano vahe tī āgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohava sui. Co cuñatai nomanoi; oque tēi ou —ehi.

Ahe ava rumo opucaete atīño seroyaēhisave yuvireco. ²⁵ Ichui opa ava omose, ahese oique oi pīpe oipopisi cuñatai. Evocoyase ahe oñarapuha voi. ²⁶ Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷ Acoi osēse evocoi oi sui Jesús, ahese ñuvirío ndasesapisoi vahe osaquīcui moña, osapucaí yuvireco chupe aipo ehi:

—¿Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pīpe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pëu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco. ³³ Ichui omosese carugar, iñhengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecar pīratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶ Osepiase ava rehii, oiparaisuereco yuvireco. Esepia, ahe oñemosañño tēi mbahe rasicuer pāhuve inungar ovesa ndovirecoi vahe guārosar yuvireco

³⁷ Evocoyase aipo ehi güemimbohe upe:

—Supi eté mbahe miti imonuhapirã setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepepi āgua iyavei iporombogüera āgua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu āgua

⁵⁻⁶ Ipare oyocuai güemimbohe imondo aipo ehi chupe: “Pesora yipindar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepii vahe. Sese peyapoño evocoi mbahe guarepochi pisiēhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperaso chira guarepochi peyese. Ndaperaso chiaveira pe mbahe riru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperaso chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyeve oi pipendar ava pëu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. ¹⁴ Acoi ndosendu potaise pe ñehe, ndape

pisi potaise avei yuvireco, ahese pesëño ahe oi pipe sui, anise tecua sui. Peipipetera pe pi ivi rätachigüer sui, pesë pecua ichui ‘toipisi Tüpa ñemoirosa yuvireco’ pe yapave. ¹⁵ Evocoyase supi eté ari cañi oyepotase co tecua upe, ivate catura Tüpa ñemoirosa ava Sodoma, Gomorra iguar upendar sui curi” ehi.

Yamotarëhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pãhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarëhimbar sui. Esepia, mborerecuar rovai pe rerasora iyavei pe nupara otüparo pipe yuvireco, ¹⁸ ichui pe reraso aveira mborerecuareta ivate catu vahe rovai yuvireco che recocuer sui tēi, ãgüe peyera peñehe che recocuer rese chupe iyavei ava ndahei vahe judío upe avei. ¹⁹ Acoi pe rerasose mborerecuar upe yuvireco, ‘¿Mbahe pñha amombehura chupe?’ ndapeyei chira; acoi peñehe potase rumo, Tüpa omondora pe ñehe ãgua pëu. ²⁰ Esepia, ndahei chira peyesui tēi peñehe, pe Ru Tüpa Espiritu pemoñehe ucara.

²¹ “Ipare rumo ava vivri omondora oamotarëhisar upe ‘toyuca yuvireco’ oya. Ëgüe ehi aveira ava guahir upe; tahir avei oyamotarëhira oyesupa yuca uca ãgua yuvireco che recocuer rese. ²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiroproi yuvirecoira curi. ²³ Iyavei acoi pe mañeco tēise ñepeu tecuave yuvireco, ahese peyepipiñora ichui ambuae tecua pipendar upe che recocuer mombehu ãgua. Supi eté Ava Riquehir oura ndapemboaviye viteiseve pe guatasa judío recua rupi.

²⁴ “Ñepeu yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. Ëgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pñha siquiyesara?

²⁶ “Sese ndapesiquiyei chira ava pe amotarëhimbar sui. Esepia, yaposa vahe imombehupirëhi cūrítei, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe pñtumimbisave pëu, pemombehu ari pipe coiye, iyavei acoi amombehu vahe pëuñomi, perosapucai pe rëta harive imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi ãgua yuvireco. Tüpa sui rumo pesiquiye catura. Esepia, ahe oicatu yande retocuer, yande hã reseve imocañi ãgua tata guasu pipe” ehi.

²⁹ “Yamondo niha ñuvirío vñraimi repirã ñepeimi guarepochi yepi. Yande Ru Tüpa ndoipotaise rumo, ndoviapi chietera que ñepeu vñraimi” ehi. ³⁰⁻³¹ “Sese pesiquiye eme. Esepia, pe niha ivate catu vahe ité peico opacatu vñrai sui. Supi eté Tüpa niha oicua opacatu ñepeu-peu pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarëhisa

³⁴ “ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che yusa omoime ucara yeamotarëhisa. ³⁵⁻³⁶ Sese ava oñemu ae oyeamotarëhi-rëhira yuvireco; ava oyesupa oyamotarëhira, iyavei cuña membri osi oyamotarëhira, cuña vovayar oyamotarëhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. ³⁸ Iyavei acoi noñemosai vahe

mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco água. ³⁹ Acoi ava oipĩsiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisiora” ehi Jesús güemimbohe eta upe.

Porerecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tūpa ñehes mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catupriresa rese, ahe oipisi aveira porerecosa inungar tupri. ⁴² Iyavei acoi omondo vahe que chíhi i sōhisa vahe que ñepeico seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoãpiramo vahe ovoya omondo Jesús recocuer cua uca água

¹ Opase Jesús oyocuai doce güemimbohe, ahese yuviraso oporombohe Tūpa Ñehen-gagüer rese judío recua rupi yuvireco.

² Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu água: “¿Nde ité vo Tūpa Rembiporavo aipo sãrombri ereico? anise, ¿oime tie ambuae orosãro vaheerã?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoico vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pĩsiosa resendar ñehesa’ peyera chupe. ⁶ ¿Oviharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiaata ivitu ombova-mbova vahe nungar pĩha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoico mborerecuar guasu rētave yepi. ⁹ Evocoyase pesepiase, ¿‘Ava’ peye vo pe chupe? ¿Tūpa ñehes mombehusar ité pĩha? Taa, ahe ité. Evocoi niha ivate catu vahe Tūpa ñehes mombehusar sui. ¹⁰ Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehes mombehusar nde raperã moingatu água’ ehi.

¹¹ Supi eté ndipoi que ñepeico ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osãhasãha ava opĩratasa pipe imocañi água. ¹³ Opacatu Tūpa ñehes mombehusar rembicuachía pipe, Moisés porocuaita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya água pēu viña, Juan rumo, Tūpa ñehes mombehusar Elías. Ahe imombehupri ou vahe. ¹⁵ Acoi ava osendu pota vahe che ñehes, toyapisacaño sese” ehi.

¹⁶ “¿Mbahe rese pĩha amboyoyara ava recocuer cūríteindar? Esepia, co ava inungar acoi chíhivahe iguayi tēi vahe ocar rupi. Ipare oñehes pucu-pucu omboripar upe yuvireco aipo ehi: ¹⁷ ‘Oromoñehes tēi mimbí pēu, ndapepivoico eté rumo iyavei orosapucaico tēi sapucaisa viharēhisa resendar pēu, pe rumo ndapeyasehoico eté’ ehi. ¹⁸ Esepia, ouse Juan Oporoãpiramo vahe, ahe ndohui tembihu sepirusu ai vahe iyavei ndoihui uva ricuer ipĩrata vahe, sese, ‘Co mbia caruguar vireco vahe oyese’ peye tupri tēi chupe. ¹⁹ Coiye che ayu, Ava Riquehir, acarú, aihu tupri avei. Ipare, ‘Co icaru guasu ai vahe secoico, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar

mboripar tēi' peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi" ehi.

Tecua ndiporeroyai vahe

²⁰ Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuera Tūpa upe nara yuvireco. Evocoyase aipo ehi chupe: ²¹ "¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pāhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. ²² Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco āgua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cūrítei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye" ehi.

Peyu cheu mbituhusa reca

²⁵ Iyavei ahe ari pipe Jesús oyerure: "Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecu va vahe sui; eremboyecua rumo ava seco mbegüemi vahe upe. ²⁶ Ëgüe ere niha mbahe nde remimbotar apo, che Ru" ehi.

²⁷ "Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira. ²⁸ Peyu cheu opacatu icuerai vahe. Che amondora pe pituhu āgua. ²⁹⁻³⁰ Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pēu" ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoyase trigo rāñii oipoho-pohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyeve ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu āgua ondugüer reseve. Ahe chupe acoi ndipotasai ihu āgua yuvireco viña. Judío pahi yuvirecoi vahe upeño ité niha ipotasa ihu āgua yepi. ⁵ ¿Ndapeyeroqui vo Moisés porocuita resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶ Cūrítei cohava oime ava ivate catu vahe tūparo sui. ⁷ Evocoyase pe ndapesenducuai eté Tūpa Ñehengagüer aipo ehi vahe: 'Che aipota peporoparaisuereco, aní chira peropovēhepa porerecosa mbahe mimba tēi cheu' ehi vahe. Pesenducuae viña, ahese, "Oyavi mbahe" ndapeye voi chira che remimbohe mbahe ndoyavii vahe upe viña. ⁸ Esepia, Ava Riquehir mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui olose Jesús, oique judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, "Yaiñhengapo angahu Jesús" ehi yuvireco viña. Sese,

—¿Iyaño p̄iha mbituhusa ari pipe ava imbogüerasa yepi' —ehi yuvireco chupe.

¹¹ Evocoyase Jesús aipo ehi imboyeve:

—¿Ava vo pe p̄ahu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva. ¹⁴ Evocoyase fariseo opa yuvinose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵ Evocoyase Jesús oicuase fariseo p̄ihañemoñetasa, osẽ oso, ava rehii avei yuviraso nupi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ëgüe ehi yaviyepa Tũpa ñehe mombehusar Isaías remimombehugüer:

¹⁸ “Co ité che mboyeroyasar che rembiporavo.

Ahe asaïsu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ih̄ivi vahe opacatu ava ivi p̄ipendar upe.

¹⁹ Noiñehepoepi-epii chira ava, nasase-sasei t̄ei chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei pataviimi oyeapa vahe; nombogüei chiaveira tataendi s̄atachiñomi t̄ei vahe.

Ëgüe ehira mbahe ih̄ivi vahe pipe opacatu secopipa.

²¹ Evocoyase opacatu tecua pendar ava ndahei vahe judío oyeroyara yuvireco sese' ehi Isaías aracahe.

“*Jesús* vireco carugar p̄iratasa oyese” ehi t̄ei ava yuvireco

²² Ichui ava ndasesap̄isoi vahe, noñehei vahe carugar rerecosar viraso Jesús upe yuvireco. Evocoyase Jesús ombogüera. Ahese osareco, oñehe avei. ²³ Evocoyase opacatu ava oyep̄hamondiisave aipo ehi yuvireco: “¿Tũpa Rembiporavo David suindar p̄iha co?” ehi yuvireco chupe.

²⁴ Osenduse rumo fariseo, “Co mbia carugar rerecur Beelzebú p̄iratasa pipe t̄ei omboyepepi carugar ava sui” ehi yuvireco.

²⁵ Oicuaño rumo ip̄ihañemoñetasa. Sese aipo ehi: “Que mborerecur guasu povri pendar ovava-vavase oyeupe oyeamotar̄hisave yuvireco, ahese evocoi mborerecur p̄iratasa ocañi t̄eira. Iyavei que tecua pendar, anise, que ava omu rese ovavase oyeupe, oyoya oyemocañi t̄eira yuvireco. ²⁶ Ëgüe ehi avei carugar. Esepia, serecur omboyepepise opovri pendar, ovavara oyeupe yuvireco viña. Evocoyase ahe oyemocañi t̄eira yuvireco. ²⁷ Iyavei pe, ‘Beelzebú p̄iratasa pipe sui t̄ei omboyepepi carugar ava sui’ peye t̄ei cheu. Evocoyase, ¿ava p̄iratasa pipe vo pe voya eta omboyepepi carugar ava sui yuvireco? Tũpa p̄iratasa p̄ipese, che avei evocoyase ayapo evocoi nungar ip̄iratasa pipe. Pe voya ae omboyecua pe ñehe pe rembiavi yuvireco p̄eu. ²⁸ Che rumo Tũpa Espiritu p̄iratasa pipe amboyepepi carugar ava sui. Sese c̄uritei pesepia ité Tũpa mborerecuasa.

²⁹ “Iyavei no, que ava oi que potase ambuae ava ip̄irata etepri vahe r̄etave imbahe rerocua ãgua ichui viña, yip̄indar opa rane itera oñap̄ichi-p̄ichi. Ipare voi opara virocua imbahe ichui.

³⁰ “Iyavei acoi ava ndache mboyoyai vahe, ahe che amotar̄himbar yuvirecoi; acoi ava ndosecai vahe ava cheu nara, ahe omosai t̄ei yuvireco che sui.

³¹ “Sese ava upe oimera ñeroisa opacatu angaipa rese iyavei iñehe mara-mara t̄ei vahe upe avei. Co catu acoi iñehe-ñehe t̄ei vahe Tũpa Espiritu upe, ahe chupe ndipoi chietera ñeroisa. ³² Iyavei acoi ava oñehe-ñehe t̄ei vahe che, Ava Riquehir rese, ahe chupe oimeño

ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviye; nderemoatiro tupriise ivira, ahe evocoyase virecora oha naporai vahe. Esepia, ivira icuasa iha rese. ³⁴ ¡Evocoyase pe, mboi nungar tēi peico vahe, pe recocuer naporaise, ndapeicatui chira mbahe aviye vahe rese pe ñehe āgua! Esepia, pe pīha pipe sui tēi osē pe ñehe āgua. ³⁵ Iyavei acoi ava aviye vahe oñehe tupri opīhañemoñeta catuprisa pipe; acoi ava recocuer naporai vahe rumo, opīhañemoñeta raisa pipe tēi oñehe. ³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyevi iñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás secoi mbosapi ari pira guasu aviterve aracahe, ēgüe ehi aveira Ava Riquehir mbosapi ari ivivrive tura omano vahe pāhuve. ⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe. Cūrtei rumo oime Jonás sui aviye catu vahe pe pāhuve. ⁴² Iyavei ari cañi pipe cuña mborerecuar guasu irohi coti secua vahe porandusave, omombehura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrtei rumo oime ivate catu vahe Salomón sui —ehi fariseo eta upe.

Carugar oyevi iri ava güeco agüerve

⁴³ “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipīhañemoñeta, ⁴⁴ Ayevi irira che reco agüerve vicho’ ehi. Aheve oyevisse, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pīha pipe. Sese mbahe tēi catu ité secocuer yipindar güeco agüer sui. Égüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe vitesese ava upe, ahese ichi, tivireta reseve ocarve yuvinochai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñehe pota yuvireco ndeu —ehi.

⁴⁸ Ahe rumo,

—¿Ava pīha che si; ava pīha che rivri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, oguapi ipa popive oī. ² Aheve ava oñemonuha atise yuvireco, oha carite pipe oguapi oī, evocoyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepei mbia osẽ omaheti oico. ⁴ Ahe otiapi-apiise mbahe rãhii oso, moviro oiti peri rupi. Vĩrai ogüeyise rumo sese, opaño yuvirohu. ⁵ Iyavei moviro oiti ivi nayanai vahesave ita pãhuve. Sese cūrteimi sorĩ; ⁶ arĩ tasise rumo, opaño ipiru. Esepia, ndasapoi niha. ⁷ Iyavei ambuae mbahe rãhii oiti yu pãhuve. Ahe yu rumo sorĩ poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setá iha imonuhasa; ñepei ihi sui osẽ cién iha, ambuae sui osẽ sesenta, ambuae sui treinta. ⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pãha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu ãgua chupe: “¿Mahera vo eremboyoya-yoya mbahe rese nde porombohesa ava upe yepi?” ehi. ¹¹ Jesús aipo ehi: “Pẽu rumo Tũpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. ¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tẽi, ndosepiacuai rumo yuvireco iyavei osendu tẽi, ndosenducuai avei yuvireco no. ¹⁴ Na ehi yaviye Tũpa Ñehengagüer Isafas remimombehu:

‘Pe niha pesendu tẽira, ndapeicuai chira rumo; iyavei pesepia tẽira, ndapesepiacuai chira rumo.

¹⁵ Esepia, evocoi ava eta upe yavai eté ipãha pipe imbahe reroya ãgua, ndayapisai eté sendu potaẽhisave; ndoyemboesapisoi avei sepia potaẽhisave.

Esepia, ndosenducua potai opãha pipe yuvireco cheu oyevi potaẽhisave ombogüera ãgua’ ehi

Isafas aracahe.

¹⁶ “Pe rumo perorivete ité sepiacuase, pesenducuae avei no. ¹⁷ Supi eté setá Tũpa ñehe mombehugar iyavei ava seco catupri vahe aracahendar osepia pota tẽi mbahe pe rembiepia, ahe rumo ndosepiai eté yuvireco; iyavei osendu pota tẽi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese. ¹⁹ Acoi osendu tẽi vahe Tũpa Ñehengagüer imborerecuasa resendar, ipare rumo ndosenducuai, ahe inungar acoi mbahe rãhii oviapi vahe peri rupi. Ipare rumo carugar ou chupe. Ahe ipãha pipe osendu vahe Tũpa Ñehengagüer opa tupriño omocañi ichui. ²⁰ Iyavei acoi mbahe rãhii seitipri ita pãhuve, ahe inungar ava recocuer yipriño osendu vahe, oipisi vahe avei vorivetesa pipe Tũpa Ñehengagüer. ²¹ Ipare rumo inungar co mbahe miti ndovirecoi vahe guapo oviracua ãgua, ãgüe ehi avei evocoi nungar ava oimese mbahe-mbahe tẽi Tũpa Ñehengagüer sui chupe, cūrteimi seroyaẽhisave oyepipi ichui. ²² Acoi mbahe rãhii seitipri yu pãhuve, ahe inungar ava osendu vahe Tũpa ñehe. Ipare rumo ahe ipãhañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tũpa Ñehengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itisa vahe mbahe rãhii ivi aviye vahe rese, ahe inungar ava osenducua vahe Tũpa Ñehengagüer. Iyavei inungar acoi co mbahe miti ihá iteanga vahe, ãgüe ehi avei ava secocuer aviye vahe inungar ñepei-pei sãhii sui osẽ que cien iha, sesenta iha, anise que treinta” ehi Jesús güemimbohe eta upe.

Trigo pãhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tũpa mborerecuasa oyoya tupri ava oivi pipe mbahe rãhii oñoti vahe rese. ²⁵ Opacatu ava queveve rumo oyepota yamotarẽhisar, caha tẽi rãhii oñoti trigo pãhuve oso. ²⁶ Acoi trigo iha potase, supive avei sorĩ caha. ²⁷ Evocoyase oporaviqui vahe yuvirasos, omombehu iyar upe aipo ehi yuvireco: ‘Ore rerecuar, ¿ndahei vo acoi mbahe rãhii aviye vahe ereñoti nde ivi pipe? ¿Que sui ru caha sorĩ ipãhuve?’ ehi yuvireco chupe. ²⁸ Iyar rumo aipo ehi

chupe: ‘Oime revo que che amotarêhisar’ ehi. Evocoyase oporaviqui vahe oporandu yuvireco chupe: ‘¿Ndiyai pîha caha têi orosapohopara ichui viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiêtera trigo’ ehi. ³⁰ ‘Evocoyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha têi rane rerocua âgua imboapuha uca sapi. Ipare oyapocatura trigo rãhii che mbahe apocatusave yuvireco’ ehi ivi yar” ehi Jesús.

Yembohesa mostaza rãhii suindar

³¹ Jesús omombehu iri co ambuae mbahe rese yembohesa oyoya vahe: “Tüpa povri pendar oyoya tupri mostaza rãhii rese. Ahe mbia oñoti vahe oivi pipe. ³² Supi eté co mostaza rãhii tahimi catu opacatu ambuae mbahe rãhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sãca rese vîrai rehii oyapo guaitirã” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tüpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo âgua yepi” ehi oporombohe.

Jesús oiporu oporombohe âgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tüpa ñehe mombehúsar rembicuachiagüer aviye âgua: “Che añehese, amboyoyara che porombohesa ambuae mbahe rese. Iyavei amombehura Tüpa ivi apo suive mbahe niporêhii vahe” ehi.

Jesús omombehu tupri oporombohesa caha têi resendar

³⁶ Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pâhuve caha oime vahe resendar yandeu’ oya. ³⁷ Evocoyase omboyevi chupe: “Acoi ava mbahe rãhii aviye vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rãhii aviye vahe, ahe ava Tüpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarêhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tüpa rembiguai íva pendar yuvireco. ⁴⁰ Iyavei inungar acoi caha têi imonuhapri sapi âgua, êgüe ehi aveira ari cañi pipe coiye. ⁴¹ Evocoyase che, Ava Riquehir, che rembiguai íva pendar amondora opacatu ava ambuae omboangaipa uca vahe, mbahe-mbahe têi aposar avei rerocua âgua che povrive yuvirecoi vahe pâhu sui. ⁴² Ichui omondopara tata guasuve. Aheve oyaseho tẽira iyavei ombotere-tere tẽira guã yuvireco. ⁴³ Aheseve voi ava Tüpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴ “Evocoyase Tüpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tẽi oyosura viña. Ahe rumo aheve avei oñomi. Ipare vorivetesá pipe opacatu ombahe omondopa co ivi rerocua âgua mbahe sepirusu vahe pota raisa pipe” ehi.

Mbohír sepirusu catu vahe sui yembohesa

⁴⁵ “Iyavei Tüpa mborerecuasa inungar ava mbahe rerocuasar oseca vahe mbohír icatupri vahe yepi. ⁴⁶ Ahe oyosuse mbohír sepi catu vahe, oso opacatu ombahe mondo co sepi catu vahe rerocua âgua.

Pira mbohasa sui yembohesa

⁴⁷ “Iyavei Tüpa mborerecuasa inungar pira mbohasa. Imondopri ipive. Ipare omboha opacatu-catu tẽi pira. ⁴⁸ Acoi savapipose pira mbohasa, vinose ivi âtasave yuvireco.

Aheve oiporavo pira aviye vahe oñoñapa ombahe riruve yuvinoi, naporai vahe rumo opaño omombo yuvireco. ⁴⁹ Ëgüe ehi aveira ari cañi pipe: ahese Tüpa rembiguai iva pendar yuvinosera opacatu ava ndaseco pōrai vahe mboyepepi āgua ava seco catupri vahe sui. ⁵⁰ Evocoyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborere-cuasa rese, ahe inungar ava oi yar vīnose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñhe pare, Jesús osē ichui ⁵⁴ oyepota güecuave oso. Aheve ombohe ava judío tūparo pipe oico. Evocoyase ahe pendar ava oyepihamondii tēi:

—¿Que pīha co ava oyembohe catu ombahecua āgua? iyavei, ¿mara ehi pīha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahir tēi? Ichi niha acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pāhuve. Evocoyase, ¿que pīha oyembohera viña? —ehi tēi yuvireco chupe.

⁵⁷ Ipīpe sui ndoviroyai yuvireco. Ahe rumo aipo ehi chupe:

—Tüpa ñehe mombehusar niha omboetei opacatu rupi yuvireco yepi. Secua pīpendar, sēta pīpendar ae rumo nombotei yuvireco —ehi.

⁵⁸ Evocoyase, ahe ava viroyaēhisa rese, moviro tēi oyapo mbahe poromondiisa ipāhuve.

14

Juan Oporoāpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerācua.

² Evocoyase aipo ehi opītivīisar upe: “Juan Oporoāpiramo vahe revo ocuerayevi. Sese oyapo poromondiisa ipīrata vahe” ehi.

³ Esepia niha, yipīndar Herodes Juan oipisi, oñapichi carena pipe soquenda āgua vivri Felipe rembireco Herodías sui tēi, ⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tüpa ñehe mombehusar secoi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté. ⁷ Sese ahe oyemoingatu ñepepe reseve que mbahe oyeupe oporanduse imondo āgua chupe. ⁸ Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoāpiramo vahe āca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Ani” ohe āgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan āca hasia āgua soquendasave. ¹¹ Ipare vīraso poratu pipe cuñatai upe yuvireco. Evocoyase ahe omondo osi upe.

¹² Ahese Juan remimbohe oyepota yugüeru, vīraso sete ñoti yuvireco. Ipare yuvīraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvīnose voi güecua sui, ivi rupi yuvīraso osupiti secosave yuvireco.

¹⁴ Evocoyase osêse carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri. ¹⁵ Evocoyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶ —Aní, ndiyai yuviraso. Pe pemondora mbahe semihura yuvireco —ehiño chupe.

¹⁷ —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihi harive” ehi. Evocoyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoyase omboyaho-yaho ava eta upe semihura yuvireco. ²⁰ Evocoyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. ²¹ Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús uguata i hari rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³ “Aviye” ohe pare ava upe, oyeupi oso ahe ae ivitri rese oyeroqui água. Pĩtuse chupe, opitaño aheve. ²⁴ Aheseve carite oso pucuse ipa popi sui, ivitu ipĩrata vahe osovaiichi yuvireco. Sese ohitu vahe nambegüe-mbegüei ocua sese. ²⁵ Cõhe potase, uguata i hari rupi oso güemimbohe coti. ²⁶ Semimbohe i hari rupi iguatase, oyembosiquiye yuvireco ichui. Sese,

—¿Ndahei vo evocoi hãgüer secoi! —ehi yuvireco chupe.

²⁷ Güemimbohe upe rumo aipo ehi:

—¿Peyemoviracuaño, che tēi! ¿Pesiquireme che sui! —ehi.

²⁸ —Che Yar —ehi Pedro—. Nde ité ereicose, taguata i hari rupi vicho nde piri —ehi.

²⁹ —Erio ru —ehi chupe.

Evocoyase Pedro ogüeyi carite pipe sui, uguata i hari rupi. Osora ipiri viña. ³⁰ Ivitu pĩrata repiase rumo, osiquiye ichui. Oso senise rumo ipive,

—¿Che Yar! ¿Che pĩsiromi eve! —ehi.

³¹ Ahese cūrteimi voi oipisi Pedro po rese, aipo ehi chupe:

—¿Chĩhi tēi ereyeroya che rese! ¿Mahera ndereyeroya tuprii che rese! —ehi.

³² Oyuvirohase rumo carite pipe, opituhu voi ivitu. ³³ Evocoyase carite pipe yuvirecoi vahe oñenopiha sovai,

—¿Supi eté catu nde Tũpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso. ³⁵ Opacatu ahe pendar ava oicuaese Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, ³⁶ aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramo aracahendar aracuasa rupi yuvireco? ¿Mahera vo yande porocuita mboaviyeẽhisa pipe ndoyepoi ocaru água yuvireco yepi? —ehi.

³ Jesús omboyeví aipo ehi chupe:

—Pe no, ¡mahera ndapemboyeroyai Tūpa porocuaita pe ramoí aracahendar aracuasa rupi tēi pe guata āgua! ⁴ Esepia, Tūpa aipo ehi: “Pemboyeroyara iyavei peipītivīira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua pēu. Esepia, che opacatu mbahe areco vahe imondopri Tūpa upe’ ehise, ⁶ ahese ndiyai eté ipītivīi āgua chupe” peye. Ēgüe peye pe aracua raisa pipe pemocañi Tūpa porocuaita peyesui. ⁷ ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuaita tēi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ēgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oique vahe oso yaviterve, ipare osē setecuer sui? ¹⁸ Ava pihanemoñetasa sui osē vahe rumo iyuru rupi, ahe ava omboangaipa. ¹⁹ Esepia, ava pihanemoñetasa sui osē pihanemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa. ²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

Cuña ndahei vahe judía viroya Jesús

²¹ Ichui osē Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraísuerecomi eve! ¡Che membri vireco carugar oyese! —ehi pucu-pucu ou chupe.

²³ Ahe rumo nomboyevīi eté chupe. Evocoyase semimbohe oyemboya yuvireco sese aipo ehi:

—Emboyepēi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoyase aipo ehi güemimbohe upe:

—Che Ru Tūpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

²⁵ Ahe cuña rumo oñenopiha sovai, aipo ehi chupe:

—¡Che Yar, che pītivīimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi. Aipo ihe ramoseve, ocuera voi eté imembri.

Jesús setá ombogüera ava imbaheasi vahe

²⁹ Ichui Jesús osë oso ipa Galilea ivii. Ipare oyeupi ivitri rese oguapi oĩ. ³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoi vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe oñehe; ipãri-pãri vahe ocuera tupri; ndoguatai vahe oguata avei iyavei ndasesapisoi vahe osareco yuvireco. Sepiase ava rehii oyepihamondii aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

³² Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sëtave sie porëhi reseve amondo. Aviyeteramo oviroviapi-api tiëtera tieporëhi peri rupi yuvireco viña —ehi.

³³ Evocoyase semimbohe aipo ehi yuvireco chupe:

—¿Que sui pïha orosecara tembihu ava rehii upe nara cohava ava porëhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tõi pirami —ehi semimbohe yuvireco chupe.

³⁵ Evocoyase, “Peguapi ivi harive” ehi ava rehii upe. ³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoyase omondopa ava rehii upe yuvireco. ³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chihivahe retacuer rumo ndicuasai. ³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha ãgua yuvireco viña. “Emoporëhi Tüpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pïrá iteanga’; ³ iyavei añihivei: ‘Co pipe ari naporai chira. Esepia, iva rese pïra vai anga, pïtu guasu-guasú avei’ peye. Pe niha peicua mbahe iva resendar tõi oyecua vahe mombehu; ndapeicuai rumo mara oyapave co poromondiisa cūriteindar ava upe imombehu. ⁴ Co ava ndaseco pōrai vahe oyepepi vahe Tüpa sui oporandu poromondiisa rese ‘¿Tüpa suindar ité pïha?’ oyapave. Che rumo namboyecuai chira ambuae poromondiisa chupe; acoi poromondiisa Tüpa oyapo Jonás upe güeraño tupri asevara chupe” ehi.

Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵ Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tõi oyeupe yuvireco.

⁸ Ahe rumo oicua güemimbohe pïhañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! ⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rutei pe aipo senducuaëhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñehe, Jesús rumo oñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava oñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoãpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tūparoguã. Ñepi yepe manosa ndosecoreroyii chietera opĩratasa pipe. ¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ãgüe ehi aveira ivave; iyavei, “Aní” erese que mbahe uve co ivi pipe, ãgüe ehi aveira ivave —ehi.

²⁰ Ipare Jesús aipo ehi güemimbohe upe: “‘Co Tūpa Rembiporavo Poropĩsĩrosar’ peye eme ava upe cheu” ehi.

Jesús omombehu omano ãgua

²¹ Ichuive tupri Jesús omboipi imombehu güemimbohe upe oico: “Iya niha cheu che so ãgua tecua guasu Jerusalén ve. Aheve judío rerecuar, pahĩ rerecuar ivate catu vahe iyavei Moisés porocuaite rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi.

²² Pedro rumo viraso co cotimi chupe oñehengata ãgua:

—¡Tūpa ndoipotai eté evocoi nungar nde reco ãgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi uguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosira viña, toyemoingatu voi che recocuer rese oparaisu ãgua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisĩrora. ²⁶ Esepia, ¿aviye ai angahu piha ava upe opacatu mbahe co ivi pipendar pisi ãgua, ahe ae tēi omocañise güecocuer yuvireco viña? ¿Mbovi piha omondora ava güecocuer repirã viña?

²⁷ Esepia che, Ava Riquehir, ayevira che Ru reco pĩratasa pipe che rembiguai iva pendar reseve curi. Che evocoyase aicuara ñepi-pe iva rembiapo agüer rupi chupe. ²⁸ Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaaro güemimbohe rovai. Evocoyase sendi sova inungar ari, iturucuar morochí, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, ¡aviye ai eté cohava yaico! Ereipotase, ayapora mbosapi teyupami: ñepeu ndeu nara, ambuae Moisés upe, ambuae evocoyase Elías upe nara —ehi.

⁵ Aviyeteramo tēi iva quiha rese osesapé ogüeyi ou oyopipa tupri ité. Ipāhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapemombehui chietera que ñepeu ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyevi güemimbohe upe aipo ehi:

—Elías rane ité niha oura opacatu mbahe moingatu āgua curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ēgüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Ēgüe ehi Jesús oñehe Juan Oporoāpiramo vahe rese.

Jesús omboqüera chíhivahe carugar rerecosar

¹⁴ Viroyepota Jesús güemimbohe ava rehíisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mbovi rupi rutei vo aico vitera pe pāhuve che ñemosasa pipe! Peru evocoi chíhivahe cheu —ehi.

¹⁸ Ahese oñehe pírata carugar upe chíhivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera piha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tūpa rese. Supi eté sese pe yeroyasa, yepe ndoyavii chira mostaza rāhii tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano āgua

²² Jesús oguata vitesese Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarēhimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuvirasó Pedro upe, oporandu yuvireco chupe:

—¿Supi eté pe rerecurar ndomondo guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerrecuar guasu co ivi pipe yepi? ¿Omu sui pīha, ambuae ava sui tie? —ehi.

²⁶ Pedro evocoyase omboeyevi chupe:

—Ambuae ava sui —ehi.

—¡Taa! —ehi—. Evocoyase mborerrecuar povri pendar nomboepii chira yuvireco —ehi—. ²⁷ Guarepochi rerocuasar moñemoñeroēhi āgua rumo, eresora ipa pipe, epirapoi. Acoi yipendar pira erenose vahe, ahe iyuru pipe ereyosura ñepei guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tūpa mborerrecuasa pipendar? —ehi.

² Evocoyase Jesús: “Erio” ehi ñepei chíhivahemi upe, omondo güemimbohe pāhuve imoha, ³ aipo ehi:

—Supi eté, acoi ndapeñecuñaroise iyavei ndapeicoise chíhivahemi nungar, ahese ndapeiquei chira Tūpa mborerrecuasa pipe. ⁴ Acoi oñemomini vahe rumo inungar co chíhivahemi, evocoi nungar seco ivate catura Tūpa mborerrecuasave. ⁵ Acoi ava oipisi vahe co chíhivahemi nungar che rer pipe seroco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chíhivahemi nungar che reroyasar, iyacatu evocoi nungar ava ñapichisa ita guasu iyessiho rese para guasu pipe imombo āgua. ⁷ ¡Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepia, aviye catu peiquera tecove apirēhisave ñepei pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroñroi rene que ñepei chíhivahemi che reroyasar. Esepia, ivave sembiguai che Ru pirindar ité yuvirecoi yepi” ehi. ¹¹ “Che niha, Ava Riquehir, ayu ava ocañi tēi vahe pĩsiro āgua.

¹² “¿Mara ehi pe pi have? Acoi virecose mbia cien tupri ovesa güeimba, ipare rumo ocañira ñepei ichui viña, evocoyase oseya ranera noventa y nueve tēi vahe ovesa ivitri rese. Oyevíra ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ēgüe ehi avei che Ru ivave secoi vahe, ndoipotai eté que ñepei ava che reroyasar chíhivahemi nungar cañi āgua” ehi.

Porombohesa yande ñero āgua rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepei, anise ñuvirío ava upe nde pĩtivii āgua rese. Ahe avei tosendu pe ñehe. Ahese oimera que ñuvirío, anise mbosapi

sendusar. ¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tüpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; ēgüe ehi aveira ivave. Iyavei co ivi pipe, ‘Aní’ peyese que mbahe upe, ēgüe ehi aveira ivave.

¹⁹ “Iyavei co amombehu potami avei pēu: Acoi ñuvirío co ivi pipe pe pīhañemoñetasa oyoya tuprise que mbahe rese peporandu āgua pe yeruresa pipe, evocoyase che Ru iva pendar omondora pe porandusa pēu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipāhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi cheu oyapose? ¿Siete yupagüer rupi pīha? —ehi.

²² —¡Aní! —ehi—. ¿Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tüpa mborerecuasa inungar mborerecuar guasu omoingatu pota vahe güembiguai revesa chupe. ²⁴ Evocoyase omboipi imoingatu āgua, ahese ipñiviisar güeru ireve ati catu vahe guarepochi rese chupe. ²⁵ Ahe rumo ndovirecoi imboepi āgua. Sese co mborerecuar oyocuai opñiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa āgua cheu’ ehi. ²⁶ Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepiase rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. ³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

³⁵ “Indó, evocoyase ēgüe ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi āgua

¹ Ipare Jesús osē Galilea sui, oso Judea ivi rupi arí sēsa coti iai Jordán rovai. ² Ava rehii yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoāhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaime vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi āgua. Evocoyase ñuvirío yuvirecoira ñepepe avei nungar’ ehi. ⁶ Sese ndahe iri ñuvirío, ñepepe vahe ité yuvirecoira. Evocoyase ava Tüpa omomenda vahe oyese, ndiyai ava tēi omboyepipi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherã güembireco upe cuachiar poisa resendar opoi ãgua ichui? —ehi.

⁸—Pe poreroyaẽhisa pìpe niha Moisés ãgüe ehi pëu. Yìpisuive ité rumo Tũpa ndoipotai oyesui opoi ãgua yuvireco. ⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tẽi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tũpa ombou vahe sembiaporã, ahe güeraño osenducua yuvireco —ehi güemimbohe upe —. ¹² Esepia, oime pìhañemoñetasa ava mendaẽhi ãgua: amove ohasa suive ndatahii vahe, ambuae nomboahi ucai ava yuvireco, ambuae evocoyase nimendasei. Esepia, ahe oporaviqui pota Tũpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chĩhivahe

¹³ Ipare ahe pendar güeru moviro chĩhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tẽi chĩhivahe?” ehiño serusar upe yuvireco. ¹⁴ Jesús rumo aipo ehi:

—¿Mahera ndapeipotai iyu ãgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru povrive —ehi.

¹⁵ Ipare omondo opo chĩhivahe harive osovasa. Ichui osẽ oso.

Mbĩa chĩhivahe imbahe eta vahe omoñeta Jesús

¹⁶ Mbĩa chĩhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirẽhi vahe rereco ãgua? —ehi.

¹⁷ —¿Mahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirẽhi vahe, emboyeroa mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevi chupe:

—‘Ndereporoyucui chira, nandegasai chira, nandemondai chira, nanderemirai chiaveira ambuae ava rese, ¹⁹ eremboyeroa nde ru, nde si avei, eresaisura ambuae ava nde yeaisu nungar eico’ ehi icuachiapri pìpe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoyase ipane vite che ayapo vaherã? —ehi.

²¹ —Ereipotase mbahe tupri pìpe nde reco ãgua, emondopa rane nde mbahe; ahe sepri evocoyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbĩa oyepepiño ichui oviharẽhisave oso. Esepia, mbahe yar ité secoi.

²³ Evocoyase aipo ehi güemimbohe upe:

—Supi eté yavai eteanga imbahe eta vahe upe oique vaherã che Ru mborerecuasave.

²⁴ Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁵ Aipo ñehesa renduse, semimbohe oyepihamondii aipo ehi:

—¿Ava angahu pìha evocoyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tẽi upe yavai aipo nungar mbahe apo. Tũpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata āgua. ¿Mbahe evocoyase oimera oreu? —ehi.

²⁸ —Oime itera niha mbahe pēu. Esepia, acoi ari oyepotase opacatu mbahe recuñaro āgua, ahese che, Ava Riquehir, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi. ²⁹ Acoi opacatu ava oseya vahe güêta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirēhi vahe. ³⁰ Seta vai rumo cūrítei yipindar vahe, ipa tēira yuvirecoi; setá aveira cūrítei ipa tēi vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tūpa mborerecua inungar acoi ava ivi yar osē añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahese omoingatu oyeupe oporaviqui vaheñā upe ñepe ari mboraviqui repri imboepi āgua. Ahese opa omondo ocove imboporaviqui. ³ Ipare osē, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tuprira niha pēu’ ehi. Ahe evocoyase yuviraso oporaviqui āgua icove. ⁵ Ipare oso iri mbiter ari rupi oyeupe oporaviqui vahe reca, ēgüe ehi tupri avei caharuse, las tres rupi. ⁶ Ipa osē iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tēi ari momba cohava pehā?’ ⁷ ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. ⁸ “Pĩtu ramosé, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. ⁹ Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepe-peipei ñepe ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepe ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tēi vahe, ñepe horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañño tēi oroporaviqui ari momba sacucuer upe oroico’ ehi. ¹³ Cove yar rumo aipo ehi ñepe ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepe ari resendar ndeu acoi, Aviye, peye vahecuer rese cheu’ ehi. ¹⁴ ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ēgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaheñā yuvireco curi” ehi güemimbohe upe.

Jesús omombehu iri omano āgua

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe mara-mara tēi che rereco āgua che roerōrosa

pípe. Ipípe che yucara curusu rese yuvireco. Imombosapisa ari pípe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu água mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepeí nde mbahe rese pocosa coti, ambuae nde mbahe rese pocoñhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pñha co mbahe-mbahe tñi aiporara vaheñã, inungar-ra que igua iro vahe aihu vaheñã viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tñi. Co rumo ndiyai cheu, che piri opomboguapí água che mbahe rese pocosa coti, ambuae che mbahe rese pocoñhisa coti avei. Che Ru rumo omoingatu güembiporavo upe nara oguapí vaheñã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tüpa cuaparñhi oporocuai oporoyuca ai tñisa pípe, iyavei acoi ivate catu vahe oyeecoapirasá omborerecuasa pípe yepi. ²⁶ Pe rumo ãgüe ndapeyei chira peico. Iyacatu rumo acoi ava oipota vahe ivate catu güeco água pe pñhuve, ihañeco rane itera opacatu ambuae ava rese. ²⁷ Iyavei acoi pe pñhu pendar oipota vahe tenonde catu güeco água, ihañeco tupri ranera opacatu pe pñhu pendar rese. ²⁸ Esepia, che, Ava Riquehir, ayu ndahei ava che rese ihañeco água, che rumo ayu ava rese che hañeco água iyavei amano vaheñã ava eta repirã Carugar povri sui senose água —ehi.

Jesús ombogüera ñuvirío ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapisoi vahe oguapí yuvinoi. Evocoyase osenduse Jesús ocuase supi, osapucái pñrata yuvireco chupe aipo ehi:

—¿Ore Yar, mborerecuar guasu David suindar, ore paraisuerecomi tñi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pñrata catuño ité yuvireco aipo ehi:

—¿Ore Yar, David suindar, ore paraisuerecomi tñira eve viña! —ehi iriño ité yuvireco.

³² Evocoyase osendu iñehe, opñta, “Perio” ehi chupe. Ipare,

—¿Mbahe vo peipota ayapo vaheñã pñu? —ehi.

³³ —¿Ore Yar, ore mbosarecomi tñi eve! —ehi.

³⁴ Evocoyase saísusave opoco sesa rese. Ahe ramosave ndasesapisoi vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pípe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe ² aipo ehi chupe:

—Peso co tecuami yande rovaíndarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pñu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ãgüe ehi chupe aracahendar Tüpa ñehe mombehusar ñehengagüer mboaviye água, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pïpe pëu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuaise yuvireco. ⁷ Güeru guaricu imembri reseve yuvireco chupe. Omondo oturucuar icupeao ägua yuvireco. Ipare Jesús oyeupi iharive. ⁸ Iyavei ava rehii oipïpira oturucuar peri rupi imboetei guasusa pïpe. Ambuae evocoyase oyasia pindo omondo peri rupi yuvireco saperã. ⁹ Ava rehii senonde, saquicuei avei uguata vahe osapucái yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pïpe! ¡Ivave imboeteipri tasecoi! —ehi yuvireco.

¹⁰ Oiquese Jerusalén pïpe, opacatu co tecua pipendar oyepïhamondii yuvireco. Iyavei setá oporandu-randu yuvireco:

—¿Ava pïha co mbïa? —ehi tãii yuvireco.

¹¹ Ava rehii uguata vahe Jesús rupi aipo ehi yuvireco chupe:

—Co niha Jesús, Tüpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepïsar tûparo pïpe sui

¹² Ipare Jesús oi que judío tûparo guasu pïpe. Ipiendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pïpe aipo ehi: ‘Che rêta yeruresa rêtarã’ ehi. Pe rumo imonda rai vahe rêta nungar tãii pereco —ehi.

¹⁴ Aheve oyemboya Jesús rese yugüeru ava ndasesapïsoi vahe, ipãri-pãri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuita rese oporombohe vahe yuvireco mbahe ndayasepiai vahe sembiapo, iyavei tûparo pïpe osenduse chíhivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tãii vahe chíhivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pïpe: ‘Chíhivahemi, pïtanimi avei osapucaira nde mboeteisa pïpe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepepi pïtu oque.

Jesús omomara ivira higuera ndihai vahe oñehe pïpe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico. ¹⁹ Aheve peri popive osepiã ivira higuera. Ahe sese oyemboya oso ‘¿iha pïha?’ oya viña. So güeraño tãii rumo osepiã. Evocoyase ahe aipo ehi chupe:

—¡Co pïpe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pïha co cûriteimi opa voi ipiru! —orohe tãii chupe.

²¹ Ahese omboyevi oreu:

—Acoi peyeroyase ité Tüpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pïpe’ peyese, ahe evocoyase osiriño itera.

²² Indó, acoi peyerurese mbahe pe porandusa rese Tüpa rese pe yeroyasa pïpe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tûparo guasu pïpe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pïpe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pëu. Pemboyevise che porandusa, ahese che avei amombehura ava porocuita rupi eté pïha ayapo co mbahe vichico. ²⁵ ¿Ava vo Juan ombou ava äpiramo ägua? ¿Tüpa pïha, ava tãii tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tēi remimbou’ yahese rumo, avieteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pihañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerēhii!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui. ³⁰ Ipare oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoāpiramo vahe ou co tecocuer ihīvi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva rñavii āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembiguai oporaviqui vahe upe imboporandu āgua ‘taipisi uva pohopri cheundar cute’ oyapave viña. ³⁵ Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembiguai. Oporaviqui vahe rumo mara-mara tēiño avei vireco yuvireco.

³⁷ “Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸ Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. ³⁹ Evocoyase oipisi, vinose miti pāhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹ Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachipri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté’

ehi icuachiapri pipe. ⁴³ Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombahesa chupe. ⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osiquiyeño rumo ava rehii sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta.

³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. ⁵ Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave, ⁶ ambuae rumo oipisi sembiguai mara-mara tēi sereco āgua. Ahe ipipe oyuca yuvireco. ⁷ Evocoiyase mborerecuar guasu oñemoiro eteprisave omondo osundao eta co ava oporapichi vahe yuca uca āgua, iyavei secua rapipa āgua. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheñā cohava. ⁹ Sese peso opacatu ava guata catusa rupi, peñehe mendasave yugüeru vaheñā opacatu pe rovaichisar upe’ ehi. ¹⁰ Evocoiyase sembiguai eta yuvínosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ēgüe ehi ava savapipo tupri oi guasu mendasave yuvireco.

¹¹ “Evocoiyase acoi mborerecuar oique ava ichohopri repia. Ipare omahecua tupri ñepeí ava ipāhu pendar rese. Ahe rumo ndomondei turucuar mendasa resendar. ¹² Evocoiyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñeheño ité chupe. ¹³ Evocoiyase, ‘Peipisi co mbia, peñapichi ipi, ipo avei, pemose ocarve pītumimbisave. Aheve oyaseho tēira, sāitere-tere tēira mbaherasicuer rereco’ ehi ichohopri rese hañecosar upe. ¹⁴ Esepia, setá tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecōha iri tēi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua. ¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe: —Pomombohesar, ore orocua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pīhañemoñeta rupi ndereicoi vahe; nde pīhañemoñeta rumo ñepeí reseve erereco. ¹⁷ ¿Mara ehi nde pīhañemoñeta? ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pīhañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!

¹⁹ Pemboyecua ru ñepeí guarepochi mborerecuar guasu upendar cheu —ehi.

Evocoiyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoyase yuvínose yuviraso ichui.

Saduceo oporandu Jesús upe cuerayevisa rese secoãhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiēhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiēhiseve. Evocoyase tivri omenda sembirecocuer rese.

²⁶ Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pīhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa —ehi—. ³⁰ Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave —ehi—. ³¹ Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehi. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipare fariseo oyanduse yuvireco Jesús omonguiriripañoise saduceo oyesui, ahese oñemonuha yuvireco. ³⁵ Ñepeipãhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tūpa opacatu nde pīhañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui. ³⁹ Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío porocuita rupi oguata opacatu Moisés porocuita icuachiapri, opacatu Tūpa ñehe mombehusar rembicuachía avei —ehi.

¿Ava suindar pīha Poropĩsirosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepīhañemoñeta acoi Tūpa Rembiporavo ou vaheã ava pĩsiro ãgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pīha evocoyase David oñehese Espiritu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrive yuvireco’

ehi David aracahe. ⁴⁵ Evocoyase, ¿mahera ru: “Poropĩsirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoiyase ndoicatu iri imboyeve ãgua yuvireco cute. Ahe ari pipe sui ndipo iri que ñepe iquerẽhi vahe ñehe avi uca ãgua õnehe pipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² “Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. ³ Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tẽi mbahe viña, ipare rumo co coti tẽi mbahe oyapo yuvireco. ⁴ Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tẽi. Osiva rese, oyiva rese avei ipe guasu vahe vireco-reco tẽi oturucuar rese Tũpa Ñehengagũer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otũparo pipe yuvireco no. ⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pipendar tẽi upe. Esepia, ñepeño ité pe Ru pereco, ahe niha iva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepia, Poropĩsirosar güeraño ité pe rerecuar secoi. ¹¹ Acoi ava seco ivate catu vahe, ahe toporopĩtivii güeco mbegüesa pipe. ¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Pemombitaño ava Tũpa povrive seique rãgũer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rãgũer sui.

¹⁴ “¡Peparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tẽi vahe peico! Esepia, perocua-rocuano tẽi cuña imer mano vahecuer rẽta ichui, ipare peyeroqui tupri tẽi angahu ava rembiepiave. Sese peipisira Tũpa ñemoirosa ipĩrata catu vahe curi.

¹⁵ “¡Peparaisu catu itera pe Moisés porocuita rese oporombohe vahe, pe avei fariseo, pe guata tẽi angahu vahe Tũpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tẽi catu pe sui. Pe nungar caruguar ratave nara tẽi pereco uca.

¹⁶ “¡Peparaisu catu itera, pe ava mbohesar ndasesapisoi vahe nungar peico! Pe aipo peye tẽi vahe: ‘Yamombehuse mbahe tũparo rer pipe yande ñehe mboaviye ãgua, ãgüe yahe tẽi eté; co rumo yamombehuse mbahe oro tũparo pendar rer pipe, ahese iya itera yamboaviye yepi’ aipo peye tẽi. ¹⁷ ¡Pe ndapembahecua vahe nungar, ndasesapisoi vahe nungar avei peico! ¿Uma vo aviye catu vahe: oro pĩha, anise tũparo tie? Tũparo pipe niha oro rovasasa yepi. ¹⁸ Iyavei co uve avei aipo peye tẽi peico: ‘Yamombehuse mbahe seropovẽhepri renda rer pipe yande ñehe mboaviye ãgua, ãgüe yahe tẽi eté; co rumo mbahe yamombehuse mbahe seropovẽhepri renda hari pendar rer pipe yande ñehe mboaviye ãgua, ahese iya ité yamboaviyera yande ñehe yepi’ aipo peye tẽi. ¹⁹ ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovẽhepri pĩha, anise mbahe seropovẽhepri renda tie? Ahe tenda harive niha porerecosa sovasasa yepi. ²⁰ Sese acoi mbahe omombehu vahe mbahe seropovẽhepri renda rer pipe õnehe mboaviye ãgua, ndahei serer pipe güeraño, omombehu avei opacatu ihari pendar mbahe seropovẽhepri rer pipe, ²¹ iyavei acoi ava omombehu vahe

mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa seci. ²² Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité seci.

²³ “¡Peparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepe-pe diez pe remiti menta, anis, comino pereco vahe sui ñepe Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihīvi vahe, peporoparaisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoyase. Ēgüe peye co mborocuita upe.

²⁵ “¡Peparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ēgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷ “¡Peparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomochimbri tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸ Ēgüe peye: ava rembiepiave aviye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihīvi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoi recose, ndayaiptivii chietera Tūpa ñehe mombehusar yuca āgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyeapi iriño evocoyase pe ramoi rembiapocuerai!

³³ “¡Pe mboi vai suindar tēi peico! Ndapesoyepe chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. ³⁵ Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ñivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. ³⁸ Sese seyapirā tēi peicora. ³⁹ Esepia, ndache repiai chira peye acoi, ‘¡Imboeteipri Yar remimbou tasecoi!’ peyese voi che repia irira peye” ehi Jesús ava eta upe.

¹ Ipare Jesús osẽ judío tũparo pĩpe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tũparo!” orohe. ² Ahe rumo:

—Supi eté amombehu pẽu: co opacatu pesepia vahe, ndipoi chietera que ñepei ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaheã ari cañi renonde

³ Ipare Jesús oso ivitri Olivo ve oguapĩ oĩ. Aheve ore güeraño tupri oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu ãgua iyavei ari cañi ãgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tũpa remimbou ava pĩsiro ãgua’ ehi tẽira ava eta mbopa yuvireco. ⁶ Iyavei pesendura ñehesa vavasa resendar cohava iyavei que rupi. Ndapeyembosiquiyei chira rumo ichui. Esepia, ãgüe ehi rane itera niha; ndehi vitei chira rumo ari cañisa. ⁷ Esepia, ñepei ivi pĩpendar ovavara ambuae ivi pĩpendar rese oyeupe yuvireco. Ahese oimera tiavor, ivi rirĩi opacatu-catu tẽi tecua rupi. ⁸ Opacatu evocoi mbahe rumo omboipĩ ramomi vahe mbahe tẽi porarasa.

⁹ “Ahese pe pĩsira yuvireco mara-mara tẽi pe rereco ãgua, pe yuca ãgua avei. Iyavei opacatu ava-ava tẽi ndape ambotai chira che recocuer sui tẽi yuvireco. ¹⁰ Ahe ari rupi evocoyase setá ava ndache reroya iri chira yuvireco. Ahe oyeamotarẽhira iyavei omondora ambuae omboetasagüer yamotarẽhimbar povrive yuvireco. ¹¹ Iyavei setá Tũpa ñehese mombehusar angahu tẽi oimera, ahe ava ombopa-mbopa tẽira yuvireco. ¹² Ombouvicha catura mbahe-mbahe tẽi naporai vahe. Ipipe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo ari ipa vahe rupi, ipĩsiropri yuvirecoira. ¹⁴ Iyavei co ñehesa icatupri vahe Tũpa mborerecuasa resendar imombehusapa ranera opacatu ivi rupi icua uca ãgua. Ahese ramo oimera cañisa co ivi pĩpe” ehi oreu.

¹⁵ “Tũpa ñehese mombehusar Daniel oicuachía mbahe-mbahe tẽi aposa resendar oime vaheã tũparo guasu maranehi vahe pĩpe aracahe. Ahe pesepiase oĩ maranehi pĩpe —acoi oyeroqui vahe, ahe tosenducua tupri yuvireco—, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güeta harive yuvirecoi vahe ogüeyise, toique iri eme güetave ombahe reca; ¹⁸ iyavei acoi que rupi tẽi yuvirecoi vahe, toyevi iri eme güetave que oyeaosa renose ãgua yuvireco. ¹⁹ ¡Iparaisu itera cuña ipuruha vahe, imembi pĩtani vahe avei yuvireco! ²⁰ Peporandu Tũpa upe pe recua pĩpe sui pe sãhi ãgua irohi pĩpe, mbituhusa ari pĩpe avei. ²¹ Esepia, ahe ari pĩpe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhise Tũpa co ari naporai vahe, ndipoi chietera ava oñepĩsiro vahe yuvireco viña. Ahe rumo güembiporavo raisusa pĩpe omombituhura” ehi.

²³ “Iyavei que ava, ‘Esepia co Poropĩsirosar secoi’; anise, ‘Peve secoi’ ehise yuvireco pẽu, aní chira peroya aipo ehi vahe. ²⁴ Esepia, yugüerura ava ‘che Poropĩsirosar aico’ ehi tẽi vahe iyavei ‘che amombehu vahe Tũpa Ñehengagüer’ ehi angahu tẽi vahe; iyavei oyapora mbahe ava ndoyapoi vahe poromondiisa güeco pĩratasa mboyecua ãgua yuvireco. Ipipe osecoãhara Tũpa rembiporavo imbopa ãgua yuvireco. ²⁵ Opa aipo co senondeve amombehu pẽu. ²⁶ Sese que ava pẽu: ‘Pesepia pe ivi iporupirẽhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pĩpe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua iva rese, ãgüe ahera che, Ava Riquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha atĩ yuvireco yepi” ehi güemimbohe eta upe.

Jesús yevi ãgua resendar

²⁹ “Ahe ari pipe mbahe-mbahe tēi pare cūrteimi ndoyecua iri chira ari, yasi avei ndosesape iri chira, yasitata avei opara oviapi i va sui iyavei i va resendar mbahe oririira yuvireco. ³⁰ Ahese oimera i va rese iporēhi vahe che, Ava Riquehir, yu āgua resendar. Evocoyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise i va quiha rese che pīratasa rendigüer porañetesa pipe. ³¹ Iyavei amboura che rembiguai eta i va pendar. Ahe evocoyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

³² “Peyembohera ivira higuera recocuer sui: Co ivira soqui ramosa, yaicua cōimi ari sacu vahe yepota āgua yandeu yepi. ³³ Na ehi aveira pēu che ñehe rupi tupri mbahe pesepiase, sese peicuara cōimi eté che yevi āgua. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñehengagüer rumo imboaviyesa rane itera.

³⁶ “Ndipoi eté rumo ava oicua vahe ari iyavei hora che yevi āgua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ēgüe ehi tupri aveira che, Ava Riquehir, yevi āgua renonde. ³⁸ Yipive amarusu renonde, ahese ava ocaru, oiñu; guahir, guayri avei omomendaño yuvireco. Noé arca pipe seiquese, ēgüe ehi vite yuvireco. ³⁹ Nomohai eté rumo amarusu viapi āgua yuvireco oyeupe viña, ēgüe ehi rumo aviyeteramo tēi amar oviapi imocañipa. ēgüe ahe aveira che, Ava Riquehir, ayeve aviyeteramo tēi. ⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara. ⁴¹ ēgüe ehi aveira ñuvirío cuña ohicho vahe upe: ñepe serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayeveira i va sui. ⁴³ Iyavei peyapisaca tupri co rese: inungar acoi oi yar oicuase revo que hora pītu pipe imonda vahe yepota āgua, ahese imahemohara sese güēta pipe seiqueēhi āgua viña. ⁴⁴ ēgüe peye aveira peyemoingatu che yevi āgua rese. Esepia niha, che, Ava Riquehir, aporoesapiha tēira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güēta pipendar rese hañeco āgua ‘tembihi tomondo che rēta pipendar upe che porocuaita rupi’ ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaira opacatu ombahe rese hañeco āgua. ⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya, ⁴⁹ omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oiñu tēi āgua. ⁵⁰ Ipare rumo serecuar oyepotara imahemohaēhiseve. ⁵¹ Ahese omobaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

25

Diez cuñatai ndaseco marai vahe resendar ñehesa

¹ “Evocoi ari pipe Tūpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi āgua yuvireco. ² Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui. ⁶ Pītu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesē ipisi āgua cute!’ ehi. ⁷ Evocoyase opacatu evocoi cuñatai oñarapuha voi iyavei omoingatu guataendi

yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chíhi pe yandi oreu. Esepia, ogüe pota ité ore rataendi’ ehi tēi yuvireco. ⁹ ‘Aní, ndiyai chira revo oromondo vaherã pēu. Iyacatu revo peso imboepisave serocua peyeupe nara’ ehi. ¹⁰ Imboepi yuviraso vitesave, ou cuña mevi cute. Oyemoingatu vahe rumo yuviroique supi mendasave. Evocoyase saquícuerive voi omboya oquenda rãrosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondosea resendar

¹⁴ “Iyavei Tūpa omborerecuasave inungar-ra ava mbahe yar oso ãgua renonde ivi amombrisave omonuha güembigui oguarepochi rãro ãgua viña. ¹⁵ Yipindar ñepepe upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepepepepe upe seco etegüer rupi-rupi. Ipare voi oso cute. ¹⁶ Evocoyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coipe oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepepe guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coipe oyeve serecuar, ahese oñehe güembigui upe oguarepochi retacuer cua ãgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepírer tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe’ ehi chupe. ²⁶ ‘Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyeve catumi ãgua viña’ ehi. ²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboeta vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembiercomi ichui. ³⁰ Sese pemose co mbiguai ãgüe ehi tēi vahe ocarve pñtumimbisave. Aheve toyaseho, tasãitere tēi oñ’ ehira serecuar chupe” ehi Jesús oreu.

Jesús oura opacatu ava recocuer rese porandu ãgua

³¹ “Che, Ava Riquehir, ayeve, opacatu che Ru rembigui iva pendar reseve che reco ivategüer pipe, ahese aguapira che renda porañete vahesave ava recocuer rese porandu ãgua. ³² Evocoyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoyase ovesa aipehara mbahe rese che pocosa coti, cavara mbahe rese che pocoñhisa coti. ³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise,

pe evocoyase pembou mbahe che remihura; iyavei che huseise, pe evocoyase pembou taihu; che aguata tēise pe recua rupi vichico, pe avei oi pembou che que āgua. ³⁶ Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no' ehi. ³⁷ Evocoyase evocoi seco catupri vahe aipo ehira yuvireco cheu: 'Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarā, ore aipo evocoyase oromondo ndeu? ³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰ Evocoyase che, mborerecuar ivate vahe, amboyevara yuvireco chupe aipo ahera: 'Supi eté, opacatu mbahe peyapose que ñepei seco mbegüemi vahe che reroyasar pāhu pendar upe viña, cheu rumo ēgüe peye' ahera.

⁴¹ "Ahesa aipo ahera cute che mbahe rese pocoēhisa cotindar upe: 'Pesiri che sui. Esepia, pe peico Tūpa ñemoirosavri pendar. Pesopa tata guasu apirēhisave, evocoi imoingatupri opacatu carugar upe nara serecuar reseve. ⁴² Esepia, ndacheriepoise, pe evocoyase: Yamondomi icaru āgua, ndapeyei eté cheu; che huseise, ahesa, Yamondomi toihu, ndapeyei avei cheu; ⁴³ ambuae tecua pipe aguata tēise vichico, ahesa, Eique che rētave che piri, ndapeyei eté cheu. Ipanese che turucuarā, pe rumo ndapemboui cheu, chembaheasise vichico, iyavei che roquendasave, Yasomi tēi sepia, ndapeyei eté cheu' ahera. ⁴⁴ 'Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarā ndeu no, nembahesise, anise nde roquendasave, marase vo mbahe rese nande p̄tiviisai?' ehi tēira yuvireco cheu. ⁴⁵ 'Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté' ahera. ⁴⁶ Ahe ava yuvirasora Tūpa ñemoirosa apirēhi vahesave. Seco ŷvi vahe rumo teco ori opaēhisave yuvirasora" ehi Jesús oreu.

26

Jesús yamotarēhimbar omboguai yuca āgua yuvireco

¹ Ipare Jesús aipo ehi oreu:

² —Pe peicua ñuvirío ari tēi ipane vite co Pascua pieta yepota āgua yandeu. Ahesa che, Ava Riquehir, imondopri aicora che atica āgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rētave. ⁴ Aheve oñemoñeta: 'Yambopa ipisi yuca āgua' ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondii guasuēhi āgua yandeu —ehi.

Cuña oipiyere Jesús āca rese mbahe s̄iacuá vahe

⁶ Jesús tecua Betania ve secoi, Simón lepra vireco vahecuer rētave. ⁷ Aheve mesave chiniseve, cuña vireco vahe mbahe s̄iacuá vahe siru reseve viroyepota chupe. Ahe oipiyere Jesús āca rese. ⁸ Orosepiase rumo oroñemoiro aipo orohe oreyeupe:

—¿Mahera vo co omocañi tēi! ⁹ Omondo vahe ité tie co setá guarepochi rupi ava iparaisu vahe p̄tívii āgua viña —orohe tēi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¿Mahera vo co cuña pemañeco tēi! Esepia, co mbahe oyapo vahe aviye ité cheu.

¹¹ Ava iparaisu vahe niha yuvirecoiño itera pe pāhuve. Che rumo ēgüe ndahe viteñoi chira vichico pe pāhuve. ¹² Esepia, co cuña oipiyere mbahe s̄iacuá vahe che rese che t̄i āgua renondeve. ¹³ Supi eté aipo ahe p̄eu: co ñehesa p̄sirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas Iscariote oyemoingatu Jesús mondo āgua yamotarēhimbar povrive

¹⁴ Ipare ñepei ore pāhu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús pëu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo ãgua yamotarëhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rëtave aipo peyera chupe: ‘Ore Mbohesar aipo ehi: Cõimi che mano ãgua, sese ayapo potami sëtave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pïtu ramomise, opacatu oroguapi mesave Jesús piri ore caru ãgua. ²¹ Ore carusave aipo ehi oreu:

—Supi eté aipo ahe pëu: ñepei pe pãhu pendar che mondora che amotarëhisar upe —ehi.

²² —Che Yar, ¿che pïha? —orohe-rohe tëi ñepei-pei ore yacatu ore viharëhisa pipe chupe.

²³ —Omondo vahe opo che caro pipe, ahe che mondora che amotarëhisar upe —ehi—.

²⁴ Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosar! Aviye catura ndoyesuisse viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, ñnde ité niha ëgüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohimbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi igua rïru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehii angaipa rese ñero ãgua. ²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “Ndaicuai vahe ité aipo mbia” erera cheu” ehi Pedro upe

³⁰ Ore sapucaire, oroso ivitri Olivo ve. ³¹ Evocoyase Jesús aipo ehi oreu:

—Opara pemocañi che rese yeroyasa peyesui co pïtu pipe. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tëira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepëpii chietera nde sui —ehi chupe.

³⁴ —Che rumo supi eté aipo ahe ndeu: co pïtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tëi chupe.

Jesús oyerogui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohave; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirío Zebedeo rahir. Ahese oyandu oviharēhisa oico. ³⁸ Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohave iyavei pemahemohara pe yeroqui pipe che rese —ehi.

³⁹ Evocoyase oso tenonde catumi. Aheve oñenopiha ovapi ivi rese oyeroqui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che rãro ãgua que ñepei hora che mondugüe ãgua peye! ⁴¹ Pemahemoha, peyeroqui mbahe tēi pipe pe viapiēhi ãgua. Supi eté pequerēhi ité viña, pe retecuer tēi niha nipiratai pēu —ehi.

⁴² Ichui imoñuviriosa rupi oso iri oyeroqui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ Ipare oyevisé, osesapiha iri iquesese ou. Esepia, sopesii nomboyeroyai eté yuvireco. ⁴⁴ Evocoyase oseyapa iri oso oyeroqui ãgua imombosapisa rupi. Aipo ehi tupriño avei oyeroqui Vu upe. ⁴⁵ Ipare oyevi iri güemimbohe upe aipo ehi chupe no:

—¡Pequeño vite vo peyu! Osupiti che, Ava Riquehir, mondo ãgua ava yangaipa vahe povrive. ⁴⁶ Pepūha, yaso. Esepia, cōimi eté che amotarēhisar upe che mondo vaherã seci —ehi.

Jesús oipisi yuvireco

⁴⁷ Jesús ñehe viteseve, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuita rupi oyapo yuvireco. ⁴⁸ Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi.

⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe seci vahe supi vinose oquise pucu, oyaia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco.

⁵³ ¿Ndereicuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi ãgua viña? ⁵⁴ Ēgüe ehise rumo Tūpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi ãgua imonda rai vahe nungar che rereco peye. Che arí yacatu rupi aguapise pe pãhuve pe mbohe ãgua tūparo pipe, ndapeyapoi eté co nungar cheu. ⁵⁶ Co rumo opacatu Ēgüe peye Tūpa ñehe mombehusar rembicuachiagüer mboaviye ãgua cute —ehi ava rehii upe.

Ahese voi opacatu oroñemosai, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rētave yuvireco, ahe pahi rerecuar ivate catu vahe seci. Aheve oñemonuha Moisés porocuita rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive tēi osaquicue moña oso. Ēgüe ehi oyepota pahi rerecuar ivate catu vahe rēta rocar āchisave. Aheve oique ipipe, iyavei oguapi oĩ sundao pãhuve ‘¿mara ehi etera piha sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarēhisave yuca uca ãgua yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui

eté rumo mbahe sembiapo naporai vahe yuca uca âgua yuvireco. Aheseve yugüeru ñuvirío yamotarêhisar oporombopa-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tūparo monduru; aicatu aveira imopuha iri mbosapî ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevíi eté iñehe yuvireco chupe? ¿Mbahe ehi vo aipo nde amotarêhisar nde rese oñehe? —ehi.

⁶³ Noñehei eté rumo. Ahese,

—Che orocuai Tūpa supi eté vahe rer pîpe emombehu oreu: ¿Poropîsirosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato cotî, ayevisé avei iva quiha rese curi —ehi.

⁶⁵ Evocoyase pahi rerecuar ivate catu vahe imboasipave omondo oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanóño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tūpa remimbou Poropîsirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoyase oguapî sâro ocarve ñachimbri pîpe oî. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pārigüer rese nde cuasaño —ehi yuvireco.

⁷⁴ Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapî oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cōhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarêhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tūparo guasuve pahi eta rerecuar

yuvirecoi vahe upe iyavei judío rerecuareta upe treinta guarepochi mboyevi āgua aipo ehi:

⁴ —Che ayemboangaipa tiēte vichico. Esepia, amondoño tēi mbīa seco catupri vahe pēu yuca uca āgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirā repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua āgua ‘toime ava secua ambuae vahe rehōgüer tī āgua’ oyapave yuvireco.

⁸ Sese cūrítei co ivi upe, “Ava ruvi repri tēi” ehi yuvireco yepi. ⁹ Ēgüe ehi co imboaviye ité Tūpa ñehe mombehugar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbīa pisi āgua. ¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehugar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco. Nomboyevei eté rumo iñehe chupe oyeepi āgua.

¹³ Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevei eté rumo que ñepe angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepe ava soquendapri renose āgua Pascua pieta pipe ava rehii remimbotar rupi yepi. ¹⁶ Aheve oime soquendapri mbīa icuapri vahe ité Barrabás serer vahe; ¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pīha, anise Jesús “Poropĩsirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pipe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he āgua yuvireco. ²¹ Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherā pēu? —ehi.

—¡Barrabás tosē! —ehi yuvireco.

²² —¿Mbahe vo evocoyase che ayapora Jesús rese chupe acoi ava, “Poropĩsirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoyase Pilato: “Ndaicatui mbahe moingatu sepi āgua” ehi tēi oyeupe. Sese ava yaivu guasu catu-catu irise, ogüeru uca i. Ipípe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atíño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica āgua.

²⁷ Evocoyase mborerecuar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omonde turucuar pīra vahe yuvireco sese ²⁹ iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. ³¹ Ēgüe ehi yoyai catu-catu yuvireco. Ipare virocuase turucuar pīra vahe ichui, ahese omonde iturucuar ité yuvireco sese. Ichui víraso curusu rese yatica āgua yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús víreco vahe rese” ehi voiño tēi yuvireco.

³³ Oyepotase yuviraso Gólgota serer vahesave, ahe ‘ava ācagüer’ oya aipo ehi chupe, ³⁴ aheve uva ricuer imboyesehapri mbahe pihaupiar rese omondo tēi yuvireco Jesús toihu. Osāha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayiño oyeupe iturucuar mboyaho-yaho āgua rese. ³⁶ Ipare aheve oguapi yuvinoi sāro. ³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸ Ñuvirío imonda rai vahe yaticasa avei curusu rese supive yuvireco, ñepeí mbahe rese ipocosa coti, ambuae evocoyase mbahe rese ipocoñhisa coti yuvireco. ³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipisiro ambuae, ahe ae rumo ndoicatui oñepisiro. Israel rerecuar guasu secoise, ¡togüeyi curusu sui cūritei, ahese voi seroyasara! ⁴³ Ahe oyeroya Tūpa rese, Tūpa evocoyase oipotase, toipisiro cūritei. Esepia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri pītu ivi rupi. Ēgüe ehi las tres rupi. ⁴⁶ Ahese tupri avei Jesús oñehe pīrata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ēgüe tehiño rane, ¿oura pīha Elías ipisiro āgua? —ehi yuvireco.

⁵⁰ Ahese Jesús sãse pĩrata iri, omano. ⁵¹ Ahe pĩpeve voi tũparo guasu turucuar ivate coti sui ovo tupri. Aheseve avei ivi orirĩ iyavei ita guasu-guasú oyeca. ⁵² Tehõgũer ruvĩpa ita apopri avei oyemboi yuvĩreco iyavei setá Tũpa reroyasar omano vahecuer, ahe avei opa ocuerayevi yuvĩreco. ⁵³ Ēgũe ehi Jesús cuerayevire, ahe opa yuvĩnose tehõgũer ruvĩpa sui. Ipare yuvĩroique Jerusalén maranehi pĩpe. Aheve setá ava upe oyemboyecua yuvĩreco.

⁵⁴ Evocoyase co sundao rerecuar iyavei Jesús rãrosareta, ahe oyanduse ivi rĩrii yuvĩreco iyavei ambuae mbahe ěgũe ehi vahecuer repiase, ahese oyembosiquiye guasu aipo ehi yuvĩreco:

—¡Supi eté catu co mbia Tũpa Rahir ité secoi! —ehi tẽi yuvĩreco.

⁵⁵ Iyavei setá cuña aheve amombrive osepia catu yuvĩnoha, ahe acoi Galilea sui yugũeru vahecuer Jesús rupi iyavei setá rupi oipĩtivĩi yuvĩreco yepi. ⁵⁶ Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agũer tuvĩpa pĩpe

⁵⁷ Pĩtu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoyase ahe oso Pilato upe oporandu Jesús rehõgũer rese. Evocoyase Pilato aipo ehi: “Aviye, timondosaño chupe” ehi. ⁵⁹ José evocoyase viraso sehõgũer. Ipare oimama tupri turucuar secose vahe ndiquihai vahe pĩpe. ⁶⁰ Ichui omoingue ombahe tuvĩpa ipiasu vahe, ita oyoho uca vahe pĩpe. Ipare osovapĩ ita guasu yapayere vahe pĩpe oso. ⁶¹ Aheve María Magdalena ambuae María rese suvĩpa rovai oguapĩ yuvĩnoi.

Jesús ruvĩpa osãro sundao yuvĩreco

⁶² Ahere ayihive mbituhusa ari pĩpe, yuvĩraso pahĩ eta rerecuar iyavei fariseo Pilato upe mbahe rese oporandu ãgua ⁶³ aipo ehi yuvĩreco:

—Ore rerecuar, ore oroyemomahenduha acoi iporombopa serai vahe ñehe agũer rese: “Acuerayevira mbosapĩ ari pare omano vahe pãhu sui” ehi acoi cuese oicove vitesse —ehi yuvĩreco—. ⁶⁴ Sese emondo sundao sehõgũer ruvĩpa rãro tupri ãgua mbosapĩ ari rupi semimbohe ñomiẽhi ãgua pĩtu pĩpe yuvĩreco. Aviyeteramo, “Ocuerayevi omano vahe pãhu sui” aipo ehi tupri tẽi tiẽtera ava upe yuvĩreco. Aipo ehise yuvĩreco, yipĩndar semira tẽi vahe sui ivate catura serecosa —ehi yuvĩreco.

⁶⁵ Pilato evocoyase aipo ehi chupe yuvĩreco:

—Aviye —ehi—. Amondora sundao pẽu. Peraso, pemovĩracua tupri ité sãro ãgua —ehi.

⁶⁶ Evocoyase yuvĩraso tehõgũer ruvĩpa rãro tupri ãgua yuvĩreco. Ahese omondo tehõgũer rovapisa ita guasu rese mbahe imomiisa cua ãgua yuvĩreco. Ipare oseya aheve sundao sãro ãgua yuvĩreco cute.

28

Jesús ocuerayevi

¹ Cõhe ramomise, domingu pĩpe, María Magdalena iyavei ambuae María yuvĩraso tehõgũer ruvĩpa repia yuvĩreco. ² Aviyeteramo tẽi orirĩ pĩratá ivi Tũpa rembiguai iva sui igũeyise. Ēgũe ehi oyepota tehõgũer ruvĩpave ou, ahe vĩrocua itape guasu sovapisa ichui. Ipare iharive oguapĩ oĩ. ³ Ēgũe ehi sendĩ iteanga aviye acoi overa vahe. Iturucuar evocoyase morochĩ eté. ⁴ Osepia se sundao, orirĩ eteanga osiquiyepave yuvĩreco ichui, opa oyuca pucu-pucu tẽi yuvĩreco. ⁵ Tũpa rembiguai rumo aipo ehi voi eté cuña upe:

—Pesiquiyei rene. Esepia, che aicua pe peseca Jesús yaticapĩrer. ⁶ Ndipoi eté cohave. Esepia, ahe ocuerayevi gũemimombehu rupi eté. Tapesepia ru supagũer —ehi.

Ipare aipo ehi:

⁷—Peso poyava voi, tapemombehu semimbohe eta upe: ‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pẽu —ehi Tũpa rembiguai cuña upe.

⁸ Evocoyase cuña yuviraso poyava voi suvipa sui, osiquiye pãhuve rumo ovïhaño yuvireco; ãgüe ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboetisave yuvireco. ¹⁰ Evocoyase ahe aipo ehi chupe:

—Pesiquiyei rene che sui. Pesoño, tapemombehu che reroysareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco. ¹² Evocoyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pïtu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. ãgüe ehi vite cüritei judío Jesús cuerayevisa reroyaẽhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoyase ãgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro tõi ore pãhu pendar ndoviroya tupri vitei yuvireco viña. ¹⁸ Evocoyase ahe oyemboya ore rese aipo ehi oreu:

—Tüpa che mbou mborerecuar ivate catu vahe che reco ãgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheã; peñapiramo avei che Ru rer pipe, che rer pipe, Espiritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve arí yacatu rupi yepi, acoi arí ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ìvi iporupirêhisa rupi secoi

¹ Co yipîndar aviye vahe ñehesa Jesucristo, Tûpa Rahîr, recocuer resendar amombehu potami pëu. ² Yîpiîndar Tûpa aipo ehi imombehu oñehe mombehusar Isafás rembicuachía pîpe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipîrata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Êgüe ehi Juan ou ava ãpiramo ìvi iporupirêhisa rupi oico, aipo ehi: “Pemboasi pe angaipa, peyevi Tûpa upe, ahese opoãpiramora Tûpa pëu ñero ãgua pe angaipa rese” ehi ava upe. ⁵ Opacatu ava oyugüeru iñehe rendu ãgua ìvi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo ìai Jordán pîpe.

⁶ Juan turucuar camello ragüer apopri, sumbicuasa mbahe pîrer, sembihu evocoyase tucru, eiri caha pîpendar avei. ⁷ Ahe aipo ehi oñehe ava upe oico: “Che raquicuei oura seco pîrata catu vahe che sui, sese cheu ndiyai chira ayeaivi ipîtaquisã yora ãgua. ⁸ Che supi eté opoãpiramo ì pîpe têi; ahe rumo pe ãpiramora Espîritu Santo pîpe” ehi.

Jesús ãpiramo agüer

⁹ Ipare Jesús osê tecua Nazaret sui oso Galilea rupi. Aheve Juan oñapiramo ìai Jordán pîpe. ¹⁰ Osê ramoseve ì sui, Jesús osepia ìva oyemboi tupri, ahese Espîritu ogüeyi iharive apîcasu nungar. ¹¹ Ahese oyeendu ñehesa ìva sui aipo ehi: “Nde che Rahîr ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espîritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mimba vai pâhuve. Aheve avei Caruguar osecoãha; Tûpa rembiguai ìva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ìvi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tûpa mborerecuasa yandeu. Sese, pemboasi pe angaipa, peyevi Tûpa upe, iyavei peroya co ñehesa aviye vahe Tûpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepi ari Jesús oguata ìpa Galilea ivii. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chíhi oguata irimise, ahese osepia Santiago, Zebedeo rahîr, tivri Juan reseve carite pîpe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pîpe ipîtiviisar reseve, yuviraso supi.

Mbia caruguar vireco vahe oyese

²¹ Oyepotase tecua Capernaum ve yuvireco mbituhusa ari pîpe, Jesús oique oporombohe tûparove. ²² Evocoyase ava osenduse iporombohesa, “¿Mara ehi rutei?” ehi têi yuvireco chupe. Esepia, ahe oporombohe güeco pîratasa pîpe, ndahei Moisés porocuaita rese oporombohe vahe nungar. ²³ Aheve mbia ahe tecua pendar vireco vahe caruguar oyese, oñehe pîrata chupe aipo ehi:

²⁴ —¿Mahera vo ereyuño têi cohava oreu, Jesús Nazaret pendar? ¿Ereyu vo ore mocañi ãgua têi? Che orocua ité, nde Tûpa suindar ndaseco marai vahe ereico —ehi chupe.

²⁵ Oñehe pĩrata rumo caruguar upe aipo ehi: —¡Quiriri, esẽ co mbia sui! —ehi chupe.

²⁶ Evocoyase caruguar mbia rese secoi vahe omoehoha seiti ivive, sãse, osẽ oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¡Mbahe pĩha co? ¡Iporombohesa ipiasu vahe ité! ¡Co mbia vireco ité omborerecuasa!
¡Caruguar avei eté omboyeroya oyeupe iñehese! —ehi tẽi ava yuvireco.

²⁸ Cũriteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tũparo sui, yuviraso Santiago, Juan rese Simón, Andrés rõtave.

³⁰ Aheve Simón rembireco si sohĩ iteanga vupave ou. Evocoyase omombehu Jesús upe imbahehasisa yuvireco. ³¹ Ahese oso chupe oipisi ipo rese imopuha, ahe ramoseve, sohi opĩtuhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pĩtu ramose opacatu imbaheasi vahe iyavei caruguar vireco vahe viraso yuvireco chupe imbogüera ãgua. ³³ Opacatu ava ahe tecua pendar oñemonuha oquendipive yuvireco. ³⁴ Evocoyase setá ombogüera mbaherasi-rasi tẽi vireco vahe, iyavei omboyepipi setá caruguar ava sui. Ndoipotai rumo caruguar ñehe. Esepia, ahe oicua ité evocoyase seco yuvireco.

Jesús Vu Tũpa Ñehengagüer omombehu judío tũparo rupi

³⁵ Ayihiteve Jesús oñarapuha oso ava porẽhisave oyerogui ãgua. ³⁶ Evocoyase Simón ondugüer reseve yuviraso seca. ³⁷ Osepia,

—Opacatu ava nde reca tẽi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tũpa Ñehengagüer mombehu ãgua aheve; evocoi nungar apo ãgua niha che ayu —ehi.

³⁹ Ëgüe ehi oguata opacatu Galilea ivi rupi, omombehu Vu Tũpa Ñehengagüer judío tũparo yacatu rupi oico, iyavei setá omose caruguar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cũritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique ãgua güecocuer mombehuse tecua rupi; secoiño tẽi tecua popi rupi ava porẽhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyevi ou tecua Capernaum ve, ahese opacatu oyandu ñepe oive secoise yuvireco. ² Cũriteimi voi eté setá ava oñemonuha yuvireco secosave. Sese ndipoi eté ava reique iri ãgua oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota ndoguatai vahe yuvireco chupe.

⁴ Ahe rumo ndiyai seroique ãgua Jesús uve ava rehĩisave yuvireco. Sese viroyepi oi harive seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco. ⁵ Ahe oicuse co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi ãgua” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pñha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivii. Aheve oporombohe oyese ava rehii yemboyase. ¹⁴ Ichui uguata vitesse, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoyase Leví opñha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuarar iyavei ava yangaipa vahe pñhuve. Esepia, setá ava osaquicue moñaño ité yuvireco.

¹⁶ Evocoyase Jesús ocaruse ipñhuve, fariseo eta, oporombohe vahe Moisés porocuita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuarar iyavei yangaipa guasu vahe pñhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoãpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipñhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase omboyevi ahe ava upe:

—¿Ndiyai eté ichohopri mendasave iyecuacu ãgua imer oicove vitesse ipñhuve!

²⁰ Oimera rumo ari imer reraso ãgua ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri ãgua, ichorosa evocoyase tuvicha catu-catuño ité. ²² Iyavei uva ricuer ipiasu vahe ndiyai iñasa mbahe pírer cuacua pipe. Esepia, uva ricuer ipiasu vahe osose mbahe pírer cuacua vahe pipe, ombopuñora, uva ricuer evocoyase ocañipa tēira, iyavei mbahe pírer ocañi tēi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús uguata güemimbohe rese trigo pñhu rupi fariseo rembiepiave yuvireco. Ahese semimbohe oipoho-poho sãhii yuvireco. ²⁴ Evocoyase fariseo aipo ehi:

—¿Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracahendar pipe mborerecuar guasu David rembiapogüer rese acoi ndasiepoise ondugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oi que Tüpa rêta pipe pan imboeteipri Tüpa upendar reca ondugüer reseve yuvirohu água. Ahe chupe acoi ndipotasai ihu água yuvireco viña; judío pahi yuvirecoi vahe upeño ité niha ipotasa ihu água yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara.

²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oi que iri judío tūparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pīha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tēi. ³ Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pīha, mbahe naporai vahe tie? ¿Yaipñi pīha ava recouer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese voriehiseve iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvinose yuviraso oyemoingatu Herodes rupindar rese Jesús yuca água yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia água. ⁹ Sese oyocuai güemimbohe vireco voi vaheñã ñepe carite yuvireco ava omboti etepriēhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco água.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco:

—¡Nde Tüpa Rahir ereico! —ehi.

¹² Jesús rumo oñehe pīrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvireco chupe. ¹⁴ Ahe ipāhu pendar osenoi doce tupri güemimboherã ‘toguataño che rupi, tomombehu Tüpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa carugar ava sui imboyepipi água yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; ¹⁹ iyavei Judas Iscariote, ahe omondo vaheñã Jesús yamotarēhisar upe.

“Jesús carugar pīratasa vireco oyese” ehi tēi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru ãgua yuvireco. ²¹ Oyanduse imu secocuer yuvireco, oyugüeru seraso ãgua 'ndayaracua iri revo' oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: "Co mbia carugar rerecuar Beelzebú oyocuai vahe, ipiratasa pipe tēi omboyepēpi carugar ava sui" ehi yuvireco.

²³ Evocoyase Jesús omombehu carugar recocuer aipo ehi: "¿Mara ehira aipo carugar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evocoi nungar mborerecuar pīratasa ocañi tēira. ²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava ãgua oyeupe ae yuvireco, ndipocopi chiaveira yuvireco, ahe evocoyase secocuer ocañi tēi vaherã ité yuvireco.

²⁷ "Ndipoi eté niha ava oi que vahe que ava ipirata etepri vahe rēta pipe imbahe rerocuapa ãgua ichui; oñapichi rane itera. Ipare voi opara imbahe virocua ichui.

²⁸ "Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apirēhi vaherã ité" ehi.

³⁰ Aipo ehi Jesús imboyevei ava upe. Esepia, "Carugar tēi erereco" ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē ãgua. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pīha che si; ava pīha che rivireta yuvirecoi? —ehi.

³⁴ Evocoyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tūpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve uguapi oī oñehe. Ava rumo opacatu ivi ātasa rupi opitaño yuvireco. ² Evocoyase ava mbohe ãgua omboyoya tecocuer mbahe tīsa rese aipo ehi:

³ "Pesendu co ñehesa: Ñepepe mbia osē omaheti. ⁴ Ahe otiapi-apiise mbahe rāhii oso, moviro oviapi peri rupi. Vīrai yugüeruse rumo, opaño yuvirohu. ⁵ Iyavei moviro oiti ivi nayanai vahesave, ita pāhuve. Sese cūrteimi sorī. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve; ahe yu rumo sorī poyava catu. Sese opaño oyopi. Evocoyase ahe miti ndihai eté. ⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco" ehi.

⁹ Evocoyase, "Acoi osendu pota vahe che ñehe, toyapisacaño sese" ehi Jesús ava rehii upe.

¿Mahera pīha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, "¿Mara oya vo co yembohesa aipo ehi?" ehi yuvireco chupe. ¹¹ Ahe aipo ehi: "Pēu niha Tūpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tēira, ndosepiacuai chietera rumo yuvireco.

Iyavei yepe osendu tēira, ahe rumo ndosenducuai chietera yuvireco, Tūpa upe oyevei potaēhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tīsa resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri āgua? ¹⁴ Evocoi mbahe rāhii oñoti vahe, Tūpa Ñehengagüer mombehusar nungar. ¹⁵ Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Caruguar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesa pipe; ¹⁷ ndovirecoi rumo guapo oyese opīrata āgua. Evocoyase yuvirecoise mbahe-mbahe tēi pipe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saīsusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoypa ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrīve nara tēi iyavei yande rupavrive nara tēi no? Aní, tataendi imondosa ivate poroesape āgua. ²² Ndipoi chietera mbahe ñomipri ndayasepiai vaheñā curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu. ²⁵ Vireco tupri vahe upe, imondosa catura. Acoi ndovireco tupri vahe sui, serocuasañora” ehi.

Yembohesa mbahe rāhii rorisa resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. ²⁷ Omaheti pare, oso oque. Ipare coiyē catu oñarapuha. Ahe oñocua pītu, ari avei, evocoyase mbahe rāhii sorī poyava yuvireco. Itīsar rumo ndoicuai mara ehi vorī. ²⁸ Ivi rese niha oyesu miti: yipindar sorī, ipare iha, ipare sāhii yuvīnose sese. ²⁹ Evocoyase co mbīa mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Ñoti pare rumo, sorī, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

Jesús omboyoya ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepeī mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaēhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

³⁶ Evocoyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyepotase rumo ivitu ai ipīrata vahe, i ohitu vahe oha guasu-guasú

carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.

³⁹ Evocoyase aipo hese, omahe, oñehe pĩrata ivitu ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese? —ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava pĩha co mbia secoi? Esepia niha, ivitu ai, ipa avei omboyeroya —ehi tẽi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pãhu rupi secoi vahe oso Jesús upe.

³ Co mbia tuvipa pãhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tẽi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pĩtu rupi uguata, osapucaí oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pĩrata chupe:

—¡Eyepipi che sui Jesús, Tũpa seco ivate catu vahe Rahir! ¡Aporandu Tũpa rer pipe che mombaraisuẽhi ãgua eve! —ehi.

⁸ Aipo ehi, esepia, yipindar Jesús aipo ehi chupe:

—¡Carugar mbahe tẽi vahe, esẽ co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehii eté —ehi.

¹⁰ Oporanduño chupe omondopaẽhi ãgua co ivi sui. ¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sã ãgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rãrosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pĩha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oĩ, yaracua tuprise avei. Ahese oyembosiquiye tẽi yuvireco. ¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoyase ava Jesús upe: “Esẽ cohava sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso ãgua. ¹⁹ Ahe rumo,

—Esoño nde rõtave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tẽi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. ²² Evocoyase oyepota mbia mborererecuar tūparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera āgua —ehi.

²⁴ Evocoyase oso supi. Ava rehii avei yuviraso supi. ²⁵ Ipāhuve avei oime cuña doce araviter rupi suvi yepiyere-yere vahe. ²⁶ Iparaisú iteanga, setá oporoposano vahe ndoicatu imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava rehii pāhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramoseve voi ndasuvi yepiyere iri. Ipare oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osēse opīratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oiviindar rese ‘¿juma ité pīha opoco che turucuar rese?’ oya. ³³ Evocoyase co cuña oicuae mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Ñehe vitesave, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho āgua; Pedro, Santiago, Juan güeraño oipota.

³⁸ Oyepotase Jairo rētave, osepia ava yemondii oyaseho vahe. ³⁹ Ichui oiqueste oi pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoyase omose opacatu ava. Ipare omoingue iyesupa, ichi, oyeupindar reseve cuñatai rehōgüersave. ⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuēhi āgua ambuae ava upe. Ipare,

—Pembocarú co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi. ² Oyepotase mbituhusa ari, ahese oporombohe tūparo pipe. Setá ava ñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pīha vinose co mbahecuasa co poromondiisa apo āgua? —ehi yuvireco oyeupe—. ³ Co niha carpintero, María membri; Santiago, José, Judas iyavei Simón riquehir, seindri avei yuvirecove yande pāhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nombotei yuvireco —ehi.

⁵ Ndoicatu mbahe oporomondii vahe apo ãgua ava viroyaẽhisa pipe, sese moviro tẽi imbaheasi vahe harive omondo opo imbogüera ãgua. ⁶ Ndoyembovĩhai ava viroyaẽhisa rese.

Jesús oyocuai güemimbohe Tũpa mborerecuasa mombehu ãgua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pĩratasa carugar mboyepepi ãgua chupe.

⁸ —Ndaperaso chira rumo mbahe peguatasa rupi, pe pococa güeraño ité perasora — ehi—. Ndiyai avei peraso mbahe riru, pan, guarepochi avei. ⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesẽra pecua. ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepipiñora ichui. Peipipeteño aveira pe pi ivi rãtachigüer sui. Ëgüe pe hesa omboyecuar cañisa apirẽhi yuvireco chupe —ehi.

¹² Evocoyase semimbohe eta yuviraso, “Pemboasi pe angaipa, peyevi Tũpa upe” ohe ãgua yuvireco. ¹³ Iyavei setá omboyepipi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondisa ipĩrata vahe —ehi.

¹⁵ Ambuae rumo,

—Tũpa ñehe mombehusar Elías mo evocoi —ehi yuvireco.

Ambuae evocoyase,

—Tũpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cüritei ocuerayevi —ehi.

¹⁷ Herodías recocuer sui tẽi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rĩvri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rĩvri rembireco” ehi.

¹⁹ Herodías evocoyase oyuca pota Juan yamotarẽhisave; ndoicatu rumo yuca. ²⁰ Esepia, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo ãgua, ahese Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membri cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboyahora ndeu” ehi. ²⁴ Ahe cuñatai osẽ oso, osi upe oporandu:

—¿Mbahe rese pĩha aporandura chupe? —ehi.

Ichĩ aipo ehi chupe:

—Eporandu Juan Oporoãpiramo vahe ãca rese —ehi chupe.

²⁵ Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoãpiramo vahe ãca poratu pipe cheu —ehi.

²⁶ Mborerecuar rumo ndoyembovĩhai tẽi. Esepia, ava ichohopri rovaque ité yipindar oñehe. Sese ndoicatu, “Anĩ” ohe ãgua. ²⁷ Evocoyase ipare voi mborerecuar oyocuai

sundao Juan ãca reru ãgua. ²⁸ Sundao oso soquendasave, oyasia Juan ãca, seru poratu pipe. Mborerecuar omondo co cuñatai upe, evocoyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembi-apogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohave, yaso, yapituhumi rane co coti —ehi.

Esepia, oyepindecuaño ité ava yugüeru chupe, sese ndiyai icaru ãgua yuvireco. ³² Evocoyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehii, ahese iparaisu ava eta chupe, inungar ovesa ndovirecoi vahe guãrosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cõi vahesa rupi? Aheve tovírocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pîha oreu doscientos denario pan repirã ava mbocarú ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoyase omboyaho-yaho ava imboguapi capihí hari rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe íva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco. Pira ñuvirío vahe avei omboyaho-yaho opacatu ava upe. ⁴² Evocoyase opacatu ava ocaru vahe ihítaropa tēi yuvireco. ⁴³ Ipare semimbohe omboapipopa doce tupri iruova pan iyavei pira rumbírer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata í hari rupi

⁴⁵ Ipare Jesús, “Peha pe rane carite pipe, pesasa ípa Betsaida ve peso che renondevé. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ívitrí rese oyeroquí ãgua. ⁴⁷ Pítuse carite ípa mbíterve ité secoi. Jesús rumo ahe ae opitaño ívive. ⁴⁸ Ahese omahe güemimbohe rese iyeapicui catuēhise. Esepia, ívitu ípírata vahe osovaíchi yuvireco. Cõhe potase, oguata í hari rupi güemimbohe coti oso. Aviye ité acoi oñocuaño vahrã oso. ⁴⁹ Sepiase rumo ‘hãgüer tēi revo’ oya, sãse pucu-pucu í hari rupi iguatase semimbohe yuvireco. ⁵⁰ Esepia, opacatu osepia osiquiye yuvireco ichui. Ahe rumo aipo ehi:

—¡Peyemovíracuano, che tēi! ¡Pesiquiye eme che sui! —ehi güemimbohe upe.

⁵¹ Ahe ohase carite pipe, opituhu voi ívitu. Evocoyase, “¡Mara ehi rutei!” ehi tēi yuvireco. ⁵² Esepia, ndoicua vítei eté pan apo atí agüer yuvireco, yavai vite seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ípa, oyepota Genesaret ívi rese yuviraso, ahe imbehive oñapichiño carite yuvireco. ⁵⁴ Yuvínosepa ramomiseve, ava oícua voi Jesús yuvireco. ⁵⁵ Ichui opacatu ahe ívi pípendar güeru imbaheasi vahe Jesús upe yuvireco. ⁵⁶ Oyepotase que tecuamive,

anise tecua guasuve, caha pipe oi-oimi rupi, ahe supi imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoyase fariseo eta, Moisés porocuita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iyepoiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe rerocuasa sui oyevisé, ndocarui oyepoiēhi viteseve yuvireco. Iyavei tecocuer aracahendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tūpa reroyasar angahu tēi peico vahe, supi tupri ité Tūpa ñehe mombehúsar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ëgüe peye pepoipa Tūpa porocuita sui ava recocuer aracahendar rupi tēi pe guata ãgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Tūpa porocuita. ¹⁰ Esepia, Moisés aipo ehi: ‘Pemboyeroyara iyavei peip̄t̄iv̄iira pe ru, pe si avei no. Acoi iñehe mara vahe oyesupa upe ahe, Tomanño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo ãgua p̄eu. Esepia, che opacatu mbahe areco vahe Tūpa upe imondopri, ahe Corbán, ehi’ peye; ¹² pe evocoyase, aipo ehi vahe upe, ‘Ndiyai eté oyesupa p̄t̄iv̄i ãgua’ peye. ¹³ Co nungar apo pipe Tūpa porocuita ndaperoyai. Esepia, ndapepoi potai ava recocuer aracahendar sui. Setá mbahe co nungar peyapo vite —ehi.

¹⁴ Ipare, “Perio” ehi iri ava rehii upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha ãgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoyase aipo ehi güemimbohe upe:

—Evocoyase pe avei no, ¿ndapesenducuai? ¿Ndapeicuai vo acoi ocar sui oique vahe ava aviterve nomboangaipai eté? ¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca ãgua —ehi.

Cuña ndahei vahe judía viroya Jesús

²⁴ Ichui Jesús osẽ oso tecua Tiro coti. Aheve oique oi pipe, ndoyecua uca potai ava upe viña; ndoicatui rumo ava sui oñemi. ²⁵ Oime cuña viresco vahe omembri cuñatai, ahe viresco carugar oyese; ahe cuña oicuase Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo água —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eyevi eso. Carugar osẽ nde membri sui —ehi chupe.

³⁰ Co cuña oyepotase güetave, osepia omembri supave; yipive rumo osẽ carugar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tẽi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipĩtuhe pucu aipo ehi: “¡Efata!” ehi (‘timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, iñehe ipiti-piti vahe avei omoñhengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeiri ari pipe setá ava oyemboya iri Jesús rese yuvireco. Ndipoi rumo mbahe icaru água. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. ³ Amondopase sètave sieporẽhi reseve, viroviapi-api tiẽtera tieporẽhi peri rupi yuvireco viña. Esepia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo cohave ava porẽhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tüpa upe. Ichui omboyaho-yaho pan imondo güemimbohe upe, semimbohe evocoyase omondo ava rehii upe yuvireco. ⁷ Iyavei viresco moviro pirami yuvireco, sese avei, “Aviye ndeu” ehi iri Tüpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihĩtaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi água yuvireco. Jesús recoãha água, oporandu iva pendar poromondiisa rese ‘¿Tüpa sui eté pĩha ou?’ oya yuvireco chupe.

¹² Sese Jesús ipĩtuhe pucu, aipo ehi:

—¿Mahera vo co ava oipota iva pendar poromondiisa che recocuer cua ãgua yuvireco! Namboyecuai chietera rumo que ñepeï evocoi nungar mbahe pëu —ehi.

¹³ Ipare oseypañõ ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeïmi tëi pan viraso güemihura yuvireco. ¹⁵ Evocoyase Jesús aipo ehi:

—Peïcua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayarui revo aipo ehi yandeu” ehi-ehi tëi oyeupe yuvireco.

¹⁷ Ahe rumo oïcua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeïcua vitei vo che rembiapo? ¿Yavai vite tie seroya ãgua pëu? ¹⁸ Oime tëi pe resa, ndapesepiai rumo; oime tëi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi ïruova vo acoi sumbirer pemonuha iri? —ehi.

—Doce ïruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi ïruova vo acoi pemonuha sumbirer no? —ehi.

—Siete ïruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapïsoi vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapïsoi vahe yuvireco chupe ‘epocomi tëi sese’ oya yuvireco. ²³ Evocoyase oïpopïsi ndasesapïsoi vahe seraso co cotïmi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. ²⁴ Ndasesapïsoi vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoyase omondo iri opo sesa rese. Ipare co mbïa omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sëtave aipo ehi chupe:

—Ereyevi iri eme tecuave —ehi.

Pedro oïcua uca Jesús Tüpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipino ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoyase, “Elías” ehi; ambuae, “Tüpa ñehe mombehúsar mboetasã” ehi yuvireco ndeu —ehi.

²⁹ Evocoyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoyase aipo ehi chupe:

—Nde niha Tüpa Rembiporavo Poropïsirosar ereico —ehi.

³⁰ Jesús rumo, “Pemombehui rene que ñepeï ava upe” ehi.

Jesús omombehu omano ãgua

³¹ Evocoyase Jesús omboïpi oporombohe: “Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaïta rese oporombohe vahe remiamotarëhi aïcõra. Ahe avei che yuca ucara yuvireco. Acuerayevira rumo mbosapi ari rupi” ehi. ³² Ahe omboyecua tupri ité chupe. Evocoyase Pedro viraso co cotïmi chupe oñehengata ãgua. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tūpa upendar rese; ava nungar tēi nde pīhañemoñeta eico —ehi.

³⁴ Evocoyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosira viña, toyemoingatu voi che recocuer rese oparaisu āgua iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora. ³⁶ ¿Aviye ai angahu pīha ava upe opacatu mbahe ivi pīpendar pisi āgua tēi, ahe ae tēi omocañi güecocuer yuvireco viña? ³⁷ ¿Mbovi pīha omondora ava güecocuer repirā viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, ěgüe ahera acoi ayevisē che Ru reco pīrata porañetesa pīpe, sembuguai rehii iva pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vitei chivaherā, osepia rane itera ouse Tūpa mborerecuasa ipīratasa pīpe yuvireco curi —ehi.

Jesús ñecuñaaro agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaaro güemimbohe rovai. ³ Iturucuar sendí, morochí eteanga. Ndipoi eté que ava co nungar co ivi pīpe turucuar oyosei vahe. ⁴ Iyavei aviyeteramo tēi oyemboyecua Elías, Moisés reseve Jesús rese oñemoñeta yuvinocha.

⁵ Ipare Pedro aipo ehi chupe:

—Ore mbohesar, ¡aviye ai eté cohava yaico! Toroyapo mbosapi teyupami: ñepeu ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe āgua, aipo ehiño tēi. ⁷ Ahe ramoseve avei ogüeyi iva quiha iharive, oyopipa tupri yuvireco. Ahe ipāhuve oyeendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. ⁸ Ahe ramoseve avei omahese oivii yuvireco, ndosepiai eté que ambuae ava, Jesús güeraño tupri ité osepia opāhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepeu ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi tēi vireco aipo ñehesa yuvireco, ahe rumo oporandu-randu oyeupe: “¿Mara oya pīha aipo, ‘Acuerayevira’ ehise?” ehi tēi yuvireco. ¹¹ Evocoyase semimbohe oporandu chupe:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu āgua. ¿Mahera arachendar icuachiapri pīpe aipo ehi: “Ava Riquehir oiporarara mbahe, yamotarēhimbrī avei sec-oira” ehi? ¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. ěgüe ehi opacatu yaviye arachendar icuachiapirer sese —ehi.

Jesús ombogüera chīhivahe carugar rerecosar

¹⁴ Ipare oyevi yuvireco güemimbohe recosave. Aheve osepia ava rehii oyere guasuse yuvireco sese, iyavei oime aheve Moisés porocuita rese oporombohe vahe oñehepoepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeu ipāhu pendar omboyevi chupe:

—Porombohesar, co aru che rahir ndeu, vireco vahe caruguar oyese, nomoñhengatu ucai vahe yepi. ¹⁸ Iyavei que iguatasa rupi co caruguar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūrítei nipirata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyeví chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pāhuve che ñemosasa pipe? Peru evocoi chíhivahe cheu —ehi.

²⁰ Evocoyase ogüeru yuvireco chupe. Osepiase caruguar Jesús, oiti uca iri chíhivahe ivive. Omboapayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichihivahemi suive ité. ²² Amove co caruguar oiti uca tatave, ive avei yuca pota uca āgua yepi. Sese ereicatuse, ore p̄tíviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che p̄tívii ru eve nde reroya catu āgua! —ehi p̄rata chupe.

²⁵ Osepiase Jesús ava rehii, oyemboyase sese, oñehe p̄rata caruguar upe aipo ehi:

—Caruguar noñehei vahe, ndayapisai vahe, che orocuai, epoi co chíhivahe sui, ereique iri eme secocuer rese —ehi.

²⁶ Caruguar sãse pucu chíhivahe yuca tupri oso. “Omano ité co chíhivahe” ehi ambuae ava yuvireco. ²⁷ Jesús rumo oipopisi imopuha; evocoyase chíhivahe opūha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera p̄ha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano āgua

³⁰ Ichui yuvínosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarēhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu āgua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepia, peri rupi, “¿Ava p̄ha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe p̄hu pendar oyemboivate ai vahe, ahe rumo seco ivi coti catura opacatu sui ava eta p̄tívii āgua —ehi.

³⁶ Ipare oipisi chíhivahe güemimbohe p̄huve senoha aipo ehi:

³⁷ —Acoi ava oipisi vahe co chíhivahemi nungar che rer pipe sereco, che ité che p̄isi yuvireco; iyavei acoi ava che p̄isi vahe, ndahei che güeraño che p̄isi, oipisi aveira che mbousar —ehi.

Acoi ndahei vahe yande amotarēhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cūrítei ore rupi; ore ité ndoroipotai chupe —ehi.

³⁹ Jesús rumo,

—Aní ěgüie peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheerã oñehe rai che rese. ⁴⁰ Sese ndayande amotarẽhii vahe, ahe yande mboyoyasar seci. ⁴¹ Acoi que omondo vahe i vaso pipe che rupi pe recosa pipe pẽu, evocoi nungar oipisi itera porerecosa oyeupe nara —ehi.

Yaicua catura mbahe tẽi apoẽhi ģgua

⁴² “Acoi que ava omboangaipa uca vahe co chĩhivahemi nungar che reroyasar, iyacatu evocoi nungar ñapichisa ita mbahe mbocuhisa iyesho rese para guasu pipe imombo ģgua. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirẽhisave ñepei pe po rese, peso rãgüer sui que ñuvirío pe po rese tata guasu apirẽhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucase, peyasia avei peyesui. Esepia, aviye catu ndape pĩndugüei peique tecovesave, que ñuvirío pe pi rese peique rãgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucase, penose ité peyesui. Esepia, aviye catu peique ñepei pe resa rese Tũpa mborerecuasave que ñuvirío pe resa rese tata guasu apirẽhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucrí aviye ai eté. Nasehe irise rumo, ndayaicatu chira imoehe iri ģgua. Peico catu yucrí nungar mbahe tupri pipe peyeupe nara” ehi.

10

Jesús oporombohe mendasa sui poiẽhi ģgua

¹ Ipare Jesús osẽ tecua Capernaum sui, oso Judea ivi rupi iai Jordán rovai ari sãsa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri. ² Evocoyase fariseo oyemboya seco rãha ģgua tẽi yuvireco sese, “¿Aviye piha cuimbahe omenda vahe opoi güembireco sui?” ehi yuvireco chupe. ³ Ahe rumo omboyevi chupe:

—¿Mara ehi vo acoi Moisés porocuita pipe? —ehi.

⁴ Ahe evocoyase omboyevi yuvireco chupe:

—Moisés remimombehu aipo ehi: “Pemondora pe rembireco upe cuachiar poisa resendar pe poi ģgua pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroyaẽhisa pipe sui pẽu. ⁶ Yipisuive ité niha, ‘Tũpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepepira oyesupa sui güembireco rese ité yuvirecoi ģgua. ⁸ Evocoyase ñuvirío yuvirecoira ñepei ava nungar.’ Sese ndahe iri ñuvirío, ñepei nungar ité yuvirecoira. ⁹ Evocoyase ava Tũpa omomenda vahe oyese, ndiyai ava tẽi omboyepepi yuvireco oyesui —ehi.

¹⁰ Oive yuvirecoi vitese, semimbohe oporandu iri co mbahe rese yuvireco chupe.

¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tẽi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa tẽi vahe avei —ehi güemimbohe upe.

Jesús osovasa chĩhivahe

¹³ Ipare ogüeru chĩhivahe Jesús upe yuvireco sese ipoco ģgua. Semimbohe rumo, “¿Mahera vo peruño tẽi chĩhivahe?” ehi opiha vĩracuasa pipe serusar upe yuvireco.

¹⁴ Evocoyase Jesús osepiase, ndasorii güemimbohe upe aipo ehi:

—¡Mahera ndapeipotai iyu ģgua! Toyugüeruño chĩhivahe cheu. Esepia, co chĩhivahe nungar ava yuviroiquera che Ru Tũpa mborerecuasave. ¹⁵ Supi eté, acoi ndoipisii vahe

che Ru Tūpa mborerecuasa chīhivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisi, omondo opo iharive osovasa.

Ñepei mbia chīhivahe imbahe eta vahe oñehe Jesús upe

¹⁷ Oguata vitesse Jesús yuvireco, aheseve mbia chīhivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁸ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa secói. ¹⁹ Ereicua niha Tūpa porocuita: ‘Ndereporoyucaí chira, nandeaguasai chira, nandemondai chira, nanderemirai chira ambuae ava rese, ndereporombopai chira, eremboyeroyara nde ru, nde sí avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

²¹ Evocoyase omahe saísusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe seprí evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secói.

²³ Evocoyase omahe oiviindar güemimbohe rese, aipo ehi:

—¿Yavai eté rumo ava mbahe yar reique āgua che Ru Tūpa mborerecuasave! —ehi.

²⁴ Semimbohe evocoyase, “¿Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique āgua ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique āgua, ava imbahe eta vahe upe rumo yavai catu che Ru mborerecuasave seique āgua —ehi.

²⁶ Aipo nungar renduse oyepihamondai guasu yuvireco. Oporandu-randu tēi oyeupe yuvireco: “¿Ava angahu pīha oñepisiora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo āgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secói —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata āgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisirosa raisusa pipe oseyapa vahe güēta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano āgua

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime āgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahí eta rerecuar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco

cheu, ondivi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:
—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vaherã pëu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepeí nde mbahe rese pocosa coti, ambuae nde mbahe rese pocoëhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pïha che co mbahe-mbahe tēi aiporara vaherã, inungar-ra que igua iro vahe aihu vaherã viña? Iyavei, ¿peicatura pïha che ãpiramosa aipisi vaherã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira ãpiramosa che aipisi vaherã nungar. ⁴⁰ Co rumo ndiyai cheu che piri pe guapi ãgua, che mbahe rese pocosa coti, ambuae che mbahe rese pocoëhisa coti. Che Ru Tüpa omoingatu güembiporavo upe nara uguapi vaherã che ipive —ehi.

⁴¹ Evocoyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tüpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoapirasá iteanga omborerecuasa pipe yepi. ⁴³ Pe rumo ãgüe ndapeyei chira pe yeereco. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ⁴⁴ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco ãgua; che rumo ayu ava rese che hañeco ãgua, iyavei amondo vaherã che recocuer manosave ava eta repirã Carugar povri sui senose ãgua —ehi.

Jesús ombogüera Bartimeo sesapisoëhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoí vahe Bartimeo serer vahe, Timoteo rahir, uguapi oí. ⁴⁷ Osenduse, “Jesús Nazaret pendar” hesa, osapucui pïrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pïrataño ité chupe.

⁴⁹ Evocoyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epüha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opüha yesapiha oso chupe.

⁵¹ Evocoyase oporandu ndasesapisoí vahe upe:

—¿Mbahe vo ereipota ayapo vaherã ndeu? —ehi.

Ahe evocoyase,

—Porombohesar, che mbosarecomi tēira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoí vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pīpe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ñipiimi. Aheve Jesús omondo ñuvirío güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ñgüe peye?” ehise pëu, “Ore Yar oiporu pota, ipare niha omboyevi voñora” peyera chupe —ehi.

⁴ Evocoyase ahe yuviraso peri rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohosa rupi tupri ité omboyevi yuvireco chupe. Evocoyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoyase oyasía pindo omondo peri rupi saperã yuvireco. ⁹ Ava senonendar, saquicuerindar avei,

—¿Imboeteipri, sovasapri tasecoi ou vahe yande Yar rer pīpe! —ehi pīrata yuvireco chupe—. ¹⁰ ¿Sovasapri yande ramoi David mborerecuasa tasecoi ou vahe oico! ¿Ivave imboeteipri tasecoi! —ehi yuvireco chupe.

¹¹ Ñgüe ehi Jesús oiquese Jerusalén ve. Ipare oique tūparo pīpe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiēpoi oico. ¹³ Osepia amombri ivira higuera so ati vahe, oso chupe ‘¿iha pīha?’ oyapave. Ahe rumo osepia so pāve tēi sese. Esepia, ahe ivira upe ndosupiti vitei iha āgua. ¹⁴ Evocoyase aipo ehi ahe ivira upe:

—¿Co pīpe suive ndipo iri chira ava nde ha yuvirohu vaherã! —ehi.

Semimbohe osendu ñehe yuvireco.

Jesús omombopa ava mbahe mboepisar tūparo pīpe sui

¹⁵ Ipare oyepota Jerusalén ve yuvireco. Aheve Jesús oiquese judío tūparo guasu pīpe, omboipi ava mbahe mondosar, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroiquepirã tūparo pīpe. ¹⁷ Ipare oporombohe aipo ehi:

—Icuachiapri aracahendar pīpe aipo ehi: ‘Co che rēta yeruresa rētarã opacatu ava ivi pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pīha sereco yuca uca āgua?” ehi voi yuvireco chupe. Osiquiye rumo opacatu ava sui. Esepia, ahe ndoyembovhai iporombohesa rese yuvireco. ¹⁹ Pītu ramomise, Jesús yuvinoso güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihiveive yuvirasose, osepia ivira higuera sapo suive ipirupa vahe yuvireco. ²¹ Evocoyase Pedro oyemomahenduha voi ñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoyase,

—Peyeroya Tūpa rese —ehi—. ²³ Supi eté aipo ahe pëu: acoi que ava ivitri upe: ‘Esiri ave sui, eso para guasu pīpe’ ehi vahe oyeroya tuprise ité aipo hesa rese, ñgüe ehi etera chupe.

²⁴ Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vaheerã rese pëu, ahese peipisi itera. ²⁵ Acoi peyerouquise, yipindar peñero rane que pe amotarëhimbar upe, ahese ëgüe ehi aveira pe Ru iva pendar iñero pe angaipa rese pëu. ²⁶ Ëgüe ndapeyeise, pe Ru iva pendar avei niñeroi chira pe angaipa rese pëu —ehi.

Jesús mborerecuasa

²⁷ Ipare oyeve Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo ãgua? —ehi yuvireco chupe.

²⁹⁻³⁰ Evocoyase omboyevi chupe:

—Che avei aporandura mbahe rese pëu: ¿Ava vo Juan ombou ava ãpiramo ãgua; Tũpa pĩha, ava tẽi tie? Pemboyeveise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

³¹ Evocoyase oñemoñeta aipo ehi oyeupe yuvireco: “‘Tũpa ombou’ yahese chupe viña, ahe evocoyase: ‘¿Mahera ru ndaperoyai?’ ehira yandeu. ³² ‘Ava tẽi remimbou’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoyase omboyevi chupe yuvireco:

—Ndroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

12

Ava mbahe tẽi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oi ivate vahe opacatu mbahe moha ãgua. Ipare oseya oivi ava oporaviqui vahe upe iporu ãgua. Ichui osẽ, oso amombri vahesa rupi. ² Oyepotase ari uva pohosa, ahese omondo güembigui oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisiño, inupa-nupa imboyevi tupri tẽi yuvireco. ⁴ Evocoyase ahe ivi yar omondo iri ambuae güembigui. Ahe oyapicha-pichaño ñaca rupi, iñehe mara-mara tẽiño avei yuvireco chupe. ⁵ Ipare omondo iri ambuae. Ahe oyucaño yuvireco. Ichui omondo ati iri tẽi. Ahe ipãhu pendar rese yuvirocua-rocuano yuvireco, oyucaño avei ambuae yuvireco.

⁶ “Iyavei ñepepi opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pãve topita co ivi’ ehi yuvireco. ⁸ Ichui oipisi, oyucaño yuvireco. Ipare ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri ãgua.

¹¹ Ëgüe ehi niha yande Yar yapo.

¡Mara ehi rutei revol’ ehi icuachiapri pipe” ehi.

¹² Evocoyase oviraso pota voi Jesús soquenda ãgua yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecõha iri tẽi Jesús guarepochi rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ēgüe ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo āgua rese. ¿Aviyera pīha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pīhañhisa, sese aipo ehi voi chupe:

—¿Mahera che moingue pota mbahe tēi pīpe peye? Peru evocoyase ñepepe guarepochi cheu, tasepia —ehi.

¹⁶ Ipare fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoyase pemondora Tūpa upe —ehi.

Evocoyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoãhasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseya güembicuachiagüer yandeu aipo ehi: “Que cuimbahe omenda vahe omanose guahiñhiseve, tivri evocoyase omendara sembirecocuer rese ahe viquehir omano vahecuer upe nara tahira oico.” ²⁰ Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo. ²¹ Ipare tivri omenda viquehir rebirecocuer rese. Ahe rumo omanoño, ndatahii avei rumo. Ēgüe ehi tupri avei tivri imombosapisa. ²² Ēgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rebireco itera pīha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyeve chupe:

—Pe pīhañemoñeta pīpe peyavi. Esepia, ndapeicuai eté Tūpa ñehe icuachiapri ararahendar, ndapeicuai avei Tūpa pīratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave. ²⁶ Co cuerayevisa resendar rumo amombehu pēu: aviye ndapeyeroqui anga vahe Moisés rebicuachiagüer pīpe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pīhañemoñeta pīpe peyavi —ehi saduceo yuvirecoi vahe upe.

Porocuita aviye catu vahe

²⁸ Ñepepe Moisés porocuita rese oporombohe vahe osendu iñehe pīratase oyeupe yuvireco, oicua avei Jesús omboyeve tuprise iñehe yuvireco chupe, evocoyase oyemboya sese oporandu chupe:

—¿Uma vo porocuita aviye catu vahe opacatu sui? —ehi.

²⁹ Jesús omboyeve chupe:

—Yipindar mborocuita aviye catu vahe aipo ehi: ‘Pesendu Israel: yande Yar Tūpa aheño ité ñepepe yande Yar secoi. ³⁰ Eresaisura nde Yar Tūpa opacatu nde pīhá pīpe, opacatu nde recocuer pīpe, opacatu nde yapisacasa pīpe iyavei opacatu nde pīratasa pīpe’ ehi. ³¹ Iyavei imoñuviriosa porocuita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuita aviye catu vahe co sui —ehi.

³² Evocoyase porocuita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tūpa iyavei ndipoi eté ambuae. ³³ Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

³⁴ Evocoyase Jesús icuase co ava pīhañemoñeta tuprisa, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheṛā mbahe rese yuvireco chupe.

¿Ava suindar pīha Poropīsirosar?

³⁵ Jesús oporombohese tūparo pipe aipo ehi:

—¿Mahera ru Moisés porocuita rese oporombohe vahe: “Poropīsirosar David suindar ité” ehi yuvireco? ³⁶ Esepia, David ité aipo ehi Espiritu Santo pīratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’

ehi David aracahe. ³⁷ ¿Mahera ru, “Poropīsirosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo āgua ocar rupi omboeteisa pipe yuvireco. ³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave uguapi yuvireco yepi no. ⁴⁰ Iyavei cuña imer mano vahecuer rēta virocua-rocuā tēi ichui. Oarondaguā tēi avei oyeroqui pucu-pucu yuvireco. Ahe rumo oipisira Tūpa ñemoirosa ipīrata catu vahe yuvireco curi” ehi.

Cuña imer mano vahecuer porerecosa

⁴¹ Ñepei ari Jesús uguapi oī porerecosa riru rovai ava repia āgua mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. ⁴³ Evocoyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe. ⁴⁴ Ambuae ava eta rumo uguarepochi rumbirermi tēi omondo oporereco āgua yuvireco; co cuña rumo oparaisusa pipe opa ité omondo uguarepochi —ehi güemimbohe upe.

13

“Imondurusara tūparo guasu” ehi Jesús

¹ Jesús osēse tūparo guasu pipe sui, ahe ñepei semimbohe aipo ehi chupe:

—Ore mbohesar, jese pia oī ita imopuhapri, icatupri ai! —ehi.

² Jesús rumo omboyevī chupe:

—¿Pesepia co oī tuvichá vahe ité? Ndipoi chietera rumo que ñepei ita oyeha vite vahe; opacatu ité imondurusara curi —ehi.

Cañi renonde mbahe oime vaheṛā

³ Evocoyase Jesús yuvirasō ivitri Olivo ve, ahe ivitri tūparo guasu rovai tupri. Aheve Jesús uguapise oī, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahese vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyeví chupe: “Peicua catu, peyembopa ucai rene ambuae ava upe. ⁶ Esepia, setá ava yugüerura, ‘Che niha Poropĩsirosar aico’ ehi tẽira ava eta mbopa yuvireco.

⁷ “Pesenduse rumo ñehesa vavasa resendar cohava, iyavei que rupi, ndapeyembosiquiyei chietera. Esepia niha, ěgüe ehi rane itera; ndehi vıteı chira rumo ari cañi. ⁸ Esepia, ñepeı ivı pıpendar ovavara ambuae ivı pıpendar rese oyeupe yuvireco; iyavei oimera ivı rirıı opacatu-catu tẽi tecua rupi, tiavor avei. Co rumo omboıpi ramomira mbahe tẽi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tũparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tẽi yuvireco. ěgüe peyera peñehe che recocuer rese chupe. ¹⁰ Cañi renonde rumo co ñehesa pĩsirosa resendar opacatu rane ité ava upe icua ucasara ivı rupi. ¹¹ Iyavei, ‘¿Mbahe pıha amombehura chupe?’ ndapeyeyı chira pe mondose mborerecuar rovai yuvireco. Aheve voi eté omboyecua Tũpa pe ñehe ğgua pũ. Esepia, ndahei chira peyesui tẽi peñehe, Espıritu Santo ité oñehera. ¹² İpare rumo ava omondoñora vivrı yamotarẽhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarẽhiñora oyesupa yuca uca ğgua yuvireco che recocuer rese. ¹³ Opacatu avei ava ndape ambotai chira che recocuer sui tẽi yuvireco. Acoı ava oyemovıracua vaheño rumo ari ipa vahe rupi, ahe ipısiropri yuvirecoira.

¹⁴ “Tũparo guasu maranehi pipe pesepiase mbahe-mbahe tẽi aposa —acoi oyerocuı vahe, ahe tosenducua tuprı yuvireco—, evocoyase acoı yuvirecoı vahe ivı Judea rupi, toñemıpa poyava ivıtri rese yuvireco. ¹⁵ Acoı güeta harıve secoı vahe, ahe ari toique irı eme güetave mbahe renose ğgua. ¹⁶ Acoı que rupi tẽi secoı vahe, toyeı eme aveı güetave oyeaosa renose ğgua. ¹⁷ İparaisu itera cuña ipuruha vahe ahe ari pıpe, imembı pıtani vahe aveı! ¹⁸ Peporandu Tũpa upe, toime eme co nungar mbahe sũhısa vahe pıpe pũ. ¹⁹ Esepia, ahe ari pıpe ava iparaisu catura opacatu yıpıve ava ivı apo ramo suıve yuvirecoı vahe sui; ipare ndıpo irı chietera evocoi nungar. ²⁰ Iyavei yande Yar nomombıtuhıse ari naporai vahe, ndıpoi chietera oñepısiro vahe yuvireco vıña; ahe rumo güembıporavo raisusa pıpe omombıtuhura.

²¹ “Que oimese aıpo ehi vahe: ‘Esepia, co Poropĩsirosar secoı’ ehi, anıse, ‘Peve secoı’ ehıse yuvireco pũ, anı chira peroya aıpo ehi vahe. ²² Esepia, yugüerura ava, ‘Che Poropĩsirosar aico’ ehi tẽi vahe, iyaveı, ‘Che amombehu vahe Tũpa Ñehengagüer’ ehi angahu tẽi vahe, iyaveı oyapora mbahe ava ndoyapoi vahe poromondiısa güeco pıratasa mboyecua ğgua yuvireco. Avıyeteramo ombopa aveira ava Tũpa reroyasar. ²³ İPeicua catura! opa aıpo co senondeve amombehu pũ” ehi.

Mara ehıra Tũpa Rahır oyeıveıse

²⁴ “Ahe ari pıpe rumo co mbahe-mbahe tẽi pare ndoyecua irı chira ari, yası aveı ndosesape irı chira, ²⁵ yasıtata aveı opara ovıapi ıva sui, iyaveı ıva resendar mbahe orıriıra yuvireco. ²⁶ Ahese che, Ava Rıquehir, ıva quıha rese ayecua itera vitu che pıratasa pıpe che rendıgüer porañetesa pıpe aveı. ²⁷ İpare amboura che rembiguai eta ıva pendar. Ahe evocoyase omonuhara opacatu ivı rupındar che rembıporavo yuvireco, que amombrı rupı yuvirecoı vahe, que ıva rese yuvirecoı vahe aveı.

²⁸ “Peyembohera ıvıra hıguera recocuer sui: co ıvıra soquı ramose, yaıcuı cõımi ari sacu vahe yepota ğgua yandeu yepı. ²⁹ Na ehi aveira niha pũ che ñehe rupi tuprı mbahe pesepiase. Sese peıcuara che, Ava Rıquehir, cõımi eté che yeı ğgua. ³⁰ Supı eté yuvirecove vıtera ava osepia vahe, co mbahe opase yavıye. ³¹ İva, ivı opara ocañi; che ñehengagüer rumo imboavıyesa rane itera.

³² “Ndıpoi eté rumo ava oıcuı vahe ari iyaveı hora che yeı ğgua yuvireco, che Ru rembiguai ıva pendar aveı ndoıcuı yuvireco, che aveı ndaıcuı eté. Che Ru güeraño ité rumo oıcuı.

³³ “Sese niha pemahemohara yepi, che rārora peye. Esepia niha, ndicuasai che yevi āgua. ³⁴ Inungar que mbia amombri oso pota āgua renonde, güembiguaí oseyapa güēta rāro āgua, omondo avei ñepeí-peí upe iporaviquí āgua, iyavei omondo güēta roquendipi rāro āgua. ³⁵ Pe evocoyase pemahemohara. Esepia, ndapeicuai marase che oí yar ayevira pēu, aviyeteramo pītu ramose, pītu mbiter, tacura ñehese, anise añihivei. ³⁶ Ndaipotai pemahemohaēhiseve tēi ayevira. ³⁷ Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca āgua rese yuvireco

¹ Ipare ñuvirío ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuita rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiēhi āgua yandeu —ehi.

Cuña Jesús rese mbahe sñacua vahe oipiyere

³ Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sñacua vahe siru reseve sepí iteanga vahe. Ahe osovapisa rerocua, ipare oipiyere Jesús āca rese. ⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sñacua vahe? ⁵ Omondo vahe ité tie co tresciento ari rupindar mboraviquí repri rupi ava iparaisu vahe pītivii āgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoiño itera pe pāhuve, iyavei peyapoño itera mbahe aviye vahe peyapo potase chupe; che rumo ēgüe ndahe viteñoi chira vichico pe pāhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoēhi viteseve. ⁹ Supi eté aipo ahe pēu: ñehesa pīsirosa resendar mombehuse opacatu tecua rupi, imombehusa aveira co cuña rembiapo sese mahenduha āgua —ehi.

Judas oyemoingatu Jesús mondo āgua yamotarēhimbar upe

¹⁰ Evocoyase Judas Iscariote, semimbohe doce vahe pāhu pendar, oso pahi eta rerecuar upe imoñeta Jesús mondo āgua. ¹¹ Senduse, oyemboviharere: “Yamondo guarepochi chupe” ehi voi eté yuvireco. Evocoyase Judas oseca voi Jesús mondo āgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, ahese avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oí pipe vo Pascua pieta resendar orohura che remimbohe reseve? ehi’ peyera. ¹⁵ Evocoyase ahe omboyecua oí guasu ivatendar imoingatupri pēu. Aheve pemoingatu mbahe yahu vaheñā —ehi güemimbohe upe.

¹⁶ Evocoyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pītu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pëu: ñepei pe pãhu pendar yande piri ocaru vahe che mondora che amotarëhimbar upe —ehi.

¹⁹ Evocoyase semimbohe ndoyembovîhai tēi yuvireco, iyavei oporandu-randu tēi ñepei-peî chupe yuvireco:

—¿Che pãha? —ehi yuvireco.

²⁰ Omboyeví rumo güemimbohe upe:

—Ñepei eté pe pãhu pendar ahe co omoaqui pan che caro pipe. ²¹ Supi eté che, Ava Riquehir, amboaviyera icuachiapri; jiparaisu catura rumo acoi mbia che mondosar! Aviye catura ahe mbia ndoyesuisse viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Ahese aipo ehi:

—Co che ruvi, ahe che Ru remimbotar ipiasu vahe pëu nara. Oyepiyerera ava rehii recocuer rese nara. ²⁵ Supi eté aipo ahe pëu: ndaihu iri chietera uva ricuer cheu ari oyepotase voi che Ru Tüpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, ahese oñemosai tēira ovesa opacatu rupi yuvireco’ ehi. ²⁸ Che cuerayevire rumo aso voi etera pe renonera Galilea ve —ehi.

²⁹ Evocoyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ëgüe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pïtu pipeve voi eté tacura ñehe yupagüe renondeve, “Ndaicuai vahe evocoi mbia” erera mbosapi oyupagüer rupi cheu —ehi.

³¹ Ahe rumo,

—Yepe che amano tēira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri tēi avei yuvireco chupe.

Jesús oyerogui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohava, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambovîhai eté oico ³⁴ aipo ehi:

—Che cūrîtei ndavîhai eté. Esepia, che hã oyandu ité manosa. Pepita rane cohava, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoyase oso tenonde catumi. Aheve oyaivi ivi rese oso, oporandu Tüpa upe mbahe tasi vahe reimeñhi água oyeupe. ³⁶ Oyerogui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tēi sui eve; tayapo eme che remimbotar tēi, nde remimbotar rupi catu tayapo” ehi.

³⁷ Ipare oyeví güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropesii upe?

³⁸ Pemahemoha, peyerogui mbahe tēi pipe pe viapiñhi água. Pe niha pequerēhi ité viña, pe retocuer tēi rumo nipiratai pëu —ehi.

³⁹ Ichui oso iri oyerogui, aipo ehi tupri avei oñehe. ⁴⁰ Ipare oyevisse, osesapiha iri iqueseve tēi avei. Esepia, sopesii nomboyeroyai eté yuvireco, ahese ndoicatui eté iñehe mboyeví yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mondo água ava yangaipa vahe povrive. ⁴² Pepūha, yaso. Esepia, cōimi eté che amotarēhisar upe che mondo vaherã secōi —ehi.

Jesús ipisisa

⁴³ Jesús oñehe vitesese ohã, Judas oyepota oso chupe, ahe doce pãhu pendar semimbohe, iyavei setá ava yugüeru quise pucu, ivira reseve-seve supi. Ahe pahi eta rerecuar, Moisés porocuita rese oporombohe vahe, judío rerecuareta porocuita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secōi vahe supi ovinose oquise pucu. Ipípe oyasia pahi rerecuar ivate catu vahe rembiguai nambi. ⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi água. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tūparove vichico, na ndapeyei eté cheu. Co rumo ãgüe peye icuachiapri mboaviye água cute —ehi.

⁵⁰ Ahese semimbohe oñemosaipe oseyá Jesús ahe ae tupri imoha yuvireco. ⁵¹ Mbia chihivahe rumo turucuar pípe güerañomi oñemama vahe supive secōi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoyase Jesús víraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuita rese oporombohe vahe avei no. ⁵⁴ Pedro avei amombri rupive tēi oi que ité oso pahi rerecuar ivate catu vahe rēta āchisa pípe. Aheve oguapiño mbia sundao pãhuve tata ipive oyephe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherã Jesús rese yamotarēhisave yuca uca água yuvireco; ndoicatui eté rumo yuvireco. ⁵⁶ Iyavei setá iteanga tēi semira yuvireco sese; oyecopí-copí tēi rumo güemira pípe. ⁵⁷ Amove aipo ehi tēi yuvireco seco momara água:

⁵⁸ —Ore orosendu ñehe aipo ehise: ‘Che opara amonduru co tūparo ava tēi rembiapo. Ipare rumo mbosapí arí rupi opara amopuha. Ndahe iri chira evocoyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboyevii chira vo ñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropĩsirosar ité vo nde ereico, Tūpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayevíse avei íva quiha rese curi —ehi chupe.

⁶³ Evocoyase pahi rerecuar ivate catu vahe omondo oturucuar aipo ehi:

—¿Mbahe iri vo yande yaipota vite yaico? ⁶⁴ Yasendupa niha aipo Tūpa upe ñehe-ñehe tēisa, ¿mara ehi aipo evocoyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondīvi-ndīvi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tūparo rārosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe seci. Aheve cuña oyepota ou pahi mborerecuar ivate catu vahe rembiguai chupe. ⁶⁷ Osepiase Pedro iyepohese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osẽse oquendipive ohã, ahese oñehhe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndaheí eté che” ehiño. Iparemi tẽi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoyase,

—¡Tũpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehhe imoñuviriosa rupi. Ahese Pedro oyemomahenduha, “Tacura ñehhe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tẽi mbahe sembiaviẽhi yuvireco chupe.

⁴ Evocoyase Pilato oporandu iri chupe aipo ehi:

—¿Mahera vo ndereñehheí eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoyase, “¿Mara ehi rutei pĩha?” ehi tẽi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepei ava soquendapri renose ãgua Pascua pieta pipe ava rehii porandusa rupi yepi. ⁷ Mbía Barrabás serer vahe, ahe pipeve avei soquendasa yuvireco ambuae oporapichi vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipotã amose vaheerã judío rerecuar? —ehi.

¹⁰ Esepia, Pilato oicuaño ité ava rese yemoecatẽhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosẽ’ ombohe ati-ati uca ava yuvireco. ¹² Evocoyase Pilato oporandu ahe ava upe:

—¿Mbahe vo peipotã ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atiño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborerecuar rēta sui ambuae oi pipe, aheve opacatu omboetasa omonuha yuvireco. ¹⁷ Aheve omboyemunde turucuar pīraumbi vahe pipe yuvireco, ipare yu piapri omonde ñaca rese. ¹⁸ Sāse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondivi-ndivi avei oñenopiha-piha avei sovai yuvireco imboeteisave angahu. ²⁰ Mara-mara tēi sereco pare, ovirocua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vinose ocarve yatica āgua yuvireco.

Jesús yaticasa curusu rese

²¹ Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voñño tēi yuvireco chupe.

²² Jesús oviraso Gólgota serer vahesave yuvireco (‘Ava Āca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. ²⁴ Evocoyase oyatica yuvireco. Ipare sundao iguayño Jesús turucuar rese ‘¿uma piha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oī. ²⁷ Supive avei yaticasa ñuvirío imonda rai vahe ñepeí mbahe rese ipocosa coti, ambuae mbahe rese ipocoēhisa coti. ²⁸ Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ēgüe ehi avei pahi eta rerecuar, oporombohe vahe avei Moisés porocuita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. ³² ¡Poropisirosar Israel rerecuar guasu, toyeeroyi ahe ae curusu sui cūrteí, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pītu ivi rupi. Ēgüe ehi las tres rupi. ³⁴ Ahese tupri avei Jesús oñehe pīrata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoyase ñepeí imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toihu’ oya:

—Ēgüe tehiño rane, ¿oura piha Elías seroyi āgua curusu sui? —ehi.

³⁷ Ahese Jesús sāse pīrata. Ipare omano. ³⁸ Aheseve tūparo asiasa turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohā. Osenduse Jesús rāse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osepiase catu yuvinoha; ahe yuvirecoi María Magdalena, José si María, ahe avei Santiago chíhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipitívii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pītu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tūpa mborerecuasa osāro vahe oico, oquerēhisa pipe ité oique oso Pilato upe oporandu āgua

Jesús rehögüer rese. ⁴⁴ Pilato rumo oyepihamondii tēi, “Omano” hese. Oñehe sundao rerecuar upe oporandu ãgua ‘¿marase vo ãgüe ehi?’ ⁴⁵ Sundao rerecuar omombehuse chupe, ahese omondo sehögüer José upe. ⁴⁶ Evocoyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiaño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe sñacua vahe Jesús rehögüer rese nara yuvireco. ² Iyavei añihiveive, yipindar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava pñha co tehögüer rovapisa virocua yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihã, ⁵ yuviroiquese tehögüer ruvipave yuvireco, aheve osepia ombahe rese pocosa coti mbia chñhivahe, iturucuar pucu morochi vahe oguapise oñ. Aheve cuña oyembosiquiye yuvireco. ⁶ Ahe rumo aipo ehi chupe:

—Pesiquire eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohave. Pese pia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pese piara mbahe che remimombehu rupi tupri’ peyera —ehi.

⁸ Evocoyase ahe cuña yuvinosese tuvipa sui, yuvinoña yuviraso, oririi avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipindar María Magdalena upe, ahe ichui acoi siete tupri carugar opa omboyepipi. ¹⁰ Ahe oso imombehu supindar upe. Ahe rumo oyaseho vite oviharēhisave yuvireco. ¹¹ Osenduse cuña ñehe: “Jesús ocuerayevi, che ité ase pia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñhengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pñsirosa resendar peico. ¹⁶ Acoi viroya vahe, iyavei oñeapiramo vahe, ahe oñepisirora yuvireco; acoi ndoviroyai vahe rumo, ahe imocañipirã tēi yuvirecoira. ¹⁷ Co mbahe poromondiisa omboyecua che reroyasar yuvireco: Che rer pipe omboyepipira carugar ava sui. Oñehe aveira ñehesa ndicuasai vahe pipe yuvireco. ¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tüpa acato coti oñ. ²⁰ Semimbohe evocoyase opa yuviraso opacatu ivi rupi ñehesa pñsirosa resendar mombehu. Yande Yar avei oipñtivii, iyavei mbahe poromondiisa pipe omboyecua uca ité ñehesa pñsirosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pãhufe co Jesucristo recocuer resendar. Acoi ava yípisiuve osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yípisiuve opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoyase nde ereicua tuprira co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha ãgua

⁵ Yípindar Jesús ha renondeve, Herodes mborereciar ivi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Tüpa upe; viroya tupri opacatu Yar porocuita yuvireco. Evocoyase ndipoi eté que ava “mara” ehi vahe yuvireco chupe. ⁷ Zacarías rumo yípisiuve ndatahii vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepei ari aipo osupiti icuaita tüparo pipe imboetasa reseve iporaviqui ãgua Tüpa rovaque yuvireco. ⁹ Pahi recosa ité ãgüe ehi aracahe suive, ahese iporavosa Zacarías yípindar yasiapri tüparo maranehi pipe oique vahe ãgüe itaisi rapí ãgua. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tüpa rembiguai repiase aipo, oyembosiquiyé iteanga. ¹³ Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese nde sembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyemboviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tüpa rovaque. Ndoihiu chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaëhi viteseve. ¹⁶ ãgüe ehira omonguerëhi setá ava judío Yar Tüpa reroya iri ãgua oico. ¹⁷ Ahe virecora espíritu pīratasa oyese oyoyara Tüpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya ãgua rese’ oyapave. ãgüe ehira ava mbohe imoingatu yande Yar pisi ãgua sereco —ehi chupe.

¹⁸ Evocoyase,

—¿Mara ahera pīha aipo reroya? Che rumo acuacuami eté vichico, iyavei che sembireco ocuacuami avei no —ehi Tüpa rembiguai upe.

¹⁹ —Aní —ehi chupe—. Che aico Tüpa rembiguai Gabriel, Tüpa rovaindar. Ahe niha che mbou ndeu che ñehe ãgua iyavei co ñehesa aviye vahe mombehu ãgua. ²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tüpa rembiguai chupe.

²¹ Osãro pucu tēi aipo ocarve ambuae imboetasa eta yuvireco. “¿Mahera pīha nose vitei tüparo pipe sui?” ehi tēi yuvireco chupe. ²² Osēse aipo tüparo pipe sui, niñehengatui voi eté. “Ñaro osepia mbahe tüparo pipe” ehiño ité aipo imboetasa eta yuvireco chupe. Ipo ãta-ãta tēi aipo oñehengatuëhise mbahe mombehu oico.

²³ Ipare omboaviyese ocuaita tüparo pipe, oyevi oso güëtave. ²⁴ Coiye aipo sembireco Isabel ipuruha oico. Judío porocuita mboyeroyasave nose iri eté ambuae ava piri

poyandepo yasi rupi. Ipíhañemoñeta: ²⁵ “Yar Tūpa ité ěgüe ehi cheu ava che rese ñeheēhi iri āgua yuvireco” ehi vorivetesá pipe aracahe.

Tūpa rembiguai Jesús yesu āgua omombehu

²⁶ Coiye seis yasi pipe Tūpa omondo güembiguai Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe āgua; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tūpa rembiguai oique co cuña rētave aipo ehi chupe:

—¡María, Tūpa nde rovasa, erereco mbahe icatupri vahe pĩtiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pĩha co aipo ehi cheu?” ehi tēi osiquiyepave opíhañemoñeta rereco. ³⁰ Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua. ³¹ Cūrítei voira rumo ndemembira: ererectora nde membri; ahe serer-ra Jesús. ³² Ahe niha secouvicha catu vaheerã secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecuar guasu seco āgua inungar tamoi David aracahe. ³³ Mborerecuar guasu secoira judío recua rupi apirēhi vaheerã; imborerecuasa niha apirēhi vaheerã ité secoira —ehi.

³⁴ Evocoyase ahe aipo ehi:

—¿Mara ahera vo aipo che membri viña? Esepia niha, ndaico vıteı vahe cuimbahe rese —ehi Tūpa rembiguai upe.

³⁵ —Espıritu Santo ogüeyıra nde harıve ıva quıha nungar; Tūpa güeco pıratasa pipe nde momembira. Sese acoı ohase nde membri seco maranehi vahe, “Tūpa Rahir” hesara chupe. ³⁶ Cūrítei nde mu Isabel aveı ocuacuami pipe imembi oico; ahe niha ndimembii vahe yıpındar viña, cūrítei rumo vıreco seis yasi omembri vie pipe. ³⁷ Esepia niha, Tūpa upe ndıpoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aıco, tayaviye ayase Tūpa remıbotar cheu nde ñehe rupi —ehi. Aipo ihe pare, Tūpa rembiguai oyepepi oso ichui.

María oso omu Isabel pıri

³⁹ Ahese María oso voi eté ivıtri rupi tecua ivı Judea ve. ⁴⁰ Aheve aipo Zacarías rēta pipe oıquese oso, oyapo “avırave” omu Isabel upe. ⁴¹ Evocoyase Isabel rie pipe omıı imembri iñehe renduse. Ahese Espıritu Santo oıque Isabel avıterve. ⁴² İpare osapucaı pırata aipo ehi chupe vorivetesave:

—¡Tūpa nde rovasa cuña opacatu sui, iyaveı osovasa nde membri! ⁴³ Noromohai eté che pıri ereyu vaheerã viña, che Yar sı. ⁴⁴ Esepia, cheu “avırave” ereyapose, che membri omıı voi vorivetesave che rie pipe. ⁴⁵ ¡Sovasaprı ereıco! Esepia, ereroya ité ñehesa ndeundar. Iyaveı Tūpa omboavıyera güemıombehu nde rese —ehi Isabel chupe.

⁴⁶ Evocoyase aipo ihese,

“Che niha amboeteı che Yar vıchıco;

⁴⁷ cherorıveté Tūpa che Pısirosar rese.

⁴⁸ Esepia, ahe omahe che rese che reco yemominısa pipe seroyasar che recosave.

Co pipe suıve, ‘Sovasaprı secoı’ ehıra opacatu ava yuvıreco cheu.

⁴⁹ Esepia niha, Tūpa mbahe mboavısarēhi, oyapo mbahe tuvıchá vahe cheu.

¡Tūpa imboeteıprı catu tasecoı yepı!

⁵⁰ Ahe oıparaisuereco opacatu omboeteısar yepı.

⁵¹ Nomboavai eté mbahe yapo.

Osecoreroıı ava oyemboıvate ai tēı vahe.

⁵² Vıroyı mborerecuar seco pırata vahe pıratasa sui; ava seco mbegüemi vahe rumo osecomboıvate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipĩtivii niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mondo ãgua ⁵⁵ güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesá pipe omu

Isabel upe.

⁵⁶ Ipare María opĩta Isabel piri mbosapi yasi rupi. Ichui oyeví oso güëtave.

Juan Oporoãpiramo vahe haragüer

⁵⁷ Osupitise ari Isabel upe, imembira. Ahe imembri cuimbahemi. ⁵⁸ Imu iyavei icotindar oyanduse Tũpa rembiapo mbahe aviye vahe, aipo ehi yuvireco chupe: “Aviye ai catu Yar Tũpa secoi co cuña rese” ehi vorivetesave yuvireco. ⁵⁹ Ocho ari pipe aipo, ahe pĩtani ombocircuncida yuvireco judío porocuita mboyeroyasa pipe. Ipare aipo omondo pota iyésupa Zacarías rer yuvireco sese viña, ⁶⁰ ichi rumo,

—Aní —ehiño—. Juan itera rumo serer —ehi.

⁶¹ —¿Mahera vo? Ndipoi eté rumo nde mu rer aipo nungar —ehi yuvireco chupe.

⁶² Evocoyase aipo omahe pĩtani yesupa rese yuvireco ‘¿mbahe pĩha ahe omondo pota sererguã viña?’ oyapave yuvireco. ⁶³ Evocoyase aipo iyésupa oporandu ivirapemi rese sese serer oicuachía vaherã. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei pĩha co?” ehi tẽi oyeupe yuvireco. ⁶⁴ Ahese ramo Zacarías iñehengatu, omboipi Tũpa upe osapucái oico. ⁶⁵ Opacatu aipo sãta cotindar oyembosiquiye tẽi yuvireco, iyavei aipo opacatu Judea recua rupi omombehu-mbehu mbahe osepiá vahecuer yuvireco. ⁶⁶ Mbahe osendu vahecuer rese avei aipo oporandurandu oyeupe yuvireco: “¿Mbahe pĩha aipo pĩtani oyapora curi?” ehi. Esepia niha, supi eté Tũpa osovasa.

Zacarías sapucái agüer

⁶⁷ Zacarías, Espĩritu Santo pĩratasa pipe, oñehe Tũpa oyeupe ñehesa pipe aipo ehi:

⁶⁸ “¿Yande Yar Tũpa imboeteipri tasecoi!

¡Esepia niha, ahe ou yande judío yaico vahe pĩsiro ãgua!

⁶⁹ Ombou niha Poropĩsirosar güembiguai David suindar yandeu.

⁷⁰ Ëgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pĩsirora yande amotarẽhimbar sui.

⁷² Ëgüe ehi Tũpa imbou oporoparaisuerecosa yande ramoi aracahendar upe, iyavei iyemomahenduha ãgua güemimbotar maranehi mombehu agüer rese.

⁷³ Evocoyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarẽhimbar povri sui ‘tache mboetei osiquiyeẽhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tũpa ivate vahe ñehe mombehusar secoi’ ehira ava yuvireco ndeu. Esepia, nde eremoingatura ava recocuer Yar pisi ãgua senondeve eico.

⁷⁷ Supi eté nde niha eremboyecua opacatu ava Tũpa upendar yuvirecoi vahe upe angaipa sui ñeroisa pisi ãgua iñepisiro ãgua.

⁷⁸ Esepia, yande Ru Tũpa, oporoparaisuerecosa pipe ombou oporoesapesa iva pendar yandeu yande reco mbopiasu ãgua

⁷⁹ iyavei ava Tũpa cuaparẽhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pĩtumimbisave yuvirecoi vahe, ocañi tẽi vaherã yuvireco” ehi Zacarías.

⁸⁰ Ichui pĩtani ocuacua iyavei vireco pĩratasa Espĩritu suindar oyese. Ipare rumo oso oyemboerecua ivi iporupirẽhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rëise. ³ Opacatu ava yuviraso güecua yacatu rupi oyecuachía ägua yuvireco.

⁴ Sese José avei osë Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secói. ⁵ Ègüe ehi oyoya yuviraso güembirecovi María rese oyecuachía ägua. María rumo imembira pota ité oico. ⁶ Aheve oyepota ramose, osupiti ari imembira ägua. ⁷ Aheve oha imembri yipindar vahe cuimbahemi. Ahese María oyao omembri turucuar pipe, ègüe ehi imoñeno imondo mbahe mimba rembihi riru pipe. Esepia niha, ndoyosui eté oque ägua aheve yuvireco.

Tüpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pïtu pipe yuvireco. ⁹ Aviyeteramo tēi oyemboyecua Tüpa rembiguai iva pendar chupe. Tüpa porañetesa avei sendi yivii chupe yuvireco. Ahe sepiase, oyembosiquiyé iteanga tēi yuvireco ichui. ¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu ägua pëu pe mboviharete ägua iyavei opacatu ava mboviharete ägua avei no. ¹¹ Co pipe oha David recua Belén ve Poropisrosar pëu nara. Ahe niha Tüpa Rembiporavo, pe Yarguã secói. ¹² Icuä ägua peyosura pïtani yaopri tuprimi vahe tui mbahe mimba rembihi riru pipe” ehi.

¹³ Aviyeteramo tēi oyemboyecua ambuae setá Tüpa rembiguai iva pendar yivii yuvireco. Tüpa upe osapucaí yuvireco aipo ehi:

¹⁴ “¡Imboeteipri tasecoi Tüpa ivave!

¡Hvive ava Tüpa rembiaisu toyuvirecoi tupri oyeaisusa pipe!” ehi osapucaí yuvireco.

¹⁵ Opase oyevi Tüpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoyase ipoyava yuviraso. Ipare osepia María, José, Jesús pïtani avei yuvireco cute. Ahe pïtani omoñenomi mbahe mimba rembihi riru pipe ino. ¹⁷ Ipare yuvinose omombehu-mbehu ambuae ava upe Tüpa rembiguai remimombehugüer pïtani resendar ñehesa yuvireco. ¹⁸ Evocoyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevise ovesa rãrosar yuviraso, omboetei iyavei osapucaí Tüpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pïtani seropovëhesa Tüpa upe tūparo pipe

²¹ Ocho ari pipe ahe pïtani ombocircuncida yuvireco; omondo sererguã Jesús yuvireco, ahe terer tupri avei acoi Tüpa rembiguai omombehu María upe imembiehi viteseve.

²² Ipare omboaviyese ohari güëtave oñemoatiro ägua, ahe aipo ègüe ehi Moisés porocuita rupi yuvireco yepi, ahese vinose pïtani seraso tecua guasu Jerusalén tūparo pipe seropovëhe ägua Yar upe yuvireco. ²³ Ègüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pïtani cuimbahe mini yuviroha vahe ipehasara Tüpa upe nara yepi” ehi. ²⁴ Yuviraso oporerecosa reropovëhe ägua yuvireco yande Yar porocuita rupi: “Ñepeí oyovaichor reseve picuhi, anise ñuvirío apicasu peropovëhera” ehi vahe.

²⁵ Ahe pipe mbia Jerusalén ve secói Simeón serer vahe. Ahe mbia aviye etepri vahe. Oyerure vahe Tüpa upe, osãro vahe avei Israel recua pendar Pisisrosar imombehupri. Ahe secói vahe ité Espiritu Santo rese. ²⁶ Ahe chupe Espiritu Santo opa uca oicua “eresepia rane itera Poropisrosar Tüpa remimbou nde mano renondeve” ehi vahe. ²⁷ Ahe ari pipe

Espíritu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuita rupi tupri,²⁸ ahese Simeón oyemboya oso sese, osupi ichi sui, viroyeroqui Tūpa upe señoa aipo ehi:

²⁹ “Che Yar, cūrítei che, nde rembiguai, amano tupriño itera.

Esepia niha, nde remimombehugüer eremboaviye ité cheu.

³⁰ Asepia ité niha Poropĩsirosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esepia, omboyecuara mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyerogui.

³³ José iyavei María ndoyembovĩhai tēi yuvireco pītani rese Simeón yeroqui renduse.

³⁴ Evocoyase Simeón osovasa ahe pītani iyésupa reseve. Ipare aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuara mbahe ava upe. Amove rumo viroĩroñora yuvireco. ³⁵ Ipipe sui ava pĩhañemoñetasa icuasara curi. Iyavei co opacatu mbahe tasira nde pĩha pipe inungar quise pucu osasara nde pĩha viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete araviter rupive. ³⁷ Cūrítei secoi omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pĩtu, ari rupi oyecuacusa pipe iyavei oyeruresa pipe avei oico no. ³⁸ Ahe evocoyase ahesa reseve avei ou pītani upe, “Aviye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua pĩsiro āgua upe oico.

Jesús pītani reroyevi agüer Nazaret ve

³⁹ Evocoyase opacatu Moisés porocuita mboaviyere, opa oyevi Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipĩrata catu irimi. Esepia, Tūpa osovasa ité sereco no.

Jesús chĩhivahe tūparo pipe secoi

⁴¹ Iyésupa yuviraso araviter yacatu Jerusalén ve Pascua pieta repia yepi. ⁴² Jesús doce araviter vírecese, ahese víraso iyésupa Jerusalén ve oyeupi pieta repia yuvireco. Esepia, ěgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opĩtaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyevi iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapĩ ava Tūpa porocuita rese oporombohe vahe pāhuve oĩ; oyapisaca iñehe rese iyavei oporandurandu ahe ava upe Tūpa Ñehengagüer rese oĩ. ⁴⁷ Evocoyase opacatu ava ndoyembovĩhai tēi imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyésupa, oyepĩhamondii yuvireco. Ahese ichi aipo ehi chupe:

—Che membri, ¿mahera vo ěgüe ere eico oreu? Nde recasa tēi opacatu rupi, ore mopĩhañemoñeta ati uca eve —ehi.

⁴⁹ Evocoyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaheerã? —ehi osi upe.

⁵⁰ Iyésupa rumo ndosenducuai eté aipo oyeupe hesa yuvireco.

⁵¹ Evocoyase oyevi Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu

avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

3

Juan Oporoãpiramo vahe secoi ivi iporupirêhisa rupi

¹ Quince araviter pipe mborerecur guasu Tiberio recose, Poncio Pilato evocoyase mborerecur secoi Judea rupi, Herodes avei mborerecur secoi Galilea ve, tivri Felipe evocoyase mborerecur secoi Iturea ve iyavei Traconite ve, Lisantias avei mborerecur secoi Abilinia ve. ² Anás iyavei Caifás ahe pahî rerecur ivate catu vahe yuvirecoi. Ahese Tūpa, “Emombehu che ñehe ava upe cute” ehi Zacarías rahîr Juan upe oico ivi iporupirêhisave. ³ Juan evocoyase oso opacatu iai Jordán ivîi oico, supi aipo ehi ava upe: “Pemboasi pe angaipa, peyevi Tūpa upe, ahese opoãpiramora Tūpa pëu ñero âgua pe angaipa rese” ehi. ⁴ Co yaviye ité Tūpa ñehe mombehusar Isaías rembicuachiagüer pîpendar aipo ehi vahe:

“Sendusa ivi iporupirêhisave ava sapucaisa aipo ehi vahe:

‘Pemoingatu yande Yar raperã, pemohivi tupri avei’ ehi.

⁵ ‘Evocoyase opacatu ivisocuer opara imboapîposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perî ipãri vahe, ahe imohivisapara; perî ipîcucu ati vahe opara imboapîposa tupri chupe.

⁶ Iyavei opacatu ava osendura ñehesa pîsirosa resendar Tūpa remimbou yuvireco cute’ ehi vahe” ehi.

⁷ Ava rehîi yuvînosepa chupe ‘tayande ãpiramo’ oyapave yuvireco viña. Ahe rumo aipo ehi: “¿Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaherã sui’ ehi tupri tēi pēu? ⁸ Yîpîndar toyecua tupri rane yande Yar upe peyevîsa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepîsiro âgua. Esepîa, Tūpa oicatuño ité co ita sui Abraham suindar nungar tupri apo âgua oyeupe nara yepi. ⁹ Hacha niha imoingatusa voi eté opacatu ivîra ilha naporai vahe sapo rupi yasîa âgua yepi. Yasîapri evocoyase imondosapara tatave” ehi.

¹⁰ —¿Mbahe pîha evocoyase oroyapora ore recocuer recuñaro âgua oroico? —ehi ava rehîi oporandu yuvireco chupe.

¹¹ —Pe pereco vahe ñuvîrío pe camisa, ñepeî pemondo ava ndovîrecoi vahe upe; iyavei pe pereco vahe tembîhu, pemboyahomî tēi ambuae ava ndovîrecoi vahe upe — ehi imboyevî ava upe.

¹² Yugüeru avei movîro ava sui guarepochî rerocuasar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata âgua oroico? —ehi yuvireco chupe.

¹³ Evocoyase aipo ehi ahe ava yuvirecoi vahe upe:

—Anî perocua catu iri guarepochî pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñehe-ñehe tēi chira ava upe sembîapoēhî rese, iyavei peyembovîhañora pe poravîquî repri rese —ehi sundao upe.

¹⁵ Ava rumo, “¿Ndaheî pîha co Poropîsirosar sãrombrî secoi?” ehi tēi Juan upe yuvireco. ¹⁶ Juan rumo aipo ehi opacatu ava upe: “Che opoãpiramo î pipe tēi; oura rumo ambuae che raquîcui, ahe pe ãpiramora Espîritu Santo tata nungar pipe. Ahe seco pîrata catu vahe secoi che sui. Sese cheu ndiyai eté ahe ipîtaquisã yora âgua ichui” ehi. ¹⁷ “Ahe güeru trigo mbovevesa ihîgüer sui ipēha âgua. Sãhîi evocoyase yapocatusa, ihîgüer rumo imondosa tata apîrēhî vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhî güecocuer recuñaro âgua yuvireco’ oya. ¹⁹ Ipare rumo Juan oñehe pîrata mborerecur Herodes upe

secocueraí rese. Esepia, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva. ²² Ipare Espíritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secoi, ²⁴ Elí evocoyase Matat rahir, ahe Matat evocoyase Leví rahir, Leví evocoyase Melqui rahir, ahe Melqui evocoyase Jana rahir, Jana evocoyase José rahir, ²⁵ ahe José Matatías rahir, Matatías evocoyase Amós rahir, ahe Amós evocoyase Nahúm rahir, Nahúm evocoyase Esli rahir, ahe Esli Nagai rahir, ²⁶ Nagai evocoyase Maat rahir, ahe Maat Matatías rahir, Matatías evocoyase Semei rahir, ahe Semei evocoyase Josec rahir, Josec evocoyase Judá rahir, ²⁷ ahe Judá Joanán rahir, Joanán evocoyase Resa rahir, ahe Resa evocoyase Zorobabel rahir, Zorobabel evocoyase Salatiel rahir, ahe Salatiel Neri rahir, ²⁸ Neri evocoyase Melqui rahir, ahe Melqui Adi rahir, Adi evocoyase Cosam rahir, Cosam evocoyase Elmadam rahir, Elmadam evocoyase Er rahir, ²⁹ ahe Er Jesús rahir, Jesús evocoyase Eliezer rahir, ahe Eliezer Jorim rahir, Jorim evocoyase Matat rahir, ³⁰ ahe Matat Leví rahir, Leví evocoyase Simeón rahir, ahe Simeón evocoyase Judá rahir, Judá evocoyase José rahir, ahe José Jonam rahir, Jonam evocoyase Eliaquim rahir, ³¹ Eliaquim Melea rahir, ahe Melea Mena rahir, Mena evocoyase Matata rahir, ahe Matata evocoyase Natán rahir, ³² Natán David rahir, ahe David evocoyase Isaí rahir, Isaí Obed rahir, ahe Obed evocoyase Booz rahir, Booz Sala rahir, ahe Sala evocoyase Naasón rahir, ³³ Naasón Aminadab rahir, ahe Aminadab evocoyase Admin rahir, Admin evocoyase Arni rahir, Arni evocoyase Esrom rahir, ahe Esrom evocoyase Fares rahir, Fares evocoyase Judá rahir, ³⁴ ahe Judá Jacob rahir, Jacob evocoyase Isaac rahir, ahe Isaac Abraham rahir, Abraham evocoyase Taré rahir, Taré evocoyase Nacor rahir, ³⁵ ahe Nacor Serug rahir, Serug evocoyase Ragau rahir, ahe Ragau evocoyase Peleg rahir, Peleg Heber rahir, ahe Heber evocoyase Sala rahir, ³⁶ Sala Cainán rahir, ahe Cainán evocoyase Arfaxad rahir, Arfaxad evocoyase Sem rahir, ahe Sem evocoyase Noé rahir, Noé evocoyase Lamec rahir, ³⁷ ahe Lamec Matusalén rahir, Matusalén evocoyase Enoc rahir, Enoc evocoyase Jared rahir, ahe Jared Mahalaleel rahir, Mahalaleel evocoyase Cainán rahir, ³⁸ ahe Cainán evocoyase Enós rahir, Enós evocoyase Set rahir, ahe Set Adán rahir, Adán evocoyase Tūpa rahir.

4

Jesús recoāhasa

¹ Jesús Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi. ² Aheve cuarenta arí secoise Carugar osecōha. Ndocarui avei oico. Sese ndasiepoi eté. ³ Carugar evocoyase aipo ehi chupe:

—Tūpa Rahir ité nde recose, co ita sui eyapo pan cūrítei —ehi.

⁴ Evocoyase Jesús omboeyi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Carugar upe.

⁵ Ipare Carugar viraso ivate vahesave. Aheve ñepeí reseve opacatu ava-ava tēi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaherā ava

upe che remimbotar rupi. ⁷ Acoi ereñenopihase cheu che mboetei ãgua, ahese opacatu co mbahe ereipsisira nde mahera —ehi tẽi Caruguar chupe.

⁸ —Icuachiapri pipe rumo: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar viraso oyeupi tecua guasu Jerusalén ve. Aheve oviroyeupi tũparo apiterve. Aheve Caruguar aipo ehi chupe:

—Tũpa Rahir ité nde recose, eviapi cohava sui. ¹⁰ Esepia niha, icuachiapri pipe: ‘Tũpa oyocuaира güembiguai eta nde rãro ãgua.

¹¹ Ahe nde mopuhara yuvireco que ñepei ita nde momara rãgüer sui’ ehi —ehi Caruguar chupe.

¹² Evocoyase omboyevi Caruguar upe:

—¡Aní! Icuachiapri pipe niha aipo ehi avei: ‘Ndereseoãhai chira nde Yar Tũpa’ ehi —ehi chupe.

¹³ Ahese Caruguar ndoicatu iri eté Jesús recoãha ãgua oico. Ipare oyepepiño raimi tẽi oso ichui.

Jesús omboipi oporombohe Galilea rupi

¹⁴ Jesús, Espiritu Santo reco pĩratasa pipe, oyevi oso Galilea ve. Ipare serãcua oguata opacatu tecua-tecuami rupi. ¹⁵ Esepia, ahe oporombohe judío tũparo pipe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbituhusa ari pipe oique tũparove inungar oyapo yepi. Ahese opũha ‘tayeroqui icuachiapri maranehi pipe’ oya.

¹⁷ Evocoyase tũparo rese ñangarecuar pĩtiviisar omondo Tũpa ñehe mombehusar Isaías rembicuachía chupe. Oyorase ahe cuachiar, oyerogui icuachiapri aipo ehi vahe pipe ohã:

¹⁸ —“Yar Espiritu secoi che rese.

Esepia niha, ahe ombou che cuaitarã cheu co ñehesa aviye vahe mombehu ãgua ava iparaisu vahe upe.

Che cuaita avei ava mbahe-mbahe tẽivrive yuvirecoi vahe senose ãgua ichui, iyavei ava ndasesapisoi vahe ambosarecora; iyavei che cuaita ava mbahe-mbahe tẽi rasicuer oiporara vahe sui senose ãgua,

¹⁹ iyavei ‘cũritei Yar oyemoingatu oporovasasa mondo ãgua pẽu’ he ãgua” ehi icuachiapri pipe —ehi oyerogui.

²⁰ Sese oyerogui pare, oyapoapipa cuachiar imondo tũparo rese ñangarecuar pĩtiviisar upe. Ipare oguapi oĩ ava rembiepiave. Ahese opacatu tũparo pipendar omahe ati yuvireco sese. ²¹ Evocoyase ahe oñehe aipo ehi:

—Cũritei yaviye co icuachiapri pipendar opacatu pe rovaque —ehi.

²² Opacatu ava oñehe tupriño ité yuvireco sese. Ndoyembovĩhai tẽi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tẽi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ãgüe ere avei eyapo cohava nde recua pipe ité’ peyera cheu —ehi.

²⁴ —Supi eté, ndipoi eté niha que ñepei yepe Tũpa ñehe mombehusar oipisi tupri vahe güecua pipe yuvireco yepi. ²⁵ Supi tupri ité Tũpa ñehe mombehusar Elías recose, iñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, ²⁶ Tũpa rumo nomondoi Elías cuña imer mano vahecuer Israel pendar upe ipĩtivii ãgua. Ëgüe ehi rumo omondo cuña ndahei vahe Israel pendar ipĩtivii ãgua. Ahe cuña tecua Sarepta pendar, ahe Sarepta Sidón ipĩimindar. ²⁷ Iyavei setá ava oime Israel recua

pīpendar imbaheasi vahe lepra rerecosar yuvireco evocoi Tūpa ñehe mombehusar Eliseo recose. Evocoi ava yuvirecoi vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tūparo pīpendar oñemoiró iteanga yuvireco sese aipo mbahe renduse. ²⁹ Sese opa voi eté opūha Jesús reraso āgua tecua pīpe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. ³⁰ Jesús rumo ipāhu sui osē tupriño oso.

Jesús ombogüera mbia caruguar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pīpe. ³² Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pīratasa pīpe.

³³ Aheve judío tūparo pīpe oime mbia vireco vahe caruguar oyese, ahe oñehe pīrata Jesús upe:

³⁴ —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi āgua tēi? Che orocua ité. Nde niha seco maranehi vahe ereico Tūpa suindar —ehi chupe.

³⁵ Evocoyase,

—¡Quiriri, esē co mbia sui! —ehi oñehe pīrata caruguar upe.

Ahese caruguar omboviapi ahe mbia ava rovai, osē ocua ichui; nomomarai eté rumo.

³⁶ Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pīpe oyocuai caruguar ava sui imose āgua! —ehi yuvireco.

³⁷ Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoyase Jesús osē judío tūparo pīpe sui oso, oique Simón Pedro rētave. Simón rembireco si sohi iteanga ou. Evocoyase oñehe ahe pendar sese Jesús upe ‘tombogüerami tēi’ oyapave yuvireco. ³⁹ Evocoyase Jesús oyeaivi oso chupe sohi sui imbogüera āgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoyase opo omondo iyacatu iharive ñepei-peí imbogüera. ⁴¹ Iyavei setá ava sui opa omose caruguar. Evocoyase caruguar osapucái tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñehe pīrata caruguar upe, nomoñehe iri. Esepia niha, caruguar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cōhe ramomise, Jesús osē tecua pīpe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi āgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherã niha che mbousa —ehi.

⁴⁴ Ēgüe ehi Jesús uguata oporombohe Judea tūparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñehengagüer yuvireco. ² Aheve oime ñuvirío carite imbehí popive. Ahe ava pira mbohasar

opa yuvínose evocoi carite pipe sui yuvireco. Ipare opira mbohasa oyosei yuvinoi.
³ Evocoyase Jesús osepiase, oha Simón carite pipe iyavei aipo ehi chupe: “Tosiri catumi tēi chíhi coi coti iai popi sui” ehi. Ipare oguapi oĩ carite pipe. Aheve ombohe ava cute.

⁴ Oñehe pare aipo ehi Simón upe:

—Yaso ipa tipí catu vahesave. Aheve erembohara pira —ehi.

⁵ Simón rumo omboyeve chupe:

—Porombohesar, orosãha tēi niha pĩtu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ēgüe ehise, pira rehii omondoromi ombohasa yuvireco. ⁷ Ahese oyaiti yuvireco omboetasa evocoi ambuae carite pipe yuvirecoi vahe upe ‘toyugüerumi yande pĩtivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai aipo ehi chupe:

—¡Eyepemimi tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ěgüe ere aveira ava reca cheu nara —ehi.

¹¹ Evocoyase opa vínose carite ivi ãtasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepeí ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopiha oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoyase, opocose sese,

—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porerecosa nde cuerasa resendar Moisés porocuita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerãcua rumo oyembouvicha catu-catu iri eté. Evocoyase setá ava oyemboya yuvireco sese iñehe rendu ãgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepeí ari Jesús oporombohe oico. Yar Tūpa pĩratasa vireco oyese ava mbogüera ãgua. Aheve avei oguapi yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyi ãgua yuvireco viña; ¹⁹ ndoicatui eté rumo seroique yuvireco ava rehii pãhu rupi. Evocoyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuase co mbia yuvirecoi vahe oyese yeroyasa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipiñañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero ãgua” ehi tēi oyeupe yuvireco.

²² Ahe rumo oicuaño ité ahe ava piñañemoñetasa. Evocoyase aipo ehi chupe:

—¿Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero āgua —ehi.

Evocoyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucai oso güētave Tūpa upe.

²⁶ Ahese opacatu tupri ité ava, “¿Too! ¿Mara ehi rutei pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepia vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuasar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoyase Leví opūha. Oseyapa oporaviquisa, oso supi.

²⁹ Ipare Leví oyapo pieta guasu chupe nara güētave. Aheve iyemborisave setá imboetasa ava guarepochi rerocuasar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¿Mahera ru pecaru iyavei pecahu guarepochi rerocuasar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tūpa uve iyeve āgua yuvireco —ehi.

Yecuacusa rese ñehesa

³³ Ipare ava oporandu yuvireco chupe:

—¿Mahera vo oyecuacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyeve chupe aipo ehi:

—Ndiyai eté ichohopri mboyeuacu mendasave imer oicove viteseve ipāhuve.

³⁵ Oimera rumo ari imer reraso āgua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyeve āgua:

—Ndiyai eté ava upe virocua vāherā turucuar ipiasu vahe sui ambuae turucuar cuacuami vahe apete āgua. Esepia niha, ēgüe ehise evocoyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pirer cuacua pipe no. Esepia niha, ēgüe ehise, uva ricuer piasu evocoyase opara ombopu mbahe pirer cuacua viña, ēgüe ehira oyepiyerepa, mbahe pirer avei evocoyase ocañi tēira viña. ³⁸ Uva ricuer piasu rumo yamondora mbahe pirer piasu pipe. ³⁹ Iyavei ndipoi eté que ava oiñu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepe mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuviraso trigo rāhii. Ipare oyequii opo pipe sāhii yuvireco igua. ² Evocoyase fariseo osepiase, aipo ehi yuvireco semimbohe eta upe:

—¿Mahera peporaviquiño tēi co mbituhusa ari pipe peico! —ehi.

³ Jesús rumo omboyeve chupe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha oique ité Tūpa rēta pipe, opoco pan imboeteipri Tūpa upendar rese evocoi pahi upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oique judío tūparo pipe oporombohe oico. Aheve mbia yasu coti ipo nomii vahe secoi. ⁷ Moisés porocuita rese oporombohe vahe, fariseo avei omahengatu Jesús rese yuvireco ‘¿ombogüerara pīha cō mbia mbituhusa ari pipe?’ oya; ‘yaiñhengapo angahu’ oyapave tēi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohava terehã ava pãhuve —ehi.

Ahe mbia evocoyase opūha, opita aheve ohã ⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yaipĩsiro pīha ava recocuer; yamocañi uca tēi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoyase oichoho oyiva; evocoyase ipo ocuera tupri ité. ¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara āgua?’ oya.

Jesús oiporavo doce tupri güemimboherã

¹² Ahe ari rupi Jesús oso ivitrive, oyerure pĩtu momba tupri Vu upe oico. ¹³ Cōhese, “Periό” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi. ¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simón, ava güecua rese secatēhĩ vahe pāhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi ñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pīratasa pipe oico.

Ava sorivete vahe iyavei ava ndoyembovīhai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tūpa mborerecuasa pēu nara ité secoi.

²¹ “Perorivete catu cūrīteindar ndasiepoi vahe. Esepia niha, pehĩtarora peico curi.

“Perorivete catu pe acoi ava cūrītei oyaseho vahe. Esepia niha, peviharetera coiye peico.

²² “Perorivete catu pe acoi ava pe amotarēhise, pe mboyepipiñose avei oyesui yuvireco, ñehe-ñehe tēise yuvireco pēu pe amotarēhisave, iyavei acoi viroĩrose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovīhaño iyavei perorivete catuñora ahe ari pipe peico. Esepia niha, ipare peipisira porerecosa tuvichá

vahe ivave. Ēgüe ehi tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

²⁴ “¡Peparaisu catu rumo cūrítei mbahe yar peico vahe! ¡Esepia niha, pemboaviye pe rorivetes peico!

²⁵ “¡Peparaisu catu acoi pe ihĩtaro vahe cūrítei! ¡Esepia niha, ndaperĩepoi chira peico coiye!

“¡Peparaisu catu acoi pevĩha vahe pe pietase cūrítei! ¡Esepia, peyasehora pe viharēhisa pĩpe peico coiye!

²⁶ “¡Peparaisu catu acoi peipĩsi vahe pe mboeteisa opacatu co ivi pĩpendar ava tēi sui! ¡Esepia niha, ěgüe ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

*Iyacatu yasa*isu yande amotarēhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. ²⁸ Pe porandu Tūpa porovasasa rese ava pēu iñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotĩdar avei pemoporēhiñora chupe. Iyavei acoi que ava virocuaño tēise pe yeosa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese. ³¹ Acoi mbahe peipota vahe ambuae ava oyapo vaherā pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipĩpe. Esepia niha, ava naporai vahe ěgüe ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime aviye vahe ipĩpe? Esepia niha, ava angaipa viyar avei ěgüe ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoiyase oime aviye vahe ipĩpe? Esepia niha, ava angaipa viyar ěgüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevi āgua vichico’ ndapeyei chietera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahĩr peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tūpa oporoparaisuereco yepi” ehi.

*Ndiyai ambuae ava sero*ĩrosa

³⁷ “Ndiyai, ‘Oyavi ité mbahe’ peye voiño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoiyase Tūpa omondoño itera mbahe aviye vahe pēu inungar-ra omondo pe mbahe rĩru pĩpe pēu sāhambri tupri aviye vahe viña. Ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pĩha ñepe ndasesapisoi vahe ambuae ndasesapisoi vahe reroguata? ¡Aní eté! Esepia, oyoya voi oviapira que ivicuar pĩpe yuvireco viña. ⁴⁰ Ñepe yepi niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropĩtivii mbahe nde rembiavi rese’ peye vaherā chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sāchi ati vahe sui higuera ha, iyavei ndahipohosai uva, yu pāhu sui. ⁴⁵ Ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe piha pipe sui tēi osē pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güētara ita harive yepi. Yipindar rumo oyoho picucu rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerocuai eté rumo. Esepia niha, vireco ité ovīracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipare amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chíhivahe sundao rerecuar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerācua anduse rumo, oyocuai moviro tēi omboripar judío imboetepri chupe ñehe āgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi: —Ore mboripar sundao rerecuar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu ñehe aipo ehi vahe: “ ‘Che Yar, ereyemañecoi rene. Esepia niha, ndiyai eté che rēta pipe nde reique āgua. ⁷ Sese niha che teieté ndasoi nde reca. Nde ñehe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeu upe, ahe evocoyase oso voi eté; ambuae upe: Erio, ahese, ou voñño ité cheu. Ipare, Ereyapora co mbahe, ahese che rembiguai upe, ahe evocoyase che reroyañño voi’ ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipare aipo ehi vupindareta upe: —Supi eté ndasepiai vahe ité co mbia che reroya tupri vahe nungar judío eta pāhuve —ehi.

¹⁰ Yuviroyevipase sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no. ¹² Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepeu vahe ité viña. Tecua pipendar setá iteanga ava yuviraso supi. ¹³ Cuña repiase rumo, oiparaisuereco. Ipare aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipare aipo ehi tehögüer upe:

—Mbia chíhivahe, che aipo ahe ndeu: ¡Eñarapuha! —ehi.

¹⁵ Evocoyase omano vahecuer oñarapuha oĩ iyavei oñehe no. Ichui Jesús omondo ichi upe. ¹⁶ Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñehe mombehúsar seco ivate vahe yande pãhuve cute —ehi yuvireco.

Iyavei,

—Tūpa niha ou güecua p̃tivii ãgua oico —ehi avei yuvireco.

¹⁷ Ipare co Jesús rerãcua yandusa opacatu Judea rupi, yivirindar rupi avei no.

Juan Oporoãpiramo vahe omondo vupindar Jesús recocuer cua uca ãgua

¹⁸ Juan avei oyandu opacatu co mbahe oico. Esepia niha, supindareta omombehupa co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu ãgua ‘¿nde ité vo Tūpa Rembiporavo aipo sãrombrí ereico, anise oime tie ambuae orosãro vaheerã?’ oyapave. ²⁰ Evocoyase oyepota yuviraso Jesús upe aipo ehi yuvireco chupe:

—Juan Oporoãpiramo vahe ore mbou ndeu co mbahe rese porandu ãgua: ¿Nde ité vo Tūpa Rembiporavo ereico imombehupri ereyu vaheerã, anise ambuae p̃iha orosãrora oroico? —ehi yuvireco chupe.

²¹ Ahe arí pipeve voi Jesús ombogüera setá ava imbaheerã sui oico, ava carugar rerecosar sui avei no. Iyavei ava ndasesapiso vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasapiso vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa p̃isirosa resendar ñehesa” peyera chupe. ²³ ¿Oviharetera acoi ava oyeroyañõ vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porẽhisave, capihiata ivitu ombova-mbova vahe nungar p̃iha? ²⁵ Anise, ¿pesepia tie iturucuar porañete ai vahe iyemboeteise? Ëgüe ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehúsar ité p̃iha? Ahe ité, iyavei evocoi niha ivate catu vahe Tūpa ñehe mombehúsar sui. ²⁷ Ahe chupe ité Tūpa icuachiapri aracahendar pipe aipo ehi: ‘Amondora che ñehe mombehúsar nde renondeve nde raperã moingatu ãgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

²⁹ “Co ñehe renduse opacatu ava, opacatu guarepochi rero cuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviye vahe ité’ ehi eté yuvireco cute. ³⁰ Fariseo eta rumo iyavei Moisés porocuaite rese oporombohe vahe ahe noñeapiramo uca potai vahe Juan upe yuvireco, ahe viroñroño Tūpa remimbotar oyeupendar yuvireco.

³¹ “¿Mbahe rese p̃iha amboyoyara ava recocuer cūríteindar? ¿Mara ehi p̃iha secocuer? ³² Ahe inungar chíhivahe iguayi t̃ei vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe t̃ei mimbi p̃eu, ndapepivoi eté rumo; iyavei orosapucái t̃ei sapucaisa viharẽhisa resendar p̃eu, ndapeyasehoi avei’ ehi. ³³ Esepia, ou Juan Oporoãpiramo vahe oico. Ahe ndohui vahe pan iyavei ndoihui vahe uva ricuer. Pe evocoyase, ‘Co mbia carugar vireco vahe’ peye tupri t̃ei chupe no. ³⁴ Coiye che ayu, Ava Riquehír, acarú iyavei aihu tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar t̃ei iyavei ava guarepochi rero cuasar mboripar t̃ei’ peye avei cheu. ³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe r̃etave Jesús secoi

³⁶ Fariseo Simón serer vahe oñehe Jesús upe: “Terecarumi che p̃iri” ehi. Jesús evocoyase oso s̃etave oguapi oĩ mesave. ³⁷ Ahese cuña angaipa viyar evocoi tecua

pendar secoi vahe oyandu ichose Simón rētave icaru āgua. Sese viroyepota aheve mbahe s̄iācua vahe siru pipe seraso sepīrusu vahe chupe. ³⁸ Aheve oyasehó ite oñenopiha Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe s̄iācua vahe ipi rese. ³⁹ Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰ Evocoyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoyase Jesús aipo ehi chupe:

—Ñuvirío mbia oime virocua guarepochi mbia guarepochi mondosar sui yuvireco. Ñepe virocua guarepochi quiniento tupri mboraviqui repirã ichui. Ambuae evocoyase cincuenta rupive virocua. ⁴² Ipare ndoicatu irise ité imboyevi āgua yuvireco chupe, evocoi mbia guarepochi mondosar iñeroño chupe yuvireco —ehi—. Esãha, emombehu cheu, ¿uma evocoyase osaisu catura mbia guarepochi mondosar? —ehi fariseo upe.

⁴³ —Cheu ndoyavii guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoyase omahe cuña rese aipo ehi Simón upe:

—¡Emahe co cuña rese! Aiquesse acoi nde rēta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipare omombiru oha apri pipe ae no. ⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondo mbahe s̄iācua vahe che āca rese; co cuña rumo opa tupri voi oipichi mbahe s̄iācua vahe che pi rese. ⁴⁷ Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma p̄iha co mbia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe ereipisi p̄isirosa. Sese eso tupriño eico —ehi.

8

Cuña oip̄itivii vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tūpa mborerecuasa resendar oico. Doce vahe apóstol supive yuvirecoi. ² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei María secoi, Magdalena serer yoapisa vahe, ahe ichui osē vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oip̄itivii mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia āgua yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepe mbia osē omaheti oico. Ahe otiapi-ap̄ise mbahe rãhii oso, moviro oiti peri rupi. Ahe opa tēi oicambe yuvireco, iyavei v̄irai opa tēi yuvirohu. ⁶ Iyavei moviro tēi oiti ivi nayanai vahesave ita pãhuve. Sese cūrítei sori; opaño rumo ipiru. Esepia niha, ivi nañaquii chupe. ⁷ Iyavei ambuae oiti yu pãhuve. Ipare oyoya tupri sori yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepepei mbahe miti sui osē” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pĩha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoyase omboyevi chupe: “Pëu Tũpa oicua uca ité mbahe ndicuasai vahe omborerecuasa resendar; ambuae ava rumo ambohe tẽi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tĩsa resendar

¹¹ “Co yembohesa resendar aipo oyapave aipo ehi: Mbahe rãhii ahe inungar Tũpa Ñehengagũer; ¹² iyavei mbahe rãhii peri rupi seitipri, ahe inungar acoi ava osendu tẽi vahe Tũpa Ñehengagũer yuvireco oyapave. Ipare rumo ou vĩrai chupe, ahe inungar carugar ou vahe chupe opaño oyaracua mocañi Tũpa Ñehengagũer sui ‘toviroya eme iyavei toñepisiro eme yuvireco’ oyapave tẽi. ¹³ Acoi mbahe rãhii seitipri ita mahugũer rupi, ahe inungar acoi ava osendu tẽi vahe Tũpa Ñehengagũer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo ovĩracua ãgua; viroya raimi tẽi yuvireco. Oyepotase rumo mbahe tẽi chupe, oyepepi voiño yuvireco ichui. ¹⁴ Acoi mbahe rãhii seitipri yu pãhu rupi, ahe inungar acoi osendu tẽi vahe. Ipare rumo oyemboyepipi uca mbegũeño ambuae mbahe rese opĩhañemoñetá iteangasa pipe tẽi, ombahe eta rese iyavei güemimbotarai mbahe tẽi potasa pipe avei. Ëgũe ehi ahe ava inungar mbahe miti ndihai vahe ité. ¹⁵ Acoi mbahe rãhii seitipri rumo ivi aviye vahesave, ahe inungar ava vireco vahe opĩhañemoñetasa aviye vahe iyavei oyemoingatu voi Tũpa Ñehengagũer rese oyapisaca ãgua yepi; viroya tupri ité no; yuvirecoiño ité sese. Ëgũe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavrive’ ndehi eté chupe; osupiño ivate imoi opacatu oi pipe yuviroique vahe resape ãgua. ¹⁷ Esepia, ndipoi eté mbahe ñomipri, ndayasepiai vahe rã curi. Iyavei yaposa vahe imombepirẽhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocusaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vahe rã yuvireco ava rehii sui. ²⁰ Oime rumo ambuae ava imombehusar chupe, —Nde si, nde rivireta reseve nde repia pota tẽi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagũer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepi ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tẽi ivitu ai omboha guasu-guasú carite pipe i, omondo pota ité ipive viña.

²⁴ Evocoyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pĩrata ivitu ai upe iyavei i ohitu vahe upe: “¡Pepituhu!” ehi. Aheseve voi opituhu tupri. ²⁵ Evocoyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeyño, ndoyembovihaiño iyavei oporandu-randu tēi oyeupe yuvireco:
—¡Mara ehi vahe pñha co mbia! Esepia niha, ivitu ai, para guasu avei omboyeroya —ehi tēi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai.
²⁷⁻²⁹ Aheve mbia tecua iguar carugar vireco vahe seci. Aracahe suive nani tupri ité seci iyavei ndopitai vahe ité oi pipe yepi; êgüe ehi rumo ahe tehögüer ruvipa rupindar tēi seci. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoyase Jesús osēse carite pipe sui, osovaichi ahe mbia. Sepiase rumo, ahe mbia oñenopiha voi oso sovai oñehe pñrata chupe:

—¡Eyepipi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús opa oyocuai carugar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, carugar evocoyase oporandu chupe aipo ehi: “Toroiqueñomi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. ³³ Ahese opa yuvinose mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

³⁴ Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepiase ahe mbia carugar rerecosarer oguapi oñi ñipiimi, oyemonde tupri, yaracua tupri avei oico. Ahese oyembosiquiye tēi yuvireco. ³⁶ Acoi ava osepiase vahecuer, ahe opa mbahe omombehu yuvireco co mbia carugar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohave sui” ehi yuvireco. Esepia niha, osiquiyé iteanga yuvireco ichui. Evocoyase oha carite pipe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētake, emombehupa opacatu mbahe Tūpa oyapo vahecuer nde rese —ehi.

Ahe mbia evocoyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetisa pipe oipisi tupri yuvireco. Esepia niha, ava opacatu ité osāro yuvireco. ⁴¹ Ahese Jairo serer vahe oyepota oso Jesús upe, evocoi judío tūparo rese yangarecuar seci vahe. Ahe mbia oñenopiha sovai oso, oporandu chupe ‘tosomi tēi che rētake che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētake, aheve peri rupi ava rehii yuvirasoño supi; oyemboti tupri ité yuvireco. ⁴³ Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuera eté rumo. ⁴⁴ Ahe cuña evocoyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵ Evocoyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoyase aipo ehi chupe:

—Prombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pĩratasa osẽse che sui —ehi Pedro upe.

⁴⁷ Ahe cuña ndoicatuĩ oñemi. Sese oririi oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupriira apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroia ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rēta sui aipo ehi Jairo upe oso: —Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rētave oso, aheve ndomoiñgue uca potai eté ava oyeupi. Pedro, Santiago, Juan iyavei cuñatai yesupa upeño oipota seique ãgua. ⁵² Aheseve opacatu ava oyaseho ati, ndoyembovĩhai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaẽhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoyase oñarapuha voi eté ocuerayevi. Ipare Jesús, “Pembocarú” ehi iyeyupa upe. ⁵⁶ Iyeyupa evocoyase, “¿Mara ehi rutei piha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeĩ ava upe” ehi.

9

Jesús doce güemimbohe omondo Vu Tũpa mborerecuasa resendar mombehu ãgua

¹ Jesús opa omonuha güemimbohe doce vahe oyeupe. Ipare omondo opĩratasa opacatu upe caruguar ambuae-ae tēi vahe imboyepipi ãgua ava sui iyavei ava mbogüera ãgua imbaherasisa sui. ² Opa omondo Vu Tũpa mborerecuasa resendar mombehu ãgua, ava imbaheasi vahe mbogüera ãgua avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe rĩru, tembihu, que guarepochi avei no. Perasora rumo ñepeĩ güeraño pe turucuar; ndahei chira ñuvirio peraso. ⁴ Pepitami ranera ñepeĩ oi pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi culi ‘toicua Tũpa ñemoĩrosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvĩnose yuvĩraso, iyavei oñemosai opacatu tecua rupi omombehu Tũpa Ñehengagüer pĩsirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi piha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera piha?” ehi tēi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tũpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeĩ Tũpa ñehe mombehusar aracahendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerãcua piha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, vĩraso ivi iporupirēhisave tecua Betsaida

cotive. ¹¹ Ahe ava rehii rumo oyanduse yuvireco, yuvirasoño saquicuei. Evocoyase, “Perioño” ehi chupe. Ipare oñehe Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgüe ehi semimbohe yuvireco chupe. Ipare oguapi opacatu ava yuvireco.

¹⁶ Evocoyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo ãgua yuvireco. ¹⁷ Evocoyase opacatu ava ocaru vahe ihĩtaropa tēi yuvireco. Ipare semimbohe omboapipopa doce tupri iruova sembihi rumbirer yuvireco.

Pedro, “Jesús, Tūpa Rembiporavo Poropĩsirosar secoi” ehi

¹⁸ Ñepeí ari pipe Jesús oyerogui ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehúsar arachendar ocuerayevi” ehi yuvireco ndeu —ehi.

²⁰ Evocoyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropĩsirosar ereico —ehi Pedro imboyeve chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuaíta rese oporombohe vahe remiamotarēhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi uguata pota vahe che rupi, topoi mbahe güemimbotar tēi aposa sui iyavei inungar-ra curusu rese ovosiira viña, toyemoingatu voi che recocuer rese oparaisu ãgua ari yacatu rupi iyavei toguata tupri che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisiora. ²⁵ Esepia, ¿aviye ai angahu pĩha ava upe opacatu mbahe co ivi pipendar pisi ãgua tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ãgüe ahera ichui acoi ayevisé che reco pĩratasa pipe, che Ru reco pĩrata porañetesa pipe avei sembiguai rehii iva pendar maranehi reseve curi. ²⁷ Supi eté, oimera amove cohava ava nomano vitéi chivaherã, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi. ²⁹ Oyerure viteseve, oñecuñaro sepiaca. Iturucuar evocoyase

sendi, morochí eteanga. ³⁰ Ahese ñuvirío ava oyemboyecua yivii imoñeta yuvinoha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirío mbia oñehe imano água rese yuvireco chupe: “Nde niha ereyemomborarara nde mano água Jerusalén pipe eico” ehi yuvireco chupe. ³² Yepe Pedro, ondugüer reseve sopesii eteanga yuvireco viña. Aviyeteramo tēi opa sopesii yuvireco ichui. Ahese osepia Jesús porañetesa yuvireco iyavei co ñuvirío mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepepe ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporēhi íva quiha, oyopipa tupri ité. Evocoiyase osiquiye tēi yuvireco. ³⁵ Ipāhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tēi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chíhivahe carugar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaichi yuvireco. ³⁸ Ahese mbia ava pāhuve aipo ehi pīrata voi eté:

—Porombohesar, ereyapomira mbahe icatupri vahe cheu viña. Esepia, che rahir ñepeimí vahe ité; ³⁹ carugar rumo opoco sese, omoase pucu-pucu uca yepi iyavei omoeōha-ōha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombehu tēi niha nde remimbohe upe ‘tomboyepimi tēi carugar ichui’ che yapave viña; nomboyepipi eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitei eté che rese, co coti tēi vite pe pihañemoñetasa! ¿Mbovi rupi rutei vo aico vitera pe pāhuve che ñemosasa pipe? Eru nde rahir cohava cheu —ehi ahe mbia upe.

⁴² Chíhivahe oyemboyase rumo sese, carugar omboviapi voi imondo ivive, imoeōha iri. Jesús rumo oñehe pīrata carugar upe imose água chíhivahe sui. Ahese chíhivahe ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano água

Opacatu ava ndoyembovhai viteseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua água chupe; osiquiye chupe oporandu água yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pīha ivate catu vahe?’ oyapave. ⁴⁷ Jesús rumo oicuaño ipihañemoñetasa yuvireco. Evocoiyase oipisi chíhivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chíhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar, ahe ndahei yande amotarēhisar

⁴⁹ Evocoiyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoiya seco água. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarêhisar; ahe rumo yande mboyoyasar —ehi güemimbohe eta upe.

Jesús oñhengata Santiago upe, Juan upe avei

⁵¹ Virovise rumo ari ivave Jesús so ãgua, ahese ahe aipo ehi: “Yaso ru Jerusalén ve cūrítei” ehi. ⁵² Evocoyase omondo ava güenonera. Ahe yuviraso tecua Samaria ivi rupi ipituhu ãgua moingatu viña; ⁵³ Samaria iguar rumo nomoingue potai eté güëtave yuvireco. Esepia, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi ãgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güëtara, vñrai avei vireco guaiti; che rumo, Ava Riquehir, ndarecoi que che rêta che pituhu ãgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatarata nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rêtave mbahe moingatu che so ãgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresia imohivi tupri ãgua, omahese rumo guaquicuei coti, evocoi nungar naporai Tūpa mborerecuasave yuviroique vaherã —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirã setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha ãgua” ehi. ³ “Peso, opomondo ovesami nungar ava mbahe mimba oñaro vahe nungar pãhuve. ⁴ Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe, yipindar rumo peyapo ranera: ‘Avirave. Tūpa tape rovasa’ peyera. ⁶ Acoi aheve oimese ava aviye vahe, ahe oipisira Tūpa porovasasa; anise evocoyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepe oi pipe güeraño pepitañora. ⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pãhuvé yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharêhisa resendar, tanimbu avei omondora oãca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ¹⁵ Pe avei no tecua Capernaum pendar, ¡pemoha co ivave pe reco ãgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoyase che mbousar avei omboyepepiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetessave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoyase aipo ehi güemimbohe eta upe:

—Taa, asepia ité niha carugar rerecuar oviapise iva sui overa vahe nungar. ¹⁹ Che niha amondo pĩratasa pẽu peguata vaheã mboi iyavei mbahe rumbiquĩape hari rupi opacatu pe amotarêhisar pĩratasa reroyi ãgua, que mbahe pe momaraẽhi ãgua avei. ²⁰ Peyemboviharetei rene carugareta pe mboyeroysa. Iya rumo peyembovĩha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetsa pipe aipo ehi: “Che Ru, che oromboetei. Nde niha iva Yar, ivi Yar avei no. Esepia niha, ereñomi co mbahe ava oyesui tẽi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setá etepri ava Tūpa ñehe mombehusar yuvirecoi vahe iyavei mborerecuar guasu eta aracahendar osepia pota tẽi mbahe pe rembiepia; ndosepiai eté rumo yuvireco. Osendu pota tẽi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuita rese oporombohe vahe oso Jesús upe secoãha ãgua, mbahe rese oporandu:

—Porombohesar, ¿mara ahera vo vichico teco apirẽhi vahe rereco ãgua? —ehi chupe.

²⁶ Ahe omboyevi:

—¿Mara ehi vo Moisés porocuita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pĩratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirẽhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipare oyuca seni seya peri rupi yuviraso. ³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. ³² Ëgüe ehi tupri avei ambuae mbia pahi p̄tiviisar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipare aipo ehi chupe: “Esāro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe. ³⁹ Icupihir evocoyase María serer. Ahe oguapi Jesús pive iñehe rendu oĩ. ⁴⁰ Marta rumo oyembopihaviracua opacatu mbahe rese oico. Ipare oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache p̄tívii rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo ãgua eico? ⁴² Iya rumo ñepeí mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherã ichui —ehi Jesús Marta upe.

11

Jesús ombohe güemimbohe eta yerure ãgua rese

¹ Ñepeí ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure ãgua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihi ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipare pesora ahe sētave p̄tū mbiter rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu.

⁶ Esepia, ambuae che mboripar oyepota ou che rētave; ndarecoi eté rumo mbahe amondomi vaherã chupe’ peyera chupe. ⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mondo pēu

pe mboripar secose viña, opũhaño itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pẽu. ⁹ Sese aipo ahe pẽu: Peporandura mbahe rese Tũpa upe, ahese omboura pẽu; peseca ahe mbahe, ahese peyosura; inungar pemota oquenda, ěgũe peyera peyeroquisa pĩpe Tũpa upe, ahese imboisara mbahe mbou ģgua pẽu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyerokuva pĩpe omota vahe oquenda Tũpa upe, chupe imboisara.

¹¹ “Oimese tahi vahe pe pãhuve, tahir oporanduse pira rese vu upe, ģomondora pĩha mboi tẽi guahir upe viña? ¹² anise, ģomondora pĩha oporanduse mbahe rupiha rese, mbahe rumbiquiãpe tẽi chupe viña? ¹³ ¡Aní! Esepia, pe yepe ava ndaseco põrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espĩritu Santo acoi ava oyeupe porandusar upe!” ehi güemimbohe eta upe.

“Jesús víreco carugar pĩratasa oyese” ehi tupri tẽi ava yuvireco

¹⁴ Ambuae ari pĩpe, Jesús osepia mbia carugar nomoñehengatui vahe. Evocoyase omose carugar ichui. Aheseve voi iñehengatu. Ipare ava rehii sepiase, ndoyembovihai tẽi yuvireco. ¹⁵ Amove rumo ava aipo ehi tẽi yuvireco: “Beelzebú, carugar rereciar pĩratasa pĩpe revo omboyepipi carugar oico” ehi tẽi yuvireco chupe.

¹⁶ Ambuae ava secoãhasa pĩpe oporandu yuvireco chupe: “Eyapo ru mbahe nde rembiapo iva pendar nde recocuer cua ģgua” ehi tẽi. ¹⁷ Ahe rumo oicuaño ipihañemoñetas. Evocoyase aipo ehi chupe:

“Que mborereciar guasu povri pendar ovava-vavase oyeupe oyeamotarẽhisave yuvireco, ahese evocoi mborereciar pĩratasa ocañi tẽira. Iyavei ava omu rese ae oyeamotarẽhi vahe, oyemocañi aveira yuvireco no. ¹⁸ ěgũe ehi avei niha carugar. Esepia, sereciar omboyepipise opovri pendar, ovavara oyeupe yuvireco viña. Ahese oyemocañi tẽira yuvireco. Co ñehesa aipo ahe pẽu. Esepia pe, ‘Beelzebú pĩratasa pĩpe tẽi opa omose carugar ava sui oico’ peye tẽi cheu. ¹⁹ ěgũe ahese rumo viña, ģava pĩratasa pĩpe ru evocoyase pe voya omboyepipi carugar ava sui? Pe voya ae omboyecua pe ñehes pe rembiavi yuvireco pẽu. ²⁰ Che rumo Tũpa pĩratasa pĩpe carugar omboyepipi ava sui. Sese cũritei Tũpa mborerecuasa oyepota ité pẽu.

²¹ “Inungar oime ava ipĩrata etepri vahe, iyavei víreco oyeroyasa. Ipĩpe osãro güẽta opacatu mbahe ipĩpendar avei icañiẽhi ģgua. ²² Acoi ouse rumo ambuae ipĩrata catu vahe chupe, ahe osecoreroyise, opa virocua iyeroyasa ichui. Evocoyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndosecai vahe ava cheu, ahe omosai tẽi yuvireco che sui” ehi.

Carugar oyevi iri güeco agüerve

²⁴ “Acoi osẽse carugar ava sui, oguata tẽi ivi ipiru vahe rupi opituhu ģgua reca. Ipare rumo ndoyosuse, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia pĩha pĩpe. Sese mbahe tẽi catu ité secocuer yipĩndar güeco agüer sui” ehi Jesús ava rehii upe.

Tũpa Ñehengagüer viroya vahe sovasapri secoira

²⁷ Oñehes viteseve aipo mbahe rese, cuña ava rehii pãhu pendar oñehes pĩrata aipo ehi: —¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei viroya vahe ité, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco põrai vahe oporandu poromondiisa rese yuvireco

²⁹ Ava rehii oyere ati vïtese Jesús rese yuvireco, ahe aipo ehi: “Pe cûriteindar ava ndaseco pōrai vahe, peporandu tēi poromondiisa che recocuer cua āgua rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ēgüe ehi aveira niha Ava Riquehir reco pipe oimera poromondiisa ava cûriteindar upe. ³¹ Acoi ari cañi pipe cuña mborerecuar guasu irohi coti secua vahe porandusave omombehura co ava cûriteindar cañipa āgua. Esepia, ahe ou amombri ivi sui Salomón mbahecuaa rendu āgua; cûritei rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cûriteindar cañipa āgua. Esepia niha, omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe; cûritei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoi chaveira que mbahevrive. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyese pe resa, opacatu pe retecuer upe osesape. Acoi imarase rumo, pe retecuer pītumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pītumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pītumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pītū vahe pēu” ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñhe Jesús, fariseo viraso güëtave imbocarū. Oiquese sētave oso, oguapi mesave oñ. ³⁸ Ocaru renondeve ndoyepoise rumo, ahese fariseo ndoyembovihai tēi nomboaviyeise judío porocuita. ³⁹ Ahe rumo aipo ehi fariseo upe:

—Inungar igua rïru iyavei tembihu rïru icupe rupi tēi yoseipri, ipipe rumo iquïha opitaño ité, ēgüe ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosa ava iparaisu vahe upe pe recatēhiēhisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepeipei diez vahe sui Tūpa upe viña, pe rumo ndaperoyai teco ñvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosa sui pe poiēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi āgua tūparo pipe, iyavei peipota pēu opacatu ‘avirave’ oyapora ava pe mboetisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvipa icuaēhise ava uguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēhiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipītiviimi eté ahe ava imboaviye āgua rese yuvireco.

⁴⁷ “¡Peparaisu! Esepia, pemointatu Tūpa ñehe mombehúsar ruvipagüer peico Tūpa mboeteisa angahu pipe tēi. Pe ramoi teieté rumo oyuca yuvireco. ⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tūpa ñehe mombehúsar yuvireco. Pe evocoyase cûritei pemointatu vite suvipagüer peico.

⁴⁹ “Sese Tūpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi virecora yuvireco’ ehi. ⁵⁰ Esepia, ava ndiporeroyai vahe cūrteindar upe ité omondora oñemoirosa opacatu oñehe mombehusar yucagüer rese aracahe suive, cūrteindar avei oyucase yuvireco. ⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tūpa opara omondo oñemoirosa ahe yuca agüer rese ava ndiporeroyai vahe cūrteindar upe curi.

⁵² “¡Peparaísu pe Moisés porocuita rese oporombohe tēi vahe! Esepia, pe mbahecuasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua” ehi chupe.

⁵³ Ipape Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe, ⁵⁴ osecoāha-āha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. ² Esepia, yaposa vahe imombehupirēhi cūrteite icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pītumimbisave, ahe sendusa tuprira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

¿Uma sui pīha siquiyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepia, ipape ndoicatu iri ambuae mbahe apo āgua pēu. ⁵ Che rumo amombehura pēu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepei sui. ⁷ Tūpa niha oicua ñepei-pe yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tēi vahe rumo Espíritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoāha āgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira. ¹² Esepia niha, ahe pipeve voi Espíritu Santo pe mbohera aviyeteramo tēi mbahe mombehu āgua rese” ehi güemimbohe eta upe.

Ñearosa mbahe pota raisa sui

¹³ Ñepei mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che mombahesa cheu —ehi.

¹⁴ Ahe rumo omboyevi chupe:

—Che mboripar, che ndachecuitai mbahe moingatu āgua, mbahe mboyaho-yaho āgua avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati āgua pe recocuer —ehi.

¹⁶ Ipare omboyoya ambuae mbahe rese imbohe: “Oime mbia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu āgua’ ehi. ¹⁸ Ipare ipihañemoñeta cute: ‘Aicua mbahe che rembiaporā. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. ¹⁹ Evocoyase aipo ahera cheyeupe: Che mboripar, oime setá mbahe cheu araviter momba-momba āgua; sese cūrítei apituhura vichico, acarura, aachura iyavei ayembovīharetera no, ahera’ ehi. ²⁰ Tūpa rumo aipo ehira chupe: ‘Mbia, nandearacuai eté eico, co pītu pīpeve voi eté eremanora. Co mbahe nde rembiapocatu, ¿ava mahera pīha evocoyase?’ ehira chupe. ²¹ Ēgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque” ehi ahe mbia upe.

Tūpa osāro opacatu guahir

²² Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove āgua, pe turucuarā rese tēi avei no. ²³ Yande recovesa rumo aviye catu vahe tembihu sui; yande retecuer avei aviye catu turucuar sui no. ²⁴ Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! ²⁵ Ndipoi eté que ñepepe pe pāhu pendar oicatu vahe opihañemoñetá iteangasa pipe tēi güecocuer mbosasaviño āgua. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ “Pemahecua ru mbahe potri caha pīpendar rese: ndoporaviquii eté iyavei ndoipiai oturucuarā. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tūpa niha omboporañete raimi tēi mbahe potri caha pīpendar. Ichui sapisapaño horno pīpe. ¡Ahe rumo omondo catura turucuar pēu, pe ava nimbahe reroya tuprii vahe! ²⁹ Sese, ‘¿Mbahe pīha yahura, mbahe pīha yamondera?’ ndapepei chira pe yemomahenduha guasu aisa pīpe. ³⁰ Esepia, ava Tūpa reroyasarēhi co ivi pīpendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. ³¹ Aviye catu rumo pesecara pe Yar Tūpa povrive pe reco āgua, ahese omboura que mbahe ipane vahe pēu” ehi.

Ivave mbahe eta oime vahe yandeu

³² “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pīpe oipota opovrive pe rereco āgua. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe riru ndituyui vahe nungar pīpe. Aheve ava imonda rai vahe ndoiquei chira ñomi āgua pe sui iyavei mbahe raso nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe pīhañemoñeta yepi” ehi.

Peyemoingatu Tūpa Rahir yevi āgua

³⁵ “Peyemoingatu tupri che yevi āgua. Inungar tataendi ndogüei vahe, pemboyecua tupriño ité che recocuer pe recocuer pīpe ava upe. ³⁶ Peico imboacuapri güerecuar osāro vahe nungar mendasa sui iyeveise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoyase serecuar ae

niha ihañecora sese, omboguapira mesave imbocarú. ³⁸ Yepe serecuar oyepotara pĩtu mbiter ou viña, anise añihiveive, ahe rumo osãroño itera chupe imboi ãgua yuvireco. Evocoyase serecuar aviye ai etera chupe. ³⁹ Peyapisaca tupri co rese: acoi oi yar oicuase mbahe hora imonda vahe yepota ãgua, ahese opitara imonda vahe rãro güëta pipe sui mbahe renoseñhi ãgua. ⁴⁰ Ëgüe peye aveira peyemoingatu che yevi ãgua. Esepia niha, che, Ava Riquehir, aporoesapiha tẽira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoyase Pedro oporandu Jesús upe aipo ehi:

—Che Yar, ¿oreuñomi pĩha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoyase omboyeve Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güëta pipendar rese hañeco ãgua ‘tembihu tomondo che rẽta pipendar upe che porocuita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaire opacatu ombahe rese hañeco ãgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara tẽi sereco iyavei ocaru, oihu tẽi osavaipo-ipoño avei oico. ⁴⁶ Ipare rumo serecuar oyepotara imahemohaẽhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua tẽise mbahe güerecuar remimbotar, noyemoingatuise rumo iyavei ndoviroyaise oico, ahe evocoyase serecuar oinupara. ⁴⁸ Acoi mbiguai nomboaviyei vahe ocuaita icua tupriẽhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarẽhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe tẽi che recoãhasa pipe, jẽgüe ahera che paraisú itera imboaviye ãgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Ëgüe ehi rumo che ayu che sui ava yeamotarẽhi ãgua. ⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarẽhira yuvireco che recocuer sui: mbosapi oyamotarẽhira ñuvirio vahe, ñuvirio vahe evocoyase oyamotarẽhira mbosapi vahe yuvireco. ⁵³ Que ava oyamotarẽhira guahir, anise tahir evocoyase oyamotarẽhira vu; cuña oyamotarẽhira omembri, imembri evocoyase oyamotarẽhira osi; sovayar oyamotarẽhira vovayar” ehi güemimbohe upe.

Iva pendar poromondhisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pĩtu ari sosa coti sui opũhase, ahese, ‘Oquira’ peye. Ëgüe ehi eté oqui. ⁵⁵ Iyavei acoi ivitu oiheyuse irohi coti sui, ahese, ‘Sacú iteangara’ peye. Ipare ãgüe ehi eté. ⁵⁶ ¡Pe Tũpa reroyasar angahu tẽi peico vahe! Pe niha peicua mbahe iva rese oyecua vahe tẽi iyavei ivi rese mbahe oyecua vahe tẽi mombehu, ¡mahera ru ndapeicuai peyeupe mbahe cũritei oime vahe rã mombehu peico!” ehi.

Peñero pe amotarẽhimbar upe

⁵⁷ “¿Mahera napesãha ranei pe ae ité co mbahe supi eté vahe? ⁵⁸ Acoi que ava nde amotarẽhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoẽhi ãgua sovai; anise, mborerecuar nde mondora ava naporai vahe rarõsar upe. Ahe evocoyase nde roquendara. ⁵⁹ Supi eté nderesẽi chiertera acoi eremboepipase voi eté eresẽra ichui” ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovêhese mbahe mimba yucapri yuvireco chupe. Ahe suvi oyeseha mbahe mimba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui êgüe ehi mbahe chupe viña. ³ ¡Aní rumo! Acoi ndapemboasiise pe angaipa Tūpa upe pe yevi ãgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tūpa upe peyevi ãgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. ⁷ Ahese aipo ehi mbia oco rārosar upe: ‘Esendu, che ayu pīhi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihāi tupri tēi cohavē’ ehi. ⁸ Ico rarōsar rumo omboyevi chupe aipo ehi: ‘Che rerecuar, êgüe tehiño vite tēi rane co araviter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho araviter rupi ahe mbaherasisa vireco, carugar tēi omboyepami uca sereco. Sese ndoicatu opūha tupri uguata. ¹² Osepiase rumo Jesús, “Erio” ehi chupe.

—Cuña, cūrtei nanembaheasi iri eico cute —ehi.

¹³ Evocoyase omondose opo sese, aheseve voi cuña oyemohivi. Ipare omboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui ãgua; ahe ari pipe peyura peposano ãgua, ndahei chira mbituhusa ari pipe —ehi.

¹⁵ Evocoyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tivi iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pīha evocoyase imbogüerasa mbituhusa ari pipe? —ehi tūparo pendar rerecuar upe.

¹⁷ Aipo ehise, opacatu yamotarêhisar yuvinochi tēi yuvireco ichui. Ambuae ava rumo oyembovīhaño opacatu Jesús rembiapo osepiase yuvireco.

Yembohesa mostaza rāhii suindar

¹⁸ Evocoyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

²⁰ Evocoyase Jesús aipo ehi iri: “¿Mbahe rese pīha amboyoyara Tūpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi sāhambri trigo cuhi rese opacatu imboapepo ãgua yepi” ehi oporombohe.

Jesús peri icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepeí mbia oporandu chupe aipo ehi:

—Che Yar, ¿supi eté pīha moviromi tēi ava oñepisirora yuvireco? —ehi.

Ahe evocoyase omboyeví chupe:

²⁴ —Peyemoviracua tupri catu peique āgua oquendipi cāhimi rupi. Esepia niha, supi eté setá ava osāha tēira yuviroique vaheṛā ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. ²⁷ Ahe rumo aipo ehira: ‘Ñepeí reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe. ²⁸ Pe rumo imomboprira pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrive ivave. ²⁹ Iyavei ava yugüerura añihivei coti sui, caharu coti sui, norte coti sui iyavei irohi coti sui, ahe evocoyase yuviroguapira ocaru Tūpa mborerecuasave ipiri yuvireco. ³⁰ Supi eté amove ava ndoyavii ipa tēi vahe sei que āgua ivave Tūpa piri viña, ahe ranengatu rumo yuviroiqueño itera ipipe iyavei amove ava tenonde catu vahe ndoyavii ahe rane oique vaheṛā ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui caruguareta vichico, ambogüerañora ava imbaheasisa sui, curi ayihive evocoyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, ēgüe ahe pota tēi pe rereco viña, pe rumo ndapeipotai eté! ³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secoi. ³ Evocoyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera āgua; aní tie? —ehi.

⁴ Ahe rumo noñeheiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoyase aipo ehi:

—¿Ava pīha pe pāhu pendar novinose voi chira güeimba guaricu, anise tiví oviapise ivicuar pipe mbituhusa ari pipe viña? —ehi.

⁶ Ahese nomboyeví catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epüha evocoi sui, co mbia toguapi eipeve’ ehira yandeu. Evocoyase yande yachĩ tẽira yaso ipami tẽi yaguapi. ¹⁰ Yande soho ucase rumo yuvireco, yaguapira evocoyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. Ëgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rẽta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; Ëgüe ehira evocoyase mbahe imboyevipa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo ichutu vahe, anise ipi chutu vahe, ipãri-pãri vahe, ndasesapisoi vahe avei. ¹⁴ Esepia niha, ahe ndoicatui mbahe mboyevi yuvireco ndeu. Opase rumo ocuerayevi ava seco catupri vahe yuvireco, ahese ereviharetera eico. Esepia, ereipisira mbahe aviye vahe Tüpa suindar —ehi.

Jesús oporombohe carusa rese

¹⁵ Iñehe renduse rumo, ñepei mbia yuviroguapi vahe mesave, ahe aipo ehi Jesús upe: —¡Sovasapri catu ava Tüpa piri ocaru vahe imborerecuasave! —ehi.

¹⁶ Evocoyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru ãgua, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatute’ ehi. ¹⁸ Opacatu rumo ava, ‘Eñemosañomi tẽi cheu’ ehi pãve yuvireco. Yipindar mbia aipo ehi: ‘Che rumo arocuva ivi; iya ité aso sepia. Sese eñemosañomi cheu’ ehi chupe. ¹⁹ Ambuae mbia aipo ehi: ‘Che arocuva ramo diez tupri tivi, ahe asãha ranera. Sese eñemosañomi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tẽi ndasoi chira’ ehi. ²¹ Oyevise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapisoi vahe, anise que ava ipãri-pãri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rõtave yuvireco che piri, tomboapipopa ité che rẽta yuvireco’ ehi. ²⁴ ‘Esepia niha, acoi yipindar ava aichoho uca vahe ndipoi chietera que ñepei ocaru vaherã che piri’ ehi güembiguai upe —ehi Jesús ahe mbia mbohe.

Yavai Cristo rupi guata ãgua

²⁵ Ava rehii Jesús raquicuei uguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi uguata ãgua, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ëgüe ndehise, evocoyase ndiyai chupe che remimbohe seco ãgua. ²⁷ Iyavei que ava noñemosañomi vahe mbahe-mbahe tẽi upe oiporarase ari yacatu rupi inungar-ra ocurusu rese ovosii vahe viña che rupi uguata ãgua, ahe chupe ndiyai che remimbohe seco ãgua” ehi. ²⁸ “Que ava pe pãhu pendar omopuha potase oi, ¿ndoyapisaca ranei chira ‘¿amomba angara pãha?’ oyapave? ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroñora ³⁰ aipo ehira yuvireco: ‘Aye evocoi mbia omopuha pota tẽi oi viña, ndoicatui eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe

oyeepi potase ambuae mborerecuar veinte mil ava vireco vahe sui, oyapisaca ranera yipindar icua tupri ãgua ‘¿yaicatura pĩha setá catu vahe rese yavava?’ ohesave. ³² Esepia, ndoicatuise, evocoyase ambuae mborerecuar guasu amombri vite secoise, omondora mbahe mombehúsar mbahe tupri rese porandu ãgua chupe. ³³ Ëgüe ehi avei pe recocuer ndapeseya potaise pe mbahe opacatu, Ëgüe ehi vahe ndahei eté che remimbohe” ehi.

Yande recocuer inungar yucrí

³⁴ “Yucrí aviye vahe ité yandeu; nasehe irise rumo, ndayaicatu chietera imoehe iri ãgua. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheerã. Evocoyase ahe imombopri tēi vaheerã. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu ãgua yuvireco. ² Sese fariseo yuvirecoi vahe iyavei Moisés porocuita rese oporombohe vahe yuvireco, ahe oviroñro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipãhuve no —ehi.

³ Evocoyase Jesús omombehu ovesa resendar yembohesa: ⁴ “Que ñepei pe pãhuve virecose cien ovesa güeimba, ipare co ocañira ñepei ichui viña, oseya ranera evocoyase evocoi noventa y nueve tēi aviye vahesave seco ãgua. Ipore oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesá pipe. ⁶ Ipore oyepotase güetave, omonuhara omboripareta, ocotindareta avei no. Ipore aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté Ëgüe ehi aveira oime torivetesá guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco” ehi.

Yembohesa guarepochi ocañi vahe resendar

⁸ “Acoi que cuña omocañise ñepei guarepochi diez tupri vireco vahe sui, omoendira tataendi. Ipore osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté Ëgüe ehi aveira oime torivetesá Tüpa rembiguai iva pendar rehii upe que ñepei ava yangaipa guasu vahe oñecuñarose güecocuerai sui” ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chihivahe catu vahe aipo ehi oyosupa upe: ‘Che ru, embou mbahe che mombahesa cheu’ ehi. Iyesupa evocoyase omboyaho ombahe imondo chupe. ¹³ Ipore coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoyase ndasiepoi tēi oico. ¹⁵ Evocoyase oso mboraviqui reca mbia piri aheve. Ahe mbia evocoyase omondo ocove güeimba cuchi rãro ãgua. ¹⁶ Aheve oyemohitaro pota tēi cuchi rembihu pipe oico viña. Ndipoi eté rumo omondo vahe chupe. ¹⁷ Evocoyase oyemomahenduha tēi güeta pendar oporaviqui vahe rese: ‘¡Che ru rētave oporaviqui vahe rumo co omoumbire guasu-guasu tēi güembihu yuvireco! ¡Che rumo che yuca pota tēi che rieporēhi che rereco cohavel’ ¹⁸ Sese ayevira che ru rētave. Aipo ahera chupe: Ayemboangaipa Tüpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tēi che rerecoñora eve, ahera’ ehi. ²⁰ Evocoyase oyevi iri oso vu rētave cute.

“Amombri vitemi tahir recose rumo iparaisu catu chupe, oña voi oso guahir rovaïchi, oyaco osovaupite avei. ²¹ Ahese tahir aipo ehi chupe: ‘Che ru, ayemboangaipa Tûpa rese, nde rese avei; ndiya iri nde rahir che reco ãgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquira catu vahe peyuca. ¡Yayapora pieta guasu!’ ehi. ²⁴ ‘Esepia, co che rahir aviye omano vahe secoi viña, cûritei rumo oyevi iri cheu’ ehi. Ëgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyevisé ou güëta rerovicave, osendu voi ipieta guasu vahe yuvireco. ²⁶ Evocoyase oporandu mbiguai upe mbahe oime vahe rese. ²⁷ ‘Nde rivri mo co oyevi tupri iri ou. Sese nde ru oyuca uca guaca iquira vahe iyevisa resendar’ ehiño. ²⁸ Evocoyase tiqehir oñemoirosa pipe, ndoique potai oyesupa uve oi pipe; tu rumo osëño ité ocarve ‘eique’ oya chupe. ²⁹ Evocoyase tahir omboyevi chupe aipo ehi: ‘Che niha setá araviter rupi oropïtivii vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta ãgua’ ehi vu upe. ³⁰ ‘Indó, cûritei oyepota ndeu nde rahir, omocañi tēi vahe nde guarepochi cuña ndipihai vahe rese tēi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoyase tu: ‘Eyapisacaño, che rahir, nde niha nderesirii vahe che sui. Opacatu che areco vahe rumo nde mbahe ité yepi. ³² Cûritei rumo iyacatu ité yande rorivetesave yayapora pieta. Esepia, co nde rivri ocañi tēi vahecuer rese yamahe iri’ ehi guahir upe” ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tēi agüer mombehu. ² Evocoyase serecuar ñepeï opïtivisar omondo seca, ahe güeruse, ‘¿Mbahe vo aipo ereyapo eico; ayandu cûritei nde rerãcua? Emoingatupa tupri voïño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. ³ Evocoyase mbahe rese ñangarecuar: ‘¿Mara ahera pïha co evocoyase vichico imombopri che recose che poraviquisa sui? Ndareco iri rumo pïratasa cheyese ivi rese che poraviqui ãgua. Achï eteanga aveira rumo mbahe rese che porandu ãgua’ ehi tēi. ⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherã oyepiri’ ehi. ⁵ Evocoyase oñehe ñepeï-peï güerucuar sui mbahe vinose tēi vahe rese chupe. Yipïndar vahe upe oporandu: ‘¿Mbovi mbahe erenose tēi yande rerecuar sui?’ ehi. ⁶ ‘Cien tupri chereve aceite siru tuvichagüe vahe rese’ ehi. Evocoyase, ‘Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupïndar año’ ehi chupe. ⁷ Ichui ambuae mbahe vinose tēi vahe upe oporandu no: ‘¿Mbovi mbahe vo erenose tēi yande rerecuar sui?’ ‘Cuatro ciento quintar rupïndar’ ehi. Evocoyase, ‘Co oime cuachiar sesendar. Yaicuachiara rumo tresciento veinte quintar rupïndar’ ehi. ⁸ Evocoyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tûpa oicua catu mbahe moingatu ãgua oyeupe Tûpa reroyasar sui.

⁹ “Sese che aipo ahe pëu: peiporu pe guarepochi pereco vahe co ivi pipe pe mboripar reime ãgua. Ichui opa tēise pe guarepochi, oimera pe pisi vaherã teco apirēhisave.

¹⁰ “Acoi ava mbahe tupri chíhi oyapo vahe, ahe oyapo tupri catura mbahe tuvichá vahe. Iyavei acoi ëgüe ndehi vahe chíhi vahe rese, ëgüe ndehi chiaveira mbahe tuvichá vahe rese. ¹¹ Evocoyase ndapemboaviyeise co ivi pipendar pe cuaita guarepochi rese, ahese ndaperecoi chira ivave mbahe rese hañeco ãgua. ¹² Iyavei acoi ndapemboaviye tupriise

pe cuaita ambuae ava mbahe rãro pipe, ¿ava pĩha evocoyase omondora pe mbahe ité pẽu viña?

¹³ “Iyavei ndipoi chietera ñepeí mbiguai omboyeroya vahe ñuvirío güerecuar. Esepia, ñepeí osaisu catura imboyeroya pipe, ambuae evocoyase ndoyambotai chira imboyeroya potaẽhisa pipe. Ëgüe peye avei ndapeicatui Tũpa mboyeroya guarepochi pota raisa pipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroĩro yuvireco. ¹⁵ Evocoyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tũpa rumo oicua opacatu pe pĩhañemoñetasa. Esepia, yepe ava rovaque ndoyavii aviye ai vahe pe recocuer viña, Tũpa uve rumo mbahe tẽi eté” ehi.

Mborocuaita iyavei Tũpa mborerecuasa rese ñehesa

¹⁶ “Yipisuive Moisés porocuaita iyavei Tũpa ñehes mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tũpa mborerecuasa resendar, sese ava iquerẽhi catu cũritei aheve yuviroique vaheẽ.

¹⁷ “Yavai catura que ñepeí Tũpa porocuaita mboaviyeẽhi ãgua co íva, ivi opa vaheẽ sui” ehi.

Jesús oporombohe mendasa sui poiẽhi ãgua

¹⁸ “Acoi opoi vahe güembireco sui, omendase ambuae cuña rese, ahe oyemboaguasa tẽi vahe. Iyavei acoi omendase cuña omenda vahecuer rese tẽi, oyemboaguasa tẽi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, ‘Tomboumi tẽi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahese Tũpa rembiguai eta oviraso yuvireco Abraham piri ivave. Mbahe yar avei omano, opa oñoti yuvireco.

²³ “Ahese oso Tũpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoyase osapucái pĩrata: ‘¿Che ramoí Abraham, che paraisuerecomi tẽi eve! Emboumi tẽi Lázaro che ãpecu morohisa ãgua ive ocuã pipe. Esepia, che paraisu etepri co tata pĩratagüer pipe vitu’ ehi. ²⁵ Evocoyase Abraham ombovevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tẽi oico’ ehi. ‘Cũritei rumo Lázaro oviharete oico cohava, nde evocoyase nde paraisu eipeve eico. ²⁶ Iyavei oime co ivicuar ipicucu vahe rasaẽhi ãgua oreu iyavei pẽu no’ ehi.

²⁷ “Ahe mbia aipo ehi: ‘Che ramoí Abraham, emondomi tẽi Lázaro ²⁸ che rivri poyandepo vahe upe, chupe iñehes ãgua. Ahe tosecuñaro güecocuer yugüeruẽhi ãgua co tecocuer mbahe tẽisave’ ehi. ²⁹ Abraham rumo, ‘Vireco niha Moisés porocuaita iyavei Tũpa ñehes mombehusar rembicuachiagüer yuvireco. ¡Ahe toviroya yuvireco!’ ehiño chupe. ³⁰ Evocoyase, ‘Taa, che ramoí Abraham, que omano vahecuer pãhu pendar rumo yuvirasose chupe, ahe evocoyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuaita rese iyavei ambuae Tũpa ñehes mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti ãgua. ¡Ahe imboangaipa ucasar rumo iparaisu itera! ² Iyacatu evocoi nungar ava

ñapichisa ita mbahe mbocuhisa iyesho rese para guasu pipe imombo ãgua chñihivahemi nungar mboangaipa uca rãgüer sui. ³ ¡Sese peñearo tupri!

“Acoi nde mboetasa Tüpa reroyasar oyemboangai pase, pemboaracuara. Omboasi pare oyevisé güecocuer tupri pipe, ahese peñerora chupe. ⁴ Supi eté acoi que ambuae ava pe amotarēhi vitese rumo siete yupagüer ñepei ari pipe, acoi ouse pēu siete yupagüer avei, ‘Ēgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tüpa rese oime pñratasa

⁵ Co doce tupri apóstol aipo ehi chupe:

—Emboumi oreu Tüpa rese ore yeroya catu ãgua —ehi yuvireco chupe.

⁶ Evocoyase yande Yar omboyeve chupe:

—Supi eté, Tüpa rese pe yeroyasa, yepe ndoyavii chira mostaza rãhii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tüpa rese pe yeroyasa pipe, ahe evocoyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pãhu pendar virecora güembiguai oporaviqui vahe ivi mboyerre cove, anise que guaca rãro yuvi rupi viña; ichui iyevisé, ¿‘Eique, eguapi terecaru’ ehira pñha sereciar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurã avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Ēgüe peye avei mbiguai nungar pe opacatu Tüpa pe cuaitarã ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevisé rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoyase ñepei ipãhu pendar, Samaria pendar, osepiase ocuerasa, oyeve chupe osapucái pñrata Tüpa upe imboeteisave. Oñenopiha oso sovai, oyaivi, “Aviye ndeu” ehi Jesús upe.

¹⁷ Evocoyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbia ambuae ivi pendar güeraño rumo oyeve ‘aviye ndeu’ ohesave Tüpa uve! —ehi.

¹⁹ Evocoyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tüpa mborerecuasa yande pãhuve secoi

²⁰ Ñepei ari pipe fariseo eta, “¿Marase vo aipo oura Tüpa omborerecuasa pipe mbahe moingatu ãgua?” ehi Jesús upe yuvireco. Ahe omboyeve chupe:

—Tüpa mborerecuasa ndahei acoi yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pãhuve —ehi fariseo eta upe.

²² Ipare aipo ehi güemimbohe eta upe:

—Oimera ari pe peipota tēira aico vahe rã pe piri que ñepei ari rupi che, Ava Riquehir, che recosa pipe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. ²⁴ Esepia, inungar acoi overa vahe osesape guasu iva rese ocua yepi, Ēgüe ahera che, Ava Riquehir, vitu ari osupitise che yevi ãgua curi. ²⁵ Yipindar rumo co ivi pipe che paraisu ranera ava cñriteindar mara-mara tēi che rerecose yuvireco che repia potaēhisave. ²⁶ Inungar ava Noé recose yuvirecoi aracahe, Ēgüe ehi tupri aveira che, Ava Riquehir, yevi ãgua renonde. ²⁷ Esepia,

ocaru, oiĥu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pipe. Ambuae ava rumo opa ocañi tēi yuvireco. ²⁸ Ēgüe ehi avei aracahe Lot recose, ava ocaru tēi, oiĥu tēi, virocua tēi mbahe omahera yuvireco iyavei mbahe mondosar tēi, mbahe tĩsar tēi, oi aposar tēi avei yuvirecoi oyapısacaēhisa pipe. ²⁹ Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehii aracahe. ³⁰ Ēgüe ahe aveira aviyeteramo tēi che, Ava Riquehir, ayemboyecuaru curi.

³¹ “Ahe ari pipe acoi ava güēta harive secoi vahe, ahe toi que iri eme güēta pipe ombahe renose. Iyavei ava que rupi tēi secoi vahe, toyevi iri eme güētave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisırora” ehi.

³⁴ “Ahe pĩtu pipe oimera que ñuvırío ava vupave yuviroque vahe yugüeru: ñepe i acoi che reroyasar serasosara, ambuae rumo opıtara. ³⁵ Ahese avei ñuvırío cuña ohichora yuvireco: ñepe i serasosara, indugüer rumo opıtara. ³⁶ Ēgüe ehi aveira ñuvırío ava amombri güecua sui yuvirecoi vahe: ñepe i serasosara, indugüer rumo opıtara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo Ēgüe ehira mbahe curi? —ehi.

Ahe evocoyase,

—Mbahe rehögüer reimesave uruvu oñemonuha atıra yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño āgua ari yacatu rupi ² aipo ehi: “Ñepe i tecuave oime mbıa mborerecuar mbahe moingatusar ndosıquıyei vahe Tũpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepı cheu’ ehi chupe. ⁴ Yıpındar rumo noıpıtıvıı potai. Coıye catu rumo cuña ombopıhavırıracua tēise, ipıhañemoñeta iri: ‘Yepe che ndasıquıyei vahe Tũpa sui, ava sui avei ndasıquıyei vahe ité, ⁵ amoıngatuñora rumo mbahe co cuña che mañeco tēısar upe. Ayapoñora semıbotar cheu iyu pıhiēhi āgua’ ehi opıhañemoñetasave” ehi.

⁶ İpare yande Yar aipo ehi: “Peyapısaca aipo mborerecuar naporai vahe ñehese. ⁷ Tũpa avei niha omoıngatura mbahe güembıporavo oyeupe yeruresar ari, pĩtu rupındar upe yepı. Nosaro tēi chiranera opıtıvıı āgua yuvireco. ⁸ Supı eté Tũpa omoıngatu voira mbahe avıye vahe yande porandusa pipe yandeu. Co rumo che, Ava Rıquehir, ayeıse co ivı pipe vıtu, oimera ava movıromı tēi oyeroya vıte vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepıa, oime amove ava avıye ai angahu secoi oyeupe vıña, iharıve rumo vıroıro ambuae ava. ¹⁰ “Ñuvırío ava yuvıraso tũparove oyeroquı. Ñepe i ava fariseo, ambuae evocoyase ava sui guarepochi rerocuasar. ¹¹ Evocoyase fariseo oso tenonde ava rembiepıave oyeroquı aipo ehi: ‘Tũpa, avıye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbıa ava sui guarepochi rerocuasar nungar tēi aıco no. ¹² Iyavei ñuvırío yupagüer ñepe i semana pipe ayecuaıtu ité nde recocuer rese, iyavei ñepe i-peı cien guarepochi che poravıquı reprı aıpıı vahe sui amboyaho diez che porerecosa ndeu’ ehi. ¹³ Ava sui guarepochi rerocuasar rumo opıtaña amombri ichui. Aheve nomahei ıva rese oyeroquı āgua oangaıpa mboasısa pipe. Oyepochıhanupa-nupa aipo ehi: ‘¿Tũpa, che paraisuerecomı eve, che angaıpa vıyar aıco!’ ehi oyeroquı” ehi. ¹⁴ “Sese aipo ahe pēu: co mbıa ava sui guarepochi rerocuasar opa oıpıı ñerosa Tũpa suındar güētave oso. Fariseo rumo anı eté. Esepıa niha, opacatu

acoi oyemboivate ai vahe, opara seco reroyisa. Acoi ava seco mbegüe vahe rumo seco mboivate catusara curi” ehi.

Jesús osovasa chihivahe eta

¹⁵ Iyavei chihivahe güeru Jesús uve yuvireco sovasapirã. Evocoyase semimbohe osepiase yuvireco, “¿Mahera vo peruño tēi chihivahe?” ehi opihavĩracuasa pipe serusar upe yuvireco. ¹⁶ Jesús rumo aipo ehi:

—¿Mahera ndapeipotai iyu āgua! Toyugüeruño chihivahe cheu. Esepia, co chihivahe nungar ava yuviroiquera che Ru Tūpa povrive. ¹⁷ Supi eté acoi ndoipisii vahe che Ru Tūpa mborerecuasa chihivahe nungar yuvireco, ahe evocoyase ndoyuviroiquei chietera ipipe —ehi.

Ñepe mbia mborerecuar imbahe eta vahe omoñeta Jesús

¹⁸ Ñepe mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁹ Jesús evocoyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepe aviye vahe ité, ahe Tūpa secoi.

²⁰ Ereicua niha co porocuita aipo ehi vahe: ‘Nandeaguasai chira, ndereporoyucaí chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe sepi evocoyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembovĩhai tēi. Esepia niha, mbahe yar ité secoi. ²⁴ Sese omahe aipo ehi:

—Yavai eté rumo ava mbahe yar reique āgua che Ru Tūpa mborerecuasave! —ehi—.

²⁵ Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁶ —¿Ava angahu pĩha evocoyase oñepisĩrora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata āgua —ehi chupe.

²⁹ Evocoyase aipo ehi güemimbohe upe:

—Supi eté acoi oseya vahe que güēta, güembireco, viquehir, vivri, oyesupa, que guahir Tūpa mborerecuasa rese, ³⁰ ahe setá iteanga catu oipisĩra mbahe aviye catu vahe co ivi pipe oseya vahe sui. Ipare rumo tecua ambuaeve oipisĩ aveira tecovesa apirēhi vahe curi —ehi.

Jesús omombehu iri omano āgua

³¹ Evocoyase yande Yar opa viraso co cotimi doce güemimbohe. Aheve aipo ehi: “Cūritei yasora tecua Jerusalén ve yaico, aheve omboaviyera co Tūpa ñehe mombehúsar rembicuachiagüer co che, Ava Riquehir, resendar ñehesa. ³² Che imondopri aicora ndahei vahe yande mu upe mara-mara tēi che rereco āgua. Che roeroĩro-ĩrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai eté senducua āgua yuvireco chupe.

Jesús ombogüera ñepe mbia ndasesapisoi vahe

³⁵ Evocoyase Jesús ovirovise tecua Jericó oso, aheve mbia ndasesapisoi vahe oguapi oĩ peri popive porerecosa oyeupe mondo ãgua rese. ³⁶ Osenduse ahe ndasesapisoi vahe ava rehii piambu, ahese, “¿Mbahe vo pẽu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe güendapeve oñehe pĩrata: —Jesús, David suindar, che paraisuerecomi tẽi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,
—¿David suindar, che paraisuerecomi tẽi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapisoi vahe upe:

⁴¹ —¿Mbahe vo ereipota ayapo vaherã ndeu? —ehi.

—Che Yar, che mbosarecomi tẽira eve viña —ehi chupe.

⁴² —¿Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoi vahe, osareco tupri ité; osoño ité Jesús rupi imboetisave. Opatatu ava osepia vahe avei omboetei Tũpa yuvireco.

19

Zaqueo osepia pota Jesús

¹ Ichui Jesús oi que tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rerocuar rerecuar. ³ Osepia pota tẽi Jesús ‘taicua ité’ oya viña. Ndoicatu rumo opucuehise ava rehii pãhuve sepia ãgua. ⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. ⁵ Evocoyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepia, asora nde rõtave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesã pipe oipisi. ⁷ Sepiase rumo opacatu ava, “Yangaipa guasu vahe rõtave tẽi oso” ehi yuvireco chupe. ⁸ Evocoyase Zaqueo opũha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe añomi vahecuer avei, ayapirasa catu-catura irungatu rupi imboyeve ãgua —ehi chupe.

⁹ —Co pipe Tũpa oipĩsiro ité co mbia. Esepia, ahe niha Abraham suindar avei secoi.

¹⁰ Esepia, che, Ava Riquehir, ayu co ivi pipe ava ocañi tẽi vahe pĩsiro ãgua —ehi Jesús Zaqueo upe.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tũpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vaherã amombri oivi pendareta rerecuarã oyevise. ¹³ Oso ãgua renonde oichohopa uca diez tupri güembigui. Ahese opa omondo ñepepepe upe guarepochi sepirusu vahe, aipo ehi chupe: ‘Peporaviqui co guarepochi rese imboeta ãgua che yevise nara’ ehi. Ipare oso. ¹⁴ Setá ava rumo secua pendar saquicuei tẽi viroiro yuvireco. Sese omondo moviro ava ‘tomombu: Ore rumo ndoroipotai ore rerecuarã secoi ãgua, tehi yuvireco’ oya viña.

¹⁵ “Ahe rumo mborerecuar guasu güecosa pipe oyeve ou cute. Opa uca oichoho oguarepochi pisisarer ‘¿mbovi-mbovi piha oipisi oyacatu yuvireco?’ oya. ¹⁶ Evocoyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoyase mborerecuar guasu omboyeve chupe: ‘Mbiguai aviye vahe ereico, nde cuaita co nde poraviquisa chĩhimi vahe eremboaviye ité. Sese ereicora diez tecua guasu pendar rese hañeco ãgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoyase ereicora cinco tecua pendar rese hañeco ãgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuar mi pipe sereco. ²¹ Esepia, che asiquiye nde sui. Nderecatêhi mete ai vahe mbahe rese. Ambuae ava poraviqui sui têi iyavei acoi ndahei vahe mbahe nde remiti, ichui têi avei ereipisi mbahe ndeyeupe nara yepi’ ehi chupe. ²² Evocoyase mborerecuar guasu aipo ehi chupe: ‘Nde mbiguai ndaseco pôrai vahe ereico. Nde ñehe sui aicuara nde recocuer. Ereicuase êgüe che hesa viña, ²³ evocoyase, ¿mahera ru ndereyapocatui che guarepochi guarepochi apocatusave che yevise voi senose âgua cheu imboyevi catumi âgua viña?’ ehi. ²⁴ Evocoyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi têi yuvireco chupe. ²⁶ Evocoyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarêhimbar, ndache potai vahe mborerecuarã yuvireco, ahe opara peru cohava che rovai yucapa âgua’ ehi” ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoyase coiye catu tecua Betfagé iyavei Betania rerovicave, ivitri Olivo ñpiimi, aheve omondo ñuvirío güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbri imoha ava ndoyeupi vitei vahe yuvireco sese. Ahe peyorañora seru. ³¹ Acoi, ‘¿Mahera vo peyora?’ ehise que ava pëu, ‘Yar oiporu pota’ peyeñora chupe —ehi güemimbohe upe.

³² Evocoyase semimbohe yuviraso, semimombehu rupi tupri ité osepiya mbahe yuvireco. ³³ Evocoyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso âgua. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi âgua oso, opacatu ava seroyasar supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¿Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri âgua —ehi têi yuvireco.

⁴⁰ Evocoyase aipo ehi:

—Supi eté amombehu pëu: co ava iquiririse yuvireco, ita rumo evocoyase osapucái pĩratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuar tarahu co co ari pipe teco tuprisa amondo pota vahe pëu viña, cūrítei rumo ocañi tupriño pe sui, ndapeicatui eté sepia!” ehi oyaseho. ⁴³ “Oimera rumo ari imombehupri naporai vahe pëu curi. Pe amotarêhimbar oñachi irira pe recua. Ipare oyere tupriira yuvireco pe rese pëu ovava âgua. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepei oya vahe ambuae rese. Esepia, ndapeicuai eté Tüpa ouse pëu pe pĩsiro âgua” ehi Jerusalén pendar rese oyaseho.

Jesús omombopa ava mbahe rerecosar tũparo pipe sui

⁴⁵ Ichui Jesús oique judío tũparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri arachendar pipe aipo ehi: ‘Che rēta yeruresa rētarã’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tũparo guasu pĩpe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pĩha yuca uca ãgua viña?’ ehi yuvireco chupe. ⁴⁸ Ndoicatui rumo yuvireco. Esepia, ava rehii oyapĩsaca iporombohesa rese yuvireco.

20

Jesús mborerecuasa

¹ Ñepeí ari Jesús judío tũparo guasu pĩpe güecose, ombohe ava eta, omombehu ñehesa pĩsirosa resendar oico. Ahese yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pĩpe vo ereyapo co nungar eico? ¿Ava vo ombou nde mborerecuarã? —ehi ahe ava yuvireco chupe.

³ Ahe omboyeví chupe:

—Che avei aporandura mbahe rese pẽu. Pemboyevira cheu —ehi—. ⁴ ¿Ava vo Juan ombou ava ãpiramo ãgua: Tũpa pĩha, ava tẽi tie? —ehi ahe ava yuvirecoi vahe upe.

⁵ Ahese, “¿Mara yahera pĩha?” ehi-ehi tẽi oyeupe yuvireco. “ ‘Tũpa’ yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tẽi remimbou’ yahese chupe, opacatu seroyasar evocoyase yande api-apira ita pĩpe yuvireco. Esepia, ava, ‘Juan omombehu vahe ñehesa Tũpa suindar’ ehi eté yuvireco chupe” ehi tẽi oyeupe yuvireco. ⁷ Evocoyase ahe ava, “Ndoroicuai rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pĩpe co mbahe ayapo’ ndahei chietera pẽu —ehi mborerecuar guasu upe.

Ava mbahe tẽi oporaviqui vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oiví pĩpe. Ipare oseya oiví ava oporaviqui vahe upe iporu ãgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, ahese omondo ñepeí güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeví tupri tẽi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tẽi avei ipogüer tẽi imboyeví imondo yuvireco. ¹² Ichui omondo iri tẽi imombosapisa rese ambuae güembiguai no. Ahe oyapicha-pichaño imosẽ imondo yuvireco.

¹³ “Coíye mití yar aipo ehi: ‘¿Mara ahera pĩha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahir repiase, ‘Co aipo oipisira vu mbahe. Yayucaño. Yandeu nara pãve topita co iví’ ehi oyeupe yuvireco. ¹⁵ Evocoyase ovinose mití pãhu sui, oyuca ité yuvireco.

“¿Mbahe vo evocoyase oyapora iví yar ahe ava naporai vahe upe? ¹⁶ Oura evocoyase ahe ava mocañipa ãgua, omondora ambuae ava upe oiví rese oporaviqui vaherã” ehi.

Aipo renduse,

—¿Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pĩpe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri ãgua’ ehi.

¹⁸ Acoi que oviapi vahe evocoi ita harive, opa tẽira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tẽi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehii sui yuvireco.

Judío rerecuar osecoãha iri tẽi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe iñehe ãgua ‘toyavi angahu oñehe’ oya viraso vaherã mborerecuar Pilato rovai. ²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pñha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboyecua ru ñepei guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboyevisé, iquiriripa tupriño oyepñhamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: ‘Que cuimbahe omenda vahe omanose guahiēhiseve, tivri evocoyase omendara sembirecocuer rese. Ahe viquehir omano vahecuer upe nara tahira oico’ ehi. ²⁹ Evocoyase oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivri omenda sese. Ahe omanoño avei guahiēhiseve. ³¹ Ipare imombosapisa tivri omenda iri tēi sese. Ëgüe ehi tupriño avei chupe. Ambuae ichuindar Ëgüe ehi tupri avei omanopa yuvireco guahiēhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pñha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherã, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco. ³⁷ Moisés rembicuachía agüer pipe niha caha pãhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi. ³⁸ ¿Tūpa ndahei omano vahe Tūpa! ¿Ahe rumo oicove vahe ité Tūpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niqerēhi iri eté mbahe rese oporandu ãgua yuvireco chupe.

¿Ava suindar pñha Poropñsirosar?

⁴¹ Evocoyase Jesús aipo ehi ahe ava upe:

—¿Mahera ru, “Poropñsirosar David suindar ité” ehi yuvireco? ⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopiha ãgua nde povrive yuvireco’ ehi David aracahe.

⁴⁴ ¿Mahera ru, “Poropñsirosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe

rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco. Oseca avei tenda porañete catu vahe güenara otũparo pipe, carusave avei oseca tenda aviye catu vahe yuvireco. ⁴⁷ Iyavei virocua-rocuãño tẽi cuña imer mano vahecuer rẽta ichui. Oarondaguã tẽi avei oyerocuĩ pucu-pucu yuvireco. Ahe rumo oĩpisira Tũpa ñemoĩrosa ipĩrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerrecosa

¹ Ipare Jesús osepia ava imbahe eta vahe omondose oporerrecosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerrecosa. ³ Evocoyase Jesús aipo ehi:

—Supi eté co cuña iparaisu vahe omondo catu oporerrecosa opacatu mbahe yar sui.

⁴ Esepia, ava imbahe eta vahe, oguarepochi rumbĩrer tẽi omondo oporerrecosa Tũpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporerrecosa ãgua Tũpa upe —ehi.

Jesús omombehu tũparo guasu monduru ãgua

⁵ Evocoyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerrecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cũritei pesepia vahe pipe ndipoi chietera que ñepe ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

⁷ Evocoyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropĩsirosar aico, cũritei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepeivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi rĩrii tuvichá vahe, tiavor, mbaherasisa opacatu-catu tẽi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

¹² “Co mbahe-mbahe tẽi reime renondeve rumo pe pisira yuvireco che recocuer sui mara-mara tẽi pe rereco ãgua. Pe reraso aveira pẽu porandu ãgua tũparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tẽi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapeyei chira pepihañemoñeta rereco pe yeepi ãgua.

¹⁵ Esepia, che amondora che mbahecuasa pe ñehe ãgua. Ndoicatui chietera evocoyase pe amotarẽhimbar imboyevi yuvireco pẽu. ¹⁶ Pe amotarẽhira rumo pe yesupa, pe mu, pe rĩvri, pe rĩquehir, pe mboripar avei. Iyavei oyucara amove pe pãhu pendar yuvireco.

¹⁷ Opacatu ava ndape ambotai chira che recocuer sui tẽi yuvireco. ¹⁸ Nocañi chietera rumo que ñepeivi pe ha pe ãca sui. ¹⁹ ¡Peyemoviracua evocoi nungar mbahe upe pe ñepisiro ãgua!

²⁰ “Iyavei pesepiase ava Jerusalén rese sundao oyere tuprise, peicuara evocoyase mbahe-mbahe tẽi reime ãgua yuvireco chupe. ²¹ Evocoyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvĩnose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe ari oimera Tũpa ñemoĩrosa. Ahe omboaviyera icuachiapri arachendar pipe imombehupri. ²³ ¡Iparaisu itera ahe ari pipe cuña ipuruha vahe, imembi pĩtani vahe avei! Esepia, oimera tecoasisa co ivi pipendar upe, ñemoĩrosa

tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupítise voi eté ari imombepri yuvireco chupe” ehi.

Ava Riquehir yevisa

²⁵ “Iva rese iporéhira poromondiisa, ari rese, yasi rese, yasitata rese; iyavei ivi pipe, opacatú tecua rupi ava ndayaracua iri chira yuvireco. Oyembosiquiye guasuguasu tēi aveira yuvireco para guasu riapugüer renduse. ²⁶ Ahese ava setá yaracua cañi tēira osiquiyepave yuvireco opihañemoñeta guasu aise co ivi pipe mbahe oime vaheñā sui. Ahese avei iva resendar opacatu mbahe oririira. ²⁷ Ahese ramo opacatu ava che, Ava Riquehir, che repiara yuvireco, agüeyise iva quiha rese che pīratasa rendigüer porañetesa pipe. ²⁸ Omboipise evocoi nungar mbahe, peyemonguerēhi catura, peyemopoase pe querēhisa pipe. Esepia, pe renosesa pihavira mbahe tēi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cōimi ari sacu vahe yepota āgua yandeu yepi. ³¹ Na ehi aveira pēu che ñehe rupi tupri mbahe pesepiase. Sese peicuara Tūpa mborerecuasa cōimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya āgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoiyase toposesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyeroqui ari rupi co mbahe tēi sui pe yepēpi āgua, pe yemboyecua tupri āgua che, Ava Riquehir, rovai” ehi güemimbohe eta upe.

³⁷ Ēgüe ehi Jesús oporombohe ari rupi tūparo guasu pipe. Pītu pipe evocoiyase opita ivitri Olivo rese. ³⁸ Iyavei opacatu ava yuviraso añihiveive tūparo guasu pipe ñehe rendu āgua yepi.

22

Yemomborandusa Jesús yuca āgua

¹ Ovirovise Pascua pieta pan ndayapepoi vahe hu āgua, ² ahese pahi rerecuareta, Moisés porocuita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

³ Evocoiyase Carugar oique Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrive” ehi. ⁵ Ahe evocoiyase oyemboviharere yuvireco. “Yamondo guarepochi chupe” ehi voi eté yuvireco. ⁶ Judas evocoiyase, “Aviye” ehi. Oseca voi ava porēhiseve Jesús mondo āgua yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu āgua. Ahe pipeve avei ovesa Pascua pieta resendar yucapri seropovēhesa yepi. ⁸ Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru āgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoiyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sētave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoiyase

ahe omboyecuara oi guasu, ivatendar pëu. Aheve pemoingatura yande caru ãgua —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru ãgua apóstol reseve yuviroguapi mesave. ¹⁵ Evocoyase aipo ehi: —¿Cueseve tēi eté niha aipota acarú vaheṛā pe piri Pascua pieta resendar rese che mano ãgua renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoyase oipisi igua riru, “Aviye ndeu” ehi Vu upe, iyavei aipo ehi: —Co amondora pëu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ēgüe ehi avei carusa pare yapo igua riru rese aipo ehi: —Co igua riru pipendar omboyecua che Ru remimbotar ipiasu vahe pëu nara, ahe che ruvi ipiyerepirā pe recocuer rese nara. ²¹ Cūritei rumo oime mbia mesave yande piri che mondo vaheṛā che amotarēhimbar upe. ²² Supi eté imboaviyesa itera che, Ava Riquehir, rese ñehesa yipive imombehupri. ¿Iparaisu catura rumo acoi mbia che mondosar! —ehi.

²³ Evocoyase aipo ehise, semimbohe oporandu-randu tēi oyeupe: “¿Ava pīha ěgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco.

²⁵ Evocoyase Jesús aipo ehi: “Ava mborerecuar co ivi pipendar oyocuai pīrata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo ěgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma pīha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoãhasa pipe. ²⁹ Sese che amondo pëu pe mborerecuasa inungar che Ru ombou cheu che mborerecuasa ãgua. ³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Carugar oporandu pe recoãha ãgua rese. ³² Che rumo ayeroqui nde rese nde yeroyasa paneēhi ãgua. Ereyevise cheu, emonguerēhi catu ambuae nde rivireta imoviracua uca ãgua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehhe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoãha ãgua

³⁵ Evocoyase Jesús oporandu güemimbohe eta upe: —Opomondose acoi mbahe riru porēhi, guarepochi riru porēhi, ambuae pe pitaqui ndugüer rerasoēhise, ¿ipane vo acoi mbahe ahese pëu? —ehi.

—Aní eté —ehi yuvireco chupe.

³⁶ Evocoyase,

—Cūrítei, acoi mbahe riru vireco vahe, tovirecoveño, guarepochi riru vireco vahe, tovirecoveño avei; acoi ndovirecoi vahe quise pucu, tomondo oyeaosa quise repirã.

³⁷ Supi eté amombehu pëu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco pōrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoyase semimbohe aipo ehi yuvireco:

—Ore Yar, cohave oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyerogui Getsemaní ve

³⁹ Ipare Jesús osé oso ivitri Olivo ve. Ahe ivitrive oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoēhi ãgua —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopiha, oyerogui ⁴² aipo ehi: “Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo” ehi.

⁴³ Evocoyase oyemboyecua Tūpa rembiguai chupe, seco momirata ãgua. ⁴⁴ Mbahe-mbahe tēi porarasa pipe oyerogui catu. Ahese sacuvor inungar tuvi osē ichui otiqui ivive.

⁴⁵ Oñarapuhase oyeroguisa sui, oyevi oso güemimbohe uve. Ahe rumo opaño yuviroque yuvirocua oviharēhisa pipe. ⁴⁶ Evocoyase,

—¡Mahera opaño peque! Peñarapuha, peyeroqui catu pe viapiēhi ãgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesús ñehé viteseve, oyepota ati ava yuvireco chupe. Judas doce semimbohe pāhu pendar tenonde secoi. Ahe oyemboya oso sese sovaupite ãgua. ⁴⁸ Evocoyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotarēhimbar upe? —ehi.

⁴⁹ Semimbohe eta rumo, mbahe-mbahe tēi repiase, oporandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepeí rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tūparo pipe pe pāhuve arí yacatu rupi, na ndapeyapoi eté co nungar cheu. Aviyeño rumo, oyepota ité niha pëu imombehupri Carugar pīratasa pipe mbahe-mbahe tēi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoyase Jesús oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso. ⁵⁵ Aheve ñachimbrí pipe oyatapi yuvireco, oyere tupri tata rese oyepehe yuvinoi. Aheve avei Pedro ipāhuve chini. ⁵⁶ Evocoyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepeí hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapí oyupagüer rupi cheu” ihe agüer rese. ⁶² Ahese osê, oyasehó iteanga oso.

Sãrosar mara-mara tẽi Jesús vireco yuvireco

⁶³ Evocoyase ava Jesús rãrosar iguayĩ tẽi yuvirocua-rocua yuvireco sese. ⁶⁴ Osesacua yuvireco. Ipare oporandu yuvireco chupe:

—¿Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tẽi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe arĩ pipe, cõhese, oñemonuha ava judío rerecuar, pahi eta rerecuar iyavei opacatu Moisés porocuita rese oporombohe vahe yuvireco Jesús reraso uca água ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropĩsiosar ereico? Emombehu ru oreu —ehi yuvireco chupe.

—Amombehuse rumo pẽu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pẽu, pe avei ndapemboyevii chietera cheu viña no. ⁶⁹ Co pipe suive rumo che, Ava Riquehir, aguapira Tũpa mbahe mboavaisarẽhi acato coti —ehi.

⁷⁰ Ichui opacatu ava oporandu yuvireco chupe:

—Evocoyase, ¿nde ité ereico Tũpa Rahir? —ehi.

—Supi eté niha aipo aipo peye cheu —ehi mborerecuareta upe.

⁷¹ Evocoyase ahe aipo ehi yuvireco:

—¿Indó! ¿Ava iri vo evocoyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoyase opacatu ava opũha yuvireco Jesús reraso água mborerecuar Pilato rovai.

² Aheve oiñhengapo aipo ehi yuvireco:

—Orosepia co mbia oipihãñemoñeta rerova atĩ uca ava yande recua rupindar aipo ehi: “Pemondoĩ rene Roma pendar mborerecuar ivate catu vahe upe guarepochi” ehi. Iyavei, “Che Poropĩsiosar mborerecuar ivate catu vahe aico” ehi oico —ehi yuvireco Pilato upe.

³ Evocoyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaheerã —ehi

⁵ Ahe ava eta rumo,

—Supi eté opacatu ava oipihãñemoñeta mboyeaviratĩ uca opacatu tecua rupindar. Yipindar omboipĩ Galilea rupi oico. Cũritei co Judea ve ãgũe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pĩha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá arĩ osepia pota tẽi serãcua anduse yepi. Evocoyase oipota ité poromondiisa oyapo vaheerã oyeovaque viña. ⁹ Sese oporandu atĩ mbahe rese chupe. Nomboyevii eté rumo Herodes upe. ¹⁰ Aheve opacatú pahi eta rerecuar iyavei Moisés porocuita rese oporombohe vahe eta seroĩrosave oñemoñeta-ñeta tẽi sese Herodes rovaque yuvireco. ¹¹ Evocoyase Herodes osundao eta reseve iñehe mara-mara tẽi Jesús

upe sese oguayi tēisa pipe yuvireco. Omboyemonde avei turucuar iporañete vahe pipe yuvireco. Ēgüe ehi imboyevi Herodes Pilato upe. ¹² Ahe ari pipe suive oyembori Pilato Herodes rese. Ndoyembotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbia cohave cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano āgua’ ehi. Sese omboyeviño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepei soquendapri mose āgua.

¹⁸ Opacatú guasu rumo ava oñehe pīrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose āgua. ²¹ Ahe rumo osapucái pīrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca āgua, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucái pīratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoyase semimbotar yuvireco” ehiño Pilato ava eta upe. ²⁵ Ēgüe ehi imose co mbia Barrabás, acói soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo āgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica āguave, ahe mbia upe, “Nde terevosii curusu rese Jesús raquicuei” ehi voñño tēi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese.

²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. ²⁹ Esepia, oura ari naporai vahe. Ahese aipo peye tēira: ‘Aviye catu acói cuña nimembii vahe iyavei ndoicuai vahe imocambu omembri’ peye tēira. ³⁰ Ahese avei ava ivitri uve aipo ehira yuvireco: ‘¡Toviapi ore harivel!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, ēgüe ehise ivira yivive vitese, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirã yuvireco.

³³ Oyepotase Ava Āca Cangüer serer vahesave, aheve oyatica curusu rese yuvireco. Iyavei oyatica ñuvirío mbia, ñepei mbahe rese ipocosa coti, ambuae evocoyase mbahe rese ipocoēhisa coti. ³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiaipo yuvireco —ehi.

Sundao evocoyase iguayíño Jesús turucuar rese oyeupe imboyaho-yaho āgua yuvireco. ³⁵ Ava rehii osepia yuvireco; mborecuareta avei seroĩrosave aipo ehi yuvireco chupe:

—Oipĩsiro ambuae ava, toñepisiro ru ahe ae ité cute Tūpa Rembiporavo Poropĩsirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoyase ndaseco pōrai vahe yaticapri iñehe mara tēi chupe aipo ehi:

—¡Nde Poropĩsirosar ereicose, eñepisiro ru nde ae, ore avei ru ore pĩsiro eve! —ehi chupe.

⁴⁰ Ambuae evocoyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaherã. ⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoyase omboyevi chupe:

—Supi eté co pipe ericora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri pĩtu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu tūparo asiassa avei mbiter rupi tupri ovo. ⁴⁶ Evocoyase Jesús oñehe pĩrata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco. ⁴⁹ Opacatu avei ava oicua vahe Jesús, ipãhuve cuña Galilea sui yugüeru vahe, osepiãño tēi amombrive co nungar mbahe yuvireco.

Jesús apocatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tūpa ombou vahe omborerecuasa pipe mbahe moingatu ãgua. Sese ndahei ipiñañemoñeta rupi co mborerecuar oyapo vahe mbahe Jesús upe yuvireco.

⁵² Evocoyase ahe oso Pilato rētave oporandu ãgua Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepia, ahe ari omoingatu mbahe mbituhusa ari upe nara, ahe mbituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité suvipave, osepiã sehögüer apocatuse yuvireco. ⁵⁶ Oyevise güëtave yuvireco omoingatu mbahe sñacua vahe tehögüer resendar ipichi ãgua.

24

Jesús ocuerayevi

Ahe cuña opituhu mbituhusa ari pipe judío porocuita reroyasave yuvireco.

¹ Cõhe ramomise domingu pipe, oyevi yuviraso tuvipave mbahe sñacua vahe reseve.

² Oyepotase yuvireco tuvipave, osepiã soquendasa ita guasu ndipo irise güendagüerve.

³ Evocoyase yuviroique voi tuvipa pipe. Ndoyosui rumo yande Yar rehögüer yuvireco.

⁴ Ndoyembovihai tēi; ndoicatu iri. Ahese aviyeteramo tēi osepiã ñuvirio mbia iturucuar sendi vahe oipive yuvireco. ⁵ Opañño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa pãhu rupi ava oicove vahe! ⁶ Ndipoi mo cohava; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese,

⁷ “Che, Ava Riquehir, imondopri ra ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñehengagüer rese yuvireco. ⁹ Oyevise tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo oyeupe mombehuse aviye aipo ehi tēi vahe; ndoviroyai eté yuvireco.

¹² Pedro rumo yandu ramoseve voi, osē, oña oso tuvipave. Omahese tuvipa pipe, turucuar güeraño osepia co cotimi tuisse. Evocoyase oyepihamondii tēi ‘¿mara ehi rutei piha?’ oya oyevi oive oso.

Jesús oyemboyecua ñuvirío güemimbohe upe tecua Emaús piar rupi

¹³ Ahe ari pipeve caharuse, ñuvirío semimbohe yuvirasos tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuvirasos opacatu co mbahe oime vahecuer rese. ¹⁵ Oñemoñeta vitesese, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovi hai yuvinoha. ¹⁸ Ipāhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe Tūpa ñehe mombehusar seco pīrata vahe opacatu mbahe apo āgua, mbahe mombehu āgua avei Tūpa rovaque iyavei opacatu ava rovaque. ²⁰ Omondo pahi rerecuar iyavei yande rerecuareta yamotarēhisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande pīsirora yande amotarēhimbar sui” orohe chupe viña. Cūrítei rumo opa mbosapi ari yucare. ²² Ore pāhu pendar cuña ndore mbovīhai eté oyevise suvipa sui yuvireco. Esepia, yipīndar yuvirasose añihiveive tuvipave, ²³ ndoyosui eté sehögüer yuvireco. Ahese aipo osepia Tūpa rembiguai aipo ehi vahe yuvireco chupe: “Jesús mo oicove cūrítei” ehi. Ahe evocoyase yugüeru imombehu oreu. ²⁴ Iyavei ambuae ore ndugüer yuvirasose tuvipave cuña remimombehu rupi tupri avei. Ndosepiai eté rumo Jesús yuvireco —ehi Cleofas chupe tupri ité.

²⁵ Evocoyase aipo ehi ahe ñuvirío mbia upe:

—¿Ndapeicuai eté rumo pe piha pipe seroya tupri āgua opacatu Tūpa ñehe mombehusar remimombehugüer! ²⁶ ¿Ndapeicuai vo Poropīsirosar iparaisu rane itera mbahe mbahe tēi virecosa pipe güecua porañetesave güeique āgua renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tūpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuvirasos, Jesús rumo aviye oguataño vite vahe rã senonde. ²⁹ Co mbia rumo oñehe yuvireco chupe:

—Epitaño ore piri, caharu etepri. Pītura moco ndeu —ehi yuvireco chupe.

Evocoyase oique, opitaño ipiri yuvireco. ³⁰ Oguapise yuvinoi mesave, oipisi pan, “Aviye ndeu” ehi Tūpa upe. Ipare ombohi co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cūríteimi ndoyemboyecua iri sovai chupe. ³² Evocoyase aipo ehi oyeupe yuvireco:

—Yande mbopihañemoñeta pīratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuvirasos tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboyecua güemimbohe eta upe

³⁶ Ahe ñehe vitesese yuvireco co tecocuer rese, ahese Jesús oyemboyecua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hägüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaéhisa pe piha pipe! ³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe vitesese omboyecuapa opo, opi avei chupe. ⁴¹ Ahe rumo vorivetesasa pipe iyavei oyepihambosiquiye vitesa sui ndoviroya tupri vitei eté yuvireco. Evocoyase aipo ehi:

—¿Perecomi vo mbahe yande caru água? —ehi güemimbohe upe.

⁴² Evocoyase omondo pira apiremi oyi vahe yuvireco chupe. ⁴³ Ipare oipisi, ohu opacatu güemimbohe rovaque. ⁴⁴ Ipare aipo ehi:

—Co rese acoi ñehe vichico cuese pe rese aico vitesese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tüpa ñehe mombehusar yuvirecoi vahe rembicuachiagüer pipe, Salmo pipe avei —ehi.

⁴⁵ Ëgüe ehi evocoyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropñirosar iparaisura omano água. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tüpa upe pëu ñeroi água” hesara. ⁴⁸ Pe niha peico opacatu co nungar mbahe repiasar imombehu água. ⁴⁹ Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pīratasa iva suindar —ehi güemimbohe eta upe.

Ivave Jesús so agüer

⁵⁰ Evocoyase Jesús yuvinosese tecua sui yuvirasose tecua Betania popive. Aheve ñuvirío opo omopuha, osovasa mbahe tupri reime água chupe. ⁵¹ Ipare oyepepi güemimbohe sui. Ahe ramoseve serasosa ivave. ⁵² Semimbohe evocoyase osapucaí imboeteisave. Ipare oyevi Jerusalén ve vorivetesasa pipe yuvireco. ⁵³ Iyavei ahe ari yacatu rupi yuvirasose tüparo guasu pipe osapucaí Tüpa mboeteisave yuvireco yepi. Aipo rupive.

JUAN REMBICUACHIA JESUS RECOCUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe seci. Ahe oicove mbahe apoēhi viteseve Tūpa rese. Esepia, ahe niha Tūpa seci. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoēhi. ⁴ Jesús niha vireco tecovesa apirēhi vahe oyese. Ahe tecovesa tesapesa nungar seci opacatu ava upe. ⁵ Ahe tesapesa omboyecua tecocuer supi eté vahe p̃t̃umimbi nungar mbahe naporai vahe aposar p̃ahuve. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua 'toviroya opacatu ava yuvireco' ohesave. ⁸ Ahe rumo ndahei eté tesapesa; imombehusar tēi rumo seci. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande p̃ahuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. ¹⁵ Juan niha oñehe sese ava upe aipo ehi: "Co uve niha acoi aipo ahe vahe cuese: 'Acoi ou vaherā che raquicuei, ahe ivate catu vahe che sui. Esepia, yipive ité seci che yesuēhi viteseve' ahe" ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, seci vahe ité ipiri, ahe oicua uca yandeu.

Juan Oporoãpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ip̃t̃iviisareta imondo Juan uve '¿Ava vo nde? tehi yuvireco chupe' oyapave icua āgua. ²⁰ Ahe rumo oyemombehu ité aipo ehi:

—Che ndahei eté Porop̃sirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehusar ou vaherā? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¿Emombehu oreu ore oromombehu vaherā ore mbousar uve! ¿Mbahe ité vo eromombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirēhisa rupi aipo ahe: 'Pemoingatu pe recocuer yande Yar yepotase nara' ahe p̃eu. Ahe inungar acoi Tūpa ñehe mombehusar Isafas aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Porop̃sirosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoyase ereporoãpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoãpiramo; oime rumo mbia pe pãhuve ndapeicuai vahe. ²⁷ Ahe co ivi pipe ou vaheã che raquicuei. Che rumo ndahei eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoãpiramo yepi.

Tũpa remimbou Ovesa nungar opacatu ava angaipa repirã

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tũpa remimbou Ovesa nungar seropovẽhepirã opacatu ava angaipa mocañi ãgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaheã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espiritu Santo ogüeyise iba sui inungar apicasu, opita tupri iharive” ehi. ³³ “Yipindar rumo ndaicuai eté. Tũpa che cuai vahe rumo che poroãpiramo ãgua i pipe, aipo ehi cheu: ‘Acoi eresepiase Espiritu Santo ogüeyise, opitase mbia harive, ahe mbia oporoãpiramora Espiritu Santo pipe’ ehi. ³⁴ Che niha asepia ité. Sese, ‘Co Tũpa Rahir ité secoi’ ahe pẽu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—¡Pesepia, ndo co mbia Tũpa remimbou Ovesa nungar seropovẽhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evocoyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoyase oroso, oroyepota las cuatro pipe secosave. Aheve ore pĩtu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropĩsirosar —ehi (‘Cristo’ oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secoi. ⁴⁵ Ipare oso Natanael reca, aipo ehi chupe:

—Orosepia Poropĩsirosar, sesendar acoi Moisés oicuachía cuachiar porocuita re-sendar pipe aracahe, oicuachía avei sesendar Tũpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pĩha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higeravrive ereicose —ehi Natanael upe.

⁴⁹ —Porombohesar, ¿nde niha Tūpa Rahir ereico, Israel iguar rerecuar guasu! —ehi Natanael chupe.

⁵⁰ —¿Che reroya voi eté acoi, “Oroepia iviravrive” che he sui tēi eve! Eresepia rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevisse avei ivave yuvireco —ehi.

2

Mendasa tecua Caná ve

¹ Ipape imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve. ³ Ègüe ehi rumo opa tēi uva ricuer. Evocoyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

⁵ Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepeipei cambuchi pipe oi que cincuenta litro, amove oi que setenta litro i ipipe. Ahe judío oiporu pietase oyepoi ãgua yuvireco Tūpa porocuita mboaviye ãgua yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Omboapipopa tupri yuvireco. ⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ègüe ehi eté yuvireco. ⁹ Ihañeco vahe pieta rese osãha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipape acoi ava hĩtaropase yuvireco, omondo ndasepii vahe. Nde rumo ereyapocatupaño aviye catu vahe, ahe cūritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipape omboyecua güeco pĩratasa. Sese semimbohe viroya ité yuvireco.

¹² Ipape oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipape judío upendar Pascua pieta yepota senise, Jesús oso Jerusalén ve. ¹⁴ Aheve osepiã tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbã guarepochi recuñarosar yuvinoi. ¹⁵ Co mbahe repiãse rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otiãpi-ãpiã iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¿Penosepa co mbahe cūritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiãpiã aracahendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi ãgua oreu cūritei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi. ²² Ocuera yevise rumo manosa sui, ore oroyemomahenduha iñehe agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secói vitesse Jerusalén ve Pascua pieta pipe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pīhañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pāhuve secói vahe. ² Ahe oso Jesús piri pītu pipe, aipo ehi chupe:

—Porombohesar, oroicua ité Tūpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyese secoñhise —ehi.

³ Evocoyase,

—Supi eté aipo ahe ndeu: acoi ava ndoyesu piasu iri vahe, ndoi quei chietera Tūpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pīha osi aviterve oi que oyesu iri āgua? —ehi Jesús upe.

⁵ Jesús ombo yeví chupe:

—Supi eté aipo ahe ndeu: acoi ava i pipe iyavei Espiritu pipe ndoyesu vahe, evocoi nungar ndoyuviroiquei chira Tūpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espiritu pipe oyesu vahe rumo, ahe espíritu. ⁷ Ereyepīhamondii rene, ‘Peyesu piasu irira’ ahese ndeu. ⁸ Co rumo inungar ivitu oi peyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espiritu pipe —ehi Jesús chupe.

⁹ —¿Mara ehi pīha aipo evocoyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehe tēi niha mbahe co ivi pipendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehír, iva sui agüeyi vahe pēu. ¹⁴ Inungar Moisés osupi ivate mboi rahanga ivi iporupirēhisa rupi aracahe. Ëgüe ehi aveira che, Ava Riquehír, rerecosa ivate che rupira yuvireco ¹⁵ opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

Tūpa poroaisusa ava upe nara

¹⁶ “Supi eté Tūpa osaisú iteanga opacatu ava. Sese ombou Guahir ñepe vahe ‘tocañi tēi eme che Rahír reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nomboui Tūpa Guahir co ivi pipe ava mocañi tēi āgua; ahe rumo ombou ava pīsiro āgua.

¹⁸ “Ava viroya vahe Tūpa Rahír, ndahei eté ocañi tēi vāherā; acoi ava ndoviroyai vahe rumo, oipisi itera cañisa yuvireco Tūpa Rahír ñepe vahe reroyaēhisa pipe. ¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota

catu mbahe Caruguar suindar p̄tumimbi vahesave güeco ãgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaëhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tüpa remimbotar oyapo vahe cua uca ãgua opacatu ambuae ava upe —ehi.

Juan Oporoãpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoãpiramo. ²³ Iyavei Juan oporoãpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca ãgua. ²⁴ Co rumo mbahe yaposa Juan roquendaëhi viteseve.

²⁵ Evocoyase Juan remimbohe omboipi ambuae omu judío rese oyeecopi-copi vaherã i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūritei ahe oporoãpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoyase aipo ehi güemimbohe upe:

—Ava ndoicatu mbahe apo Tüpa nombouise chupe. ²⁸ Pesendu tupri ité che ñehe cuese: “Che ndahei Porop̄sirosar aico, che rumo senonde imboupri tēi aico” ahese p̄u. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohã, oyemboviharete sese. Ëgüe ahe avei che cūritei, ayemboviharete Jesús rese. ³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tüpa omombehu mbahe” ehi. ³⁴ Co Tüpa remimbou niha omombehu Tüpa ñehe. Esepia, Tüpa omondo ité oEspíritu sese. ³⁵ Tüpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tüpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tüpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoãpiramo catuse avei Juan sui ² (ndahei eté rumo Jesús oporoãpiramo; semimbohe tēi rumo ãgüe ehi yuvireco). ³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oĩ. ⁷⁻⁸ Semimbohe eta rumo opacatu yuviraso tecuave mbahe tembihu reroqua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chĩhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose āgua. Esepia, co ĩgua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co ĩgua ore ramoi Jacob oseyā oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pīha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe—. ¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vahe rā ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriēhi āgua, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūritei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tūpa ñehe mombehusar ereico cheu —ehi—. ²⁰ Ore ramoi eta omboetei Tūpa co ivitri rese yuvireco. Pe rumo, judío peico vahe, “Jerusalén ve yamboeteira Tūpa yepi” peye —ehi.

²¹ —Che reroya eve cuña, vīrovi ari pēu peso iriēhi āgua Tūpa mboetei co ivitri rese iyavei Jerusalén ve. ²² Pe Samaria pendar peico vahe pemboetei tēi pe rembiguāhi. Ore rumo oroicua oromboetei vahe. Esepia, ñepisirosa ou judío sui. ²³ Oyepota rumo ari cute, ahe ité co cūritei co pipe suive supi eté Tūpa omboetei vahe, Tūpa Espiritu pipe omboeteira yuvireco. Supi eté Tūpa, “Ēgüē tehi che mboetei yuvireco” ehi. ²⁴ Esepia, Tūpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropĩsrosar yu āgua (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyevi yuvireco, nombovihai pri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸ Ahese cuña oseyā tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pīha ahe Poropĩsrosar? —ehi omu eta upe.

³⁰ Evocoyase ava rehii yuvinose tecua sui, yuviraso Jesús recosave sepia. ³¹ Ava yepotaēhi viteseve, semimbohe eta,

—Ore mbohesar, ecarumi —ehi tēi yuvireco chupe.

³² —Oimera rumo ambuae mbahe cheu che moviracua āgua. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuita, ahe ayapora iyavei amboaviye rane itera iporaviqui —ehi—. ³⁵ Esepia, pe aipo peye: ‘Ipane vite irungatu yasi mbahe miti ha monuha āgua’ peye yepi; che rumo aipo ahe pēu: pemahe pe ivirindar ava eta rese. Opa ité opīha omoingatu yuvireco, ahe inungar mbahe miti ha yaviye vahe.

³⁶ Acoi oporaviqui vahe Tūpa upe ava hā pisi āgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco.

³⁷ Supi eté co ñehesa aipo ehi vahe: ‘Ñepei eté omaheti vahe; imonuhasar rumo ambuae ité’ ehi. ³⁸ Che opocuai ava hã pisi ãgua ambuae ava poraviquisave; yipindar rumo ambuae oporaviquí ité yuvireco sese. Pe evocoyase peique iporaviquí agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoyase ava rehii Samaria pendar yuviraso chupe ‘epítami ore piri’ oya. Evocoyase opita ipiri ñuvirío ari rupi. ⁴¹ Setá catu iri ava viroya yuvireco ñehe ité renduse. ⁴² Evocoyase ava eta aipo ehi cuña upe yuvireco:

—Cūrítei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supi eté opacatu ava p̄s̄irosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osẽ ivi Samaria sui, osoño ivi Galilea ve. ⁴⁴ Ahe ae ité aipo ehi: “Tūpa ñehe mombehusar ndasaisusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoyase oyevi iri tecua Caná ve Galilea ivi rese, aheve acoi i tẽi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rêtave, tombogüerami che rahir omano pota vahe cheu’ oya. ⁴⁸ Evocoyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tẽi che rahir mano viteẽhiseve —ehi mborerecuar chupe.

⁵⁰ —Eyevi nde rêtave; nde rahir oicove —ehi mborerecuar upe.

Ahese viroya voi oyeupe ñehesa. Sese oyevi voi eté güëtave. ⁵¹ Amombri seco viteseve, yuvinoña voi sovaĩchi sembiguai imombehu:

—¡Nde rahir oicove! —ehi yuvireco chupe.

⁵² Evocoyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ãgua ivi Judea sui oyeve Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pãve. ³ Aheve ava eta imbaheasi vahe oñeno yugüeru ivi rupi: ndasesapiso vahe, ndoguatai vahe, ndipindugüei vahe avei i ñemomiisa osãro yuvireco yepi. ⁴ Esepia, amove tẽi Tūpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiaise Jesús, oicua voi eté vireco pucuse ombaherasisa. Evocoyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyeve:

—Nde mbia, ndipoi eté que ava che mongui vaheã i pipe i ñemomiise. Asãha tẽi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoyase,

—Epūha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, uguata voi oico. Mbituhusa ari pipe tupri rumo ěgüe ehi. ¹⁰ Evocoyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii āgua —ehi yuvireco chupe.

¹¹ Ahe mbia evocoyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi āgua. Esepia, Jesús aviyeteramo tēi ndoyecua iri ava rehii pāhuvē. ¹⁴ Coiye rumo Jesús osepia iri tūparove ahe mbia, aipo ehi chupe:

—Ereicua co nde cuerasa cūrītei, aní ereyemboangaipa iri mbahe tēi catu reime iri āgua ndeu —ehi chupe.

¹⁵ Ahe mbia evocoyase oso voi eté judío eta rerecuar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbituhusa ari güeraño nomboyeroyai, ahe rumo oyeapo Tūpa nungar, Tūpa uve ‘che Ru’ ohe angahu tēisa pipe” ehi yuvireco chupe.

Tūpa Rahir mborerecuasa

¹⁹ Evocoyase Jesús aipo ehi judío upe: “Supi eté aipo ahe: Tūpa Rahir ndoicatui eté mbahe apo oyesui tēi, Vu rembiapo mbahe oicua; aheño tupri avei oyapo yepi. ²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporā, ‘¡Mara ehi rutei col!’ pehe tēi āgua chupe. ²¹ Esepia, che Ru ombogüerayevi omano vahe iyavei omondo tecovesa chupe. ěgüe ehi avei Tahir omondo tecovesa ava upe güemimbotar rupi. ²² Iyavei Tu nomondo iri ava upe sembiapo repri. Esepia, ombou Guahir upe opacatu pīratasa ava upe sembiapo repri mondo āgua. ²³ ěgüe ehi Guahir upe opacatu ava imboetei āgua yuvireco inungar Tu imboetepri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocañipri. Esepia, osē manosa sui oipisi tecovesa. ²⁵ Supi eté aicua uca pēu: oura ari imombehupri, cūrītei eté co ari oyepota, ava eta omano vahecuer osendura Tūpa Rahir ñehe. Acoi osendu vahe, oicoveño itera. ²⁶ Esepia, Tu vireco tecovesa oyese. ěgüe ehi avei Guahir upe imondo tecovesa rereco āgua. ²⁷ Ombou avei imborerecuā āgua chupe ava recocuer rese iporandu āgua. Esepia, ahe Ava Riquehir secōi. ²⁸ Peyepihamondii rene aipo che hesa sui. Esepia, oyepotara ari imombehupri, ahese opacatu ava omano vahecuer osendura iñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco āgua; acoi oyapo vahe rumo mbahe naporai vahe, ocuerayevira yuvireco Tūpa ñemoirosa pisi āgua” ehi Jesús judío rerecuar upe.

Jesús omboyecua tupri omborerecuasa

³⁰ “Che ndaicutui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo āgua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai chira peye viña. ³² Oime rumo ambuae che mombehusar. Ahe supi eté che mombehu pe seroya āgua; ahe Juan. ³³ Pe niha, pemondo ava chupe imboporandu mbahe rese. Ahe

semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipotā peñepisiro āgua. Sese aipo ahe pēu. ³⁵ Juan niha inungar tataendi, ēgüe ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo āgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cua ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoiquei eté pe rese. Ipipe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirēhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco āgua.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatui eté che reroya āgua peye. Esepia, pe ae tēi peyemboetei; ndapesecai eté Tūpa ñepe vahe suindar yemboeteisa. ⁴⁵ Ndapepiñañemoñetai chira che pe recocuer mombehu āgua rese che Ru rovai. Moisés peroya vahe ité niha oicuachía pe Tūpa reroyaēhisa chupe imombehu āgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoyase ndapeicatui chietera che remimombehu reroya āgua” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipare Pascua pieta ñipiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoyase oyeupi ivitri rese. Aheve oguapi opacatu güemimbohe eta reseve yuvinoi.

⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoyase Felipe omboyevi chupe:

—Dosciento denario pan ndosupitii chietera que chíhi-chíhimi ava retacuer viña —ehi.

⁸ Aipo hese, ñepe semimbohe pãhu pendar, Simón Pedro rivri, Andrés aipo ehi chupe:

⁹ —Co chíhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. ¹¹ Evocoyase oipisi cinco vahe pan, “Aviye ndeu” ohe pare Vu Tūpa upe, opa ombohi-mbohi imondo ava rehii upe.

Ēgüe ehi avei pira upe, imondopa semimbotar rupi-rupi yuvireco. ¹² Opase ava ihĩtaro,

—Pemonuhapa sumbirer iyemombucaēhi āgua —ehi güemimbohe upe.

¹³ Evocoyase omonuha doce iruova sumbirer yuvireco pan cincomi vahe sui.

¹⁴ Evocoyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tūpa ñehe mombehusar ivi pipe” ehi icuachiapri ararahendar pipe —ehi yuvireco.

¹⁵ Jesús rumo oicuase ava opĩratasa pipe tēi güeraso pota āgua mborerecur guasu vireco āgua oyeupe nara yuvireco, ahese oyeupi iri oso ivate catu. Aheve ahe ae güeco āgua.

Jesús uguata i hari rupi

¹⁶ Pĩtu ramose ogüeyi yuviraso Jesús remimbohe ipave, ¹⁷ yuviroha carite pipe sasa āgua yuvireco tecua Capernaum ve yuviraso. Ahese pĩtu ité. Jesús rumo ndoyevi vitei eté. ¹⁸ Ahese oipeyu pĩrata ivitu, i avei ohitu pĩrata. ¹⁹ Yuviraso pucumi tēi cinco,

anise seis kilómetro rupi. Ahese osepia Jesús yuvireco osupiti senise carite. Ahe i hari rupi oguata oso chupe. Evocoyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepei vahe carite pipe. Jesús rumo ndosoi eté güemimbohe rupi” ehi tēi yuvireco.

²³ Aheseve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoyase ava rehii oicuase Jesús semimbohe reseve iporēhise yuvireco, yuviroha yuviraso āgua co ambuae carite pipe tecua Capernaum ve seca.

Jesús, pan nungar, tecovesa apirēhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi, ndahei co che poromondiisa reroyasave ité peico pota che rupi. ²⁷ Peoporaviqui eme catu tembihu ndasecosei vahe rese; iyacatu rumo peoporaviqui tembihu secose vahe rese omondo vahe tecovesa apirēhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tūpa upe? —ehi yuvireco.

²⁹ —Tūpa oipota pe che reroyara peye che semimbou che recose —ehi ava eta upe.

³⁰ Evocoyase,

—¿Mbahe poromondiisa vo eremboyecua irimira oreu orosepia vaherā nde reroya tupri catu āgua? ³¹ Esepia, aracahe ore ramoi eta yuvirohu ivi iporupirēhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cūritei che Ru ombou pēu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo āgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira. ³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui iva sui mbahe che remimbotar apo āgua tēi; ayu rumo che mbousar porocuita apo āgua. ³⁹ Che Ru che mbousar ndoipotai que ñepei ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipota avei opacatu ava oyeroya vaherā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi —ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che reroĩrosa sui. ⁴⁴ Ndipoi chietera que oicatu vahe ou cheu, nomonguerẽhiise che Ru che mbousar; omonguerẽhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tũpa ñehe mombehusar cuachiar pipe aipo ehi: ‘Tũpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepei ava osepia vahe che Ru; acoi ichui ou vaheño ité, ahe güeraño tupri ité osepia. ⁴⁷ Supi eté aipo ahe pẽu: acoi che reroya vahe vireco tecovesa apirẽhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoi eta niha yuvirohu ité tembihu maná serer vahe ivi iporupirẽhisa rupi. Ahe rumo opa iriño ité omano yuvireco. ⁵⁰ Che rumo ñehe pan iva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirẽhi vakerã ité. Co pan amondo vakerã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rerecuar oyeecopi-copi yuvireco aipo ehi:

—¿Mara ehira vo aipo co imbou tẽi güete yande tohu viña? —ehi yuvireco.

⁵³ —Supi eté aipo ahe pẽu: ndapehuse Ava Riquehir rete, ndapeihuse avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirẽhi iyavei che ambogüerayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; egüe ehi aveira che husar che sui yuvirecovera. ⁵⁸ Añehe pan iva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi ohu vahe rumo co che rete, oicovera apirẽhi vakerã ité —ehi ava eta upe.

⁵⁹ Jesús oporombohe co mbahe rese judío ñemonuhasave tecua Capernaum ve.

Ñehesa tecove apirẽhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya água; ¿ava vo viroya tẽira viña? —ehi yuvireco.

⁶¹ Jesús rumo oicua voi eté ñehe-ñehe tẽise co mbahe rese yuvireco, evocoyase oporandu:

—¿Pemboasiño tie che ñehe? ⁶² ¿Mara peyera pĩha che repiase peye che, Ava Riquehir, ayeupise che reco agüerve vicho viña? ⁶³ Espíritu ité niha omondo tecovesa; yande retocuer rumo egüe ehi tẽi vahe. Co amombehu vahe pẽu ahe espíritu iyavei tecovesa. ⁶⁴ Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarẽhimbar upe ⁶⁵ aipo ehi:

—Sese niha acoi aipo ahe pẽu: “Ndipoi chietera que ava ou vakerã cheu che Ru nomonguerẽhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyeví chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirẽhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tũpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pãhu pendar carugar ité —ehi Simón upe.

⁷¹ Jesús oñehe Simón Iscariote rahir, Judas, rese. Yepe doce semimbohe pãhu pendar viña, ahe rumo omondora ava yamotarẽhimbar upe.

7

Jesús ndoviroyai tivri yuvireco

¹ Ipare Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo água yuvireco, ahese tivri aipo ehi yuvireco chupe:

—Erepita eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güemiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaëhisave tēi avei tivri aipo ehi yuvireco chupe. ⁶ Evocoyase vivri upe aipo ehi: —Ndehi vitei rumo ari che so água. Pe guata água rumo opacatu ariño tēi aviye. ⁷ Esepia, pe ndape amotarēhi eté ava co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoymboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pñha acoi mbia? —ehi tēi yuvireco.

¹² Ava rehii pñhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oi que ava pñhuve tūparo pipe ava mbohe. ¹⁵ Judío eta rerecuar evocoyase,

—¡Too, mara ehi rutei! —ehi tēi—. ¿Mara ehi vo co mbahecuá iteanga? ¡Ndoymbohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—.

¹⁷ Que ñepe pe pñhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ãgüe ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pēu. Que ñepe pe pñhu pendar rumo ndipoi eté omboyero vahe. ¿Mahera ru che yuca pota peye?” ehi.

²⁰ —¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ãgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahe rerozasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chíhivahe mbocircuncida água mbituhusa ari pipe tupri pēu, peyapoño rane ité mborocuita mboaviye água. ¿Mahera ru cheuño pemboasi ñepe mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pñha?’ pe yapave —ehi Jesús ava eta upe.

Jesús oñehe güecocuer Tūpa suindar rese

²⁵ Evocoyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca água yuvireco? —ehi—. ²⁶ Ahe ité co niha co ava pñhuve oñehe oico, ndipoi eté que mara ehi vahe yuvireco chupe. ¿Omoha pñha

mborerecuar co mbia Poropĩsirosar seco āgua yuvireco? ²⁷ Yande rumo yaicua que sui turi. Acoi ouse rumo Poropĩsirosar ité coiye, ndipoi chietera que ava oicua vahe iyusa —ehi yuvireco.

²⁸ Evocoyase aipo renduse oporombohe viteseve tũparove, oñehe pĩrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tẽi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pẽu —ehi.

³⁰ Aipo ihese, oipisi pota yuvireco soquenda āgua viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropĩsirosar, ¿oyapo catura pĩha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi āgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tũparo rãrosar Jesús pisi āgua yuvireco. ³³ Jesús rumo aipo ehi:

—Aicove vitemira pe rese chĩhi rupive. Ipare voi ayevira che mbousar piri vicho —ehi—. ³⁴ Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheerã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pĩha aipo osora yande sui seca iriẽhi āgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe āgua? ³⁶ ¿Mara oya pĩha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheerã che recosave’ ehi yandeu? —ehi-ehi tẽi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe ari pipe Jesús oñehe pĩrata ohã aipo ehi:

—Acoi que ava ihusei vahe, toyugüeru cheu. Che evocoyase tamboĩhu —ehi—. ³⁸ Esepia, inungar aipo ehi vahe icuachiapri pipe, che reroyasar pĩha sui osẽra iai ndopai vahe nungar —ehi.

³⁹ ‘Che reroyasar oipisira Espiritu curi’ ohesave aipo ehi. Espiritu rumo ndou vitei ahese. Esepia, Jesús ahese ndoyeví vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tũpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropĩsirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropĩsirosar viña? —ehi—. ⁴² Icuachiapri pipe rumo aipo ehi Poropĩsirosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tẽi. ⁴⁴ Amove ava viraso pota tẽi yuvireco soquenda; ndipoi eté rumo ěgüe ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tũparo rãrosar oyeví yuvireco Jesús recosa sui. Fariseo eta iyavei pahi eta rerecuar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tũparo rãrosar evocoyase aipo ehi:

—¡Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii tēi ěgüe ehi yuvireco. Ahe rumo ndoicuai vahe Tūpa porocuita yuvireco, sese inemoirosavrive ité yuvirecoi —ehi sundao tūparo rārosar upe yuvireco.

⁵⁰ Evocoyase Nicodemo, acoi oso vahe p̄itu pipe Jesús p̄iri, ahe avei eté fariseo p̄ahuve secói, ahe aipo ehi:

⁵¹ —Yandeundar porocuita mboaviye āgua ndiyai, “Ereyavi mbahe” yahe voiño tēi que ava mbahe sembiapocuaēhi vitesese —ehi.

⁵² Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ip̄ipe eresepiara ndipoi eté que ñepeí ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepeí-peí güēta rupi.

8

¹ Jesús rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoyase oguap̄i oī oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepeí ava.

⁵ Moisés porocuita rumo ore cuai co nungar cuña yuca āgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoāhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaiv̄i, ombahecuachía ocuā pipe ivi rese. ⁷ Evocoyase oporandu vitesese ava yuvireco, opūha aipo ehi:

—Que ñepeí pe p̄ahu pendar ndoyemboangaipai vahe, ahe rane toyapi ita pipe —ehi.

⁸ Oyaiv̄i iri, ombahecuachía ivi rese. ⁹ Osenduse rumo judío rerecuareta, omboip̄i ñepeí-peí yuvinose yuvireco, cuacua catu vahe sui rane yuvinose. Opacatu yuvinosepase, Jesús güerañomi cuña rese opita yuvireco. ¹⁰ Evocoyase opūhase, ahese aipo ehi chupe:

—Cuña, ¿que que ru ava? ¿Ndipoi eté que ñepeí opita vahe nde mocañi āgua? —ehi

¹¹ —Aní eté, che Yar, ndipoi eté —ehi.

Evocoyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secói

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secói vahe virecora tesapesa omondo vahe tecovesa ap̄irēhi vahe iyavei ndaseco iri chietera p̄tumimbisa nungar mbahe-mbahe tēi vahe pipe —ehi.

¹³ Evocoyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri āgua ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri āgua, ahe supi tupri vahe ité. Esepia, ndahei che ae tēi ěgüe ahe, che Ru, che mbousar rumo secói che rese. ¹⁷ Porocuita p̄eu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi.

¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tũparo pipe, guarepochi monuhapri riru ipive oporombohe ohã. Ndipoi eté rumo ahese osoquenda vaherã. Esepia, ndoyepota vitei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesús aipo ehi iri:

—Che asose, che reca tẽira peye. Pe rumo opara pemanu pe angaipa reseve. Che sosave ndapeicatui chietera peso vaherã —ehi.

²² Aipo ihese, judío eta aipo ehi yuvireco:

—¿Oyeyucara pĩha ahe ae; ayeve pĩha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tẽi avei peico; che rumo ndahei eté co ivi pipendar aico. ²⁴ Sese niha acoi aipo ahe pẽu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemanõora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pẽu. ²⁶ Setá iteanga areco che ñehe ãgua pẽu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe: —Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tẽi mbahe ndayapaise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tũpa rahir ité yuvirecoi vahe iyavei ava angaipa pipe tẽi yuvirecoi vahe

³¹ Evocoyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tẽi. ¿Mahera ru aipo nde, “Pesẽra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pẽu: acoi opacatu ava oyemboangaipa vahe, inungar mbiguai tẽi, ãgüe ehi oangaipa rereco yuvireco. ³⁵ Mbiguai tẽi ndahei güereciar rẽta pipe nara ité; tahir rumo opitaño itera güẽta pipe nara. ³⁶ Sese Tahir pe renosese mbiguai tẽi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¿Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tũpa che mbohe mbahe supi eté vahe rese” ahe tẽi pẽu. Pe evocoyase che yuca potaño ité peye. ¿Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tẽi eté —ehi.

Evocoyase ava aipo ehi yuvireco:

—¿Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raísura peye viña. Esepia, che ayu Tūpa sui. Sese cūrítei cohave aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Peyesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepia, Caruguar yipisuive ité oporoyuca serai vahe. Ndoyapoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropĩsirosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepeñe oipota vahe. Ahe niha omondora ava rembiapo repri chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyevi yuvireco chupe aipo ehi:

—Cūrítei oroicua ité cute nde ererecose caruguar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. ⁵⁶ Esepia, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi vitesese —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe. ² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua. ⁴ Sese oime vitesese arí yandeu che mbousar poraviquisa apo

ãgua, iya ité ahe yayapo. Esepia, pĩtura, ahese ndayaicatui chietera mbahe apo. ⁵ Co ivi pipe che recove viteso rumo, che aico ava upe tesapesa nungar —ehi oreu.

⁶ Aipo ohe pare, ondĩvi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoyase oso, oyovai. Oyevise ichui, omahe tupri ité. ⁸ Evocoyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapĩ oĩ guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güēta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera ãgua. Sese viraso ndasesapisoi vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoyase ambuae aipo ehi yuvireco chupe:

—Aipo mbia ndahei eté revo Tüpa suindar. Esepia niha, nomboetei eté mbituhusa ari —ehi yuvireco.

Ambuae evocoyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyevirati tēi ipihañemoñetasa. ¹⁷ Sese oporandu iri ndasesapisoi vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoyase aipo ehi:

—Che amoha ité Tüpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūritei osareco no? —ehi iyesupa upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūritei osareco? iyavei ¿ava vo catu ombogüera? ¡Ndoroiuai eté! Peporandu chupe. Ocuacua niha; ahe ae oicua uca pēu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropĩsirosar secoi” ehi vahe oñemonuhasa sui ñepi reseve imombo ãgua. ²³ Sese niha iyesupa aipo ehiño yuvireco: “Peporandu chupe. Ocuacua niha” ehiño.

²⁴ Evocoyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tūpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoyase omboyeve chupe:

—Che ndaicuai eté angaipa viyar tie revo. Co güeraño catu che aicua: che ndachere-sapisoi vahecuer aico; cūrítei rumo asareco —ehi.

²⁶ Evocoyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vahe rã pëu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramo aracahendar Moisés rupi oroguata vahe. ²⁹ Esepia, oroicua ité Tūpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

³⁰ —¿Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tūpa ndosendui eté ava angaipa viyar ñehe; ava omboetisar iyavei viroyasar ñehe güeraño ité niha osendu. ³² Esepia, ndipoi eté que avaño tēi ava oyesu sui ndasesapisoi vahe ombogüera vahe. ³³ Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

³⁴ Evocoyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi. Ipare omose ñepe reseve oñemonuhasa sui yuvireco.

Jesús reroyasar ehi ndasesapisoi vahe nungar tēi

³⁵ Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbia evocoyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoi vahecuer upe.

³⁸ Evocoyase mbia oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo água; ava ndasesapisoi vahe nungar upe mbahe supi eté vahe che Ru suindar mboyecua água iyavei ava oicua tēi vahe mbahe Tūpa suindar mboesapisoēhi iri água —ehi.

⁴⁰ Evocoyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

⁴¹ Evocoyase omboyeve ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tūpa pe angaipa rese pëu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pëu —ehi Jesús fariseo eta upe.

10

Jesús ovesa rãrosar nungar

¹ “Supi eté aipo ahe pëu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sãrosar ité seci. ³ Oquendipi rãrosar omboi chupe. Evocoyase ovesa rãrosar oñehe serer rupi güeimba ovesa upe senose água sēta sui. Ahe evocoyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoyase oguata saquicuerive. Esepia, oicua ité iñehe yuvireco. ⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi ⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoyase Jesús aipo ehi iri: “Supi eté, aipo ahe pëu: che año ité oquendipi nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oi que vahe che rupi, ahera ipĩsiropirã yuvirecoi. Iyavei inungar acoi ovesa oi que vahe güëta pipe, ichui osẽ capihĩ reca ãgua igua yepi, ãgüe ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe mocañĩ ãgua tēi avei. Che rumo ayu ‘tovireco ava tecovesa ndopai vahe rã ité yuvireco’ viya. ¹¹ Che ité ava rãrosar aviye vahe aico. Sese ayemoingatu tupri che recocuer mondo ãgua ava cheundar repirã; ¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiario, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoyase mahembiar oñaro ai vahe omondi-mondii eté ipisi ãgua. ¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiario ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vahe rã yuvireco. Ahese ñepei reseve guasu che remiario yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca ãgua; che teieté rumo amondora che recocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité caruguar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe caruguar rerecosar. ¿Omboesapiso tie caruguar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sõhisa vahe pipe tecua Jerusalén ve tũparo rovasagüer pieta oyepota. ²³ Ahese Jesús oguata oico tũparo Salomón oyapo vahecuer rocupe ivii rupi. ²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehũ tuprira Poropĩsirosar nde recosa oreu? Emombehũ tupri catu ñepei reseve oreu —ehi yuvireco chupe.

²⁵ —Amombehũ niha acoi pëu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsirosar che recosa; ²⁶ pe rumo ndache reroyai eté peye. Esepia, pe ndahei eté che remiario ovesa peico. ²⁷ Che remiario ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirẽhi yuvireco chupe icañiẽhi ãgua; ndipoi chietera que ava virocua iri vahe rã che sui. ²⁹ Che Ru niha ombou cheu. Esepia, ahe ipĩrata catu opatatu ava sui. Ndipoi chietera que ñepei ava oicatu vahe serocua che Ru sui. ³⁰ Che Ru iyavei che oroico ñepeiño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo ãgüe orohera ndeu. Esepia, nde ereñehe rai tẽi Tũpa rese. Nde moco ava tẽi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pẽundar mborocuaita icuachiapri pipe niha aipo ehi: ‘Che aipo ahe pẽu: pe tũpa pãve ité peico’ ehi. ³⁵ Yaicua niha icuachiapri pipendar ndiyai yayamotarẽhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pĩsar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tẽi Tũpa rese’ peye cheu, ‘Che Tũpa Rahir aico’ ahese pẽu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tẽi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarẽhimbareta upe.

³⁹ Osoquenda pota iri yuvireco viña; Jesús rumo osoño ipãhu sui.

⁴⁰ Oyevi ïai Jordán rovai. Aheve acoi Juan yipindar oporoãpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agũer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe sãacua vahe yande Yar pi rese. Ipare oiquiti oha pipe. ³ Ahe seindri omondo oñehe Jesús upe yuvireco aipo ehi: —Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ãgua ité. ãgüe ehi rumo Tũpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tẽi acoi judío rerecuareta ahe pendar nde yuca pota ita pipe yuvireco; ¿cũritei co ereso pota iri aheve? —orohe chupe.

⁹ Oreu rumo aipo ehi:

—Ñepeí ari niha vireco doce hora. Supi eté acoi uguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi uguata vahe rumo pĩtu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tẽi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tẽise, ocuerara —orohe.

¹³ ‘Omano ité’ oyapave tẽi aipo ehi. Ore rumo orepihañemoñeta: “Oque tẽi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ãgüe ehise ité aviye catura pẽu pe che reroya ãgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaherã supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tĩre” ehi vahe.

¹⁹ Setá judío yuviraso Marta iyavei María piri iquivri mano agüer sui imbovıha āgua.

²⁰ Oicuase Marta Jesús yepota seni, oso voi eté sapeve; María rumo opıtaño oi pipe.

²¹ Evocoyase Marta aipo ehi voi chupe:

—Che Yar, ehi cohove ereicose, nomanoi chietera revo ore quivri viña. ²² Che rumo aicua Tūpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevıra opacatu omano vahecuer reseve ari ipa vahe pipe —ehi Marta.

²⁵ —Che niha cuerayevısa aico iyavei tecovesa. Acoi ava che reroya vahe, yepe omano tĩira viña, oicoveño itera rumo. ²⁶ Acoi che reroya vahe güecoveseve, nomanoi chietera. ¿Eroya aipo che hesa? —ehi Marta upe.

²⁷ —Orovıroya ité, che Yar. Nde niha Poropĩsirosar ereico Tūpa Rahir, ore remıaro ereyu vaheřa co ivı pipe oreu nara —ehi Marta Jesús upe.

Jesús oyaseho Lázaro ruvıpa rovai

²⁸ Aipo ohe pare, Marta oso ocupıhir María reca, chupeñomi aipo ehi:

—Porombohesar oicove cohove, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vıteı eté tecua pipe; Marta rese oyoepıasave vıteño ité secoi. ³¹ Osepiase María sē poyava, judío eta sētave yuvırecoı vahe imbovıhasar yuvıraso voi saquıcuerve, “Oquivri ruvıpave revo osora oyaseho” ehi yuvıreco viña.

³² Evocoyase María oyepotase chupe, oñenopıha sovai aipo ehi:

—Che Yar, ehi revo ereicoveño itese cohove, che quivri nomanoi chietera viña —ehi María chupe.

³³ Osepiase María yaseho iyavei judío eta yuvıraso vahe supı, opıha pipe oyandu ité ovıharēhısa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvıreco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvıreco:

—¿Esepia, osaisu ité! —ehi oyeupe yuvıreco.

³⁷ Ambuae rumo ipāhu pendar aipo ehi yuvıreco:

—Co mbıa omomahe vahe acoi mbıa ndasesapısoı vahe, ¿ndoıcatui chıra pıha Lázaro manoēhi āgua mbahe apo cuese rahe viña? —ehi yuvıreco.

Lázaro mbogüerayevi agüer

³⁸ Jesús oyemboya suvıpave ovıharēhısa pipe; ahe suvıpa ita hoprı, sovapısa ita aveı.

³⁹ —Perocua sovapısa ita ichui —ehi.

Marta, omano vahe reındrı, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che reroyase eve, Tūpa pıratasa eresepıara” ndahei vo acoi ndeu? —ehi Marta upe.

⁴¹ Aipo ihe pare, vırocua ita yuvıreco ichui. Evocoyase omahe ıva rese aipo ehi:

—Che Ru, “Avıye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepı, che rumo aipo ahe co ava eta rembiepiave ‘tovıroya aveı nde che mbousa co ivı pipe yuvıreco’ che yapave —ehi.

⁴³ Aipo ohe pare, oñehe pırata aipo ehi:

—¿Lázaro, esē eıpeve sui! —ehi.

⁴⁴ Omano vahe evocoyase osē voi opacatu turucuar omamasa reseve. Jesús evocoyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi ãgua yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipãhu pendar rumo moviro yuviraso voi ava fariseo rerecuareta uve sembiapo mombehu ãgua. ⁴⁷ Evocoyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu tiête ava viroyara yuvireco viña iyavei aviyeteramo mborereducar Roma iguar yanduse, yugüerura yande tũparo mondurupa iyavei omocañi tẽi uca aveira yande recua yande sui —ehi oyeupe yuvireco.

⁴⁹ Ñepei rumo mbia ipãhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviye catura ñepei mbia omanose yande recocuer rese, ndahei que opacatu yande mocañi tẽi ãgua —ehi omboetasa eta upe.

⁵¹ Ahe rumo ndahei oyesui tẽi aipo ehi; Tũpa ité aipo ombohe uca. Esepia, ahe ité mborereducar guasu chini ahese. Sese aipo ehi: “Jesús omanora yande recocuer rese” ehi.

⁵² Iyavei ndahei chira ahe ava reseño, omanora opacatu ava Tũpa Rahir oñemosai tẽi vahe ñepei reseve imonuha ãgua. ⁵³ Ëgüe ehi ahe ari pipeve judío eta rerecuar oyemoingatupa voi yuca ãgua yuvireco.

⁵⁴ Sese ndoguata iri ava judío eta pãhu rupi. Ahe rumo osẽ ivi Judea sui, oso ivi iporupirẽhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo ãgua, setá iteanga ava ambuae tecua rupindar yuviraso tecua Jerusalén ve oyecocuer moatiro ahe pieta mboetei ãgua renondeve.

⁵⁶ Oseca tẽi Jesús yuvireco. Ipare tũparove yuviroiquese, oporandu-randu oyeupe yuvireco:

—¿Mara peye pe, oura pãha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi ãgua” ehi yuvireco chupe.

12

Ñepei cuña omondo Jesús rese mbahe sãcua vahe

¹ Seis ari ipane vitesse Pascua pieta ãgua, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoyase ocaru yuvinoi mesave ipiri. ³ Evocoyase María güeru medio litro mbahe sãcua vahe nardo, sepí iteanga vahe. Omondo ipi rese. Ipare oiquiti ohavapri pipe ichui. Sãcuá iteanga evocoyase opacatu oi pipe. ⁴ Evocoyase ore mboetasa Judas Iscariote, ahe acoi omondo vakerã ava yamotarẽhimbar uve, aipo ehi:

⁵ —¿Mahera vo ndimondosai co mbahe sãcua vahe tresciento denario rupi ava iparaisu vahe pãtivii ãgua? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tẽi. Setá rupi guarepochi virocua güembiporuguã tẽi. ⁷ Evocoyase Jesús aipo ehi:

—Toyapoño cheu. Esepia, ahe che mano ãgua renonde Ëgüe ehi cheu. ⁸ Yuvirecoveño itera ava iparaisu vahe pe pãhuve yepi; che rumo ndaico pucu iri chira pe pãhuve —ehi Judas upe.

Pahi rerecuar oyamotarẽhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, Ëgüe ehi rumo imbogüerayevipri Lázaro repia avei. ¹⁰ Evocoyase pahi rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tẽi niha setá iteanga judío oyepepi pahi rerecuar sui Jesús reroya ãgua yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota água ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaichi água, osapucaí yuvireco chupe:

—¡Imboeteipri, sovasapri secói ou vahe yande Yar Tūpa rer pīpe! ¡Tūpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquirene, Sión pendar; pesepia, pe rerecuar guasu guaricumí harive ou pēu” ehi.

¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepia.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvínose voi sovaichi ipisi água. Esepia, oicua ité ahe mbahe poromondiisa guasu yapose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, jopacatu guasu ité ava oguata cūrítei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pāhuve yuviraso vahe pieta repia Tūpa mboetei água tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pīpendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri água che recua porañetesave.

²⁴ Supi eté aipo ahe pēu: inungar acoi trigo rāhii nañotisaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pīpendar tēi che recocuer rese, evocoi nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoyase omboeteira ahe sereco —ehi chupe.

Jesús omombehu omano água

²⁷ “¡Cūrítei ayandu ité mbahe-mbahe tēi oime vāherā cheu! ‘¿Mara ahera pīha?’ ahe tēi. ¿Aipo ahera: ‘Che Ru, che pīsiro eve cūrítei cheu oime vāherā mbahe tēi sui’ ahera viña? ¡Che rumo aicua evocoi nungarā ité ayu! ²⁸ Che Ru, emboyecua nde pīratasa nde rer porañetesa mboetei água” ehi oyoerqui.

Ichui oyeendu íva sui ñehesa aipo ehi vahe: “Ēgüe ahe niha amboyecua che pīratasa vichico, ēgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pēundar. ³¹ Cūrítei oimera ñemoirosa co ivi pīpendar ndache reroyai vahe upe, cūrítei avei imombosara Carugar co ivi pīpendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pīpe omboyecua tupri ité mara ehira omano. ³⁴ Aipo ihese ava eta aipo ehi:

—Ore rumo orosendu mborocuaíta icuachiapri pīpe aipo ehi vahe: “Poropīsirosar apirēhi vāherā ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chíhi rupive tesapesa pe pãhuve. Peguata catu supi seime viteseve. Aviyeteramo pe resapiha tẽira pĩtumimbi vahe. Esepia, acoi oguata vahe pĩtumimbisa rupi, ndoicuai que güecosa. ³⁶ Peroya co tesapesa cūritei pereco viteseve, ipipe ité pe reco ãgua —ehi.

Aipo ohe pare, Jesús osẽ ava rehii pãhu sui; ndoyemboyecua iri chupe.

Setá judío rereciar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rereciar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tũpa ñehe mombehusar Isafás rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pĩratasa eremboyecua chupe” ehi.

³⁹ Co rese avei ava ndoicatu eté senducua yuvireco. Inungar oicuachía Isafás aipo ehi:

⁴⁰ “Tũpa nomboesapisoi ava iyavei nombopihañemoñeta tupri iri mbahe rese yuvireco. Sese ndosepiacuai eté mbahe, ndosenducuai avei mbahe, ndoyevi catu yuvireco chupe ombogüera ãgua” ehi.

⁴¹ Isafás aipo ehi. Esepia, osepia ité Jesús reco porañetesa. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rereciar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya. ⁴³ Esepia, ahe oipota catu ava tẽi suindar yemboeteisa Tũpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitesese ava rehii upe, oñehe pĩrata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe vahe che reroyasar pĩtumimbisave yuvirecoiẽhi ãgua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi ãgua, che rumo ayu ipĩsiro ãgua. ⁴⁸ Acoi ava che rooĩro vahe, ndoviroyai vahe avei che ñehe, oime rumo imocañi ãgua: Co che ñehesa supi eté vahe reroyaẽhisa pipe oyemocañi ucara ari ipa vahe pipe. ⁴⁹ Esepia, che nañehei eté cheyesui tẽi; che Ru, che mbousar rumo che cuai che ñehe ãgua, che porombohe ãgua avei. ⁵⁰ Che aicua co cheundar porocuita güeru tecovesa apirẽhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya ãgua oso vaheerã Vu piri. Ahe osaisu vahe ité ava oyeupendar co ivi pipe yepi. Ëgüe ehi saisu ari ipa vahe rupi.

²⁻⁴ Carugar oi que ité Simón rahir, Judas Iscariote, piha pipe imondo ãgua yamotarẽhimbar uve. Jesús rumo oicua ité Vu Tũpa sui ousa, oicua avei oyevi iri ãgua Vu Tũpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opũha, osequi oturucuar yohasa. Ipare omonde ambuae turucuar vumbicuasa rese. ⁵ Evocoyase omondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cūritei. Ipare rumo eresenducuar —ehi Pedro upe.

⁸ Pedro rumo aipo ehi chupe:

—¡Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquíhai eté. Sese ndiyai oyasu iri. Ipí güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ëgüe peye —ehi.

¹¹ Ahe aipo ehi: “Ndaopacatui rumo ëgüe peye” ehi. Esepia, oicua ité uma omondora yamotarëhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pëu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepeí-peí peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ëgüe ahe pëu. ¹⁶ Supi eté aipo ahe pëu: ava mbiguai tēi, ahe ndahei ivate catu güerecuar sui; ëgüe ehi avei imbouprí ndahei ivate catu secoi ombousar sui. ¹⁷ Pesenducuae co nungar mbahe, peyapo tuprise, ahese peviharete catura peico —ehi.

¹⁸ “Che ñaÑehēi opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. ¹⁹ Senondeve amombehu pëu. Evocoyase ëgüe ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepeí pe pãhu pendar che mondora che amotarëhimbar upe” ehi

²¹ Aipo ohe pare, Jesús ndoyembóvhai eté iyavei mbahe oime vahe rã omboyecua tupri ité,

—Supi eté aipo ahe pëu: ñepeí pe pãhu pendar che mondora che amotarëhimbar upe —ehi.

²² Evocoyase ore oromahe-mahe tēi ore yese, “¿Ava upe pãha aipo ehi?” orohe tēi ore yeupe. ²³ Che sembiaisu catu yípive acaru vîte. ²⁴ Ipare Pedro oyaiti-ití ‘¿Ava upe vo aipo ere? tehi chupe’ oyapave cheu. ²⁵ Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrítei amoaquíra pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. ²⁷ Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voñño ité ru —ehi chupe.

²⁸ Que ñepeí rumo mesave orocarú vahe, ndorosenducuai eté aipo ihesa. ²⁹ Esepia, Judas guarepochi riru rãrosar secoi yepi. Sese amove ore pãhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuita ipiasu vahe

³¹ Judas sē pare, Jesús aipo ehi:

—Cūrítei oyecuará che, Ava Riquehir, reco porañetesa. Che Ru Tūpa reco porañetesa avei oyecuará che rese. ³² Acoi amboyecuae che Ru Tūpa reco porañetesa, ahe avei omboyecuará che reco porañetesa, ëgüe ehira imboyecua pãhaivi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuita ipiasu vahe pëu ñepeí-peí peyeaisu água inungar che opoaisu. ³⁵ Pe yeaisuse ñepeí-peí, opacatu tupri ité ava oicuará yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevi Pedro upe:

—Cūrítei ndiyai peso vaheerã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrítei voi ndiyai nde rupi che so ãgua? ¡Ayemoingatu ité amano vaheerã nde rese! —ehi Pedro chupe.

³⁸ —¿Supi eté pïha ereyemoingatu ité che rese nde mano ãgua? Nde rumo cõhe potase tacura ñehe renondeve, mbosapi oyupagüer rupi, “Ndaicuai eté co mbia’ erera cheu —ehi Pedro upe.

14

Jesús, Tüpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tüpa rese, che rese avei peyeroya. ² Esepia, che Ru rêtave setá oime pe reco ãgua; ãgië ndehise rumo, namombehui chira aipo pëu viña. Sese che asora pe recuarã moingatu. ³ Imoingatu pare ayevira pe reca che recosave pe reraso ãgua cheyepiri. ⁴ Pe peicua que vo asora iyavei peicua mara peyera pe yepota ãgua che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so ãgua? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vitei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vite cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pëu, ndahei cheyesui tõi amombehu. Che Ru secoi vahe che rese, ahe ité oyapo güemimbotar che recocuer rese —ehi—. ¹¹ Che reroya peye che Ru rese che recose, ahe avei secoise che rese. Anise, che reroyañomi tõi catu peye mbahe che rembiapo rese —ehi—. ¹² Supi eté aipo ahe pëu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pëu. Ipipe che amboyecua che Ru reco pïratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espiritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuita. ¹⁶ Che aporandura che Ru upe ombou vaheerã Espiritu supi eté vahe pe pïtivii ãgua, ahe secoi vaheerã ité pe rese. ¹⁷ Ava Tüpa ndoicuai vahe rumo, ndoicatu chietera ipisi. Esepia, ndosepiai, ndoicuai avei yuvireco. Pe rumo peicua ité. Esepia, ahe ité secoi pe rese. Ipare oique itera pe pïha pipe.

¹⁸ “Ndopoeyai chira pe güeraño tõi; ayevira niha pe rese aico vaheerã. ¹⁹ Chïhi tõi oime vite ari che reroyasarëhi che repia vite vaheerã yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuita, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuará; mahera ru ndereyemboyecua iri chira ava nde reroyasarêhi upe? —ehi chupe.

²³ Evocoyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoyase osaisura iyavei che Ru reseve oroyura oroico vahehã sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tẽi; ahe rumo che Ru, che mbousar suindar —ehi.

²⁵ “Pe rese che reco vitese, opa co mbahe amombehu vichico pẽu. ²⁶ Espíritu Santo rumo, Poropítiviisar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pẽu che ñehe agüer rese.

²⁷ “Aseya teco tuprisa pẽu, ahe che reco tuprisa; ndahei rumo avaño tẽi rembiapo nungar amondo pẽu. Aní, ‘¿Mara yahera piha?’ peyera; aní chiaveira pesiquiye. ²⁸ Pesendupa niha acoi, ‘Asora, ipare ayevi irira pe rese aico vahehã’ che hesa. Supi eté che raisuse peye, peviharetera peicuase che Ru piri che sosa. Esepia, ahe ivate catu vahe ité che sui. ²⁹ Sese amombehupa voi co mbahe tenondeve pẽu, ãgüe ehise ité, ahese peroyara.

³⁰ “Namombehu pucu iri chira mbahe pẽu. Esepia, ou ité co ivi pipe oporocuai tẽi vahe. Ahe rumo ndahei ivate catu vahe che sui ³¹ ‘toicua ava che reroyasarêhi che Ru raisusa yuvireco’ che hesa pipe. Ayapoño ité che Ru che cuaita.

“Pepũha. Yaso cohava sui” ehi güemimbohe eta upe.

15

Jesús uva hi nungar

¹ Ipare Jesús oñehe iri oreu aipo ehi: “Che aico inungar uva hi supi eté vahe; che Ru evocoyase inungar sese ihañeco vahe secoi. ² Ahe oyasia sãca ndihai vahe ichui yepi; iha vahe rumo omoatiro tupri iha catu ãgua. ³ Pe pe recocuer imoatiropri ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva rãca oise ohí sui, ndiha iri ahe ae tẽi; pe avei ãgüe peyera peyepipse che sui” ehi oreu.

⁵ “Che niha uva hi nungar aico; pe evocoyase sãca nungar peico. Acoi secoi vahe che rese, che avei aico sese. Inungar mbahe miti iha ati vahe, ãgüe ehira ahe. Supi eté ndapeicatu chietera che porẽhi mbahe apo. ⁶ Acoi ndasecoi vahe che rese, ahe imombosara inungar acoi uva rãca yipi vahe. Ipore imonuhasa sapi ãgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pẽu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pẽu ‘tovireco che vihasa oyese yuvireco’ viya; ‘toyemboviharete catu yuvireco’ che hesa pipe. ¹² Co che porocuita: Peyeaisu ñepeipei, inungar che opoaisu. ¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pẽu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pẽu. Esepia, aicua ucapa ñehesa che Ru cheu omombehu vahe pẽu. ¹⁶ Pe niha ndache poravoi peye. Che rumo opoporavo iyavei opocuai peporaviqui vahehã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pẽu. ¹⁷ Co rese opocuai: Peyeaisu catu ñepeipei peyacatu” ehi Jesús güemimbohe upe.

Jesús amotarẽhimbar, supindar amotarẽhimbar avei

¹⁸ “Acoi ava ndoicuai vahe Tũpa pe amotarẽhise, peicuaño che rane che amotarẽhi yuvireco yipindar. ¹⁹ Pe peico vitese ava Tũpa ndoicuai vahe pãhuve, evocoyase pe raisu

aira yuvireco viña. Che rumo opoporavo ipãhu sui yuvireco. Sese tēi ndape ambota iri yuvireco. Esepia, pe ndahe iri ipãhu pendar peico. ²⁰ Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbri aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyeroya yuvireco. ²¹ Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

²²⁻²⁴ “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tūpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipãhuve; ahe rumo yepe osepia co mbahe yuvireco viña, che amotarēhiño, che Ru avei oyamotarēhi yuvireco. Sese, ‘Pereco ité mbahe pe rembiavi peyese’ ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco. ²⁵ Co rumo ēgüe ehi. Esepia, imboaviyesa rane itera ñehesa sesendar icuachiapri pīpe aipo ehi vahe: ‘Mbahe apoēhi pīpe sui tēi che amotarēhi yuvireco’ ehi vahe.

²⁶ “Acoi ambouse rumo Poropītiviisar, Espiritu supi eté vahe che Ru sui pēu, ahe omombehura che recocuer. ²⁷ Pe avei pemombehura che recocuer. Esepia, yipisuive ité peico che rupi” ehi.

16

¹⁻² “Pe mocañiehi āgua che rese pe yeroyasa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tūpa uve nara revo na vahe’ ehira yuvireco viña. ³ Evocoi rumo ēgüe ehira yuvireco che Ru cuaēhi pīpe iyavei che cuaēhi pīpe yuvireco. ⁴ Amombehu aipo pēu acoi ēgüe ehise, peyemomahenduhara che remimombehugüer rese.

Espiritu Santo rembiapo

“Yipisuive rumo namombehui co mbahe pēu. Esepia, aicoveño ité pe rese. ⁵ Cūrítei rumo asora che mbousar piri iyavei ndipoi que ñepepe pe pãhu pendar ‘¿que vo aipo eresora?’ ehi vahe cūrítei cheu. ⁶ Pe rumo ndapeyembovihaiño aipo mbahe amombehuse pēu. ⁷ Supi eté rumo aipo ahe pēu: aviye catura pēu che asose. Esepia, ndasoise viña, ndoui chietera pe rese Poropītiviisar. Asose rumo, che amboura pēu. ⁸ Ouse ahe, oicua ucara ava che cuaēhisar upe yangaipa, oicua uca aveira tecocuer ñvisa iyavei cañisa ndaseco pōrai vahe upendar. ⁹ Oicua ucara yangaipa chupe ndache reroyaise yuvireco; ¹⁰ oicuaru rumo che reco ihĩvi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹ iyavei oicuaru Tūpa poromocañisa. Esepia niha, Carugar, ahe co ivi pīpendar rerecuar oipisira che Ru Tūpa ñemoirosa.

¹² “Setá iteanga mbahe oime amombehu vaherã pēu. Pe rumo ndapeicatui chira cūrítei senducua. ¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaherã. ¹⁴ Ahe che mboeteira. Esepia, oicua ucara opacatu mbahe cheundar pēu. ¹⁵ Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pēu’ ahe.

¹⁶ “Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohé:

—¿Mara oya pīha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepiara iyavei aipo osora Vu piri no? ¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿‘Ipare rumo coiye catumi che repia irira peye’ che he agüer rese co pe porandu vite peyeupe? —ehi—. ²⁰ Supi eté aipo ahe pēu: peyasehora pe viharēhisa pīpe, ava

angaipa viyar rumo ovihareteñora yuvireco. Yepe pe, ndapevihai chira viña, coiye catu rumo peviharetera. ²¹ Inungar acoi que cuña imembira potase, tasi chupe oyepotase ari imembira ãgua; pītani oha pare rumo, nimahenduha iri tasicuer rese; soriveteño omembri rese. ²² Ēgüe peye avei; pe cūritei tasi avei pēu, ayevi irira rumo pe repia ãgua, ahese peviharetera. Ahe viharetesa ndipoi chietera que ava virocua vaheã pe sui.

²³ “Ahe ari pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse. ²⁴ Cūritei rumo ndapeporandu vitei mbahe rese che rer pipe. Peporandu catu sese, ahese peipisira. Ipīpe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayerokuira pe rese che Ru upe’ ndahei pēu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asē che Ru sui co ivi pipe vitu; cūritei rumo aseyara co ivi, ayevíra che Ru upe” ehi oreu.

²⁹ Evocoyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu ãgua mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pēu che rese mbahe tupri pipe pe reco ãgua. Peparaisu itera co ivi pipe; peyemonguerēhi catura rumo. Esepia, che opa ité asecoipi co ivi pipendar mbahe tēi —ehi.

17

Jesús oyerogui güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipīpe sui avei che nde Rahir toromboetei. ² Supi eté niha, nde erembou che mborerecua ãgua opacatu ava ivi pipendar harive iyavei tecovesa apirēhi mondo ãgua opacatu ava nde cheu erembou vahe upe. ³ Co niha tecovesa apirēhi, tande cua nde Tūpa ñepei supi eté vahe nde recose yuvireco, tache cua avei nde che mbose yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete ãgua, inungar acoi yipindar areco vahe nde rese ivi apoēhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvirecoi; ndayeroqui rumo ambuae ava che reroysarēhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesa oyecua.

¹¹ “Che ndapitai chira co ivi pipe; ahe rumo opitara cohava yuvireco. Che evocoyase asora nde piri. Che Ru, seco maranehi vahe, esāro nde pīratasa pipe nde remimbou cheu oyese yuvirecoi tupri ãgua inungar yande yaico. ¹² Aicose co ivi pipe, asāro tupri nde rer pīratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ēgüe ehi.

¹³ “Cūrīteī asora nde recosave. Co ivi pipe che reco vītese rumo, amombehu co mbahe chupe ‘tovireco che vīharetesa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarēhi rumo oyamotarēhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. ¹⁵ ‘Enose ava Carugar povri pendar pāhu sui’ ndahei ndeu, che rumo aipota eresepira Carugar sui. ¹⁶ Inungar che ndahei Carugar povri pendar aico, ēgūe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pāhuve, ēgūe ahe avei che imondo ava pāhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroquii co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherā rese. ²¹ Aporandu avei ndeu toyuvirecoi tupri ité yuvireco oyese inungar ñepei vahe, ēgūe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi āgua, inungar yande ñepei vahe yaico. ²³ Che aico yuvireco sese, nde evocoyase ereico che rese ahe yuvirecoi tupri āgua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherā teco porañetesa cheu erembou vahe yuvireco. Nde niha yipive ité che raisu eve ivi apoēhiseve. ²⁵ Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoyase nde che raisusa toviroco avei yuvireco, che avei taico yuvireco sese” ehi Jesús oyeriqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembī Cedrón rovai. Aheve oime mbahe miti rēta, ipipe Jesús ore reroique ore reraso. ² Iyavei Judas omondo vaherā yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tūparo rārosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuvirasos. ⁴ Yipive ité rumo oicua oyeupe mbahe oime vaherā. Sese osē voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secoi imondo āgua yamotarēhimbar upe. ⁶ “Che niha ahe aico” ehise ava upe; guaquicuei coti pāve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pēu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye āgua ēgūe ehi: “Acoi che Ru ombou vahe cheu, nocañii eté que ñepei che sui” ehi. ¹⁰ Evocoyase Simón Pedro vireco vahe quise, vinose, oyasia Malco

serer vahe nambi yasu cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañño itera chupe —ehi.

Jesús serasosa mborecuar Anás rovai

¹² Evocoyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua. ¹³ Yipindar vīraso Anás rētave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secoi. ¹⁴ Caifás ité aipo ehi omboetasa upe: “Yandeu aviye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborecuar rētave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asē, aporandu oquendipi rārosar uve Pedro reique āgua rese. ¹⁷ Evocoyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoyase mborecuar rembiguai iyavei sundao eta oyatapi yuvireco oyepehe āgua. Pedro avei aheve ipāhuve oyepehe tata ipive ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che ñañemi eté añehe vaherā. ²¹ ¿Mahera vo evocoyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovape aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoyase che rovape eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocua reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¿Aviye acoi nde ité oroepia vahe mbahe miti rēta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase vīraso Jesús Caifás rēta sui Roma pendar mborecuar guasu recosave yuvireco. Cōhe potase ēgüe ehi. Judío rumo ndoyuviroiquei eté mborecuar recosave oyemboangaipaēhi āgua. Esepia, ahe icuaita yuviroique, ndiyai chietera Pascua resendar ovesa roho hu āgua yuvireco chupe viña. ²⁹ Sese Pilato osē ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyeví yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pẽundar ité porocuita rupi sese —ehi.

Judío rerecuar evocoyase omboyeví yuvireco:

—Ore judío oroico vahe upe rumo ndipotasai oroyuca vaheerã que ava —ehi.

³² Ëgüe ehi Jesús ñehe imano ãgua resendar yaviye. ³³ Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¿Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

³⁶ —Che mborerecuasa rumo ndahei co ivi pĩpendar. Co ivi pĩpendarse viña, che rupin-dareta ovavara che amotarẽhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¿Tayaticasa!” ehi ava eta Jesús uve yuvireco

Aipo ohe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepei ava soquendapri Pascua pieta pipe yepi; ¿peipota amose vaheerã judío rerecuar? —ehi.

⁴⁰ Aipo ihese, opacatu osapucái pĩratá yuvireco aipo ehi:

—¿Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoi.

19

¹ Evocoyase Pilato oporocuai Jesús nupa ãgua. ² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco. ³ Ipare oyemboya sese aipo ehi:

—¿Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osẽ iri ava upe aipo ehi:

—Pesepia, anose pẽu pe icua ãgua che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Ahese Pilato aipo ehi:

—¿Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipí osapucái:

—¿Tayaticasa! ¿Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyeví yuvireco:

—Ore rumo orovireco mborocuita. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu. ⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyeví iri eté ñehe chupe. ¹⁰ Evocoyase Pilato aipo ehi chupe:

—¡Mahera ndereñehei eté cheu! ¿Ndereicuai vo che mborerecuar aico nde atica uca ãgua, mbahe tēi sui nde renose ãgua avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tūpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tēi Jesús renose ãgua; judío rerecuar rumo osapucai voiño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemomborecuat tēi vahe, ahe evocoyase mborerecuar ivate catu vahe amotarēhimbar tēi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, uguapi mborerecuar guasu renda harive. Ahe mbahe rese porandusa rer hebreo ñehe pipe Gabata ‘ita apopri’ oya. ¹⁴ Mbiter ari Pascua pieta ãgua Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucai pīratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyeví yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca ãgua. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso “Ava Ñcagüer” serer vahesave (ahe serer hebreo ñehe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeipei yique ivii. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyeroqui co icuachiapri rese yuvireco. Esepia, icuachiasa hebreo, latín iyavei griego ñehe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tēi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyeví:

—Co aicuachía vahe, ãgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho ãgua yuvireco. Oipisi avei iturucuar ivri pendar nimbovívísai vahe, ñepeipei reseve pucuño tēi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pñha oipisira? —ehi yuvireco.

Ñgüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ãgüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yípive, che güembiaisu, aipo ehi osi upe:

—Che si, evocoi nde membirã ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rētave asãro vaherã.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye ãgua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.
Ipare voi ñaca iviso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaheã sundao curusu rese yaticapri rētima mope ãgua ‘tomano’ oyapave curusu sui setecuer reroyipa ãgua yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepeí sundao rumo oicutu yiqueve lanza pipe. Ahe ramoseve voi osē suvĩ, i reseve. ³⁵ Che asepia vahe ité; supĩ eté aipo ahe. Evocoyase amombehu pēu pe seroya ãgua. ³⁶ Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepeí icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasa judío eta upe pahĩ rerecuar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipitĩvĩ, acoi oso vahe Jesús upe pituse. Ahe güeru mbahe síacua vahe mirra, áloe rese oyeseha vahe, treinta kilo, sehögüer rese nara. ⁴⁰ Ëgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe tĩ ãgua yuvireco yepi. ⁴¹ Namombrii Jesús aticasa sui oime mbia remitĩ rēta. Aheve ité oime tuvipa ita hopri, ipiasu vahe iporupirēhi. ⁴² Ipipe omoingue Jesús rehögüer yuvireco. Esepia, ahe tuvipa cōimi eté ichui iyavei virovĩ ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pĩtu vitemiseve. Ahe osepia ita tuvipa rovapisa ndahe irise güendave ihai. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndroicuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tēi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia ãgüe ehi vahe. Ahese aroya voi eté. ⁹ Ore rumo ndorosenducua vitei eté icuachiapri: “Ocueraevira omano vahe pãhu sui” ehi vahe. ¹⁰ Ipare oroyevipa oroso ore rēta.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tũpa rembiguai iturucuar morochĩ vahe oguapi yuvinoi sehögüer rupagüerve. Ñepeí oguapi oĩ ñaca rupagüer coti, ambuae ipi rupagüer coti. ¹³ Ahe Tũpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoyase oporandu María upe:

—Cuña, ¿mahera vo ereyaseho? ¿Ava vo eresece? —ehi chupe.

Ahe omoha ‘co mbahe miti rêta rãrosar revo’ oya viña, aipo ehi chupe:

—Nde ererasose sehögüer, emombehuñomi tẽi cheu que vo eremondo. Aheve taso seca —ehi chupe.

¹⁶ Evocoyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pıpe chupe:

—¡Rabuni! —ehi (‘Porombohesar’ ohesave).

¹⁷ Evocoyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tũpa recosave” erera chupe. Che Ru, pe Ru avei; che Tũpa, pe Tũpa avei —ehi.

¹⁸ Evocoyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pıpeve, domingu pıpe, pĩtuse, ore ore ñemonuhasave oroyeoquenda tupri judío rerecuareta sui ore siquiyepave. Ahese Jesús oi que ore pãhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oi que avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ãgüe ahe aveira co che pẽu —ehi oreu.

²² Ichui ore peyu:

—Peipisi Espıritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepei ore mboetasa rumo Tomás icõi vahe, ndipoi eté ore pãhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pıpe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pıpe oroico. Aheve ramo Tomás secoi ore pãhuve. Yepe oroyeoquenda tupri ité viña, Jesús rumo oi queño ité ou ore pãhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuã quiravo cuarerve; embou ave nde po, emoingue avei che ique cutu agüerve. “Tachequerẽhi eme seroya ãgua” nderei chira cheu; ¡che reroya eve! —ehi.

²⁸ Evocoyase Tomás aipo ehi:

—¡Che Yar Tũpa! —ehi chupe.

²⁹ Ahese aipo ehi Tomás upe:

—¿Cũritei che reroya che repiase eve cute? ¡Aviye catu ava che repiãhi pıpe che reroya vahe! —ehi chupe.

Co icuachiapri Jesús reroya ãgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropĩsiosar, Tũpa Rahir secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icõi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pĩtu pipe rumo ndorombohai eté pira. ⁴ Cõhe potase rumo, Jesús oyemboyecua imbehĩ ivii. Ore rumo ndoroicuai eté Jesús secose.

⁵ Evocoyase aipo ehi oreu:

—Mbĩa chĩhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoyase aipo ehi:

—Pemondo pira mbohasa ive pe asu coti. Ahese pembohara —ehi.

Ëgüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapipo tupri ité pira ipipe. ⁷ Evocoyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. ⁸ Ore evocoyase oroviroyepota ité carite ndatipimisave, oroichoho pira rehii imbohasa pipe seraso, cien metro tõi oroico imbehĩ sui. ⁹ Orovinosese ivi ãtasave, orosepia tãtapii harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoyase Simón Pedro oha carite pipe, oichoho ndatipisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroĩ eté. ¹² Evocoyase aipo ehi:

—Perio, tapecarumi rane —ehi oreu.

Ndipoi eté que ñepei ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, ãgüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoyase esãro tupri che reroysar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovĩhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chihivahe catu vitesé, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoyase nde mboyemondera, nde reraso aveira nde so potañhisave —ehi.

¹⁹ Jesús rumo omboyecua aipo ohe pipe mara ehira Pedro omano Tūpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yípive añ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoyase omboyevi Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tẽi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tüpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuera yevire, ivave oso renondeve, Jesús omombehu oporocuaíta Espiritu Santo pĩratasa pipe güembiporavo apóstol upe sembiaporã. ³ Oyemboyecua güembiporavo upe omanore. Setá rupi omboyecua tupri ocuera yevisa chupe. Semimbohe osepia yuvireco imanore cuarenta ari rupi. Ahese omombehu Tüpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tüpa güemimombehu, ahe acoi amombehu pēu. Juan niha pe āpiramo i pipe tēi; Tüpa rumo Espiritu Santo pipe pe āpiramora. Moviro mi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pĩratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tüpa año ité vireco omborerecuasa ahe mbahe apo āgua. ⁸ Peipisira rumo Tüpa pĩratasa oiquese Espiritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tüpa víraso ivave. Ichui Jesús oique íva quiha pāhuve. Evocoyase ndosepia iri eté yuvireco cute. ¹⁰ Omahe vitesse yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite íva rese pehã? Evocoi Jesús, inungar Tüpa víraso ivave pe sui, ēgüe ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oyevi yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemi imombehusa judío guata āgua mbítuhusa ari pipe yepi.

¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyeroqui āgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe: ¹⁶ “Che mu eta Jesucristo reroyasar, iya ité co imboaviyasa Tüpa Ñehengagüer Judas recocuer resendar. Ahe imombehupri David upe Espiritu Santo pipe aracahe. Evocoi Judas víraso vahe Jesús amotarēhimbar ipisi uca āgua. ¹⁷ Ahe acoi secoi yande pāhuve co mboraviquisa rese yande pñivii āgua avei viña. ¹⁸ Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ívi Tuví resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

'Toime ambuae secoyar iporaviqui rãgüer pisi ãgua' ehi vahe.

²¹ “Evocoyase cohawe oime ava yande Yar Jesús secoi vitesse yande pãhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepei ipãhu pendar yande rupi icuerayevi agüer mombehu ãgua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipare oyeruqui yuvireco aipo ehi: “Nde, ore Yar, opacatu ava pïha ereicua. Emboyecua cohawe nde rembiporavo oreu; ¿uma vo ereipota ²⁵ eremondo vaherã icuaitarã apóstol seco ãgua Judas recuñara? Ahe oangaipa pïpe oyemocañi uca tēi vahe oico” ehi Tūpa upe yuvireco.

²⁶ Evocoyase osãha iporavo yuvireco. Matías ité vinose iporavopri sui yuvireco. Ichui tupri ité oique once apóstol pãhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pïpe yuvireco. ² Aheve oi pïpe aviyeteramo tēi ivitu ipĩrata vahe nungar siapu guasu ou ìva sui. Ahe siapugüer oyendupa tupri oi pïpe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tūpa omoingue evocoi ava pïha pïpe oEspíritu Santo. Ichui ahe Espiritu omoñehe uca ambuae ñehesa pïpe yuvireco.

⁵ Ahe ari pïpe setá iteanga judío yuvirecoi Jerusalén ve omboaviye vahe ocuaita Tūpa mboeteisa, ahe oñemonuha vahe opacatu ìvi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoymboaracuai tēi yuvireco ambuae ava oñehe pïpe ñehese. ⁷ “¡Too!” ehi tēi oyepihamondiisa pïpe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco? ⁸ ¿Mahera pïha co ñepei-pei oñehe yande ñehe pïpe yuvireco? —ehi tēi oyeupe yuvireco—. ⁹ Esepia, cohawe yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pïpe Tūpa rembiapo icatupri vahe! —ehi.

¹² Opacatu oyepihamondii, ndoicuai opïhañemoñeta ãgua yuvireco.

—¿Mara ehi pïha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroñrosa pïpe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoyase Pedro opūha opacatu once vahe apóstol pãhuve, oñehe pĩrata aipo ehi: “Che mu judío eta, opacatu Jerusalén pendar avei, peicua co mbahe amombehu vaherã pēu; peyapisaca tupri che ñehe rese: ¹⁵ ndosavaipoi moco co mbia yuvireco. ¿Ndapeseipai vo añihivei vite cūrítei? ¹⁶ Co niha Tūpa ñehe mombehusar Joel oicuachía vahe aracahe:

¹⁷ “Tūpa aipo ehi:

Coiye, ari cañi renonde, amondora che Espiritu Santo opacatu ava upe.

Ipĩratasa pïpe pe rahir, pe rayri oñehera yuvireco.

Mbia chíhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

¹⁸ Supi eté ahe ari pïpe amondora che Espiritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pïpe.

¹⁹ Amboyecua poromondiisa ìva rese.

Ēgüe ahe aveira poromondiisa mboyecua ivi pipe:
tuvi, tata iyavei tātachi.

²⁰ Yande Yar ari tuvichá vahe imboeteipri renonde ohara pĩtu, yasi oyeapora tuvi nungar.

²¹ Opacatu ava, che Yar che pĩtivii eve, ehi vahe, ahe oñepisirora yuvireco' ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tūpa pĩratasa pipe pe pãhuve güeco maranehi mboyecua ãgua. Ahe niha peicua opacatu. ²³ Ipare rumo evocoi Jesús imondosa pẽu yuca ãgua. Ahe rumo Tūpa remimbotar rupi. Esepia, yipive ité Tūpa oicua pe peipisira yuca uca ãgua curusu rese ava naporai vahe upe. ²⁴ Tūpa rumo ombogüerayevi manosa sui. Esepia, manosa ndoicatui sereco ãgua. ²⁵ Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tẽi pipe che viapiẽhi ãgua yepi.

²⁶ Sese avihaño ité vichico, asapucai avei che rorivetesá pipe.

Iyavei che yeroya tuprisave asãrora mbahe aviye vahe che recove iri ãgua.

²⁷ Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose' ehi David aracahe.

²⁹ “Che mu eta, supi eté yande ramoi David omano, ñotisa ita hopri pipe aracahe. Ahe suvipa ouve vite cohava yande pãhuve. ³⁰ David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara' ehi vahe. ³¹ Ahe ndoyavii osepiá vahe ité Poropĩsirosar cuerayevisa. Evocoyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira' ehi aracahe. ³² Evocoi Jesús, Tūpa remimbogüerayevi secoi. Ahe imombehusar opacatu ore oroico. ³³ Ipare Tūpa viraso oacato coti imboguapi. Ahe oipisi imombehupri Espiritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cūrítei peico. ³⁴ Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapi cohava che acato coti che piri.

³⁵ Asecopipa uca ranera nde amotarẽhimbar ndeu, ehi Yar che Yar upe' ehi David aracahe.

³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarã iyavei yande pĩsira ãgua” ehi Pedro ava rehii upe.

³⁷ Aipo renduse, tasí iteanga ipiha pipe yuvireco. Evocoyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoyase? —ehi.

³⁸ Evocoyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoyase Tūpa iñerora pe angaipa rese. Iyavei omondora Espiritu Santo pẽu.

³⁹ Esepia, co ñehesa imombehupri, ahe pẽu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepipi co ava secocuer co coti tẽi vahe sui! —ehi chupe.

⁴¹ Acoi ava viroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaisu tupri yuvireco, oyeroquí iyavei oñemonuha oyeupe pan mboyaho-yaho ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovihasa pipe, opihañemoñeta tuprisa pipe avei. ⁴⁷ Osapucaí yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisiro āgua Jesucristo viroya vahe pāhuve.

3

Ndoguatai vahe cuerasa

¹ Ñepeí ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeruqui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña.

⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei ovīracua. ⁸ Evocoiyase opūha, opo, oguata; oique oso tūparove supi. Opo-opo vorivetesave iyavei osapucaí Tūpa upe. ⁹ Opacatu ava osepia yuvireco iguatase iyavei Tūpa upe isapucaise. ¹⁰ Omahecuase sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñhe ava rehii upe tūparo Corero Salomón serer vahevrive

¹¹ Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. ¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoí eta avei no, ahe niha omondo güeco pīratasa tuvicha catu vahe Guahír Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose āgua chupe. ¹⁴ Ahe seco maranehi vahe, seco ñvi vahe renose rāgüer pipe, peporandu: ‘Tosē oporapichi vahe’ peye. ¹⁵ Ēgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu. ¹⁶ Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipitívii vahe pe rerecuar Jesús yuca uca āgua pe icua tupriēhi pipe cuese. ¹⁸ Ēgüe ehi Tūpa imboaviye aracahendar opacatu oñhe mombehusar upe güemimombehugüer: ‘Che Rembiporavo Poropñisrosar oiporarara mbahe-mbahe tēi rasicuer omano’ ehi vahe. ¹⁹ Sese pemboasi pe angaipa; peyevi Tūpa upe. Ipipe sui tomocañi pe angaipa pe sui. Aviyeteramo co sui omboura yande Yar pe reco morohisa āgua, ²⁰ ombou aveira Jesús, ahe yipisuive iporavopri pe pñisiro āgua. ²¹ Cūrítei rumo Jesucristo ivave vite secoi acoi Tūpa opase voi omoingatu opacatu mbahe

iyevi ãgua. Aipo ehi acoi imoñehe uca aracahendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tũpa omopuhara ñepei oñehe mombehusar pe pãhuve che nungar. Ahe iñehe pesendura, pemboyeroia catu aveira. ²³ Opacatu ndoviroyai vahe iñehe Tũpa omocañira güembiporavo pãhu sui’ ehi.

²⁴ “Ëgüe ehi opacatu Tũpa ñehe mombehusar Samuel suive aracahe omombehu avei co ari cūrítei yasepia vahe yuvireco. ²⁵ Pëu nara niha Tũpa ñehe mombehusar remimombehugüer aracahendar. Pëu nara avei acoi Tũpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi. ²⁶ Acoi Tũpa Guahir ombogüerayevise, pëu rane ombou pe rovasa ãgua ‘toseyapa ñepei-peï güecocueraï yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahi eta, tũparo rãrosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pãhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tẽi osoquenda yuvireco. ⁴ Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuaita rese oporombohe vahe, ⁶ pahi rerecuar ivate catu vahe Anás, Caifás, Juan, Alejandro, opacatu omu reseve. ⁷ Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espiritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogüerayevi iri omano vahe pãhu sui. ¹¹ Co Jesús pe remieroño, ahe rumo yande vĩracuasa. Pe evocoyase inungar oi mopuhasar omomboño vahe ita aviye catu vahe oi movĩracuasa rãgüer yepi. ¹² Ndipoi que ambuae ava sui poropĩsirosa, Jesús güeraño ité oicatu oporopĩsiro. Esepia, Tũpa nomboui ambuae ava tẽi co ivi pipe yande pĩsiro ãgua —ehi.

¹³ Mborerecuar osepiase iyembosiquiyeẽhisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatui chupe oñehe mara ãgua yuvireco. ¹⁵ Ipape, “Pesẽ ocarve” ehi mborerecuareta yuvireco chupe. Ahe güeraño evocoyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgüe ndehi” yahe chupe. ¹⁷ Yambosiquiye ava upe Jesús rer rese iñehe iriẽhi ãgua yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñehe yuvireco chupe:

—¿Mara ehi pe pihave? ¿Uma pīha aviye catu Tūpa rovai? ¡Pe porocuita tie oroviroya catura Tūpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehuēhi āgua oreu —ehi.

²¹ Aipo ihese, mborereciar ombosiquiye catu tēi yuvireco. Ichui rumo omose tupriño. Esepia, ava omboetei guasu Tūpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. ²² Evocoi ava oipisi vahe Tūpa poromondiisa ocuera āgua, ahe otīaro catu cuarenta araviter vireco vahe sui.

Jesús reroyasar oporandu Tūpa upe siquiyeēhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rereciar oyeupe ñehe mara-mara tēisa yuvireco. ²⁴ Aipo rendu pare, oyoya guasu oyerogui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico. ²⁵ Nde Espiritu Santo pipe aipo eremombehu uca nde rembiguai mborereciar David upe aracahe:

‘¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

²⁶ Mborereciar guasu eta, ambuae mborereciar reseve co ivi pipendar oñemonuha yuvireco yande Yar Tūpa iyavei sembiporavo amotarēhi āgua’ ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropširosar Jesús, seco maranehi vahe, amotarēhi āgua.

²⁸ Ēgüe ehi yapo opacatu nde pihañemoñeta aracahendar rupi tupri ité yuvireco.

²⁹ Iyavei cūritei, ore Yar, emahe ore amotarēhisar rese. Embou nde pīratasa nde rembiguai oroico vahe upe siquiyeēhisa pipe nde ñehengagüer mombehu vite āgua.

³⁰ Ipare, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerogui.

³¹ Iyeroqui pare, Tūpa omboririi opacatu mbahe iñemonuhasave yuvireco chupe. Ahesse Espiritu Santo opa oi que yuvireco sese. Sese osiquiyeēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osovasa catu vite opacatu yuvireco. ³⁴ Ndipoi eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ēgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho sepri, ñepeiyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Carugar nde pīha pipe Espiritu Santo mbopa āgua, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahese opacatu oyandu vahe osiquiye tēi yuvireco. ⁶ Ipape mbia chíhivahe yugüeru, osupi sehögüer, oipoque seraso yuvireco ñoti água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe piñañemoñetasa rese pe secoãha água yande Yar Espiritu! Coi yugüeru nde mer tísarer. Nde avei nde reraso água yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chíhivahe yuviroquese, oipoque voñiño ité sehögüer seraso imer iviñi ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tūpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vñnose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahí rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. ¹⁸ Sese oipisi osoquendapa uca yuvireco. ¹⁹ Ipape rumo, pñtu pipe, Tūpa rembiguai iva pendar ou omboi oquenda, vñnose ichui, aipo ehi chupe: ²⁰ “Peso tūparo guasuve, pemombehu avei ava upe co ñehesa tecocuer pñasu resendar” ehi chupe. ²¹ Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe água.

Aheseve pahí rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña. ²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahí rerecuar ivate catu vahe, tūparo rãrosar rerecuar, pahí rerecuareta avei yuvireco, ipiñañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepepi mbia oyepota imombehu:

—Evocoi pesoquenda vahecuer, ahe mbia cūrítei oporombohe tūparove yuvireco —ehi chupe.

²⁶ Evocoyase tūparo rãrosar rerecuar, sembiguai avei yuviraso seru água mbahe tupri pipe, “Aviyeteramo yande api-api tiētera ava yuvireco yaru raise” ehi yuvireco. ²⁷ Vñroyepotase yuvireco ñemonuhasa ivate catu vahesave, ahese evocoi pahí rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahí rerecuar chupe.

²⁹ Pedro, omboetasa reseve, omboyevi pahí rerecuar ivate catu vahe upe yuvireco:

—Ore cuaita ité Tūpa mboyeroya, ndahei chira rumo ava tēi rane oromboyeroyara — ehi yuvireco chupe—. ³⁰Yepe peyatica, peyuca uca Jesús curusu rese viña, yande Ru Tūpa rumo acoi yande ramo eta viroya vahe, ahe ité ombogüerayevi. ³¹Ipare osecomboivate ivave oacato coti imboguapi imoi. Ahe niha Mborerecuar guasu, Poropñisrosar avei ‘tomboasi oangaipa, toyeve cheu, toipisi angaipa resendar ñeroisa yuvireco’ oya Tūpa Israel suindar upe. ³²Ore Tūpa rembiapo repiasarer imombehu āgua oroico, Espiritu Santo avei oñehe ore ñehe rupi ava upe, ahe acoi Tūpa ombou vahe viroyasar upe —ehi.

³³Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴Mborerecuar pāhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi. ³⁵Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo āgua renondeve co mbia upe yuvireco —ehi—. ³⁶Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. ³⁷Coie catu, omombehuse mborerecuar Roma pendar ava retacuer cua āgua, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸Sese cūrítei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opiratasa pipe tēi yuvireco. ³⁹Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰Ichui rumo güeru iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. ⁴¹Ipipe apóstol ovihareté iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. ⁴²Ipare ndopoi eté ari yacatu Poropñisrosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pñivii āgua yuvireco

¹Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropñiviisa imondosase chupe” ehi oñehe yuvireco. ²Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropñiviisa mondo āgua rese tēi —ehi yuvireco—. ³Sese ore rivireta, peiporavo siete mbia seco avíye vahe pe pāhu sui, yaracua vahe iyavei Espiritu Santo viroya vahe ité opíha pipe. Ahe mbia tihañeco co mboraviquisa rese yuvireco. ⁴Ore evocoyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opíha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶Ichui virasopa apóstol upe yuvireco. Ahe omondo oyo iharive oyerogui yuvireco sese.

⁷Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco. ¹⁰ Ndoicatu rumo iñehe recopi āgua yuvireco. Esepia, ahe oñehe mbahecuasa Espiritu Santo omondo vahe pipe. ¹¹ Evocoyase yamotarēhimbar omboepi ambuae ava upe semira tēi āgua sese yuvireco. “ ‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe. ¹² Evocoyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vahe rā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuita amotarēhisave avei. ¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohese avei aipo osecañarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai iva pendar rova.

7

Esteban oñehe oyepisa pipe

¹ Evocoyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyevi chupe: “Che mu eta, peyapisaca che ñehe rese: Tūpa imboeteipri oyemboyecua yande ramoi Abraham upe aracahe. Mesopotamia ve secoi vītese, icho renondeve Harán ve seco āgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecua ndeu’ ehi Tūpa chupe. ⁴ Evocoyase osē Caldea ivi sui oso tecua Harán ve güeco āgua. Omano pare tu Harán ve, Tūpa ombou cohava yande recosave. ⁵ Yepe oyepota tēi cohava aracahe, Tūpa rumo nomondoimi eté que chíhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vītei ahese). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirā semimombaraisugā tēi avei yuvirecoira cuatrociento araviter rupi’ ehi. ⁷ Tūpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri āgua cohava yuvireco’ ehi Tūpa chupe aracahe. ⁸ Tūpa oyocuai güemimbotar pipe Abraham guahir mbocircuncida āgua rese. Sese Abraham mbocircuncida guahir Isaac iha pare ocho ari pipe. Isaac ēgüe ehi avei guahir Jacob upe. Jacob ēgüe ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoi Jacob rahir omondo vivri guarepochi repirā yamotarēhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese. ¹⁰ Ichui vīnose opacatu iparaisusa sui. Omondo ombahecuasa chupe iyavei seco aviye tupri āgua Egipto pendar mborerecuar guasu faraón upe. Evocoyase faraón ipotasa pipe omoingue mborerecuar seco āgua opacatu ava ivi Egipto pendar cuai āgua iyavei güēta pipendar cuai āgua avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹² Oyanduse rumo Jacob Egipto ve oime vītese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³ Ichui yuviraso yupagüe irise Egipto ve, ahese José oyecua uca viquehir upe. Ēgüe ehi faraón upe oicua uca uma sui oyesu. ¹⁴ Evocoyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ Ēgüe ehi Jacob yuviraso Egipto ve yuvirecoi āgua opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶ Imano pare

rumo, suminogüer vıraso icangüer yuvıreco tecua Siquem ve. Aheve oñoti yuvıreco. Aheve acoi Abraham vırocua tuvıpa Hamor rahir sui aracahe” ehi mborerecuar upe.

¹⁷ “Ipare, vırovise ari ipapapri Tüpa Ñehengagüer Abraham upendar, ahese yande ramoı setá catu-catu iri oyesu Egipto ve yuvıreco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoı José. ¹⁹ Evocoi mborerecuar guasu ombopa yande ramoı eta aracahe. Omombaraisu avei oyucapa uca israelita rahir cuimbahe pıtani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoı upe aracahe. ²⁰ Aheseve avei aipo Moisés oha. Ahe pıtani aviye ité Tüpa uve. Ihare, iyesupa mbosapı yasımi rupive vıreco oyese güetave yuvıreco. ²¹ Oseyase rumo iyesupa ive yuvıreco, ahese faraón rayrı oseca ahe i rupi sui. Ichui vınose seraso güetave, omboacua omembri nungar ité sereco. ²² Ichui Egipto pendar yaracua vahe opacatu ombahecua rese ombohe tuprı Moisés sereco yuvıreco. Evocoyase Moisés ipırata ité oñehese iyavei oyapose mbahe.

²³ “Vırecese rumo Moisés cuarenta aravıter, ipıhañemoñeta: ‘Tasepia rane che mu israelita cohave yuvırecoi vahe’ ehi. ²⁴ Ipare aheve osepia Egipto pendar oinupa-nupa imu sereco yuvıreco. Ahese oyuca Egipto pendar omu repıcave. ²⁵ Ahe rumo, ‘Oicua revo che mu Tüpa vınose uca água Egipto sui yuvıreco cheu’ ehi viña. Imu rumo nomohai eté Moisés vınose água yuvıreco evocoi ava po sui. ²⁶ Ahere ayihive oso omu pãhuve. Aheve osepia ñuvırío mbıa ovavase oyeupe yuvıreco. Ahe rumo oipota tēi iñero água oyeupe yuvıreco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. ²⁷ Oyemovıracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pãhuve ore rerecuarã ore recocuer moingatu água?’ ehi chupe. ²⁸ ‘¿Che yuca pota avei tie eve inungar ereyuca evocoi Egipto pendar irapıpel!’ ehi chupe. ²⁹ Osenduse rumo co iñehe, oñemi voi eté oso Egipto sui ambuae ivı Madián ve. Aheve opıta pucu. Ahe ivı rumo ndahei secua ité. Aheve oyesu ñuvırío tahır.

³⁰ “Omboavıyese cuarenta aravıter Madián ve, Tüpa rembiguai oyemboyecua ivıtrı Sinaı rerovicave ivı iporupırēhisave caha rese tata rendıgüer pãhuve chupe. ³¹ Osepıase mbahe sendı vahe oyepıhamondıı, oyemboya catu sese sepıa tuprı água viña. Ahese osendu Yar ñehe aipo ehi vahe: ³² ‘Che nde ramoı Tüpa aico. Nde ramoı Abraham, Isaac iyavei Jacob che reroya vahecuer yuvıreco’ ehi. Evocoyase Moisés orırıı osıquıyese pıpe nomahe pota iri sese. ³³ Evocoyase Yar aipo ehi chupe: ‘Esequıı nde pıtaquı. Esepıa, ivı nımarai vahesave ereico’ ehi chupe. ³⁴ ‘Che asepia tuprı ité Egipto ve nde mu che rembıporavo paraisuse; asendu avei ipoãse tēısa yuvıreco yepı. Sese agüeyı ndeu nde oromondora aheve senosepa água’ ehi Tüpa Moisés upe aracahe.

³⁵ “Yepe yande ramoı ndovıroya potaiño ité yuvıreco, ‘¿Ava vo nde moingue ore rerecuarã ore recocuer moingatu água?’ ehiño yuvıreco chupe, Tüpa ité rumo oyocuai güembıguai imbogüeyı tata rendıgüer pãhuve imoñehe Moisés upe iporocuai água, ava renosepa água avei ivı Egipto pendar mborerecuar povrı sui. ³⁶ Ipare ahe ité vınose yande ramoı eta Egipto sui, oyapo avei mbahe poromondiısa aheve ‘toicua Tüpa yuvıreco’ oya, para guasu Pıra vaheve avei oyapo poromondiısa iyavei ivı iporupırēhısa rupı avei cuarenta aravıter rupı. ³⁷ Ahe avei aipo ehi israelita upe: ‘Tüpa vınosera pe pãhu sui ñepeı oñehe mombehusar che nungar’ ehi. ³⁸ Ahe avei acoi ivı iporupırēhısa rupı ava pãhu rupı secoi. Chupe avei oñehe Tüpa rembiguai ivıtrı Sinaı ve yande ramoı rese; ahe avei oipısi ñehesa tecovesa resendar yandeu imbou água.

³⁹ “Yande ramoı eta rumo nomboyeroya potai eté Moisés yuvıreco. Ipıhañemoñetaño ité Egipto ve oyevi água rese yuvıreco. ⁴⁰ Evocoyase aipo ehi Aarón upe yuvıreco: ‘Eyapomi catu ava tüpa rahanga oreu ore reroguata água’ ehi yuvıreco chupe. ‘¿Que vo catu Moisés, ore renosesarer Egipto sui, secoi? Omano tie revo’ ehi tēi israelita yuvıreco aracahe. ⁴¹ Ipare oyapo uca mbahe rahanga guaca repıaca nungar oyeupe yuvıreco. Oyuca mbahe mımba ahe mbahe rahanga upe vıropovēhe vaherã yuvıreco iyavei oyembovıha pieta apo yuvıreco güembıapo ucagüer rese tēi. ⁴² Sese Tüpa opoiño

ahe ava sui, ‘Toyerure evocoyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovêhe ãgua cuarenta araviter pipe ivi iporupirêhisa rupi.

⁴³ Pe rumo che mboeteiêhisa pipe peraso tûpa rahanga Moloc rêta iyavei yasitata rahanga Refán pe ae têi peyapo vahe pe tûpaguã.

Sese che opovinosera pe recua sui pe mondo Babilonia cupe coi coti’ ehi Tûpa chupe aracahe.

⁴⁴ “Ivi iporupirêhisa rupi yande ramoi eta vireco Tûpa porocuita rêta oyeupive yuvireco aracahe mbahe mimba pিরer apopri. ‘Na peyera yapo’ ehi Moisés upe. Evocoyase iñehe rupi tupri oyapo uca. ⁴⁵ Ahese coiye catu yande ramoi eta vireco co oi Tûpa rêta mbahe pিরer apopri yuvireco iyavei Josué rupi yugüeru vahe güeruño ité avei yuvireco, omosepase Tûpa ambuae ava co yande recuavi sui. Êgüe ehiño vite ité ahe sereco yuvireco mborerecur guasu, David, secoise aracahe. ⁴⁶ Ahe David aviye ité Tûpa upe, oyapo pota setarã ‘toime tûparoguã yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tûparo. ⁴⁸ Tûpa rumo, seco ivate vahe, ndasecoi vahe tûparo ava têi rembiapo pipe. Inungar acoi omombehu vahe Tûpa ñehe mombehusar aracahe aipo ehi:

⁴⁹ ‘Iva che renda iyavei ivi che pirunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

⁵⁰ Che niha opacatu co mbahe aposar aico’ ehi Tûpa icuachiapri pipe” ehi mborerecur upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime têi pe nambi, pe piha avei, ipipe rumo ndapeicuai eté Tûpa. Peico Espiritu Santo amotarêhimbar têi inungar pe ramoi aracahe yuvirecoi. ⁵² ¿Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cûritei ou ndaseco marai vahe cute. Pe avei evocoyase ahe yuca uca ãgua peporocuai. ⁵³ Pe pereco têi Tûpa porocuita acoi Tûpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecur upe.

Esteban mano agüer

⁵⁴ Osendupase mborerecur iñehe, omboasí iteanga yuvireco; oñeaimboterepri ité yamotarêhisave yuvireco. ⁵⁵ Esteban rumo vireco ité Espiritu Santo oyese. Evocoyase iva rese omahese, osepia Tûpa porañetesa. Osepia avei Jesús opûha ohã Tûpa acato coti.

⁵⁶ Evocoyase aipo ehi:

—¡Pespia! Asepia inungar iva imboipri. Aheve asepia Ava Riquehir Vu acato coti ihã —ehi.

⁵⁷ Mborerecuareta rumo osapucái pírata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivii yuvireco. Aheve oseya oyeaosa Saulo pive ‘tosáro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tûpa upe: “Che Yar Jesús, eipisi che hã” ehi. ⁶⁰ Ipare oñenopiha, oñehe pírata Tûpa upe: “¡Che Yar, ndeñero co ava che amotarêhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo oseca Jesús reroysar mocañipa ãgua oico

Ahe ari pipeve omboipi Jesús amotarêhimbar seroyasar reca mara-mara têi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime

ava Tūpa mboeteisar yuvirecoi vahe, ahe víraso Esteban rehōgüer ñoti yuvireco. Ití pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaēhi āgua viña. Yuviroique-iqueño tēi aipo sēta rupi cuimbahe, cuña mbotiriri senose soquenda āgua yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa pñirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tūpa Rembiporavo ava pñiro āgua” ehi. ⁶ Ahese ava rehii oñemonuha Felipe ñehe rendu āgua yuvireco. Oyapisaca tupri ñehese rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osēse ava sui, sāse yuvireco. Iyavei setá ava nomii vahe, ndoguatai vahe avei ombogüera. ⁸ Evocoyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa. ¹⁰ Evocoyase opacatu ava, cuacua vahe iyavei chíhivahe catu vahe oyapisaca tupri ñehese rese, aipo ehi yuvireco: “Co niha Tūpa pīratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñepiramo ité yuvireco cuimbahe, cuña avei. ¹³ Ahe Simón avei viroya. Oñepiramo pare, oso Felipe rupi. Co mbahe poromondiisa iyavei Tūpa suindar ndayasepiái vahe rese oyepihamondii.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñhengagüer yuvireco. Evocoyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñepiramoño tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:

—Cheu avei pemboumi tēi evocoi pīratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaheṛā nde guarepochi pipe viña —ehi chupe—. ²¹ Ndeu ndiyai co nungar mbahe apo āgua. Esepia, nde pihañemoñetasa ndahei ihivi vahe Tūpa rovaque. ²² Sese epoi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa pñirosa resendar Samaria pipendar tecua rupi yuvireco. Ēgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tūpa rembiguai oyemboyecua Felipe upe aipo ehi chupe: “Epūha, eso irohi coti nde yepota āgua evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. ²⁷ Evocoyase opūha oso peri rupi. Aheve osovaichi ñepeí ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tūpa mboetei āgua. ²⁸ Oyevise ocāreto pipe, oyeruqui Tūpa ñehese mombehusar Isaías rembicuachiagüer rese ou.

²⁹ Evocoyase Espíritu aipo ehi Felipe upe: “Eyemboya cãretomi rese” ehi.
³⁰ Evocoyase virovise ahe ava, osendu iyeroqui Isaiás rembicuachiagüer pïpe oĩ. Ahe se oporandu chupe:

—¿Eresenducua aipo Tüpa Ñehengagüer nde yeroquisa eĩ? —ehi chupe.

³¹ Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohava che piri” ehi Etiopía pendar chupe. ³² Ahe Isaiás rembicuachía oyeroqui vahe pïpe aipo ehi:

“Inungar ava viraso ovesa yuca ãgua, ãgüe ehi avei ahe mbia seraso yuca ãgua yuvireco. Iyavei inungar ovesa nasasei eté guagüer rerocuase, ãgüe ehi avei ahe mbia noñehi eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaiás rembicuachía pïpe.

³⁴ Oyeroqui pare ahe Etiopía pendar oporandu chupe:

—Emombehumi cheu: ¿Ava rese pïha aipo Isaiás oñehi: oyese ae pïha, ambuae ava rese tie? —ehi.

³⁵ Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohava che ãpiramomi tõi eve viña? —ehi.

³⁷ Ahe se omboyevi chupe:

—Eroya itese opacatu nde pïha pïpe, iya ité ndeu —ehi.

—Aroya ité niha Jesucristo ahe Tüpa Rahir secoi —ehi.

³⁸ Evocoyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo. ³⁹ Yuvinosese i sui, yande Yar Espíritu viraso ahe Etiopía pendar sui. Ahe se ndosepia iri; ãgüe ehiño vorivete oso peri rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohava nde rer pïpe” ehi, “evocoyase eremombehura cuachiar pïpe Damasco pendar tüparo rerecuar upe” ehi pahi rerecuar ivate catu vahe upe. ³ ãgüe ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo tõi osesape guasu iva sui chupe. ⁴ Evocoyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epüha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate oñehi vahe yuvireco. ⁸ Ipare Saulo opüha, omahe tõi; ndoicatui rumo mbahe repia. Ichui supindar oipisi iyiva rese seraso Damasco ve yuvireco. ⁹ Aheve mbosapi ari ndasesapisoi, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: “¿Ananías!” ehi. “Co aico, che Yar” ehi imboyevi chupe.

¹¹ Evocoyase yande Yar aipo ehi chupe: “Epūha, eso calle Ihĩvi serer vahe rupi. Eporandu Judas rētave Saulo, tecua Tarso pendar, rese. Ahe oyerogui cūrītei. ¹² Oquerve angahu osepia mbia Ananías serer vahe omondose opo iharive omboesapiso iri” ehi.

¹³ Evocoyase omboyevī chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroysar reco maranehi upe Jerusalén ve. ¹⁴ Cūrītei ou rutei ahe mbia pahi rerecuar porocuaite rupi opacatu nde rer rese oyeroya vahe roquendapa āgua” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheṛā ava ndaheṛi vahe judío upe iyaveṛi serecuar guasu yuvirecoṛi vahe upe, judío upe aveṛi. ¹⁶ Che ae amboyecuaṛa setá mbahe tēi chupe oiporara vaheṛā che remimbotar mboaviye āgua” ehi yande Yar chupe.

¹⁷ Evocoyase oso secosave. Oiquese ahe oi pīpe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri āgua. Toique aveṛi catu Espíritu Santo nde rese —ehi Saulo upe.

¹⁸ Ahese voi eté pira pīrer nungar mbahe oviapipa sesa sui. Ahese voi sesapiso iri. Ichui opūha. Ipare voi Ananías oñapiramo. ¹⁹ Ipare Saulo ocaruse, ipīrata catu iri. Moviro ari tēi opīta iri Jesús reroysar pīri Damasco ve.

Saulo omombehu Jesús recocuer Damasco ve

²⁰ Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secoṛi” ehi ahe pendar ava upe. ²¹ Ava opacatu osendu vahe iñehe,

—¿Mara ehi pīha co? —ehi tēi yuvireco—. ¿Ndaheṛi vo acoi co mbia Jerusalén ve Jesús reroysar mara-mara tēi vireco vahe? ¿Ndaheṛi vo acoi co aveṛi ou cohava ava Jesús reroysar ha pendar pīsi āgua serasopa āgua aveṛi Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava pīsiro āgua secosa. Sese ndoicatui judío iñehe mboyevī yuvireco.

Saulo oñemi omu sui oamotarēhise

²³ Setá ari pare judío ahe pendar omboguai yuca āgua Saulo yuvireco viña. ²⁴ Ahe rumo oyandu omboguaisa judío osārose tecua āchisa roquendipive ari, pītu momba yuvireco yuca āgua viña. ²⁵ Jesús reroysar rumo pītu pīpe tecua tapia āchisa oyere tupri vahe tecua rese, icupe rupi ombogüeyi iruova guasu pīpe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroysar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. ²⁷ Ipare rumo Bernabé vīraso Saulo apóstol yuvirecoṛi vahe upe. Aheve Bernabé omombehupa chupe aipo ehi: “Co mbia Saulo osepia yande Yar peri rupi iyaveṛi yande Yar oñehe chupe. Ichui co oñehe osiquiyeēhisa pīpe Damasco ve Jesús recocuer rese” ehi. ²⁸ Evocoyase Saulo opīta aheve ipīri. Ari yacatu rupi apóstol rupi oguata yepi, iyaveṛi omombehu yande Yar recocuer osiquiyeēhisave. ²⁹ Oiñehopepi aveṛi secocuer rese judío griego pīpe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroysar yuvireco, vīraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroysar yuvirecoṛi vahe Judea rupindar, Galilea rupindar iyaveṛi Samaria rupindar, chupe oime mbahe tupri. Iyaveṛi oyemovīracua tupri catu yuvireco yande Yar mboeteisa pīpe, Espíritu Santo oipītivīi iyemboeta catu āgua yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcas cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitívii yepi.

³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oĩ. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serãcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tüpa opacatu guahir, güembireco reseve yepi. Iyavei omondoño ité judío pítivii água guarepochi, oyerogui avei Tüpa upe yepi. ³ Ñepe ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepia avei nde poroparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopitasar piri. Ahe sēta para guasu popive chini” ehi chupe.

⁷ Orose Tüpa rembiguai ichui, Cornelio oñehe ñuvirío güembiguai upe iyavei ñepe sundao Tüpa mboeteisar upe, sese acoi oyeroya vahe yepi. ⁸ Opacatu Tüpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyerogui água. ¹⁰ Viēporēhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe oquer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe. ¹² Ahe turucuar pipe, osepia opacatu mahembiar vai, mboi, v̄rai vai tēi avei. ¹³ Ahese osendu ñehesa aipo ehi vahe: “Pedro, epüha, eyuca, ichui ehu” ehi chupe.

¹⁴ Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tüpa remimbotatupri upe, ‘Ava remimbotarēhi, ndihusai vahe’ nderei chira” ehi.

¹⁶ Ëgüe ehi mbosapí oyupagüer rupi chupe. Ipare turucuar oyeví ivave oso. ¹⁷ Pedro ipihañemoñeta vitesse mbahe osepia vahecuer rese oquer nungar pipe: “¿Mbahe rese pīha co oyemboyecua cheu?” ehi vite oico. Aheseve Cornelio remimondo oporandurandu pare yuvireco, oyepota Simón rēta roquendipive yuvireco. ¹⁸ Oñehe pucu oī pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta vitesse Pedro mbahe oyemboyecua vahecuer rese, Espíritu Santo aipo ehi chupe: “Pedro, esendu rane, pe mbosapí mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pīha?’ erei rene. Esepia, che ambou evocoi mbia nde reca” ehi Espíritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyeví iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ïvi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese eseso vahe rā sētave, ahe osendu vahe rā nde ñehesa —ehi yuvireco Pedro upe.

²³ Evocoyase omoinguepa, omombitapa oyepiri ñepeí pītu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sētave. Cornelio rumo osāro opacatu omu eta rese yuvireco iyavei omboriparete güembisoho reseve avei. ²⁵ Oyepotase sētave oso, Cornelio rane osē voi, osovañichi, oñenopiha sovai imboeteisa pipe. ²⁶ Pedro rumo aipo ehi chupe:

—Epūha, che niha nde nungar avei aico —ehi chupe.

²⁷ Evocoyase ahe omoñeta seroi que seraso oī pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuita aipo ehi vahe: “Peiquei rene ndahei vahe judío piri. Aní chaveira pembori evocoi ava peico” ehi acoi —ehi Cornelio rēta pipendar upe—. Tūpa rumo omombehu cheu che quer nungar pipe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhi che yu āgua pēu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rētave aicose, ndacarui eté che yerure āgua Tūpa upe. Aheseve oyemboyecua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pīrer mopítasar. Ahe sēta para guasu popive chini” ehi cheu. ³³ Sese amondo voi eté nde reca āgua. Aviye nde ereyu cohava. Cūrítei co opacatu yaico cohava Tūpa rovaque. Orosendu pota opacatu nde ñehe yande Yar nde cuai vahe nde ñehe āgua oreu —ehi Cornelio chupe.

Pedro oñehe Cornelio rētave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ivi pipendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñehesa tupri yeamotarēhiēhisa resendar Jesucristo rembiaporā sui, ahe opacatu ava co ivi pipendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omondo Jesús Nazaret pendar upe opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe carugar povrive yuvirecoi vahe. Esepia, Tūpa secoi sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatīca uca curusu rese yuca yuvireco. ⁴⁰ Tūpa rumo ombogüerayeví imombosapisa ari pipe. Ipare omboyecua iri oreu. ⁴¹ Nomboyecuai

rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oiñu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu āgua oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío pīha pipe

⁴⁴ Pedro oñehe vitesese, Espíritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo āgua yande pāhu pendar? Esepia, co oipisi Espíritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuve yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai ñva sui. ⁶ Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espíritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rētave. ¹³ Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua. ¹⁴ Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—. ¹⁵ Añehe ramosese chupe, Espíritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espíritu Santo pipe peñeapiramora” ehi vahe. ¹⁷ Tūpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer recuñaro ãgua, tecovesa apirẽhi vahe rereco ãgua! —ehi Tūpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarẽhimbar oyamotarẽhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar pĩratasa vireco yuvireco. Evocoyase setá ava viroya; oseyá ité yipĩndar güembieroya yuvireco yande Yar reroya ãgua.

²² Serãcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Tūpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe pĩha pipe” ehi chupe yuvireco. ²⁴ Bernabé aviye etepri vahe, viroya ité Espiritu Santo iyavei oyeroya ité yande Yar rese. Evocoyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe ãgua ñepei araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipĩndar, “Cristo reroyasar” ehi yuvireco.

²⁷ Aheseve Tūpa ñehe mombehúsar yugüeru Antioquía ve Jerusalén sui. ²⁸ Ñepei ipãhu pendar, Agabo serer vahe, opũha aipo ehi Espiritu Santo pĩratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoyase Jesús reroyasar Antioquía pendar omondo pota voi guarepochi Jesús reroyasar Judea pendar pĩtivii ãgua yuvireco ocatugüer rupi. ³⁰ Ëgüe ehi yande Yar reroyasar rãrosar Judea pendar upe porrecosa mondo. Bernabé, Saulo ahe porrecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro ãgua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoyase Pedro opita voquendasave sãrombri tupri chini. Jesús reroyasar rumo oyerocui pĩrata Tūpa upe yuvireco sese.

Tūpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive. ⁷ Aviyeteramo tẽi Tūpa rembiguai oyemboyecua ique viteseve chupe. Ahese sendi gasú iteanga soquendasa pipe. Ahe oñatoi Pedro iqueve imomahe: “¡Epũha poyava!” ehi chupe. Ipũhase, opa voi oyera carena ipo sui. ⁸ Ahese Tūpa rembiguai aipo ehi chupe: “Eyemonde, emonde nde pitaqui” ehi. Evocoyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

⁹ Ëgüe ehi oso saquicuei. Ahe rumo ndoicuai Tūpa rembiguai oyeupe Ëgüe ehise. Ndoyavii iquerve tẽi Ëgüe ehi vahe chupe. ¹⁰ Ichui yuvinose, oñocua yipĩndar guãrosar yuvireco. Ipare yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose ãgua yuvireco. Ahe oquenda

oyemboi ahe ae ité chupe yuvireco. Ipare yuvinose yuviraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoyase Pedro aipo ehi oyeupe: “¡Too! Supi eté Tūpa ombou cheu güembiguai che renose āgua Herodes povri sui. Tūpa che p̄siro judío rerecuar che yuca rāgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rētave oso. Aheve setá ava oñemonuha oyerogui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osē imboi āgua chupe. ¹⁴ Osenduse rumo Pedro ñehe, oquenda omboi rāgüer sui, oña oique oi pipe vorivetesave, omombehu: “Pe Pedro ihāi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehe viteño ité oquendipive ohā. Ichui omboise oquenda yuvireco chupe cute, oyembosiquiye iriño tēi sepiase yuvireco. ¹⁷ Pedro rumo opo omopuha imonguiriri āgua. Ichui opa omombehu yande Yar op̄siro agüer voquendasa sui chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cōhese sundao oyepihamondii eteanga yuvireco. “¿Que p̄iha Pedro?” ehi tēi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sãrosar yucapa āgua. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaherã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca āgua rese yuvireco. Esepia, Herodes porocuita sui oipisi mbahe güemihura yuvireco. ²¹ Herodes evocoyase omombehu ari oñehe vaherã chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive uguapi oĩ. Aheve oñehe ava rehii upe. ²² Evocoyase ava rehii osapucui p̄rata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave. ²³ Ava aipo iheseve voi, ñepei Tūpa rembiguai oyapo mbaherasi guasu chupe. Ichui mbahe rasoi ocaru yaviter rupi yuvireco. Esepia, nombotei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboraviqui apo āgua

¹ Evocoyase Jesús reroyasar Antioquía pendar pãhuvē oime Tūpa Ñehengagüer mombehular, sese oporombohe vahe avei. Ahe Bernabé, Simón (chupe, “Avaũ” ehi yuvireco), Lucio evocoi Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemonuhase yande Yar mboetei āgua, oyecuacu avei, ahese Espiritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Espiritu Santo yuvireco chupe.

³ Evocoyase oyerogui pare, omondo opo yuvireco iporavopri āca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

Apóstol yuvirecoi Chipre rupi

⁴ Evocoyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pãhu Chipre ve. ⁵ Oyepota yemboyasa Salamina ve yuviraso. Aheve omombehu Tüpa Ñehengagüer judío tũparo rupi yuvireco. Juan avei oso supi ipĩtivii ãgua.

⁶ Opase ité oguata caha pãhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe tēi: “Che ãñehe Tüpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tüpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoyase Saulo, Pablo serer vahe, vireco ité vahe Espíritu Santo opiha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Carugar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe roñrosa sui. ¹¹ Eyapisaca, cūrítei yande Yar nde mombaraisura. Nande mboesapiso chira moviro ari rupi. Ichui ndereicatu iri chietera ari rendigüer repia ãgua —ehi Pablo chupe.

Aipo ehi ramoseve voi, opacatu pĩtumimbi chupe. Oñehe tēi ava güeraso ãgua upe. ¹² Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbĩtuhusa ari pipe, yuviroique judío tũparove oguapi yuvinoi. ¹⁵ Oyeroqui pare Tüpa porocuita resendar cuachiar pipe, Tüpa ñehe mombehusar cuachiar pipe avei, tũparo pendar rerecuar omondo oñehe Pablo upe:

—Ore mu, perecose mbahe pemombehu vaherã co ava monguerēhi ãgua, pemombe-humi yandeu cūrítei —ehi.

¹⁶ Evocoyase Pablo opũha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tüpa mboeteisar, pesendu che ñehe —ehi—. ¹⁷ Israel iguar Tüpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opĩratasa pipe vinosepa ahe ivi sui aracahe. ¹⁸ Ipare Tüpa oñemosañõ yande ramoi reco ai upe cuarenta araviter rupi, oguatase yuvireco ivi iporupirēhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara. ²⁰ Ēgüe ehi cuatrocientos cincuenta araviter rupi yapo yuvireco —ehi.

“Ipare Tüpa ombou ava recocuer moingatusar oporocuai vaherã. Ipa vahe ipãhu pendar serer Samuel aracahe. Ahe Tüpa ñehe mombehusar avei. ²¹ Ahese yande ramoi eta oporandu yuvireco Tüpa upe mborerecuar guasu rese. Evocoyase Tüpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico. ²² Ipare Tüpa virocua imborerecuasa ichui; omondo David upe yande ramoi cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuita’ ehi Tüpa. ²³ Ahe David suindar sui, Tüpa ombou Jesús Israel iguar pĩsiro ãgua. Aracaheve Tüpa omombehu co yande ramoi upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tüpa upe pe ñeapiramo ãgua’ ehi chupe. ²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pĩsirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ãgua ipi sui’ ehi Juan” ehi judío tũparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa p̄sirosa resendar. ²⁷ Jerusalén pendar rerecuar avei ndoicuai evocoi Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyerouise mbituhusa ari yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehusar rembicuachiagüer pipendar yuvireco. ²⁸ Yepe ndoyosui mbahe sembiapo rai yuca uca āgua yuvireco viña, ahe rumo oporanduño Pilato upe yuca uca āgua rese yuvireco” ehi. ²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñoti āgua yuvireco. ³⁰ Tūpa rumo ombogüerayevi iri. ³¹ Setá ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrítei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cūrítei oromombehu p̄eu evocoi ñehesa aviye vahe Tūpa omondo vahe yande ramoi upe aracahe. ³³ Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe. ³⁴ Tūpa omombehu avei güemimbogüerayevi sete tuyuēhi āgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi. ³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa āgua’ ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pāhuve yuvireco. Ahe setecuer rumo opaño ité ituyu” ehi. ³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi p̄eu. Moisés porocuita sui ndipoi ñeroisa angaipa rese yande reco mohivi āgua. ³⁹ Jesús recocuer sui rumo oime ñeroisa ñepei-peí viroya vahe upe” ehi. ⁴⁰ “Peicua catu co mbahe sui, toviapi eme pe harive acoi Tūpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroĩrosar peico vahe. Peyepihamondii, ipare pecañi tēira. Esepia, che ayapora mbahe pe recoveseve. Yepe ambuae omombehu tupri itera p̄eu che rembiaporā viña, pe rumo ndaperoyai chietera’ ehi Tūpa” ehi Pablo tūparo pendar upe.

⁴² Yuvínose potase tūparo sui, omombita Pablo yuvireco: “Teremombehu irimi eremombehu vahe ñehesa ambuae mbituhusa ari pipe oreu” ehi yuvireco chupe.

⁴³ Yuvínosese ava rehii tūparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tūpa pe rovasasa pipe” ehi ava upe yuvireco.

⁴⁴ Ambuae mbituhusa ari pipe seni opacatu ava ahe pendar oñemonuha yuvireco Tūpa Ñehengagüer rendu āgua. ⁴⁵ Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroĩro Pablo ñehe ava upe yuvireco. ⁴⁶ Evocoiyase Pablo, Bernabé reseve oñehe yuvireco judío upe osiquiyeēhisave:

—Tūpa ore cuai p̄eu rane ore ñehe āgua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirēhi vahe. Evocoiyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarā co ñehesa rese arachendar aipo ehi vahe:

‘Che oroporavo tataendi nungar nde reco āgua ndahei vahe judío yuvirecoi vahe upe p̄sirosa reroguata āgua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tūpa Ñehengagüer. Opacatu ava iporavopri tecovesa apirēhi vahe pisi āgua, ahe viroya yuvireco. ⁴⁹ Evocoiyase Tūpa Ñehengagüer omombehu opacatu ahe ivi rupi yuvireco.

⁵⁰ Judío rumo omonguerēhi cuña imboyeroyapri Tūpa mboeteisar iyavei mbia seco ivate

vahe Pablo, Bernabé mose uca ãgua güecua sui yuvireco yamotarêhisave. ⁵¹ Ahese Pablo, Bernabé oipipete opitaqui ivi sui yuvireco ‘Tûpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espiritu Santo oyese yuvireco.

14

Pablo, Bernabé reseve omombehu Tûpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tûparo pipe, omombehu tupri yande Yar recocuer yuvireco. Sese setá ava viroya ñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarêhi ãgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeêhisave yuvireco. Aheve Tûpa ombou opiratasa mbahe yavai vahe apo ãgua chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yoivi yuvireco: ñepe judío pihañemoñetasa rupindar; ambuae evocoyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tõi sereco ãgua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa aviye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oĩ ⁹ oyapisaca Pablo ñehese. Ahese Pablo omahengatuse sese, oicua ndoguatai vahe oyeroya ité Tûpa rese ocuera ãgua. ¹⁰ Evocoyase aipo ehi pĩrata chupe:

—¡Epũha! —ehi.

Ahese opo, opũha, oguata voi. ¹¹ Osepiase ava rehii mbahe sembiapo yuvireco, osapucái pĩrata Licaonia ñehese pipe yuvireco:

—¡Tûpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tûpa Zeus iyavei Pablo ahe tûpa Hermes viña. Esepia, Pablo oñehese vahe. ¹³ Ahese co tûpa Zeus pahi güeru tivi, mbahe potri avei. Ahe tecua tapia roquendave, ahe Zeus tûparo tecua pipe ava reiquesa rupi chini. Oyuca pota tivi Pablo, Bernabé mboetei ãgua yuvireco viña. ¹⁴ Oicuase rumo Bernabé, Pablo, ahese omondo oturucuar yuvinoña ava pãhuve; oñehese pĩrata yuvireco:

¹⁵ —Mbia, ¿mahera ãgüe peye oreu? —ehi—. Ore rumo ava tõi pe nungar avei oroico. Oromombehu: “Pepoi co mbahe ãgüe ehi tõi vahe mboeteisa sui; peroya Tûpa supi eté vahe” orohe pẽu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tûpa, “Ãgüe tehi oguata ndahei vahe judío oipihñemoñetasa rupi yuvireco” ehi viña. ¹⁷ Tûpa rumo ndasesarai ava upe mbahe tupri apo ãgua sui. Ahe ombou amar pẽu mbahe miti ha aviye ãgua yepi. ãgüe ehi mbahe tembihu imbou iyavei viharetesa pẽu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei ãgua viña.

¹⁹ Ahese oyepota moviro judío Antioquía sui, Iconio sui avei. Oipihñemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivii. Ipihñemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinoso oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco. ²² Ahe supi omonguerêhi catu opacatu Jesús reroyasar yuvireco, aipo

ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āgua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āgua ñepei-pei ñemonuhasa rupi. Oyeroqui iyavei oyecuacu. Ipare viropovēhe yande Yar upe iporaviqui āgua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese. ²⁵ Omombehu Tūpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āgua. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āgua yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oyocuai Moisés yande ramoi cuai āgua: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuvireco. “Cūritei acoi ēgüe ndapeyese Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rārosar upe aipo mbahe moingatu āgua yuvireco.

³ Ēgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata āgua yuvireco” ehi. Ahese opacatu Jesús reroyasar oyemboviharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasareta oipisi tupri yuvireco. Aheve omombehu Tūpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye āgua yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu āgua aipo mbahe rese yuvireco. ⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropĩsirosa resendar mombehu āgua ava ndahei vahe judío upe ‘toviroya yuvireco’ oyapave. ⁸ Tūpa oicua ité opacatu ava pĩhañemoñetasa. Chupe avei omondo Espiritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipĩhañemoñeta rai sui oyese yeroyasa pipe. ¹⁰ ¡Pe tie pesecoãha pota Tūpa! ¡Mahera peyocuai uca pota co Jesús reroyasar mbahe yavai rai vahe apo āgua! Aní rumo. Esepia, yande ramoi ndoicatui Tūpa porocuita mboaviye āgua yuvireco, yande avei ēgüe yahe —ehi—. ¹¹ Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe semiapo avei yuvireco. Evocoyase omombehu ndayasepiai vahe poromondiisa Tūpa

oyapo uca ava ndahei vahe judío pãhuve yuvireco chupe. ¹³ Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese: ¹⁴ Simón omombehu yandeu Tūpa osaisu avei ava ndahei vahe judío. Sese oiporavo ahe ava oyeupe nara —ehi—. ¹⁵ Oyoya tupri Tūpa ñehe mombehúsar rembicuachiagüer rese. Ñepeí ipãhu pendar oicuachía aracahe aipo ehi:

¹⁶ ‘Coíye catu ayevíra vitu. Ahese ayapo piasu irira che rêta David oyapo uca vahecuer, ahe oi imocañipirer. Ambopiasu irira oitipa vahecuer yuvireco.

¹⁷ Ëgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

¹⁸ Evocoi yande Yar rembiaporã icuapri aracahe suive’ ehi Tūpa ñehe mombehúsar aracahe.

¹⁹ “Sese chepihañemoñeta iya ndayayocuai chira Moisés porocuita rupi oñecuñaro vaheñã ndahei vahe judío Tūpa rupi oguata ãgua yuvireco” ehi. ²⁰ “Aviye rumo yaicuachiase chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi. ²¹ “Esepia, opacatu tecua rupi yuvirecoi ava omombehu vahe Moisés porocuita ñepeí-peí mbituhusa ari pipe judío tūparo pipe aracahe suive. Aipo rupive” ehi Santiago.

Icuachiapri ndahei vahe judío upe nara

²² Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco. ²³ Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei. ²⁴ Oroyandu amove ava ore pãhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe pihañemoñeta rerova. ²⁵ Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve pēu. ²⁶ Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. ²⁷ Oromondo Judas, Silas avei pēu: ahe teieté omombehura opacatu cuachiar pipendar pēu yuvireco. ²⁸ Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese. ²⁹ Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruvi, mbahe mimba yucapri suvi renosepirēhi vahe iyavei ndapeaguasai chira. Pepoise evocoi mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe. ³¹ Ahe cuachiar rese oyerouise, oyemboviharete yuvireco. ³² Judas, Silas Tūpa suindar ñehesa mombehúsar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe. ³³ Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe. ³⁴ Silas rumo opita potaño ité aheve. ³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coíye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi piha ahe yuvireco? —ehi.

³⁷ Ahese Bernabé viraso pota Juan Marcos oyeupi viña. ³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve.

“Taipĩtivĩño iporavĩquisa rese” ndehi chupe. ³⁹ Nomoingatuise mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho ãgua. Yuvĩnose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tũpa oporoaisusa pipe” ehi yuvireco imondo. ⁴¹ Ipare yuvĩraso Siria, Cilicia rupi Jesús reroyasar monguerẽhi catu ãgua yuvireco.

16

Timoteo oso Silas ndugũerã Pablo rupi

¹ Pablo ondugũer reseve yuvĩraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego. ² “Evocoi Timoteo aviye etepri” ehi Jesús reroyasar Listra pendar, Iconio pendar avei yuvireco chupe. ³ Pablo viroguata potaño ité Timoteo oyeupi. Sese seroguata renondeve, ombocircuncida uca seroĩroẽhi ãgua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoyase opacatu tecua iguatagũer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemovĩracua catu yuvireco Jesús reroyasa pipe iyavei oyemboeta catu yuvireco ari rupi.

Tũpa omondo uca Pablo Macedonia ve iquer nungar pipe

⁶ Espĩritu Santo ndoipotai Asia rupi yuvĩraso vaheerã Tũpa Ñehengagũer mombehu ãgua. Sese oyahuva yuvĩraso Frigia rupi, Galacia rupi avei. ⁷ Ëgũe ehi oyepota Misia popĩve yuvireco. Ichui yuvĩraso pota tẽi Bitinia ve. Jesús Espĩritu rumo ndoipotai icho ãgua supi. ⁸ Ahese osasaviño yuvĩraso Misia sui carite guasu yemboyasa Troas ve oyepota ãgua yuvireco. ⁹ Oyepotase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivĩ ãgua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pĩsirosa resendar mombehu ãgua.

Pablo, Silas Filipino ve yuvirecoi

¹¹ Oroso carite pipe Troas sui oromohĩviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tẽi oroico. ¹³ Mbituhusa ari pipe orosẽ evocoi tecua sui iai popĩve. “Aheve oñemonuhara judío oyerogui ãgua” orohe. Aheseve cuña oñemonuha yugũeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe. ¹⁴ Nepei imboetasa, Lidia serer vahe, Tiatira pendar, oyapĩsaca ore ñehese rese oĩ. Ahe Tũpa mboeteisar secoi, turucuar suendi vahe mbovendesar avei secoi. Yande Yar omohivi ipĩhañemoñetasa iyapĩsaca ãgua Pablo remimombehu rese. ¹⁵ Sese ñapiramosa, opacatu sãta pendar reseve. Ipare ore mombita pota gũetave.

—Che reroyase peye yande Yar reroyasar che recose, pepitara che rãtave —ehi oreu.

Ëgũe ehi ore monguerẽhi. Sese oropita sãtave ipiri.

¹⁶ Ipare ambuae ari oroso irise oroyeroqui ãgua, cuñatai ore rovaĩchi, ahe cuñatai carugar pĩratasa pipe mbahe mombehusar. Oicatu ava upe mbahe oime vaheerã mombehu. Omombehuse mbahe, setá oipisi sepri guarepochi gũerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tũpa ivate catu vahe upendar oporavĩqui yuvireco omombehu: “Na ehira Tũpa yande pĩsiro” ehi yuvireco! —ehi pucu-pucu ore mombehu ava upe.

¹⁸ Setá ari Ëgũe ehi oico oreu. Omañeco tẽise rumo Pablo, oyemboyere chupe cute, aipo ehi icarugar upe:

—Che orocuai Jesucristo rer pipe: esẽ co cuñatai sui —ehi.

Aheseve voi caruguar osẽ ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco. ²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tẽi yuvirecoi. Ayeve omboaivu guasu tẽi yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

²² Evocoyase ava eta oyamotarẽhi Pablo iyavei Silas yuvireco iyavei mborerecuar, “Pesequii iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pĩrata soquendapri rãrosar yuvireco, “Esãro tupri” ehi yuvireco chupe. ²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pĩtu mbiter rupi rumo Pablo, Silas oyerogui, osapuca Tũpa mboeteisave yuvireco. Ambuae ava soquendapri evocoyase osenduño tẽi yuvireco isapuca. ²⁶ Ahese aviyeteramo tẽi ivi orirĩi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tẽi ndeyeupe! ¡Esepia, opacatu oroicoveño cohave! —ehi pucu soquendapri rãrosar upe.

²⁹ Evocoyase soquendapri rãrosar, “Emboumi tataendi” ehi ondugüer upe. Ichui oña oi que, orirĩi, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro ãgua vichico? —ehi chupe.

³¹ —Eroya yande Yar Jesucristo. Ichui ahe nde pĩsirora, nde rẽta pendar avei —ehi yuvireco chupe.

³² Ahese omombehu yuvireco Tũpa Ñhengagüer soquendapri rãrosar upe, opacatu sẽta pendar upe avei. ³³ Ahe pĩtu pipeve avei soquendapri rãrosar viraso oyeupi, yapichasa oyoseipa chupe. Ahese Pablo, Silas oñapiramo guãrosarer, sẽta pendar avei yuvireco. ³⁴ Viraso pare sãrosar güëtave, ombocarú. Ahe sẽta pendar avei oviharete ité yuvireco Tũpa reroyasa rese.

³⁵ Cõhese mborerecuareta omondo sundao ava rese icuaiipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rãrosar omombehu co ñehesa Pablo upe:

—Mborerecuar ombou yuvireco ñehesa cheu pe mose ãgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tẽi yuvireco. Ipare aipo ava rembiepiaẽhive tẽi ore mosepa uca pota viña. ¡Aní eté rumo! Ahe teieté ru toyugüeru ore mose ãgua —ehi soquendapri rãrosar upe.

³⁸ Ipare sundao ava rese icuaiipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe.

⁴⁰ Pablo, Silas yuvinosese voquendasa sui, yuviraso iri Lidia rõtave. Oñemonuha irise ambuae Jesús reroyasar pãhuve, omonguerẽhi catu yuvireco. Ipare yuviraso ichui.

¹ Oguatase Pablo iyavei Silas, oñocua Anfípolis iyavei Apolonia rupi yuvíraso. Ëgüe ehi oyepota tecua Tesalónica ve yuvireco. Aheve oime judío tūparo. ² Secocuer rupi eté mbituhusa ari pipe Pablo oique judío tūparove, oñemoñeta ava eta upe mbosapi mbituhusa ari rupi Tūpa Ñehengagüer rese. ³ Omboyecua tupri imombehu Tūpa Rembiporavo ava pĩsiro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pẽu, ahe ité niha Tūpa Rembiporavo ava pĩsiro ãgua — ehi.

⁴ Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoirombave secatẽhi ava rese yuvireco. Sese omonuha ava yuvireco tẽi vahe, ndipihai vahe yuvireco. Imonuha pare, ahe omboaivu guasu uca tẽi ahe ava upe opacatu güecua pipe yuvireco. Yuvíraso Jasón rõtave Pablo, Silas reca, vinose pota ava rehii pãhuve yuvireco viña. ⁶ Ndoyosuse rumo aheve yuvireco, vírasoño Jasón, ambuae Jesús reroyasar avei güecua rerecuar rovai yuvireco. Víroãse guasu seroco yuvireco,

—¡Evocoi mbĩa Pablo iyavei Silas vírova vahe ava recocuer opacatu tecua rupi yuvireco, cūrítei oyepotapa yuvireco cohavel ⁷ Co Jasón omombituhu güõtave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe. ¹¹ Berea pendar ava aviye catu ava Tesalónica pendar sui. Ëgüe ehi ipisi ohãpisiẽhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pĩha Pablo ñehesa?’ oyapave yuvireco. ¹² Evocoyase setá avei Pablo ñehereoyasar iyavei setá griego víroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuvíraso aheve imboaivu guasu tẽi uca ãgua ava upe yuvireco. ¹⁴ Evocoyase Jesús reroyasar Berea pendar Pablo víroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco. ¹⁵ Evocoyase Pablo rupi yuvíraso vahe víroyepota Atenas ve seraso. Ahe ichui víroyevi Pablo ñehereoyasar upe iyavei Timoteo upe avei yuvireco yuvíraso voi ãgua Pablo piri ahe tecuave yuvireco.

Pablo Atenas ve secoi

¹⁶ Pablo osãro vitesese Silas iyavei Timoteo Atenas ve oico, ndoyembovĩhai osepiase opacatu rupi tūpa rahanga-anga tẽi. ¹⁷ Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osepi vahe ocarusu rupi ava ñemonuhasave ahe tecua pipe. ¹⁸ Evocoyase amove mbĩa oyembohe vahe epicúreo aracuasa rese iyavei mbĩa oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbĩa iñehere papa rai ava upe oico? —ehi.

Ambuae aipo ehi yuvireco:

—Ndoyavii co mbĩa oñehere vahe ambuae ava Tūpa rese tẽi —ehi yuvireco.

Esepia, omombehu Jesús recocuer iyavei cuerayevisa resendar. ¹⁹ Evocoyase ahe oyembohe vahe víroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña? ²⁰ Supi eté niha eremombehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepi pe tūpa eta pemboetei vahe. Ahese asepi ñepei tūpa upe seropovēhepri renda. Sese asepi icuachiapri aipo ehi oī: ‘Tūpa ndicuasai vahe upendar’ ehi. Evocoi Tūpa ndapeicua vitei vahe, ahe secocuer niha amombehu pēu” ehi.

²⁴ “Evocoi Tūpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tūparo ava tēi rembiapo pipe. ²⁵ Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe ivi, ivave” ehi.

²⁶ “Tūpa oyapo opacatu-catu tēi ava ñepei ava sui ava yesu āgua opacatu ivi rupi. Omondo ivi ava yemboerecua āgua ñepei-peu upe. Ari avei omondo co ivi pipe iyemboerecua āgua yuvireco chupe. ²⁷ Ēgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ēgüe ehi rumo Tūpa yande resevemi eté. ²⁸ Esepia niha, Tūpa sui yaicove, ipīratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco. ²⁹ Sese yande Tūpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi. ³⁰ “Pe ramoi ndoicua tupriise yuvireco aracahe, Tūpa oñemosañño mbahe sembiapo rese chupe. Cūrítei rumo oyocuai opacatu ava co ivi pipendar ‘tomboasi oangaipa, toyeve yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca āgua güecocuer ĩvi tupriisa pipe ñepei güembiporavo upe. Ahe ombogüerayevi güembiporavo omano vahe pāhu sui ‘toicua opacatu ava güecocuer rese iporandu āgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroĩrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osē ipāhu sui oso. ³⁴ Moviro rumo mbia oyemboya sese, viroya ité vahe iñehesa yuvireco. Ahe ipāhuve secoi mbia Dionisio serer vahe, ahe Areópago pāhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osē Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvínose ñepei tecua Italia rupindar Roma sui oyocuaise mborerecuar guasu Claudio: “Toyuvínose ité opacatu judío Roma sui” ehise. Pablo oso, ³ opita Aquila piri oporaviqui āgua. Esepia, Pablo, Aquila avei ahe mbahe pírer mbovívar pāve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu āgua rese güeraño judío eta upe aipo ehi: “Jesús niha Tūpa Rembiporavo ava pĩsiro āgua secoi” ehi. ⁶ Iñehe-ñehe tēi rumo seroĩrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pëu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osë judío tūparo sui, oi que mbia Ticio Justo serer vahe rêtave, ahe Tūpa mboeteisar avei secoi. Ahe sêta judío tūparo iqueve. ⁸ Crispo, ahe judío tūparo rerecuar viroya avei yande Yar, opacatu sêta pendar avei viroya yuvireco. Setá ambuae Corinto pendar avei viroya osenduse iñehesa yuvireco. Seroya pare, oñeapiramopa uca yuvireco. ⁹ Ñepe pîtu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pipe” ehi yande Yar chupe. ¹¹ Evocoyase opîta ñepe aravîter yemombitesa rupi Corinto ve oico. Aheve ombohe Tūpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarêhisave. Ichui viraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tēi ava oTūpa mboetei ãgua. Ndahei rumo Roma pendar porocuaita rupi êgüe ehi yuvireco —ehi yuvireco seroñrosave chupe.

¹⁴ Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerêhira che yapisaca ãgua pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuaita resendar rese tēi. Pemoingatu pe ae pe recocuer; ndaipotai aipo nungar mbahe moingatu ãgua —ehi Galión ahe ava upe.

¹⁶ Ipape opa omboyepēpi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipape yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevî irisa Antioquía ve

¹⁸ Pablo secoi pucu vîte pare Corinto ve, “Asora vichico cute” ehi Jesús reroyasar upe. Ipape yuviraso Aquila, Priscila reseve. Oyepotase Cencrea ve yuvireco para guasu popîve, aheve Pablo oñeapipa tupri oñehe mboaviye ãgua. Ipape yuviraso carite pipe Siria ve. ¹⁹ Siria piar rupi yuviraso Efeso ve. Aheve opîta Aquila, Priscila yuvireco. Ichui Pablo oi que judío tūparo pipe Jesús resendar ñehesa mombehu ãgua chupe yuvireco.

²⁰ Ahe pendar omombîta pota vîte tēi yuvireco viña, Pablo rumo ndopîta potai aheve.

²¹ Evocoyase, “Aviye, taso rane” ehiño chupe yuvireco. “Tūpa oipotase cheu, ayevî irira vitu pe pîri” ehi.

Ipape oso Efeso sui carite pipe. ²² Oyepotase Cesarea ve, oso Jerusalén ve “avirave” apo ãgua Jesús reroyasar upe. Ipape oso Antioquía ve. ²³ Opîta pucu pare aheve, osë, oguata iri Galacia rupi, Frigia rupi opacatu Jesús reroyasar monguerêhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerêhisa pipe secocuer ava upe, oporombohe tupri ai avei sese. Ahe rumo oicua Juan oãpiramo agüer güeraño tēi. ²⁶ Ahe osiquiyeêhisave judío tūparo pipe omombehu Tūpa Ñehengagüer. Osenduse Aquila, Priscila iñehesa, omombîta yuvireco oyepîri. Ahese omombehu tupri catu Tūpa recocuer chupe yuvireco. ²⁷ Oso potase Apolos Acaya cotî, ahese Jesús reroyasar Efeso pendar omonguerêhi catu. Oyapo cuachiar Acaya pendar upe imondo yuvireco sese hañeco tupri ãgua. Ipape oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipîtivîi seroya tupri catu ãgua yuvireco.

²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pĩsiro āgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar. ² Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoyase aipo ehi ahe ava upe:

—Juan niha oñapiramo acoi omboasi vahe oangaipa oyeveise Tūpa upe. Ipare rumo omombehu ava upe: “Peroya ahe eté vahe ou vaherã che raquícuei” ehi. Ahe ou vaherã, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco.

⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu Tūpa suindar ñehesa yuvireco. ⁷ Ēgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyēhisave itūparo pipe ipihañemoñeta rerova āgua Tūpa mborerecuasa resendar reroya āgua rese. ⁹ Amove rumo judío ipihavĩracua ité seroyaēhi āgua yuvireco. Ipipe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepēpi ichui, vñosepa oyeupi Jesús reroyasar yeroquisa Tirano serer vahesave seraso. Aheve arĩ yacatu rupi oñehe yepi. ¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tūpa omondo güeco pĩratasa Pablo upe poromondiisa apo āgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera āgua. Caruguar avei opa yuvinose yuvireco ichui.

¹³ Amove oime judío oguata vahe ocar rupi caruguar mose āgua ava sui. Sese nara oiporu pota yande Yar Jesús rer yuvireco.

¹⁴ Evocoyase aipo ehi caruguar upe: “Pablo Jesús recocuer omombehu vahe rer pipe, ‘Peyepēpi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyepota judío pahi rerecuar secoi. ¹⁵ Caruguar rumo omboyevĩ chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño caruguar chupe.

¹⁶ Aheseve ahe cuimbahe caruguar vireco vahe opo ipãhuve oso. Opacatu opĩratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. ¹⁷ Co mbahe sembiapo rēracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi āgua opacatu ava rovaque yuvireco. Sapi pare, opa ahe cuachiar repri vñose yuvireco. Ahe sepri cincuenta mil tupri arĩ mboraviqui repri. ²⁰ Ēgüe ehi Tūpa opĩratasa pipe ombouvicha oñehengagüer iyavei iñehe pĩratasa oyecua catu ava rese.

²¹ Ipare Pablo ipihañemoñeta Jerusalén ve oso āgua ivi Macedonia, Acaya rupi. “Coiye catu aheve che reco viteseve, ichuive che asora Roma ve” ehi. ²² Evocoyase omondo

ñuvirío opĩtiviisar Timoteo, Erasto Macedonia ve güenonera. Ahe rumo opĩta vitemi Asia rupi oico.

Ava Efeso pendar yaivu guasu yuvireco

²³ Ahe arĩ pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secõi. Ahe oyapo Artemisa rēta rahanga guarepochi apopri guarepochi pisi āgua. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiivu guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Tũpa ité’ ohesa pipe yande rembiapo uve. Ndahei rumo cohapeño ēgũe ehi, opacatu Asia rupi ēgũe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi āgua, tũparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nombotei iri chira, iyavei viroĩrora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucai aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaivu guasu tēi. Osapucai vahe oipisi Gayo iyavei Aristarco, ahe ñuvirío Pablo rupindar yugũeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehii pāhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucai pĩrata ñepe mbahe rese, amove osapucai ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipāhu pendar yuvireco. ³³ Amove rumo ava rehii pāhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu āgua ava rehii rovaque yuvireco. Alejandro evocoyase omopuha tēi opo ava monguiriri āgua viña. Osepi pota omu judío ava rehii rovaque viña. ³⁴ Ava rehii rumo oicuse Alejandro judío secose yuvireco. Opacatu guasu osapucai pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ēgũe ehi ahe osapucai ñuvirío hora rupi rutei yuvireco.

³⁵ Evocoyase tecua pipendar mbahe cuachiasar oicatusave ava monguiriri āgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui oviapi vahe rese avei hañecosa. ³⁶ Ndipoi niha ava, ‘Aní’ ehi vaherã che remimombehu rese. Sese peyemonguiririño, peyapoi rene mbahe pe yapisacaēhisave. ³⁷ Peruño tēi eté co ñuvirío mbia cohava, ndoyapoi rumo mbahe tēi Artemisa upe yuvireco. Nimondai mbahe rese itũparove, ndoviroĩroi avei serer yuvireco. ³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu āgua. ⁴⁰ Mborerecuar revo oyandura yande rembiapo co pipe, ‘¿Mahera peaiivu guasu tēi? ¿Che amotarēhimbave tie ēgũe peye?’ ehi tiētera yandeu. Oporanduse yandeu, ndayaicatu chitiētera imboyevi āgua iñehe chupe. Esepia niha, co yañemonuha yande remibotar tēi cohava” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agũer Macedonia, Grecia rupi

¹ Ava aivu guasu pare, Pablo, “Toyugũeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia

rupi, omonguerēhi-rēhi avei ambuae Jesucristo reroyasar yuvirecoi vahe tecua-tecua rupi. Ipare oyeputa Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco āgua rese yuvireco. Oyanduse, carite pipe oso rāgüer sui, oyevi iri oso Macedonia ve ivi rupi. ⁴ Yuviraso moviro mbia supi, ipāhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoi mbia yuviraso Pablo renondeve sáro āgua Troas ve. ⁶ Pieta pan ndayapepoi vahe hu pare, orosē tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oroñemonuha pan hu āgua. Ahese Pablo oporombohe oico pñtu mbiter rupi. Esepia, ahe osē pota ahere ayihive voi ichui. ⁸ Ahe oi ivate vahesave ñemonuhasa pipe setá tataendí. ⁹ Mbia chíhivahe, Eutico serer vahe, metanave oguapi oí. Pablo rumo oñehe pucú iteanga. Evocoyase omboopesii ahe chíhivahe. Ipare oqué; aviyeteramo tēi oviapi oi ivate vahe mbosapisa sui. Ahese ava ogüeyi sehögüer rupi ivi sui yuvireco. ¹⁰ Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe:

—Pesiqüeyi rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cōhe senise; ipare oso cute. ¹² Evocoyase co mbia chíhivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso āgua semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco āgua. Sese Efeso oroñacuasaño oroso.

Pablo ñehesa Jesús reroyasar rārosareta Efeso pendar upe

¹⁷ Mileto ve ore recose, Pablo omondo oñehe Efeso ve ‘toyugüeru Jesús reroyasar rārosar cheu’ oya. ¹⁸ Oyeputase yuvireco chupe, aipo ehi: “Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pāhuve vichico che reco asiēhisave che yasehosa pipe. Yepe judío che mboguai etepri che recoāhasave pe recuave yuvireco viña, ²⁰ che rumo ndaicutui ñehesa aviye vahe mombehuēhi pēu mbahe aviye āgua yepi. Che opombohe ava rehii rovaque, opombohe avei ñepei-pei pe rēta rupi yepi” ehi. ²¹ “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tūpa upe, peroya avei yande Yar Jesús’ ahe” ehi. ²² “Cūrítei asora Jerusalén ve vichico. Aheve che so āgua Espiritu che cuai che pñha pipe. ‘¿Mara ehira pñha yuvireco peve cheu?’ aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda āgua iyavei che mombaraisu āgua yuvireco yepi” ehi. ²⁴ “Ndacherecatēhii rumo cheyese che mano āgua. Che rumo amboaviye potaño ité che poraviquisa Tūpa upe, ahe yande Yar Jesucristo che cuai vahe co ñehesa icatupri vahe mombehu āgua. Co Tūpa oporoaisusa pipe ombou ñepei vahe Guahir ava pñsiro āgua” ehi.

²⁵ “Opa niha Tūpa mborerecuasa amombehu pēu. Che rumo aicua ndache repia iri chira peye. ²⁶ Sese tapeicua cūrítei: ndayavii eté che cuaita mboaviye āgua co tecocuer aviye vahe mombehu pipe pēu. ²⁷ Esepia, ndaicuacui eté Tūpa Ñehengagüer mombehu; che rumo amombehuño ité opacatu Tūpa recocuer pēu. ²⁸ Sese peñearo tupri, pesáro avei opacatu Jesús reroyasar Espiritu Santo porocuita rupi. Inungar ovesa rārosar, ēgüe peye tuprira sáro. Ahe Tūpa remimboepi yuvirecoi. Esepia, Jesús oipiyere vuvi opacatu ava angaipa repirã. ²⁹ Aicua che opoeyare, oyugüerura ambuae ava mahembiar oñaro

ai vahe nungar pe pãhuve opacatu Jesús reroyasar mocañipa pota ãgua. ³⁰ Oime aveira que ava pe pãhu pendar pe mbopa pota aveira yuvireco pe reraso ãgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pĩtu, ari yacatu rupi avei che yasehosa pipe pe rereco” ehi.

³² “Sese, che rivireta, opoeyara Tũpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pẽu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pãhuve. ³⁴ Peicua niha acoi che po pipe ité aporaviqui che recove ãgua, che rupindar recove ãgua avei. ³⁵ Ēgũe ahe amboyecua che recocuer pẽu. Supi avei Ēgũe peyera; yaporaviqui tupri iparaisu vahe rese hañeco ãgua. Pepiñañemoñeta acoi yande Yar Jesús remimombehu rese: ‘Sorivete catu ava iporeroco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

³⁶ Oñehe pare, oñenopiha oyerure ãgua opacatu omboripar reseve. ³⁷⁻³⁸ Ndoyembovĩhai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovapite-pite iri tẽi avei yuvireco saispave. Ipare yuvirasoi ité yuvireco supi carite yemboyasave.

21

Pablo so agũer Jerusalén ve

¹ Evocoyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaheřã Fenicia ve, ahe ipipe oroha, oroso. ³ Orosasase para guasu oroso, orosepia caha pãhu guasu Chipre serer vahe. Ahe oroñocua yande mbahe rese pocoñhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepia Jesús reroyasar yuvirecoi vahe. Ahese oropita siete ari ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoyase eresoi rene Jerusalén ve” ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugũeru, güembireco, guahir reseve-seve ore rupi. Aheve oroñenopiha ore yerure ãgua. ⁶ “Aviye, toroso rane” ore he pare chupe yuvireco, oroha carite pipe. Ahe evocoyase oyevi yuvirasoi güẽtave.

⁷ Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepei ari. ⁸ Ahere ayihive oroso Cesarea ve. Aheve oroi que, oropita Felipe rẽta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve. ⁹ Evocoi Felipe vireco irungatu guayri ndomendai vahe. Tayri Tũpa ñehe mombehusar pãve yuvirecoi. ¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tũpa ñehe mombehusar secoi. ¹¹ Ouse ore pãhuve, virocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tẽi chupe. ¹³ Omboyevi rumo oreu:

—¡Mahera peyaseho che rese, ndache mbovĩhai peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndroicatuisse ipiñañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuvirasoi avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rẽtave. Ahe ore moingue oyepiri. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisii ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tüpa mbahe oyapo uca vahe ava ndahei vahe judío pãhu rupi. ²⁰ Osenduse, omboetei guasu Tüpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerêhi vahe Moisés porocuita aracadendar mboaviye água yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “‘Peseya Moisés porocuita. Pembocircuncida iri rene pe rahir. Peico iri rene yande recocuer aracadendar pipe’ aipo ehi tēi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tüpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tüpa upe icuavêhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua va semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovêhepri, pehui rene mbahe ruvi, pehui rene mbahe mimba yucapri suvi renosepirêhi vahe iyavei peguasai rene” orohe chupe —ehi yuvireco.

Judío oipisi Pablo tũparo guasu pipe yuvireco

²⁶ Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatiro. Ahese oromondo pota ndeu porerecosa Tüpa porocuita rupi icuavêhepirã” ehi yuvireco pahi upe.

²⁷ Opa potase evocoi siete ari, judío Asia pendar osepi Pablo tũparo pipe yuvireco. Ahese omoñemoiro uca opacatu ava rehii tũparo pendar. Ipare ipisise, ²⁸ sãse yuvireco: “¡Ore mu, ore p̃tivii peye co mbia oroipisi vahe rese! Esepia, uguata opacatu rupi. Oñehe tēi yande rese, Moisés porocuita rese, yande tũparo rese avei iyavei viroique ava ndahei vahe judío yande tũparo pipe. Sese omonguiha tēi yande tũparo maranehi” ehi yuvireco chupe.

²⁹ Co rese aipo ehi. Esepia, cuese osepi Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tũparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cũriteimi ava yuvinoña guasu tũparove. Oipisi Pablo ombotiriri senose tũparo pipe sui yuvireco. Ahese omboya voi guaquicuei tũparo roquenda yuvireco. ³¹ Oyuca potase yuvireco, ahese yaivu rãracua oyepota sundao rerecuar guasu upe. ³² Cũriteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepei mbahe rese oñehe, ambuae, ambuae mbahe rese tēi yuvireco. Evocoyase sundao rerecuar ndoicatui supi eté vahe mbahe rendu água yaivu guasu vahe pãhuve. Sese, “Peraso quartelve” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe: —¿Iyacatu vo yañemoñeta raimi? —ehi.

Evocoyase, omboyevi mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pãve cuatro mil tupri ivi iporupirẽhisa rupi —ehi sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoyase mborerecuar, “Aviye” ehi chupe. Ipare opũha yeupisa harive, omopuha opo ava eta monguiriri ãgua. Ahese oyapisaca tupri ava rehii yuvireco. Ahe ava upe õhehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi ãgua pẽu cũritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerokisave. Aheve ayembohe tupri yande ramoi porocuaite rese. Ahe che mbohesa pipe avei ayembohe Tũpa mboetei ãgua rese vichico inungar pe peico cũritei. ⁴ Che yipindar aseca-seca catu ava co Tecocuer Piasu rupi oguata vahe yamotarẽhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaheã yande mu tũparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi ãgua. Ichui tarupa cohove imombaraisu ãgua’ ahe viña.

Pablo omombehu oñecuñaro agüer

⁶ “Evocoyase aso Damasco ve. Ahe ipiar rupi arovisave vicho mbiter ari rupi, aviyeteramo tẽi osesape guasu iva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarẽhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarẽhi etepri che rereco eve’ ehi cheu. ⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epũha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tũpa mboyeroyasar ité, viroya tupri vahe avei iporocuaite; sese opacatu judío secua pendar: ‘Co mbia aviye vahe ité’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporẽhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tũpa, nde poravo güemimbotar cua ãgua. Oipota avei eresepia vaheã ichuindar ava seco ivi vahe, eresendu aveira iñehe’ ehi. ¹⁵ ‘Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ ‘Evocoyase, cũritei ndiya iri eresãro’ ehi. ‘Epũha, toroãpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tũpa che mondo ava ndahei vahe judío upe” ehi Pablo

¹⁷ “Coiye catu, ayevi irise Jerusalén ve, ayerure tũparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che

cua nde reroyasar roquenda-quendase, ainupa-nupa ucase avei aguatase judío tūparo yacatu rupi' ahe. ²⁰ Aipo ahe avei chupe: 'Oyucase Esteban yuvireco, ahe nde recocuer mombehugar, che ahese asepiā. Chepiñañemoñeta rupi aviyeño oyucase yuvireco. Sese asāro yucasar yeaosa vihā' ahe chupe. ²¹ Che Yar rumo omboyevī cheu: 'Eso, oromondora coi rupi ava ndahei vahe judío pāhuve' ehi che Yar cheu" ehi Pablo ava rehii upe.

Pablo sundao rerecuar guasu povrīve secoi

²² Aipo rupi osendu iñehe yuvireco. Ahese rumo osapucaī pīrata yuvireco chupe: "¡Tmano co mbīa! ¡Toicove vite iri eme co ivī pipe!" ehi yuvireco chupe. ²³ Osapuca-pucaī, osequiipa oyeaosa oñemoirombave yuvireco iyavei omombo-mombo ivī cuhi ivate coti yuvireco yamotarēhimbave. ²⁴ Ahese sundao rerecuar guasu omoingue uca cuartelve, aipo ehi osundao upe: "Peinupa, ahese revo omombehura mbahe sui vo sāsē atī yamotarēhimbave ava yuvireco chupe" ehi osundao upe. ²⁵ Oñapichise rumo inupa āgua yuvireco, Pablo omombehu ñepeī sundao rerecuar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduehiseve? —ehi mborecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbīa romano secoi —ehi.

²⁷ Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco āgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepēpī yuvireco ichui; sundao rerecuar guasu avei oicuae Pablo romano secosa rese, osiquiye ñapichi ucase.

Pablo oyoepī judío porandusa ivate catu vahesave

³⁰ Ahere ayihive sundao rerecuar guasu oicua tuprī pota: ¿Mbahe sui pīha judío oyamotarēhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha āgua yuvireco. Ahese ovīraso uca Pablo yuvireco chupe.

23

¹ Aheve Pablo omahengatu ava oñemonuha vahe rese ohā aipo ehi chupe:

—Che mu, che rembiapo mbahe tuprī Tūpa rovaque areco yepi che piñañemoñeta tuprīsa pipe —ehi.

² Ahese Ananías, ahe pahi rerecuar ivate catu vahe, yipī pendar uve, "Peiyurupete" ehi. ³ Ahese Pablo omboyevī chupe:

—¡Tūpa nde nupara, nde aviye tuprī tēi angahu vahe ereico! Nde mbahe rese porandu āgua cheu porocuita rupi ereī. Evocoyase, ¿mahera ereporocuai che yurupete āgua mborocuita mboyeroyaēhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroīrosa pipe co Tūpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyevī chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: 'Peñehe rai eme pe rerecuar upe' ehi —ehi.

⁶ Ahese oicuae oñemonuha vahe pāhuve amove oime saduceo, amove fariseo. Ahese oñehe pīrata chupe:

—Che mu, che fariseo aico iyavei fariseo che yesupa yuvirecoī. Oroviroya avei ava ocuerayevī vāherā curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñeñehepoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sāse guasu yuvireco. Ahese oime amove opūha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu āgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pāhu sui, pemoingue iri cuartel pipe” ehi.

¹¹ Ahe pītu pipe, yande Yar oyemboyecua chupe aipo ehi: “Eyemonguerēhi catu, Pablo, inungar che mombehu nde siquiyeēhisa pipe cohava Jerusalén ve, ēgüe ere aveira che mombehu Roma ve” ehi.

Omboguai Pablo yuca āgua yuvireco

¹² Ahere ayihive setá judío oñemonuha, omboguai Pablo yuca āgua yuvireco: “Tūpa rovaque ndayayucase Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucase —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoyase mborerecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vahe rā yuvireco sese. Omboguai eté yuca āgua yuvireco. Ndocarui, ndoihui chira aipo ndoyucase yuvireco. Cūrítei oyemoingatu, osāro viteño nde porocuita yuvireco —ehi mbia chīhivahe chupe.

²² Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vahe rā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipare pesopara pītuse las nueve pipe” ehi. ²⁴ “Pemoingatu uca avei cavayu Pablo yeupi āgua. Ēgüe peye pesāro tuprira seraso yande rerecuar Félix upe” ehi. ²⁵ Evocoyase sundao rerecuar guasu oicuchía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca āgua viña. Che rumo aicua romano seco rese, ahese araso sundao sepi āgua judío eta sui ²⁸ ¿mbahe

rese p̄iha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco. ²⁹ Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei. ³⁰ Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoyase ahe p̄itu pipe sundao viroguata Pablo ocuita rupi yuvireco, viraso Antípatris ve yuvireco. ³² Ahere ayihive sundao yuviraso vahe opi rese oyevi yugüeru cuartelve. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēhisar yuvireco, asendura nde yoepisa —ehi Félix chupe. Evocoyase oyocuai op̄itiviisar Pablo rāro āgua güētave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar p̄itiviisar oñehe vaheñã Pablo amotarēhi uca āgua, ahe serer Tértulo. Ahe yugüeru Pablo recocuer mombehu āgua mborerecuar Félix upe. ² Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroysar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe op̄iratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ēgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesa pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. ¹² Co judío oicua yuvireco nañehengatai ava upe tūparo guasu pipe, namboaivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Piasu p̄ihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. ¹⁶ Sese ayemoviracua tupri che p̄ihañemoñetasa rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayeve che recua Jerusalén ve ava iparaisu vahe upe porerocosa mondo āgua. Ahese avei mbahe mimba ayuca uca Tūpa upe seropovēhe āgua. ¹⁸⁻¹⁹ Evocoyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndipoi ahese ava rehii che rupi, namboaivu

guasu ucai avei ava. Ahe che repia vahe rumo iya yugüeru ndeu che mombehu, que virecose che amotarêhisa yuvireco viña. ²⁰ Anise, aviyeteramo co oyepota vahe cohava yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pîratase ipâhuve: ‘Che aroya ava ocuerayevira coiye. Sese che reraso pe rovai co pîpe che recoãha âgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoyase oyocuai sundao rerecuar Pablo rãro âgua: “Eremondomira rumo que mbahe semimbotar apo âgua chupe iyavei imboripar yugüeruse, tihãnecoño yuvireco sese. Ëgüe ere sãro” ehi Félix sãrosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñhe Jesucristo reroyasa resendar yuvireco. ²⁵ Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tüpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri âgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osê âgua’ oya viña. Sese osãro pucu tõi. Iyavei setá oyupagüer güeru uca oyeupe oñemoñeta âgua sese.

²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha âgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osê Cesarea sui, oso Jerusalén ve. ² Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe.

³ Ipare oporandu chupe: “Emboumi uca Pablo cohava oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendasava oico iyavei che ayevi piaivira vicho aheve” ehi.

⁵ —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara âgua —ehi Festo chupe.

⁶ Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapí güendave ava reco moingatu âgua oï. Ahese oyocuai Pablo reru âgua. ⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tõi Festo upe Pablo rembiapo yuvireco, ndoicatuí eté rumo seroya uca âgua yuvireco. ⁸ Esepia, Pablo aipo ehi oyoepisave:

—Ndayemboangaipai judío porocuita rese, judío tūparo rese, yande rerecuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequerêhi vo Jerusalén ve ereso vaherã? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeve chupe:

—Cūrítei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tõi ayapo judío amotarêhisave —ehi—. ¹¹ Ayapose que mbahe naporai vahe, aviyeño che yuca uca âgua eve; ndayapoise rumo co judío omombehu vahe yuvireco ndeu, ndiyai che mondo âgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu âgua —ehi.

¹² Ahese Festo oñemoñeta opĩtiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³ Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo ãgua Festo upe yuvireco. ¹⁴ Opĩtase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepe mbia soquendapri oseya vahe Félix cheu —ehi—. ¹⁵ Aose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶ Ahese aipo ahe yuvireco chupe: “Ndiyai eté romano mborerecuar omondo vaheã que ava uve sese oñemoñeta vahe rese mbahe moingatuẽhi renondeve. Toyoepe rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohava yuvireco, aporandu voi pota secocuer rese chupe. Evocoyase ñepe ari pare aguapi che rendave porandusave. Ahese ayocuai che pĩtiviisar evocoi mbia reru ãgua —ehi—. ¹⁸ Evocoyase opũha sese oñemoñeta vahe sembiapo ai mombehu ãgua. Asendu renondeve che pĩhañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tẽi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera pĩha co sembiapo moingatu?” ahe tẽi. Sese aporandu chupe: “¿Ndequerẽhi vo Jerusalén ve mbahe nde rembiapo rese porandu ãgua ndeu?” ahe chupe —ehi—. ²¹ Pablo rumo oporandu cheu Cesar upe oso ãgua. Oipota mborerecuar ivate catu vahe oyeupe mbahe güembiapo rese porandu ãgua. Sese asoquenda ucaño vite sereco imondo ãgua Cesar upe —ehi Agripa upe.

²² Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ãgüe ehi yuviroique mborerecuar ñemoñetasave sundao rerecuar iyavei opacatu tecua pĩpendar ava seco ivate catu vahe reseve. Ahese Festo oyocuai opĩtiviisar Pablo reru ãgua yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tẽi yuvireco Jerusalén ve iyavei cohava Cesarea ve. Osapucái pĩrata tẽi yuvireco ‘ĩtomanó ité evocoi!’ oya yuvireco cheu —ehi—. ²⁵ Ndayosui rumo mbahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe. ²⁶ Ndarecoi rumo mbahe naporai vahe aicuachía vaheã imondo ãgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—. ²⁷ Chepĩhañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi: ² “Ore rerecuar Agripa, ayoepera che rorivetesave judío che rese ñemoñeta-ñeta tẽisa sui mbahe che rembiapoẽhi rese nde rovai. ³ Esepia, ereicua tupri opacatu judío recocuer, ipĩhañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteẽhisendar

⁴“Opacatu judío che cua vahe yuvireco, oicua tupri che recocuer che chĩivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūrítei che reru nde rovai yuvireco che recocuer rese nde porandu ãgua. Esepia, aroya Tũpa remimombehugũer ore ramoi uve omombehu vahe aracahe” ehi. ⁷ “Doce ore ramoi suindar opacatu judío yuvirecoi, osãro vite evocoi Tũpa remimombehugũer aviye vahe yuvireco. Sese yuviroique tũparove ari, pĩtu pipe avei Tũpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tũpa remimombehugũer reroyasa sui judío eta semira-mira tẽi che amotarẽhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tũpa porombogũerayevisa?” ehi.

Pablo omombehu yipindar Jesús reroyasar amotarẽhi agũer

⁹“Yipindar che avei che pĩhañemoñeta rai aracaco mbahe tẽi apo ãgua rese ava Jesús, Nazaret pendar, rer amotarẽhisave. ¹⁰ Ògũe ahe Jerusalén ve. Ombose pahĩ rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraisũ Jesús reroyasar ‘tamomboipa ava seroyasa sui yuvireco’ che hesa pipe tẽi. Ògũe ahe aguata opacatu tũparo rupi, ambuae tecua rupi avei yamotarẽhisa pipe” ehi.

Pablo omombehu güeco recuñaro agũer

¹²“Evocoyase aso avei Damasco ve Jesús reroyasar mombaraisũ ãgua, pahĩ rerecuar ombouse oporocuita apo ãgua cheu” ehi. ¹³ “Mbiter ari rupi rumo, aguatase Damasco piar rupi, asepiã mbahe sendĩ vahe iva sui. Ari sui osesape catu cheu, che rupindar upe avei. ¹⁴ Orovipapase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tẽi cheu? Ereyapose evocoi mbahe tẽi, nde ae ereyemombaraisũ’ ehi cheu. ¹⁵ Evocoyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarẽhi eve. ¹⁶ Epũha, co rese ayemboyecua ndeu, tasecoi che rembiguai, che yapave. Tomombehu avei co mbahe osepiã vahe iyavei tomombehu avei co mbahe amboyecua vaherã chupe curi, viya ndeu’ ehi. ¹⁷ ‘Oropĩsirora judío sui iyavei oromondora ava ndahei vahe judío upe. Ereguatase ipãhuve, oropĩsiro aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pĩtumimbi vahe nungar rupi; toguata catu tesapesa rupi yuvireco. Ipĩpe sui toyuvireco iri eme carugar povrive yuvireco; toguata catu Tũpa rupi; ògũe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tũpa porerecosa oime vaherã opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepiã

¹⁹“Evocoyase, che rerecuar Agripa, che quer nungarve asepiã vahe iva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tũpa upe. Peicove tupri, ipĩpe sui toicua ava yuvireco pe ñecuñarosa’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tẽi judío che pisi tũparo pipe che yuca pota yuvireco” ehi. ²² “Tũpa che pĩtiviisa pipe rumo aicoveño ité supĩ, amombehu-mbehu vite Tũpa recocuer opacatu ava seco ivi coti catu vahe upe, seco ivate catu vahe upe avei. Namombehui eté que mbahe co coti tẽi Tũpa ñehe mombehusar iyavei Moisés, ‘Oimera mbahe aviye vahe’ ihe agũer sui. ²³ Aracahe omombehu yuvireco: ‘Tũpa Rembiporavo Poropĩsirosar omano ranera’ ehi. Ahe rumo yipindar ocuerayevi vaherã omano vahe pãhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñehe oyoeepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquiyei opacatu co mbahe mombehu āgua chupe. Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroya āgua —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³² Ahese Agripa aipo ehi:

—Ahe ndoporanduse Cesar upe oso āgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoyase mborerecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secui, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. ⁴ Sidón sui orosirise, oroso Chipre ivii rupi ivitu sui ore ñemoha āgua. Oroso pota tēi ari sosa coti rupi, ndoroicatui rumo. Esepia, oipeyu pīrata ivitu icoti sui. ⁵ Evocoyase oroguata para guasu pipe Cilicia, Panfilia ivii rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherā Italia ve. Evocoyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oreypota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸ Supi yavai rai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota āgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite āgua. Yaguata vitesse, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroquatasar, carite yar avei. ¹² Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu

ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota água” ehi yuvireco viña. Ahese orosirise ore yemboyasa sui, oroso Creta ivii rupi. ¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. ¹⁵ Oyepotase oreu, ndoroicatu iri eté sovaichi. Evocoyase, “Tayande rerasoño” orohe chupe. ¹⁶ Oroñocua caha pāhumi serer Cauda. Ahe oroñocuasave oroviroha sāi ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño. ¹⁸ Ivitu rumo ombohitū iteanga para guasu. Sese ahere ayihive oporaviqui vahe omboipi carite vosiita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya voira peye viña, nayasēise Creta sui, ahese ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tūpa oipīsiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—. ²⁶ Yande mohañira rumo imbehi coti caha pāhumi rese yande mondo —ehi.

²⁷ Ñuvirío semana ivitu ore reroguata pare ahe pītu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sā oiti ive imondo yuvireco.

³³ Cōhe ramosa Pablo aipo ehi opacatu upe:

—Cūritei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe. ³⁴ Evocoyase pehuñomi mbahe cute pe ñepisiro água. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu água. Ahe imbohi pare, ohu. ³⁶ Evocoyase opacatu ava oyemonguerēhi yuvireco ocaru água. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pipe iposiiēhi água yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguata yuvireco. Evocoyase oroi que oroso yācua vahe pipe.

⁴¹Oroguatase rumo, oroyapi ivi cuhi. Aheve carite opãha ité sese. Ndoicatuí eté seroyevi yuvireco iyavei carite rupita i ohitu vahe opa tupri oyoca.

⁴²Ahese sundao eta, “Aviyeteramo soquendapri ohita tiëtera, oñemi yuvireco. Sese yayucapa” ehi yuvireco chupe viña. ⁴³Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴“Ambuae evocoyase ivirape, carite yecacuer rese toyasecoño yuvinose ãgua ivi rese” ehi. Ëgüe orohe orosëpa ivi rese oroso.

28

Caha pãhu Malta ve Pablo secoi

¹Ore ñepisiropare, ahese ramo oroicua caha pãhu rer Malta revo rahe. ²Ahe pendar ava nihapisií ore repiase yuvireco. Oquí iteanga, sôhisa avei. Ahese oyatapí guasu yuvireco, “Perio, tapeyephehemi” ehi yuvireco oreu. ³Evocoyase Pablo omonuha yepaha seru, omondo potase rumo tatave, ahese osë aviyeteramo tēi sacucuer sui mboi ahe eté vahe chupe, oipomama ichuhu. ⁴Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tûpa rumo oichuhu uca mboi upe ‘tomano’ oya” ehi yuvireco viña.

⁵Ahe rumo omomboño mboi tatave imondo oyesui. Ipare nomomaraiño ité. ⁶Ahe pendar opacatu osãro tēi yuvireco, “Irurura chupe, ahese oviapira, omanora revo” ehi yuvireco chupe viña. Osãro pucu tēi yuvireco, Pablo rumo nimaraiño ité. Ahese, “Ndahei vo co mbia tûpa ité co secoi” ehi tēi yuvireco chupe.

⁷Evocoyase mbia Publio serer vahe, ahe opacatu caha pãhu Malta pendar ava rerecuar secoi. Ivi namombriimi ichui. Ahe nihapisií ore repia güetave iyavei ihañeco tupri ai ore rese mbosapí ari rupi. ⁸Aheve ore recoseve Publio yesupa sohí iteanga ou, sepochiuví avei. Evocoyase Pablo oique chupe. Ahese oyerquí Tûpa upe sese, omondo opo iharive. Ëgüe ehi imbogüera. ⁹Oyanduse ahe icuera yuvireco, ahese ambuae imbaheasi vahe evocoi caha pãhu pendar yugüeru chupe, ahe ombogüerapa avei. ¹⁰Ahe pendar oyemboava etepri yuvireco oreu. Ipare ore ha ãgua ambuae carite pipe, opacatu mbahe ore guatasa rupi ipaneëhi ãgua ogüeru yuvireco oreu.

Pablo oyepota Roma ve

¹¹Co carite mbosapí yasi osãro vahe ari mbahe tēi vahe pituhu ãgua. Ipipe oroso. Ahe carite yugüeru Alejandría sui. Ahe ichí rese ñuvirío itûpa rahanga yuvireco: ñepi rer Cástor, ambuae evocoyase Pólux. ¹²Ahese oroso oroyepota yemboyasa Siracusa ve. Aheve oropita mbosapí ari. ¹³Ichui orosë oroso oroyepota Regio ve. Ahere ayihive ivitu oipeyu irohí cotí sui. Sese oroyepota Puteoli ve ambuae ari pipeve. ¹⁴Aheve orosepia ambuae Jesús reroyasar. Ore mombita güetave yuvireco ñepi semana. Ipare oroso Roma ve ivi rupi. ¹⁵Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda ãgua yuvireco. Sepiase, Pablo, “Aviye ndeu” ehi Tûpa upe. ¹⁶Oroyepotase Roma ve, sundao rerecuar co coti omondo Pablo ñepi sundao upe sãro uca ãgua.

Pablo omombehu Roma ve Tûpa Ñhengagüer

¹⁷Mbosapí ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naroñroi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive. ¹⁸Ahe mborerecuar oporandu che recocuer rese yuvireco. Oicuse che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca ãgua yuvireco. ¹⁹Evocoi judío rumo ndoipotaiño ité chupe. Ahese ayu pota cohave Cesar upe che yoepi ãgua. Nayamotarēhi uca potai rumo che mu Jerusalén pendar Cesar upe —ehi—. ²⁰Che yoepi ãgua oposoho uca. Opomoñeta pota yande

remiario rese. Co Tūpa Rembiporavo ava pĩsĩro ãgua resendar reroyasa rese carena pĩpe ñapĩchimbri aico —ehi.

²¹ Ahese ahe ava omboyeve yuvireco chupe:

—Ndroipisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroĩro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oiporavo ari ñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tūpa mborerecuasa resendar iyavei Jesús recocuer Moisés porocuita icuachiapri pĩpe sui iyavei Tūpa ñehe mombehusar rembicuachía pĩpe avei ‘toviroya yuvireco’ oyapave. Ëgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvínosepa pota. Ahese aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoi upe aracahe aipo ehi:

²⁶ “Eso nde mu pãhuve.

Emombehu aipo ere:

‘Yepe pesendu tẽira mbahe viña,

ndapesenducuai chira rumo.

Iyavei pesepia tẽira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharãtã iteanga seroyaẽhisave.

Ndoyemboapisaiño yuvireco.

Iyavei osapĩvii tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pĩpe suive Tūpa omboyecua ucara oporopĩsirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvínose ñehe rese oyecopi-copi yuviraso.

³⁰ Ipare Pablo opita ambuae ava rõtave ñuvirío araviter rupi omboepi oque ãgua oico. Aheve nihapisii opacatu ava rese oyepiri oyepotase yepi. ³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyeẽhisa pĩpe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehe pëu. Tüpa che poravo apóstol che reco ãgua ñehesa poropĩsirosa resendar mombehu ãgua.

² Tüpa niha yipisuive omombehu uca co ñehesa ava oñehe mombehusar upe icuachi-apri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyesu ou mborerecuar guasu David suindar sui; ⁴ ocuerayevise oespíritu maranehi pipe, ahese opĩratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopĩtiviisa apóstol che reco ãgua, che cuai avei ava ndahei vahe judío upe Guahir recocuer mombehu ãgua opacatu ivi rupi sese yeroya uca ãgua 'ipipe sui tovíroya che Rahir yuvireco' oya. ⁶⁻⁷ Pe Roma pendar peico vahe, pe avei senoipri ipãhuve peico Jesucristo rese peico vahe. Pe niha Tüpa rembiaisu peico. Oipota avei pe reco catupri ãgua oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che pãha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so ãgua rese chupe yepi. ¹¹ Esepia, che aso pota ité Espiritu suindar mbahecuasa mondo pëu pe pĩtivii ãgua 'toyemoviracua tupri catu Cristo rese yuvireco' che yapave. ¹² Che aipota ité yande ñepei-peí yañepitivii catu ãgua Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tẽisa pe piri yepi. Cũritei rumo ndaicatuño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipãhuve" ahe pëu, inungar opacatu ambuae ivi rupi ãgüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe ãgua, tecua pĩpendar yuvirecoi vahe upe iyavei ndayaracua vitei vahe upe, imbahecua vahe upe, nimbahecua vahe upe avei no. ¹⁵ Sese pe Roma ve peico vahe upe avei ayemonguerẽhi voi eté co ñehesa pĩsirosa resendar mombehu ãgua.

Ñehesa pĩsirosa resendar pĩratasa

¹⁶ Che nachĩ eté co ñehesa pĩsirosa resendar aviye vahe sui. Esepia, ahe Tüpa pĩratasa opacatu viroyasar pĩsiro ãgua, judío rane yipindar, ipare opacatu ambuae ava-ava tẽi avei. ¹⁷ Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité ãgüe ehi yandeu. Esepia, icuachiapri arachendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirẽhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipĩrata vahe ombou itera iva sui opacatu ava viroyasarẽhi upe, ndaseco põrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tẽi mbahe Tüpa suindar yuvireco. Esepia, Tüpa ité niha omboyecua chupe. ²⁰ ãgüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité seci iyavei ipĩratasa apirẽhi vahe. Sese ava angaipa viyar ndiyai, "Eñemosañõ tẽi rane oreu" ehi vahe yuvireco chupe. ²¹ Esepia, yepi ahe oicua tẽi Tüpa yuvireco viña, nomboetei rumo Tüpa secosa rese. "Aviye ndeu" ndehi avei yuvireco chupe. Iyavei

ipihañemoñeta mbahe ãgüe ehi tõi vahe rese. Ipïpe sui mbahe ndosenducua catu iri eté yuvireco. ²² Yepe, “Ore mbahecua vai” ehi tõi viña, ndoicuai eté rumo mbahe ipïpe yuvireco. ²³ Esepia, ahe Tüpa nomanoi vahe seco porañete vahe mboetei rãgüer sui, omboetei ava ocañi tõi vahe rã rahanga yuvireco iyavei vïrai, opacatu mbahe mimba, mboi tõi avei omboetei yuvireco.

²⁴ Sese Tüpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboeteiẽhisa pïpe yuvireco. ²⁵ Esepia, mbahe supi vahe reroya rãgüer sui temira tõi viroya catu yuvireco. Iyavei Tüpa ité mboyeroya rãgüer sui omboetei catu mbahe sembiapocuer tõi yuvireco. Yaposar ité ru timboeteisa catu yepi.

²⁶ Sese Tüpa opoi eté ichui, “Toyapoño poromochisa mbahe tõi güemimbotarai pïpe yuvireco” ehi chupe. Evocoyase cuña avei cuimbahe rese güeco rãgüer sui yuvirecoi oyese ae. ²⁷ Cuimbahe avei cuña rese güeco rãgüer sui yuvirecoi avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tüpa supi eté vahe” ndehise seroyaẽhisa pïpe yuvireco, Tüpa evocoyase opoi eté ichui ‘toyapoño ayase mbahe ndipotasai vahe güeco raisa pïpe yuvireco’ oya chupe. ²⁹ Ahe evocoyase yuvirecoi opacatu mbahe-mbahe tõi pïpe; oyemboaguasaguasa tõi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tõi ava upe. Ahe oñemoïro ambuae ava mbahe pota raisave tõi, oporapichi, ivava serai, iporombopa serai, ipihañemoñeta ava reco momara ãgua tõi iyavei imahechiroi ai ipïpe yuvireco. ³⁰ Iyavei ambuae ava cupe cotive mara ehi-ehi tõi vahe, ahe Tüpa amotarẽhisar yuvirecoi, viroïro avei ava, oyemboivate ai, oyeecomboivate ai tõi avei oñehe pïpe yepi, oseca-seca tõi mbahe naporai vahe güembiaporã, nomboyeroyai avei oyesupa yuvireco, ³¹ ndoyapisaca potai eté Tüpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tõi Tüpa “oimera evocoi nungar aposar upe cañisa” ehi vahe, oyapo viteño rumo mbahe tõi yuvireco iyavei ambuae ava oyapose mbahe tõi, ovihareteño sepiase yuvireco.

2

Tüpa omondo ava upe sembiapogüer rupi tupri ité

¹ Oimese que pe pãhu pendar ‘co oyapo mbahe tõi; tocañi’ ohesave ambuae upe, ahese ahe ae oyemocañi tõi uca. Esepia, ahe inungar tupri avei. ² Yaicua rumo Tüpa omocañise evocoi nungar mbahe tõi aposar recocuer, ahe evocoyase oyapo mbahe supi tupri vahe. ³ Pe opase ava recocuer pesenoi, pe avei rumo ãgüe peye tupri peico. Pe avei eté evocoyase ndapeñemi chietera Tüpa ñemoïrosa sui. ⁴ ¿Peroïro tie Tüpa oyapo vite se mbahe aviye vahe oñemosase, seco mbegüe tupri ai vite se avei pëu? ‘Tosecuñaro güecocuer yuvireco’ oyapave rumo ãgüe ehi pëu. ⁵ Pe rumo pepiharãta viteño ité Tüpa upe pe yevi potaẽhi ãgua. Sese pereco catu viteño ité Tüpa ñemoïrosa peyese, acoi ari oyepotase Tüpa güeco tuprisa pïpe yande renoipara yande mocañi ãgua, anise yande pïsiro ãgua curi. ⁶ Ahese opara omboepi ñepeipei yande rembiapogüer rupi yandeu. ⁷ Omboura tecovesa apirẽhi vahe yandeu yasecase teco ori, Tüpa suindar poromboeteisa iyavei mbahe apirẽhi vahe yande mbahe tupri aposa pïpe. ⁸ Ombou aveira oñemoïrosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tõi. ⁹ Judío opacatu mbahe-mbahe tõi aposar ranengatu oiporarara mbahe rasicuer yuvireco, iparera ndahei vahe avei judío. ¹⁰ Tüpa rumo opacatu seco catupri vahe upe omondora imboetei ãgua ‘toipisi teco ori iyavei toyuvirecoi mbahe tupri pïpe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tüpa ndayande mboyoaviratii yande rereco. ¹² ãgüe ehi eté, opacatu oyemboangaipa vahe Moisés porocuita porẽhi oyemocañi tẽira yuvireco. Acoi oyemboangaipa vahe Moisés porocuita rereco pïpe yuvireco, ahe porocuita pïpe avei

opara ocañi tēi porandusave yuvireco coiye. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoyase inungar porocuita vireco vahe yuvireco. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyasa. Ahe ipipe avei oyandu mbahe güembiavi, ichui avei oye-monguerēhi mbahe aviye vahe apose. ¹⁶ Ahe ari cañi pipe Tūpa oyocuai ucara opacatu ava rembiapo cuaēhisa repri pisi āgua Jesucristo upe, co ñehesa p̄sirosa resendar amombehu vahecuer rupi tupri ēgüe ehira curi.

Ñehesa judío resendar, Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyasa pipe pe reco catupri āgua Tūpa rovaque viña. Iyavei ipipe peyecomboivate ai Tūpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe poravo āgua. ¹⁹ Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar p̄tumimbi vahe nungarsave tēi resape āgua” peye tēi. ²⁰ “Aicatu avei ava mbahe ndosenducuai vahe mboaracua iyavei ava ch̄hivahemi nungar mbohe āgua. Esepia, areco co mborocuita vireco vahe opacatu mbahecuaasa iyavei mbahe supi tupri vahe ité” peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaēhi āgua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ēgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itūparo pipe sui. ²³ Peyecomboivate ai co mborocuita rerecosa rese; ndapemboetei rumo Tūpa ipipe ahe mborocuita mboaviyeēhi pipe. ²⁴ Supi eté icuachiapri aracahendar pipe aipo ehi: “Pe sui tēi ava ndoicuai vahe Tūpa iñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviye angara p̄eu, pero- oya tupri itese Moisés porocuita viña. Ndaperoya tupriise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi āgua yuvireco. Esepia, yepe pereco Tūpa porocuita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retocuer rese güeraño tēi avei no. ²⁹ Judío ete ité rumo opiha pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoyase, ¿mbahe vo co aviye judío yande reco āgua? ¿Yande yembocircuncidasa piha aviye? ² Supi eté. Esepia, yipindar Tūpa omondo oñehe judío eta upe imboaviye āgua. ³ Amove yepe ipāhu pendar nomboaviyeise ocuita viña, ¿Tūpa avei tie ēgüe ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri aracahendar pipe aipo ehi:

“Supi tupri vahe Tūpa’ ehira nde ñehe rese yuvireco.

Sese ereiquesave va porandusave, eresē tupriñora eso ichui” ehi.

⁵ Yande reco rai pipe tēi yamboyecuaase Tūpa reco tupriisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri āgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei cature Tūpa supi eté vahe, ¿mahera pīha evocoyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime āgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboyecua Tūpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepe angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepe angara viña!

¹³ Ñehesa mbahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe oñeha rai opihaviracuá iteangasa pipe yuvireco.

¹⁵ Ndayipitii oporapichi āgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri āgua yuvireco.

¹⁸ Ndipihañemoñetai eté Tūpa sui osiquiye āgua yuvireco” ehi.

¹⁹ Yande niha opa yaicua opacatu co mbahe omombehu vahe mborocuita arachendar pipe, omombehu co porocuita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa pisi āgua yuvireco’ ohesave aipo ehi. ²⁰ Esepia, ndipoi chietera que ñepe seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande p̄sirora

²¹⁻²² Cūrítei rumo Tūpa oicua uca yandeu ndahe iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombepri secoi porocuita arachendar pipe, iñeha mombehusareta rembicuachigüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetes. ²⁴ Ahe rumo oporoaisusa pipe, “Ereyavi mbahe che ñemoirosa pisi āgua” ndehi iri yandeu. Esepia, ahe yande p̄siro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vahrã vuvi yande angaipa rese ñero āgua. Sese yande yeroya pipe oime ñeroisa yandeu. Ipipe omboyecua güeco ñvi tuprisa. Yipisuive rumo güeco asiñhisa pipe oñemosaño arachendar ava angaipa upe; cūrítei rumo omboyecua ité güeco ñvisa yandeu, seco ñviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai āgua sovaque! Esepia, ndahei porocuita mboaviye rese ēgüe ehi, ahe rumo Cristo rese yande yeroya pipe ēgüe ehi yandeu. ²⁸ Sese yaicua Tūpa, “Ereyavi mbahe che ñemoirosa pisi āgua” ndehi iri Cristo rese yande yeroyase yandeu, ndahei mborocuita mboaviyesa sui tēi.

²⁹ ¡Tūpa niha opacatu ité ava Tūpa, ndahei ore judío oroico vahe Tūpa güeraño! ³⁰ ¡Supi eté ñepeño ité secoi: sese yayeroyase Cristo rese, oyoya guasuño ité, “Ereyavi mbahe che ñemoirosa pisi āgua” ndehi chira yandeu, yepera imbocircuncidapri viña, anise que ndahei vahe imbocircuncidapri viña no! ³¹ Ndahei rumo, “Ēgüe ehi tēi vahe” yahe evocoi

mborocuita upe Jesucristo reroyasa pīpe. Ipipe rumo yamboyecua evocoi mborocuita ěgüe ndehi tēi vahe.

4

Abraham recocuer sui yembohesa

¹ Iyavei, ¿mara ehi pīha yande ramoi Abraham recocuer aracahe? ² Acoi mbahe güembiapo pīpe sui tēi oipisise güeco tupri āgua Tūpa sui, oyemboivate aira oico ipīpe viña. Ndiyai eté rumo ěgüe ehi Tūpa rovaque. ³ Esepia, icuachiapri aracahendar pīpe aipo ehi: “Abraham oyeroya ité Tūpa rese. Sese Tūpa, ‘Co seco catupri vahe’ ehi chupe” ehi. ⁴ Co rumo yande yayapose mboraviqui, ahe yaipisi vahe ndahei porerecosa tēi, ahe rumo mboraviqui repri ité yaipisi. ⁵ Yande rumo, yayeroyase Tūpa rese, Tūpa evocoyase yande pisira, ‘co seco catupri vahe’ ohesave. Esepia, ahe ěgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar aracahendar avei oñehe ava rorivetesese rese Tūpa seco catupri vahe nungar pisisa rese. Ahe rumo ndahei mbahe sembiapogüer rese tēi oipisi. ⁷ Ahe aipo ehi aracahe: “¿Sorivete acoi ava Tūpa iñeroise yangaipa rese, iyavei ndoyemomahenduha irise yangaipa rese chupe!

⁸ ¿Sorivete avei ava, ‘Nde angaipa viyar ereico’ ndehi irise Tūpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tūpa, “Co seco catupri vahe secoi” ehi Abraham upe oyese iyeroyasa rese. ¹⁰ ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tūpa chupe. Sese imbocircuncidapri secoi. ěgüe ehi Abraham opacatu ava oyeroya vahe Tūpa rese, ndoyembocircuncidai vahe yesupa nungar secoi. ěgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncida viteiseve.

Tūpa remimombehu imboaviyesara sese yeroyasa pīpe

¹³ Esepia, aracahe Tūpa aipo ehi Abraham upe, ichuindar upe avei: “Peipisira opacatu co ivi pe mahera” ehi. Ndahei Moisés porocuita mboyeroya pīpe ěgüe ehi chupe, oyese yeroyasa pīpe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroyasar güeraño oipisise co mbahe oime vahe chupe viña, evocoyase yande yeroyasa Tūpa rese ěgüe ehi tēi etera, Tūpa remimombegüer evocoyase ěgüe ehi tēi vahe aveira viña no. ¹⁵ Esepia, co mborocuita mboaviyeēhisa pīpe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaēhisa.

¹⁶ Sese mbahe Tūpa remimombegüer porerecosa yaipisira sese yande yeroyasa pīpe, ahe semimombegüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoyase ahe opacatu yande ramoi secoi. ¹⁷ Icuachiapri aracahendar pīpe aipo ehi: “Orombou ava eta ivi rupindar ramoirã” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya āgua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehe: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi āgua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opiratasa opacatu oñehengagüer mboaviye āgua” ehiño ité opiha pīpe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirã. Ipare Tüpa ombogüerayevi yande pisi ägua seco catupri vahe nungar oyeupe.

5

Tüpa, “Peyavi mbahe” ndehi iri

¹ Sese yaico mbahe tupri pipe Tüpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tüpa suindar porovasasa yayeroyase sese. Ipipe avei yayemoviracuaño ité yaico, yayemboviha avei. Esepia, yaicua Tüpa piri yande reco ägua imborerecuasave. ³ Ndahei rumo sese güeraño yayemboviha, yande yemombaraisusa rese avei niha yayemboviha yaico. Esepia, yaicua ahe yande mbohe yande ñemosa ägua, ⁴ iyavei yañemosañose, yasë tuprira yande recoãhasa sui, ahese yaicua yaipisi vaheerã mbahe aviye vahe Tüpa suindar yepi. ⁵ Iyavei ahe yande remiaro nayamoha tēi chira sereco. Esepia, Tüpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro ägua yande recocerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepi ava omano vaheerã ambuae ava aviye vahe upe nara; yepe que ava recocer supi eté aviye aira viña, seni rumo ndipoi eté que ava, “Che tamano sepirã” ehi vaheerã chupe. ⁸ Yepe yande angaipa viyar yaico yipindar, Tüpa rumo omboyecua yande raisusa; ombou Cristo imano ägua yande angaipa repirã. ⁹ Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarēhimbar yaico vitesse, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoyase oicatu ité yande p̄siro. ¹¹ Ndahei co reseño ēgüe yahera, yaviha catu aveira Tüpa rese, yande Yar Jesucristo rese avei. Ichui niha ndipo iri mbahe Tüpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo viteise Moisés porocuita, oime voi eté angaipa co ivi pipe. Yepe tie ndicuaa vitei angaipa porocuita ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuita mboaviyeēhisa resendar rese viña. Ahe Adán rese omboyecua mbia ou vaheerã.

¹⁵ Tüpa porerrecosa ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tüpa ombou oporerrecosa porop̄sirosa yandeu. Ahe rumo aviye catu vahe ava eta upe nara. ¹⁶ Ahe ñepi ava angaipa rumo ndoyoyai eté Tüpa porop̄sirosa ombou vahe rese yandeu. Esepia, ñepi ava angaipa sui ou Tüpa ñemoirosa; oporerrecosa rumo Tüpa ombouño ité ava eta mbahe oyavi ati vahe upe nara yangaipa mocañi ägua. ¹⁷ Supi eté ñepi ava angaipa sui oimeño ité manosa opacatu yandeu. Yande rumo yaipisi mbahe ipirata catu vahe ichui, ahe Tüpa porovasasa tuvichá vahe ité iyavei iporerrecosa, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepi ava sui, ahe Jesucristo.

¹⁸ Evocoyase inungar Adán rembiapo ai güeru Tüpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tüpa ñemoirosa pisiēhi ägua ‘tovireco tecovesa apirēhi yuvireco’ oya. ¹⁹ Esepia, ñepi ava Tüpa reroyaēhisa sui setá oime ava angaipa viyar; ēgüe ehi aveira ñepi ava mboyeroyasa sui setá aveira ava vireco güeco catuprisa Tüpa rese yuvireco.

²⁰ Supi eté porocuita ouse aracahe, ahese angaipa yaposa catu ité. Yepe ēgüe ehi viña, Tüpa porovasasa rumo ivate catu ité ichui. ²¹ Evocoyase inungar angaipa ipirata yandeu

yande mano āgua viña, ēgüe ehi avei rumo Tūpa oporovasasa ipīrata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoyase, ¿iya iri pīha yayapo vite angaipa yaico Tūpa yandeu oporovasasa mboyecua catu āgua? ² ¡Aní chietera! Esepia, yande niha senosepri angaipa sui. Evocoyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? ⁴ Yande ñeapiramose, aviye acoi ñotimbri yaico Cristo rupive yande mbogüerayevi iri āgua iyavei yande recocuer mopiasu āgua avei, inungar acoi Cristo ocuerayevi Vu reco pīratasa pipe.

⁵ Yande omano vahe nungar yaicose supive, ēgüe yahe aveira yande yacuerayevi supi. ⁶ Yaicua avei niha yipīndar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoēhi āgua. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar Cristo rese yaico. Evocoyase yayeroya avei yaicove vaherā sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi āgua; cūrítei rumo oicove Tūpa upe nara. ¹¹ Ēgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavrive pe cuai āgua pe remimbotarai mboyeroyasa pipe. ¹³ Aní peyemondo angaipa upe mbahe tēi apo āgua. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo āgua. ¹⁴ Evocoyase, pe angaipa ndape cuai iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoyase peico. Pemboyeroyase Carugar angaipa apo āgua, ahe evocoyase pe reco mocañi tēira. Tūpa pemboyeroyase rumo, ahe evocoyase pe reco mohivira. ¹⁷ Aviye Tūpa upe. Esepia, pe yipīndar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe. ¹⁸ Ñepei reseve pe angaipa sui Tūpa pe renosese, pe evocoyase mbiguai nungar mbahe supi tupri vahe apo āgua peico. ¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri āgua.) Yipīndar pe retecuer pereco mbahe tēi pipe mbahe naporai vahe apo āgua. Ēgüe peye rumo pe cūrítei pe reco mohivi āgua peico mbahe tupri pipe ñepei reseve Tūpa upe pe reco āgua.

²⁰ Pe peico vitesese mbiguai tēi nungar pe angaipa pipe, ahese ndapeyapo vitei mbahe supi tupri vahe; ²¹ cūrítei rumo pechī tēi ichui, ahe niha ndape pñivii eté pe recocuer rese, iyavei pe reraso pota manosa apirēhi vahesave yepi. ²² Cūrítei rumo angaipa sui senosepri peico Tūpa povrive pe reco āgua. Ichui mbahe tupri oime pēu. Ahe niha ombou oyeupe nara ité pe reco tupri āgua. Ipīpe sui peicora apirēhi vaherā. ²³ Angaipa niha ombou manosa tēi yandeu, Tūpa rumo oporerocosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitesese co ivi pipe. ² Esepia, inungar cuña omenda vahe, imer

oicove vïtese, iporocuaítavrive vïteño ité secoi yepi. Omanose rumo imer ichui, ahe cuña ndahe iri omer porocuaítavrive secoi. ³ Acoi cuña omer recove vïteseve, vïrecose ambuae cuimbahe, oyemboaguasa tēi evocoyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cute.

⁴ Che rivireta, pe niha ēgüe peye avei Cristo rese peico vahe; Cristo manosa sui ndahe iri Moisés porocuaítavrive peico Cristo rese peico āgua. Ahe niha acoi ocuerayevi vahe. Sese yande recocuer ēgüe ndehi tēi vahe Tūpa upe. ⁵ Esepia, yande yaicove vïtese yande reco ai pïpe, ahe porocuaíta renduse, yaipota catu mbahe tēi pïpe yande reco āgua. Ipare rumo ahe manosave tēi yande reraso ucara viña. ⁶ Cūrítei rumo yande omano vahe nungar yaico acoi porocuaíta pïpe yaico vahecuer sui. Ēgüe yahe, yasē ichui Tūpa upe mbahe apo āgua Espírïtu sui yande reco pïasu pïpe. Ndahe iri mborocuaíta icuachiapri yïpïndar vahe pïpe yaico.

Angaipa oime vahe yande rese

⁷ ¿“Tūpa porocuaíta angaipa” yahera pïha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaíta ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaíta pïpe, ahese ndaicuai chiaveira che mbahe pota raisa viña. ⁸ Aicuase mborocuaíta, ahese angaipa ipïrata catu cheu. Ahe mborocuaíta apo potaēhisa pïpe che querēhi catu opacatu che remimbotarai tēi apo āgua. Esepia, mborocuaíta porēhi angaipa aviye ndipoi vahe viña. ⁹ Yïpïndar Tūpa porocuaíta ndaicua viteise, ndoyavii aviye vahe ité che reco areco viña. Porocuaíta aicuase rumo, aipota rai angaipa apo āgua. ¹⁰ Che evocoyase acañi tēi vaheerā aico ipïpe viña. Ahe porocuaíta che recove apïrēhi āgua mbou rāgüer sui, che mondo ucaño itera manosa apïrēhi vahe pïpe tēi viña. ¹¹ Esepia, angaipa ahe porocuaíta pïpe che mbopa ité. Ahe ipïpe avei che mocañi tēira viña.

¹² Evocoyase co porocuaíta ndaseco marai vahe ité, supi tupri vahe ité, aviye vahe avei. ¹³ ¿Co porocuaíta aviye vahe pïha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoyase co porocuaíta cuasa sui oipota catu uca mbahe tēi apo āgua cheu. Ipïpe aicua angaipa oime vahe che rese. Ēgüe ehi avei ahe porocuaíta omboyecua tupri ité angaipa mbahe tēi vahe yandeu.

¹⁴ Yaicua niha porocuaíta Tūpa suindar, che tēi rumo imondopri aico angaipa mboyeroa āgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaíta aviye vahe. ¹⁷ Evocoyase ndahei cheyesui eté ēgüe ahe, angaipa tēi rumo ēgüe ehi che mbohe uca. ¹⁸⁻¹⁹ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo viteño itese mbahe ndayapo potai vahe, ndahei rumo che ité ayapo, che pïha pïpe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che pïha pïpe rumo Tūpa porocuaíta aipotá iteanga tēi, ²³ che rumo aicua che pïha pïpe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbuguai nungar tēi che rereco.

²⁴ “¡Che paraisu itél, ndaicatu iri eté, ¿uma pïha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahïr Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuaíta amboaviye pota viña, che remimbotarai tēi rumo che rereco uca angaipa povrive.

¹ Cūrītei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatuī Moisés porocuaīta mboyeroīa āgua, ahe avei evocoyase ndoīcatuī eté yande reco moingatu. Tūpa rumo oīcatuño ité. Esepia, Guahir ombou yande nungar tuprī ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei. ⁴ Ahe ēgüe ehi yande yamboaviye vaheṛā mborocuaīta. Esepia, ndayaico iri yande remimbotar tēi pipe. Yaico rumo Espiritu aviye vahe rese.

⁵ Esepia, acoī yuvirecoī vahe rumo güemimbotar tēi pipe, güecocuerei reseño tēi ipihañemoñeta yuvireco; Espiritu rese yuvirecoī vahe rumo semimbotar rese ipihañemoñeta catu yuvireco. ⁶ Iyavei acoī güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tuprī pipe yuvireco. ⁷ Esepia, acoī güecocuerei reseño tēi ipihañemoñeta vahe, ahe Tūpa amotarēhimbar yuvirecoī. Ndoipotai eté iyavei ndoīcatuī Tūpa porocuaīta mboyeroīa āgua yuvireco. ⁸ Ēgüe ehi eté, acoī yuvirecoī vahe güemimbotarai pipe, ndoīcatuī eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoī ndovirecoī vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaheṛā angaipa sui viña, pe espíritu rumo oīcoveño ité. Esepia, Tūpa, “Peyavi mbahe” ndehi iri pēu. ¹¹ Acoī Tūpa Espiritu secoise pe rese, Tūpa evocoyase omondora tecovesa piasu pe retecuer upe oEspiritu pe rese secoī vahe pīratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua. ¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyēsui, ahese peicovera apirēhi vaheṛā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoī. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. ¹⁶ Co Espiritu avei oīcua uca yande espíritu upe Tūpa rahir yande recose. ¹⁷ Evocoyase yaipisi aveira mbahe yande Ru Tūpa ombou vaheṛā yandeu; ahe oyoya Cristo reseve yaipisira, Cristo paraīsu agüer pipe ité yaicose yareco vaheṛā teco porañetesa ipiri curi.

Teco porañetesa ou vaheṛā curi

¹⁸ Cūrītei rumo yande paraīsusa ndoyoyai eté teco porañetesa yande rese ou vaheṛā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoī vahe rese. ²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité ²¹ güeco opa tēi vaheṛā sui ñepisiro āgua teco porañete vahe Tūpa rahir vireco vahe rupiti āgua curi. ²² Yande niha yaicua aracahe suive opacatu mbahe Tūpa rembiapo oīporara mbaherasicuer yuvireco cuña imembī rasi vahe nungar. ²³ Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espiritu, ahe yipindar vahe yaipisi vaheṛā ichui curi. Yayemombaraisu, yasāro vite yande querēhisa pipe Tūpa guahir ité yande rereco āgua, yande retecuer recuñaro āgua avei. ²⁴ Esepia, yande niha yañepisiro ité yande remiaro reroya pipe; sese acoī yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia. ²⁵ Acoī mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espiritu yande pñivii ndayaicatu irise. Esepia, ndayaicuai eté mara yahera yayeroqui, co Espiritu Santo rumo oporandu ité Tūpa upe yande rese oyemoposesa pipe. ²⁷ Iyavei Tūpa, ahe oīcua vahe opacatu yande pihañemoñetasa,

oicuaño ité Espíritu mbahe omombehu pota vahe oyeupe. Esepia, Espíritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave.

²⁹ Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya.

³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco!

³² Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pñivii āgua Tahir rese yande recose.

³³⁻³⁴ Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angai pa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi.

³⁵ ¿Mbahe pñha yande mboyepepira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove vitesse. Ndayande mboyepepii chiveira ichui que Tūpa rembiguai, que seco ivate vahe, seco pīrata vahe ndayasepiyai vahe, que cūrítei mbahe oime vahe yandeu, anise que mbahe oime vāherā curi.

³⁹ ¡Ndayande mboyepepii chiveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara arácahe

¹ Che Cristo reroyasar che reco pipe supi eté añehe, ndopombopai. Tūpa Espíritu oicua ité che pñhañemoñetasa supi vahe. ² Ndavihai eté che pñha pipe; oime mbahe tasi vahe cheu yepi.

³ Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuita avei chupe nara viña ‘tache mboetei oyeruresa pipe che rētave yuvireco’ oya, iyavei, “Amboaviye itera che ñehe pe rese” ehi yuvireco chupe.

⁵ Ahe avei niha yande ramoi yipindar vahe suindar yuvirecoi, Tūpa Rembiporavo Poropīsīrosar avei ahe ichuindar oyesu vahe. Ahe Poropīsīrosar niha Tūpa ité, ivate catu vahe secoi opacatu sui. Sese, ¡timboeteisa catu yepi! ¡Ēgüe tehi apirēhi!

⁶ “Tūpa nomboaviyei Israel upe oñehe imombehupri” ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tūpa aipo ehi: “Nde rahir Isaac sui rumo oimera nde suindar sovasapri” ehi chupe.

⁸ Co rumo osenducua uca yandeu ndahei Abraham suindar yuvinoise vaheño ité Tūpa rahir yuvirecoi, Tūpa remimombehu rupi yuviroha vahe

güeraño rumo ichuindar ité yuvirecoi. ⁹ Esepia, Tūpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi cōi, ahe icōi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tūpa aipo ehi ichi Rebeca upe: “Yipindar oha vahe nde membri ahe omboyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotarēhi” ehi. Sese yaicua iya ité Tūpa upe ava poravo güemimbotar rupi, ndahei seco aviye vahe rese.

¹⁴ ¿Sese pīha Tūpa upe, “Ndaseco tuprii vahe” yahera? ¡Aní eté! ¹⁵ Esepia, acoi Moisés upe aipo ehi: “Aiparaisuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tūpa oyapo mbahe; ahe rumo oporoparaisuerecosa pipe mbahe oyapo yandeu. ¹⁷ Supi eté Tūpa aipo ehi mborerecuar guasu Egipto pendar upe aracahe: “Che oromoingue uca mborerecuar nde reco āgua che pīratasa mboyecua āgua nde sui, che rer mboetei āgua avei opacatu ava upe co ivi pipe” ehi. ¹⁸ Ēgüe ehi oporoparaisuereco güemimbotar rupi. Güemimbotar rupi avei omboavai viroya āgua ava upe.

¹⁹ Aviyeteramo oimera que amove pe pāhu pendar aipo ehi vahe, “Ndiyai evocoyase Tūpa upe, ‘Pe peyavi mbahe’ he āgua yandeu. Esepia, ndipoi eté niha ava, ‘¡Aní!’ ehi vahe Tūpa remimbotar upe” ehira. ²⁰ “Ndiyai eté rumo Tūpa poepi āgua ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tēi eve?” ihe āgua ooposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo āgua.

²² Tūpa rumo oñemosa pare iya ité oñemoirora, opīratasa mboyecua āgua ocañi tēi vahe upe. ²³ Ēgüe ehi avei yapo güemimbotar rupi güeco porañetesa ivate vahe mboyecua āgua yandeu. Esepia, yande paraisuereco iyavei yipisui teco ori porañetesa omoingatu yandeu aheve yande reique āgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

“Acoi ava ndahei vahe cheundar, chupe,

‘Cheundar ité’ ahera, iyavei acoi ava ndahei vahe saisupri yuvirecoi, chupe, ‘Che rembiaisu ité’ ahera” ehi.

²⁶ “‘Pe ndahei vahe cheundar peico’ ehi vahesave, ahe chupe, ‘Tūpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar ivi cuhi, moviro tēi rumo oñepisiroa yuvireco. ²⁸ Esepia, yande Yar omboaviye voira oñehe ava viroyasarēhi mocañi āgua co ivi pipe” ehi. ²⁹ Oyoya avei ambuae Isaías remimombehugüer yipindar vahe rese:

“Yande Yar seco pīrata catu vahe noipisiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa pīsiroa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecá vahe güeco catupri āgua yuvireco viña, Cristo rese oyeroyasa pipe rumo vireco ité güeco catuprisa Tūpa rovaque. ³¹ Judío yuvirecoi vahe rumo oipota tēi güeco tupri āgua ité Tūpa porocuaita mboyeroya pipe viña, ndoicatu eté rumo supiti yuvireco.

³² Esepia niha, ndahei oyeroyasa pipe ité osecá oñepisiro āgua, ahe rumo co mborocuaita mboyeroyasa sui tēi Tūpa rese yuvirecoi pota viña. Ahe evocoyase ndoyavii oyepiapi vahe “ita yepiapis” rese yuvireco. ³³ Aipo ehi tupri icuachiapri aracahendar pipe:

“Che amondo Sión ve ñepe ita yepiapis, ahe oporoieiti vahe.

Acoi sese oyeroyá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tūpa upe che mu judío recocuer rese ‘toñepisiro yuvireco’ che yapave. ² Supi eté iquerēhi ité Tūpa upe mboraviqui apo āgua yuvireco viña. Oquerēhisa sui rumo oyavi senducuaēhisa pipe yuvireco. ³ Esepia, ndoicua potai mara ehi Tūpa ava pisi oyeupe. Sese oyesui tēi oseca güecocuer tuprisa pipe ‘tomoingatu Tūpa opiha yande pisi āgua’ ohesave yuvireco viña. Ipipe sui nomboyeroyai eté Tūpa remimbotar güeco mbocatupri āgua ité yuvireco. ⁴ Esepia, Cristo recocuer pipe imboaviyesa tupri Moisés porocuaita, “Peyavi mbahe che ñemoirosa pisi āgua” ehiēhi āgua Tūpa oyese oyeroya vahe upe.

⁵ Co yande reco catupri āgua porocuaita pipe sui, Moisés aipo ehi icuachía: “Acoi ava omboaviye tupri vahe opacatu co mborocuaita, ipipe sui yuvirecovera” ehi. ⁶ Tūpa, “Peyavi mbahe che ñemoirosa pisi āgua” heēhi āgua rumo yande yeroyasa pipe, “Ava vo oyeupira ivave Tūpa Rembiporavo reroyi āgua” ndapeyei chira. ⁷ Iyavei, “Ava vo ogüeyira omano vahe pāhuve Tūpa Rembiporavo mboyeupi uca āgua” ndapeyei chiaveira. ⁸ ¿Mara peyera evocoyase pe piha pipe? “Co ñehesa namombriveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipĩsiropri peicora. ¹⁰ Esepia, yande piha pipe yayeroya Jesús rese. Ahese Tūpa, “Co seco catupri vahe” ehira yandeu. Iyavei yamombehuse sese yande yeroyasa, ahese ipĩsiropri yaicora.

¹¹ Esepia, icuachiapri aracahendar pipe Tūpa aipo ehi: “Acoi sese oyeroyá vahe rumo, nomochi ucai chietera oyesui” ehi. ¹² Sese oyoya tupri judío ndahei vahe judío recocuer rese. Esepia, ñepeñiño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri aracahendar pipe aipo ehi: “Acoi opacatu osenoi vahe yande Yar rer, ipĩsiropri yuvirecoira” ehi. ¹⁴ Ava rumo ndoporandui chira pĩsirosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: “¿Aviye ai eté acoi ava güeru vahe ñehesa aviye vahe pĩsirosa resendar!” ehi.

¹⁶ Ndahei rumo opacatu che mu judío viroya co ñehesa pĩsirosa resendar yuvireco. Isaías niha aipo ehi avei aracahe: “Che Yar, ¿uma piha viroya ore ñehe yuvireco?” ehi. ¹⁷ Sese yayeroya Jesucristo rese co ñehesa pĩsirosa rendusa pipe.

¹⁸ ¿Osendu piha judío co ñehesa yuvireco? ¿Osendu ité! Esepia, aipo ehi avei acoi icuachiapri aracahendar pipe:

“Sendusa niha opacatú ivi rupi iñehe” ehi.

¹⁹ Iyavei, ¿osenducua piha yuvireco? ¿Osenducuaño ité! Esepia, yipindar Moisés omombehu icuachiapri pipe aipo ehi:

“Perecatēhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe” ehi.

²⁰ Ipare omombehu tupri ité Isaías osiquiyeēhisave Tūpa ñehe aipo ehi vahe:

“Acoi ava ndache recai vahe, ahe che pisi ité yuvireco.

Iyavei ayemboyecua acoi ava che rese ndoporandui vahe upe” ehi.

²¹ Judío recocuer rese avei rumo aipo ehi: “Ari rupi añehe tēi ava che reroyasarēhi ndiporeroyai vahe upe vichico” ehi aracahe.

11

Moviño tēi ava Israel pendar Tūpa oiporavo oyeupe nara

¹ Evocoyase, ¿omombo piha Tūpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoi eté, Benjamín suindar avei aico. ² Yipisuive ité niha Tūpa, “Co ava cheundar ité” ehi ore ramoi israelita upe. Sese cūrítei ndore momboi eté oyesui. Peicua niha acoi Elías resendar icuachiapri

aracahendar oyeroyai tēise omu israelita rese aipo ehise Tūpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ēgüe ehi avei cūrítei opita viteño moviro judío, ahe niha Tūpa oiporavo oporoaisusa pīpe. ⁶ Ipīpe ité niha Ēgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pīpe viña.

⁷ Evocoyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu viroya āgua. ⁸ Icuachiapri pīpe aipo ehi aracahe: “Tūpa nomboyecua uca iri mbahe secocuer pīpe. Cūrítei Ēgüe ehiño vite ité yuvireco. Omondo tēi sesarã; ipīpe rumo ndosepia ucai mbahe chupe. Omondo tēi avei yapisaguã; ipīpe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasa ivonde nungar iyavei pira mbohasa nungar tasecoi chupe.

Ipīpe sui toyuviroha mbahe tēi pīpe yuvireco, toyemombaraisu uca avei ipīpe yuvireco.

¹⁰ Toicua eme mbahe inungar ndasesapiso vahe yuvireco.

Icuhapri nungar ayase toyuvirecoi apirēhi vahe rã” ehi.

Ndahei vahe judío ñepisiro agüer

¹¹ Evocoyase areco iri che porandusa pēu: ¿Apirēhi vahe rã ité pīha judío eta ndoyeroyai Jesucristo rese oñepisiro āgua yuvireco? ¡Aní eté! Ahe rumo Ēgüe ehi ava ndahei vahe judío pīsīrosa pisi āgua yuvireco. Ipīpe sui oyemonguerēhi catura judío ipisi āgua yuvireco curi. ¹² Evocoyase judío eta rembiavi sui tuvichá Tūpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tūpa poroparaisuerecosa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu āgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipāhuve oyemonguerēhi vahe pīsīrosa Tūpa suindar pisi āgua oyeupe nara yuvireco. ¹⁵ Esepia, judío mombosa pīpe sui Tūpa omoime ñerosa opacatu ava co ivi pipendar upe. ¿Mara ehira pīha evocoyase Tūpa ipisise? Ahese oipisira tecovesa apirēhi vahe yuvireco, evocoyase ndoyuvireco iri chira omano vahe nungar Tūpa upe. ¹⁶ Esepia, yipindar panguã sui yapopri seropovēhesa Tūpa upe, opacatu panvi evocoyase sovasapri avei ichui. Iyavei inungar ivira rapo seropovēhesa Tūpa upe viña, sāca avei evocoyase opacatu Ēgüe ehi aveira viña.

¹⁷ Amove che mu judío inungar Olivo rãca yasiapri. Pe evocoyase ndahei vahe judío ivira caha pipendar rãca nungar peico vahe, peso yasiapri rendagüerve, ipīpe sui peipisi vīracuasa pe recove āgua. ¹⁸ Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pīpe. Esepia, ndahei pe sui judío oipisi oyemoviracua āgua yuvireco, pe rumo yipindar ichui eté peipisi pe yemoviracua āgua.

¹⁹ Iyavei, “Co judío rumo imombosa ité ivira rãca asiapri nungar yande sendagüerve yapita vahe rã” peye revo. ²⁰ Supi eté, co rumo Tūpa reroyaēhi pīpe ahe imombosa ichui yuvireco, pe rumo seroya pīpe suiño ité pepita sendagüerve. Sese peicua catu, aní chira peyemboivate ai ipīpe. ²¹ Esepia, Tūpa oiporavo co judío oyeupe nara ité viña, ndoviroyaise rumo, ndoipisii eté. Pēu avei Ēgüe ehira ndapemboyeroyaise. ²² Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pīpe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoyase viroyevi irira oyeupe nara. Esepia, chupe iya ité ipisi iri āgua. ²⁴ Pe ndahei vahe judío ivira caha pipendar rãca yasiapri nungar peico, Tūpa rumo pe mondo ivira

aviye vahe nungar rese. ¡Evocoyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tüpa remimbotar icuapirêhi oyemboivate aiêhi ãgua yuvireco” ahe pëu. Esepia, amove Tüpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pëu, ²⁶ ahese ramo opacatu ava judío yuvirecoi vahe Tüpa oipisiora. Esepia, icuachiapri aracahendar pipe aipo ehi:

“Oura ava Pïsirosar judío recua Sión pãhu sui, ahe oipehara mbahe naporai vahe opacatu judío sui.

²⁷ Evocoi niha che remimbotar chupe nara, amocañise yangaipagüer yuvireco ichui” ehi.

²⁸ Êgüe ehi cüritei judío eta ndosendu potai ñehesa pïsirosa resendar yuvireco. Sese Tüpa amotarêhisar yuvirecoi. Pëu mbahe tupri ãgua rumo êgüe ehi. Tüpa rumo osaisu vite. Esepia, yipive ité oiporavo tamoi eta oyeupe. ²⁹ Supi eté, Tüpa ndoviroyevi iri eté mbahe güemimondo iyavei ndovirova-rova tõi vahe opihañemoñetasa güembiporavo sui. ³⁰ Yipindar niha pe ndapemboyeroyai eté Tüpa. Cüritei rumo judío eta ndoviroyaise yuvireco, pe paraisuereco Tüpa. ³¹ Êgüe ehi avei judío eta cüritei ndoviroyai yuvireco. Tüpa pe paraisuereco uca ãgua rumo êgüe ehi yuvireco. Coiye inungar pe, judío avei osupitira Tüpa poroparaisuerecosa yuvireco. ³² Esepia, Tüpa ité, “Opacatú oyavi mbahe che reroyaêhisa pipe” ehi ‘oicuase mbahe güembiavi, tiquerêhi opacatú che poroparaisuerecosa pisi ãgua yuvireco’ oya.

³³ ¿Mara ehi rutei Tüpa aracuasa, imbahecuasa avei? Ndipoi chietera que ava yaracuasa mombehu tupri ãgua. Ndayaicatui avei secocuer cuapa tupri ãgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tõi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tüpa suiño ité niha opacatu mbahe oime, oyeupe nara avei mbahe oyapo opiratasa pipe. ¡Sese imboeteipri ité Tüpa tasecoi yepi! Êgüe tehi apirêhi.

12

Yande recocuer imondopri Tüpa upe nara

¹ Sese che rivireta, che Tüpa poroparaisuerecosa pipe aipota pe yemondo ité pe recoveseve chupe nara, inungar mbahe Tüpa upe seropovêhepri ité, ahe aviye itera chupe. Ahe niha pe cuaita pe piha pipe sui eté peyapo vahrã chupe. ² Peico iri eme co ivi pipendar pihañemoñetasa tõi rupi. Iyacatu rumo pesecuñaro pe pihañemoñetasa. Ipape sui opacatu pe recocuer oñecuñarora. Êgüe peyese, peicuara Tüpa remimbotar ahe mbahe aviye vahe, semimbotar supi tupri vahe ité.

³ Tüpa niha oporovasasa pipe che cuai, sese aipo ahe pëu: pepihañemoñeta eme pe yemboivate ai ãgua rese. Iyacatu rumo peicua tupri pe pihañemoñetasa peyesendar Tüpa pëu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Êgüe yahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoyase yande ñepepei opacatu upendar yaico.

⁶ Tüpa niha omboyeavirati mbahecuasa imbou oporoaisusa pipe ñepepei upe. Evocoyase Tüpa ombouse oñehe mombehu ãgua yandeu, yamombehura ñepepei iñehe sese yande yeroyagüer rupi. ⁷ Que ombouse mbahecuasa ambuae ava pïtivii ãgua yandeu, yaipïtivii tupri aveira. Ombouse yande porombohe ãgua, yaporombohe tupriño itera. ⁸ Iyavei ombouse yandeu ambuae ava monguerêhi ãgua, yaporomonguerêhiño itera. Ombouse yande poropïtivii ãgua ava mbahe ndovirecoi vahe upe, yamondoño itera mbahe chupe yande recatêhiêhisave. Acoi oporocuai vahe, toyapoño oquerêhisa pipe; iparaisu vahe pïtivistar, toipïtivistar avei vorivetesasa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepei-pei oyeivri nungar tupri pe recosa pipe. Pe ae peyemboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhii chira iyavei peyapo yande Yar upe mbahe opacatu pe recoete pipe.

¹² Peicoño pe viharetesave mbahe iva péndar rārosa pipe; peñemosaño mbahe rasicuer peiporarase iyavei aní chira peseya pe yeruresa yepi.

¹³ Peipitívii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepei-pei oyese pe yeaisusa pipe. Aní chira peyeecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe. ¹⁹ Che rivireta, aní pe ae pemboeyevi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, ēgüe peyese pe amotarēhimbar upe, ochīra pe sui” ehi. ²¹ Aní mbahe tēi upe peyecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecurar yuvirecoi vahe pemboyeroyara. Esepia, ndipoi mborerecurar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecurar upe que mara ehi vahe, Tūpa porocuaita reroyaēhisar yuvirecoi. Ēgüe ehi vahe inupambri yuvirecoira. ³ Esepia, mborerecurar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye āgua. Ndayasiquiye potaise mborerecurar sui, iya yaicora mbahe tupri pipe. Mborerecurar evocoyase, “Aviye” ehira yande reco catuprisa rese yandeu. ⁴ Esepia, ahe Tūpa rembiguai mbahe tupri apo āgua yandeu. Acoi mbahe tēi yayapose rumo, yasiquiyera ichui. Esepia, ahese mborerecurar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa āgua yuvireco. ⁵ Sese iya yamboyeroya ité mborerecurar; ndahei rumo ahe yande nupaēhi āgua reseño, yande pihañemoñetasa momaraēhi āgua rese avei. ⁶ Sese avei yamondora guarepochi mborerecurar upe yuvireco yandeu oporanduse. Esepia, ahe mborerecurar Tūpa rembiguai yuvirecoi. Evocoyase aheño ité iporaviquisa yuvireco.

⁷ Yamondo ñepei-pei ava upe mbahe chupendar. Iya ité yamondo mborerecurar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu āgua, supi eté acoi ava osaisu vahe ambuae ava, omboaviye ité Tūpa porocuaita. ⁹ Aipo ehi acoi Tūpa porocuaita: “Ndapeyemboaguasai chira, ndapeporoyuca chira, ndapemondai chira, ndaperemirai chira, ndapeipota rai chiaveira ambuae ava mbahe” ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuaita.

¹¹ Iyavei peicua tupri co mbahe oime vahe yandeu. Cūritei ari osupiti ité yandeu yande yemopoase āgua. Esepia, yande Yar yevi āgua cōimi catu yandeu iñhengagüer

yipindar seroyasa sui. ¹² Supi eté osupiti senimi ari yandeu; sese iyacatu yapoi p̃t̃umimbi vahe nungar mbahe-mbahe t̃ei aposa sui mbahe icatupri vahe pipe yande reco ãgua. Evocoyase tayaico sundao oyoepisa omonde vahe nungar. ¹³ Yande catu yaguata yande reco ñvi tuprisa pipe, inungar yaguatase ari pipe. Aní catu yaico caguar pipe t̃ei iyavei pieta siapu t̃ei vahe rupi, ndayande poropota rai chiaveira, iyavei ndayayapoi chira mbahe t̃ei, ndayaicoi chiaveira yande p̃iñañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande p̃iñañemoñeta mbahe-mbahe t̃ei apo ãgua yande remimbotarai pipe.

14

Aní peroñiro ambuae Jesús reroyasar

¹ Acoi ava ndoyeroya tupri vitei vahe yande Yar rese que oiquese pe piri, peipisi tuprira; aní peñehopoepira ip̃iñañemoñetasa ndahoyoyaise pe p̃iñañemoñeta rese.

² Esepia, amove evocoi nungar ava ihupri p̃ave t̃ei yuvirohu, oime rumo amove ava ip̃iñañemoñeta opacatu mbahe hu ãgua rese. ³ Acoi ava opacatu mbahe ohu vahe, toviroñiro eme amove ndohui vahe mbahe iyavei acoi amove ndohui vahe mbahe, toviroñiro eme acoi ohu vahe opacatu mbahe. Esepia, evocoi nungar ava T̃upa oipisi ité.

⁴ Supi eté pe ndiyai eté peroñiro vahrã ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe t̃ei pipe, sereciar ité oicuaru chupe. Esepia, yande Yar op̃iratasa pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasuño ité niha ari” ehi vahe. Ñepeí-peí op̃iñañemoñeta rupi, “Co supi tupri vahe” ehira op̃iña pipe yuvireco. ⁶ Acoi que ñepeí ari ava omboetei vahe, yande Yar mboeteisa pipe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Aviye ndeu” ehi T̃upa upe; iyavei acoi amove ndohui vahe mbahe, Yar mboeteisave ãgüe ehi, iyavei, “Aviye ndeu” ehi avei T̃upa upe.

⁷ Esepia, yande ñepeí-peí ndayaicoi yandeyeupe nara t̃ei, ndayamanoi avei yandeyeupe nara. ⁸ Esepia, yaicove vitei, yaico yande Yar upe nara; yamanose, yamano yande Yar upe nara avei. ãgüe yahe yande yaicove vitei, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco ãgua que omano vahe, anise que oicove vite vahe upe avei.

¹⁰ ¿Mahera evocoyase peroñiro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora T̃upa rovai. Ahe evocoyase opara oporandu yande recocuer rese yandeu. ¹¹ Esepia, icuachiapri arachendar pipe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoyase yande ñepeí-peí yamombehu yande recocuer T̃upa upe.

Aní pe rivireta mbahe t̃ei pipe pereco uca

¹³ Sese yande ndiyai yañeroiro. Iyacatu rumo ñepeí reseve pereco tupri ambuae pe rivri, angaipa pipe sereco ucañi ãgua, iyeroyasa momarañi ãgua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe t̃ei co tembihu, ndiyai yahu” ehise, ahe chupe evocoyase mbahe t̃ei, ndiyai eté ihu ãgua. ¹⁵ Iyavei yande que mbahe yahuse, ipipe yamomara t̃eise yande rivri p̃iñañemoñetasa T̃upa rese, ndahei evocoyase yande poroaisusa pipe ité ãgüe yahe. ¡Aní ahe yamocañi t̃ei uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviyera yandeu viña, ndayayapoi chira rumo evocoi nungar yande rembiapo rese ava ñehe-ñehe t̃eiñi ãgua. ¹⁷ Esepia, ndahei ivate catu vahe T̃upa upe yande carusa, yande igua avei ipovrive yande recose. ãgüe ehi

rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetesā yareco vahe Espiritu Santo sui. ¹⁸ Ēgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri vaheerā yandeyeupe. Ipípe sui yande yaicatura yañepitívii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipĩsiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pīhañemoñetasa momara āgua. ²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriēhi āgua. ²² Yande pīhañemoñetasa yareco vahe rumo yarecoño itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opīhañemoñetasa pipe! ²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipípe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vītese que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipīhañemoñeta tupri vītei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opīhañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaheerā Tūpa reco porañetesa yande ñemosasa pipe iyavei yande pīhamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pīhamonguerēhisa avei yandeu, tape pītívii oyoya guasu pe reco tupri āgua ñepeipei peyese Jesucristo recocuer rupi. ⁶ Ipípe sui pe opacatu oyoya guasu ñepeipei pīhanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pĩsirosa resendar imombehusa ava eta ndahei vahe judío upe

⁷ Peyepisi tupri ñepeipei, inungar Cristo pe pisi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pītívii Tūpa remimombehugüer mboaviye āgua judío ramoi arachendar upe. Ēgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ēgüe ehi icuachiapri rupi tupri ité aipo ehi vahe: “Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pīpendar ava, ¡pemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipípe sui tombou yasāro vaheerā ahe mbahe aviye vahe Espiritu Santo pīratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepe-pe peyeupe pe yemboaracua água. ¹⁵ Co tecocuer rese rumo aicuachía opacatu che siquiyeñhisa pipe pëu pe resaraiëhi água ichui. Esepia, ayapo Tüpa che cuaita ombou vahe che raisusa pipe cheu ¹⁶ Jesucristo rese che poraviqui água ava ndahei vahe judío recocuer aviye água. Evocoyase judío pahi nungar che cuaisa pipe amombehu co ñehesa Tüpa ombou vahe pñsirosa resendar yuvireco chupe imoporëhi água Tüpa rovai inungar mbahe seropovëhepri aviye vahe Tüpa upe Espiritu Santo pipe yepi.

¹⁷ Supi eté che Jesucristo reroyasar che recosa pipe aviharete Tüpa che cuaita rese. ¹⁸ Esepia, cheu ndiyai añehe vaheñã que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheñã. Esepia, amonguerëhi Tüpa reroya água yuvireco che ñehe rese, che rembiapo sui avei. ¹⁹ Ëgüe ahe poromondiisa mbahe yavai vahe apo Tüpa pñratasa pipe. Ahe ayapo Espiritu Tüpa suindar pñratasa pipe. Ipipe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerëhi avei co ñehesa pñsirosa resendar mombehu água ava Cristo recocuer ndosendui vahe upe yepi. Ndahei rumo ambuae ava imboaracua pare tõi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipiñañemoñeta Roma ve oso água

²² Co rese tõi che ndaicutui aso pe piri, yepe setá rupi aso pota tõi viña. ²³ Cñritei rumo opa amboaviye che poraviqui co ivi rupi, iyavei opa tõi setá araviter pe piri che sosa rãgüer. ²⁴ España ve che soseve, apita pucumira vicho pe piri yande yemboviha água. Iyavei pe sui che sã potase, che pñtivimira peye aheve che so água. ²⁵ Cñritei rumo che asora Jerusalén ve. Arasora porerecosa ahe pendar yande mboetasas Jesús reroyasar pñtivii água. ²⁶ Esepia, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pñtivii água yuvireco. ²⁷ Ahe ëgüe ehi güemimbotar rupi yuvireco iyavei iya ité imboyevi água yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tüpa suindar ahe ava ndahei vahe judío yuvirecoi vahe upe. Sese iya ité imboyevi água co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaisusa Espiritu ombou vahe pipe avei aporandu pëu opacatu che rese peyeroqui pñrata vaheñã Tüpa upe che pñtivii água co mboraviqui rese. ³¹ Peporandu Tüpa upe, tache repi ava Jesús reroyasarëhi sui ivi Judea ve, iyavei Jerusalén pendar yande rivireta co porerecosa pisi tupri água avei. ³² Ahese Tüpa oipotase, che aviharetera ayepotase pe repia, iyavei toime pñtuhusa yandeu che pe piri che sose. ³³ Ëgüe tehi Tüpa güeco tupriisa pipe tasecoi opacatu pe rese.

16

Pablo mahenduhasa ñepe-pe avei upe

¹ Co yande reindri Febe serer vahe, ahe oipñtivii tecua Cencrea pendar Cristo reroyasar oico. ² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipñtiviiño que mbahe chupe ipane vahe rese. Esepia, ahe setá ité oporopñtivii iyavei che avei eté che pñtivii no.

³ Pemombehu che mahenduha Prisca upe, Aquila upe avei, ahe niha che pñtivii mboraviqui Jesucristo recocuer resendar rese yuvireco. ⁴ Ahe avei niha mbahe tõi pipe omondo güecocuer che repicave yuvireco, sese, “Aviye” ahe chupe, iyavei ndahei che

güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sêtave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviquí iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroa yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande ndugüer oporaviquí vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoãhasa sui osê tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rêta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rêta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporaviquí vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviquí ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohava omondo avei omahenduhasa yuvireco pëu.

¹⁷ Che rivireta, peicua catu pe pãhu pendar omboyaho pota serai vahe sui. Oime ava êgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepepiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Êgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherã pe mbahecua mbahe aviye vahe apo ãgua, ndahei mbahe tēi apo ãgua. ²⁰ Evocoiyase Tūpa güeco tuprisa pipe pihavi Carugar osecopipa tupri itera. Pe avei evocoiyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pëu. Ahe che p̃tivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

²³ Omondo avei omahenduhasa Gayo pëu. Ahe sêtave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivi apoēhi suive mbahe ndicuasai vahe rese. ²⁶ Cūrítei rumo oyecua uca oñehe mombehusar rembicuachía pipe Tūpa apirēhi vahe porocuita rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

²⁷ ¡Tũpa güeraño imbahecuá vahe yepi, ãgüe tehi ahe yande Yar Jesucristo rer pĩpe imboeteiprĩ tasecoi!

YIPINDAR PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tüpa niha, güemimbotar rupi, che poravo apóstol che reco água. ² Aicuachía co che ñehe pëu, pe Jesús reroyasar peñemonuha vahe Tüpa upe tecua Corinto ve. Peicua niha pe ipehapri peico Tüpa upe nara ité Jesucristo rese peicose. Peicua avei niha Tüpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tüpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tüpa upe pe recocuer rese yepi. Esepia, Tüpa pe rovasa ité Jesucristo rese peicose. ⁵ Ēgüe ehi secocuer pipe sui Tüpa ombou opacatu pe reco tupri catu água, pemombehu tupri vaheñã imbahecuasa, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tüpa Espiritu suindar ipane vahe pëu yande Yar Jesucristo yevi água pesãrose. ⁸ Tüpa niha pe moviracuaño itera pe rereco arí cañisa pipe Jesucristo yevise voi curi ‘tipo eme que mbahe tã secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pëu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pëu: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tã; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tã aipo peico. ¹³ ¡Cristo rumo vireco porombohesa ndoyaho-yaho tã vahe! ¿Che tie amano curusu rese pe angaipa repirã? anise, ¿che rer pipe tie peñeapiramo uca peico? ¹⁴ ¡Aviye Tüpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfnas rëta pendar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroãpiramo água. Ēgüe ehi rumo che cuaita ñehesa ñepisirosa resendar mombehu água tã. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa pĩratagüer Jesucristo curusu rese imano agüer resendar ava sui.

Cristo Tüpa pĩratasa, imbahecuasa avei

¹⁸ Esepia, acoi ava ocañi tã vaheñã upe co ñehesa curusu rese Cristo manosa resendar aviye Ēgüe ehi tã vahe viña. Yande ipisiroproi yaico vaheñã upe rumo co ñehesa vireco ité Tüpa pĩratasa, ¹⁹ inungar Isaías rembicuachiagüer pipe aipo ehi: “Amocañira co ivi pipendar ava tã mbahecuasa iyavei arocuara ava yaracua vai tã vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecua vai vahe, ava-ava tã aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¿Tüpa niha osecuñaro evocoi nungar mbahecuasa Ēgüe ehi tã vahe pipe! ²¹ Ēgüe ehi eté oaracuasa pipe ‘toicua eme che recocuer ava oaracuasa pipe tã’ oya. Yepe, “Co ñehesa

Cristo resendar ěgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipiratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye acoi ěgüe ehi tēi vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa pīratasa ité, imbahecuasa avei. ²⁵ Esepia niha, ava upe, Tūpa suindar mbahe aviye acoi ěgüe ehi tēi vahe viña. Co Tūpa suindar rumo mbahecuasa aviye catu vahe ité ava tēi mbahecuasa sui iyavei acoi mbahe Tūpa suindar aviye nipiratai vahe ava upe viña, ahe rumo ipirata catu ité opacatu ava tēi pīratasa sui. ²⁶ Che rivireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecuasa vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecuasa vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipirata vahe Tūpa cuaparēhi mochi āgua. ²⁸ Oiporavo avei co ivi pipe ava remieroīro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi āgua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsiproi toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehēi co ivi pipendar tēi ava mbahecuasa pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepiñañemoñetai eté que ambuae mbahe rese; Jesucristo recocuer rese, yatica agüer rese catu ité che piñañemoñeta vichico. ³ Iyavei ndachepiratai, aririi avei che siquiyepave pēu che sose. ⁴ Iyavei acoi añehese ñehesa pīsirosa resendar rese pēu, ndaiporui eté rumo ñehesa ivate ai vahe pe piñañemoñetasa rerova āgua. Che rumo Tūpa Espiritu pīratasa pipe añehē pēu ⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuasa rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vahe. ⁷ Oroñehē catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vahe. ⁸ Co ivi pipendar ava mborerecuareta rumo ndosenducuai eté co ñehesa. Osenducua rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopiñañemoñetaimi eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ Ēgüe ehi eté, inungar opacatu ava pãhuve ndipoi eté que ñepei ava pïhañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espíritu güeraño ité oicua Tūpa pïhañemoñetasa. ¹² Yande evocoyase ndahei co ivi pïpendar tēi espíritu yaipisi, ēgüe ehi rumo Espíritu Tūpa suindar yaipisi yaicua vaheṛā iporerecosa oporoaisusa pipe ombou vahe yandeu. ¹³ Ahe niha oromombehu Tūpa Espíritu ore mbohe vahe, ndahei ñehesa ava tēi aracuasa sui. Ēgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opïha pipe, ndoipisii eté mbahe Tūpa Espíritu suindar yuvireco. Esepia, chupe evocoi mbahe aviye ēgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espíritu pipeño ité. ¹⁵ Acoi ava vireco vahe rumo Tūpa Espíritu opïha pipe oicatu opacatu mbahe cua āgua. Ndipoi chira rumo ambuae ava ndovirecoi vahe Espíritu opïha pipe ahe ava recocuer cua tupri āgua. ¹⁶ Esepia, icuachiapri aracahendar pipe aipo ehi: “¿Ava vo oicua tēira yande Yar pïhañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pïhañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espíritu reroyasa pipe; pe rumo peguataño vite ava tēi pïhañemoñetasa rupi peico. Sese namombehu catui ñehesa yavai vahe Espíritu suindar pēu. Esepia, pe pïtanimi nungar vite tēi pe pïhañemoñetasa Cristo rese. ² Sese che opombohe mbahe ndayavaimi vahe rese. Esepia, pïtanimi ndoicatu vitei ocaru. Sese ocambu viteño tēi. Cūrítei rumo ēgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pïpendar pïhañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pïhañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pãhuve inungar ava Tūpa ndoicuai vahe pïhañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepei-peï mboraviqui yandeu chupe yayapo vaheṛā. Tūpa upe ore poraviquisa pipe sui niha peroya yande Yar peico: ⁶ che rane inungar añoti vahe mbahe rāhii pe pïha pipe; Apolos evocoyase inungar imboihusar; Tūpa rumo inungar omboori vahe pēu. ⁷ Evocoyase ndiyai peyeroya mbahe t̄sar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pēu nara. Sese ñepei-peï Tūpa omboura porerecosa pe rese ore poraviquigüer rupi oreu. ⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi v̄racua āgua, ēgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe iv̄racuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que iv̄rape tēi, capïhi, anise tacuar tēi oigüā yuvireco. Ēgüe ehi aveira pe mbohesar yuvireco. Ahe ñepei-peï rumo iya oicua tuprira pe mbohe āgua yuvireco. ¹³ Ahe iporaviqui agüer rumo ari cañise icuasa tuprira ñepei-peï yuvireco. Esepia, ahe ari pipe yande Yar oura tata reseve ñepei-peï pe mbohesar poraviqui agüer cua āgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande piha pipe. ¹⁷ Oimese que ava yande pãhuve omomara vahe Tūpa rēta, Tūpa evocoyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua ãgua. ¹⁹ Esepia, ava tēi aracua Tūpa upe ãgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ãgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pëundar ité. ²² ãgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vahe, ahe niha opacatu pëu nara, ²³ pe niha Cristo upendar, Cristo evocoyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe ãgua” peyera oreu viña. ² Acoi vireco vahe ocuaitarã, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu ãgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe pëu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi ãgua. Ahe niha omboyecua opacatu mbahe ndoyecuai vahe, iyavei omboyecuapara ñepei-pei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-pei yandeu.

⁶ Che rivireta, che añe cheyese ae, Apolos rese avei pëu mbahe tupri ãgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi ãgua’ ore yapave pëu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¿Sese ndiyai peyecomboivate etepri co mbahe pereco vahe rese! ¿Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pëu. Peyeupe revo ndoyavii mborerecuar guasu peico ore sui viña. ¡ãgüe peye itera tarahu viña! Ahese, ore avei mborerecuar oroicora pe pãhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi ãgua. Sese seroñrombri oroico inungar ava imboguai pri yucapirã. ãgüe orohe oroico opacatu ava rovaque, Tūpa rembiguai eta iba pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco pĩratai vahe oroico ava rembiepiave; aheseve avei rumo peyecomomirata tēi peico. Ore seroñrombri tēi oroico, pe evocoyase ava pe mboetei guasu pe rereco yuvireco. ¹¹ Cũritei ore oroicove vite ité ore rieporehi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité. ¹² Ore oroporaviquiño ité, oroyembogüerai tēi ipipe. Ava rumo iñehe mara-mara tēi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara ãgua yuvireco; ore rumo

oroñemosañó ité yuvireco chupe. ¹³ Ñehe-ñehe tēi ore rese yuvireco; ore rumo saísusa pipe oromboyevi ñehe yuvireco chupe. Ore rereco ití nungar tēi iyavei ore rereco inungar ava ēgüe ehi tēi vahe yuvireco. Cūrítei ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, ēgüe ehi rumo pe mboaracua āgua tēi. Inungar che rahír ité, che rembiaisu opovireco. ¹⁵ Esepia, yepe pereco atí pe p̄tíviisar Cristo rese pe reco āgua viña, ndaperecoi rumo setá pe yesupa. Esepia, che amombehuse niha ñehesa p̄sírosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahír nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe p̄ahuve oyeecomboivate ai vahe. “Ndou iri chietera revo cohava yande repia” ehi yuvireco cheu viña; ¹⁹ aso p̄ihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco p̄iratasa yuvireco. Ndahei chira ñehe güeraño tēi aicuara. ²⁰ Esepia, Tūpa omborerecuasave, ndahei oñehe pipe tēi oporocuai, op̄iratasa pipe rumo ēgüe ehi. ²¹ ¿Mbahe p̄iha peipota peico? ¿Peipota p̄iha che aso vaheṛā pēu che ñehe p̄irata pe mboaracua āgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepei Jesús reroyasar p̄ahu pendar oyemboaguasa vahe rese

¹ Ambuae mbahe, oroyandu ñepei mbahe tēi pe p̄ahu pendar rembiapo oroico: oime aipo osí recoyar rese secoi vahe. Ahe angaipa guasu oyapo oico. Tūpa reroyasarēhi ité ndoyapoi evocoi nungar mbahe tēi yuvireco. ² ¡Pe rumo peyeecomboivate ai peico! ¡Iyacatu rumo ndapeyemboivhai chira evocoi nungar mbahe tēi repiase viña! Evocoi nungar ava iyacatu ité pemboyepira pe p̄ahu sui. ³ Yepe niha che teieté ndaicoi pe p̄ahuve viña, pe rese che mahenduhasa pipe rumo aicove ité pe p̄ahuve iyavei aicua voi eté aipo oyapo vahe mbahe tēi recocuer inungar-ra aico vahe ité pe p̄ahuve viña. ⁴ Acoi peñemonuhase, che avei niha aicora pe p̄ahuve che mahenduhasa pipe, yande Yar Jesucristo p̄iratasa avei secoira pe rese. ⁵ Evocoyase ahe ava timondosa Carugar povrive secocueraí mocañi āgua. Ip̄ipe sui iesp̄iritu oñepis̄irora yande Yar Jesucristo yevis̄e curi.

⁶ Ndapeyeecomboivate ai chira peico co mbahe tēi oimese pe p̄ahuve. Esepia, peicua niha co ñehesa aipo ehi vahe: “Yepe chíhimi imondosa pan mboapeposa panguā rese viña, ahe rumo oiquepa tupri panguā rese” ehi. ⁷ Evocoi ava rembiapo ai inungar pan mboapeposa pe p̄ahuve. Sese pemombopa pe p̄ahu sui peicoēhi āgua angaipa pipe peico vaheṛā inungar panguā ipiasu vahe ndovirecoi vahe omboapeposa oyese. ēgüe peye ité niha. Esepia, yande Yar Jesucristo iparaisu omano yande repirā. ēgüe ehi ahe inungar ovesa yucapri angaipa mocañi āgua judío pieta Pascua pipe yepi. ⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco āgua, ēgüe yahe aveira yaico yande reco p̄iasu supi eté vahe pipe; yamombopara yande recocueraí yandeyesui, ahe ava reco momaramara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapemborii chira ava oyemboaguasa-guasa tēi vahe, acoi ava oipotai rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua vitei vahe upendar. Esepia niha, pe yepipi āgua ñepei reseve evocoi nungar ava sui, pesē itera co ivi pipe sui viña. ¹¹ Che niha aipo ahe icuachía pēu: ndapemborii chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipotai raise que ambuae ava mbahe, oyerogui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda

rai vahe. Evocoi nungar ava piri ñepei yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu āgua. Tūpa ahe ava yuvirecoi vahe recocuer opara oicua coiyé. Pe rumo pe cuaita ité Tūpa rese yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoyase, ¿ndapeicatu pīha co tecocuer mbahemi tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoyase, ¡peporandu catu itera co ivi pīpendar tecocuer rese peyeupe yepi! ⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! ⁵ Che aipo ahe ité pēu pe chí āgua: ¿Ndipoimi eté vo pe pāhuve que ñepei yaracua vahe oicatu vahe que mbahe tēi peyependar moingatu āgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoyia pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pipe curi! Peyembopa ucai rene chupe. Esepia, acoi ava oyemboaguasaguasa tēi vahe, mbahe rahanga upe tēi oyeroqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapiñaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yīpīndar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipēhapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipēhapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vahe” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. ¹³ Supi eté niha aipo ehi vahe: “Yande rembihu yande aviter upe nara, yande aviter evocoyase yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vahe, ahe rumo yande Yar upe nara. Yande Yar evocoyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiyé.

¹⁵ Peicua niha yande rete Jesucristo upendar ité. Ndiyai eté evocoyase Jesucristo upendar yande rete mondo āgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoyase ñepei vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepei vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoyase ñepeiño ité.

¹⁸ Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande reteducer rese nara ité. Acoi ava rumo oyapo tēi vahe mbahe cuña rese, güetecuer ae evocoyase omomara catu güembiapo pipe sui tēi. ¹⁹ ¿Ndapeicuai vo pe reteducer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe reteducer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe reteducer pipe Tūpa mboetei āgua.

7

Poromboaracuasa mendasa resendar

¹ Cūrítei amboevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rembireco, cuña avei evocoyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

⁸ Iyavei ndomenda vitei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosa āgua, pemendaño. Esepia, aviye catu itera pemenda poropota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judíoño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. ¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe

renoiêhi viteseve. ²¹ Pe mbiguai tēi peico vahe pe renoise Tūpa, pepihañemoñeta etepri eme evocoiya pe recosa sui pesē vaheṛā rese. Peicatusē rumo, peyepēpiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe êgüe peye viña, peroyase rumo Cristo, ahese sembiguai peico. ²³ Tūpa upe rumo pēpēpī iteanga, sese ndiyai eté ambuae ava povrive tēi peico. ²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe āgua. Che rumo amondora che pīhañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe êgüe ehiño tēise yuvireco viña. Esepia niha, tecocuer yavaí eteanga cūrītei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaheṛā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opīhañemoñetasa pipe. ³⁰ Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetesa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opīhañemoñetasa pipe. ³¹ Acoi ava ipīhañemoñeta catu vahe co ivi pipendar mbahe poru āgua, tipīhañemoñeta eme evocoi nungar mbahe tēi rese yuvireco. Esepia, co ivi pipendar mbahe yasepia vahe, ocañi tēira.

³² Che ndaipotai co ivi pipendar recocuer rese tēi pe pīhañemoñeta etepri peico. Acoi mbia ndomendai vahe rumo, ipīhañemoñeta catuño ité yande Yar rese imbovīha āgua; ³³ omenda vahe rumo ipīhañemoñeta avei co ivi pipendar recocuer rese tēi, güembireco mbovīha āgua rese avei. ³⁴ Evocoiyase ndahei ñepe opīhañemoñetasa vireco. Êgüe ehi avei cuña opīhañemoñeta rereco; cuña ndomendai vahe, ipīhañemoñeta yande Yar upendar mbahe rese, güetecuer iyavei oespīritu rereco tupri āgua Tūpa upe. Cuña omenda vahe rumo ipīhañemoñeta co ivi pipendar recocuer rese tēi omer mbovīha āgua oico.

³⁵ Che aipo ahe pēu ‘mbahe tupri pipe toyuvirecoi’ viya, ndahei mbahe yavai vahe pipe pe reco āgua. Che aipota ité pe reco catuprisa pipe yande Yar upeño ité mbahe peyapo vaheṛā pe recoeté pipe peico.

³⁶ Acoi ava ipīhañemoñeta vahe güembirecovi rese omenda āgua, “Aviyeteramo ayavira mbahe ichui iyavei niha osupiti ité imenda āgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda āgua iyavei oicatu ité güemimbotar apo, ipīhañemoñetase ñepe reseve güembirecovi rese omendaēhi āgua, ahe aviyeño ité. ³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepēpi āgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri āgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pīhañemoñetasa, iyavei revo ahe che pīhañemoñetasa Tūpa Espīritu suindar.

8

Pablo oñehe tembihu mbahe rahanga upe tēi seropovēhepri rese

¹ Cūrītei ambuae mbahe amombehura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai

tēi! Yayeaisuse rumo, ahese yañepitivii catu Cristo reroya tupri āgua. ² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri āgua yandeu. ³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoyase co mbahe rahanga upe tēi seropovēhepri mbahe mīm̄ba yucapri hu āgua rese añehe. Yande niha yaicua co mbahe rahanga ēgüe ehi tēi vahe co ivi pipe, iyavei oime ñepei güeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeiño ité Tūpa oime, ahe niha yandé Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepei vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhano vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tūpa rahanga upe seropovēhepri” ehi viteño yuvireco oyeupe. Ipípe sui omomara uca Tūpa rese opihañemoñetasa yuvireco. ⁸ Supi eté tembihu ndayande p̄tivii Tūpa rese yaico vahe. Ndahei mbahe roho husa pipe sui tēi aviye catura yaico iyavei ndayahuse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca āgua chupe. ¹¹ Evocoyase co pe mbahecuasa pipe pemocañi uca yande rivri Tūpa rese noviracua tupri vitei vahe peico. ¡Cristo rumo omano ip̄siro āgua! ¹² Esepia, pemomarase Tūpa rese ipihañemoñetasa, ahese pe ae peyemboangaipa uca Cristo amotarēhisa pipe peico. ¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaēhi āgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe p̄si āgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipípe sui avei icuasa tupri apóstol che recosa pēu.

³ Ahe ñehesa amboyevi tupri ava che recoāha potasar upe yuvireco yepi. ⁴ Iya ité che remihura p̄si, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ēgüe ehi yuvireco, ēgüe ehi avei Pedro, ēgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove āgua? ⁷ Esepia, sundao nomboepii sundao güeco āgua, ahe rumo oporaviquisa repri oipisiño. Iyavei ava uva t̄sar, ahe avei yaviyese, ohu güemitigüer. Iyavei ovesa r̄rosar, ahe avei omohe ovesa cambi igua. ⁸ Che ndahei cheyesui tēi aipo ahe pēu. Esepia niha, Moisés porocuita pipe avei aipo ehi yandeu: ⁹ “Pemondo eme t̄vi yuru rese mbahe icaruēhisa mbahe r̄h̄ii oicambese yuvireco pēu” ehi. Supi eté co Tūpa aipo ehi vahe ndahei t̄vi upeño. ¹⁰ Yande reco tupri āgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe r̄h̄ii, oyoya osāro mbahe oipisi vahe r̄h̄ii oporaviquisa sui oyeupe nara yuvireco yepi. ¹¹ Evocoyase ore avei oroñoti Tūpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe p̄si āgua oyeupe nara yuvireco pe sui. Evocoyase ore avei niha oroicatu mbahe p̄si āgua pe sui ore poraviquisa pipe viña.

Ore rumo ěgüe ndorohei eté. Esepia, ore oroñemosañó ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tūpa upe seropovēhepri tūparo rocarve yuvireco yepi. ¹⁴ ěgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoi nungar mbahe rese ayembovihaño ité. ¡Yepe che yucapri tēira tieporēhi viña, ndaporandui chietera rumo mbahe rese pēu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa p̄sirosa resendar ava upe, ndiyai ayeecomboivate ai ipipe. Esepia niha, che cuaita ité yapo āgua iyavei, ¡cheparaisu itera ndamombehuse ava upe co ñehesa viña! ¹⁷ Tūpa ndache cuaise oñehe mombehu āgua viña, che rumo che querēhisa pipe amombehuse, ahese aipisira Tūpa suindar porerecosa. ěgüe ndahei rumo. Esepia, Tūpa che cuaisa pipe niha amombehu. ¹⁸ Ndaporanduse mbahe rese pēu amombehuse co ñehesa p̄sirosa resendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu āgua viña, che rumo ěgüe ndahei eté.

¹⁹ Yepe che ndahei ava povrive tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerēhi vahe Cristo reroya āgua’ che yapave. ²⁰ Esepia, aicose judío p̄huvé, secocuer rupi aicoveño Yar upe imonguerēhi catu āgua yuvireco. ěgüe ahe ité, aicose ava Moisés porocuita povrive yuvirecoi vahe p̄huvé, che avei eté mborocuitavrive nungar aico. Ndahei rumo Moisés porocuita povrive ité aico imboaviye āgua. ²¹ Iyavei ava ndoyuvirecoi vahe Moisés porocuita povrive, ip̄huvé aicose, inungar ahe yuvirecoi, ěgüe ahe tupri avei imonguerēhi āgua yande Yar upe vichico. Ndahei rumo Tūpa porocuita mboyeroaēhisa pipe aico. Esepia, Cristo porocuitavrive che recocuer. ²² Iyavei no, aicose ava yande Yar ndoviroya tupri vitei vahe p̄huvé, secocuer nungar tupri avei aico Yar upe imonguerēhi catu āgua. ěgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetá catu co ñehesa p̄sirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ěgüe peye avei pe recocuer pipe Tūpa porerecosa p̄isi āgua peico. ²⁵ Iyavei opacatu oyemoingatu vahe oguayi āgua oñearo tupri opacatu mbahe tēi sui oyemomaraēhi āgua yuvireco. Ahe ěgüe ehi porerecosa ndipocopi vahe p̄isi āgua tēi yuvireco. Yande rumo yayemomborarara porerecosa apirēhi vahe p̄isi āgua yaico. ²⁶ Evocoyase che avei, ndahei ava oyahuva-huva tēi vahe nungar aico Tūpa remimbotar apo āgua iyavei che ndaicoi ava iguayi tēi vahe nungar. ²⁷ Che rumo mbiguai nungar che retocuer areco, amboyeroya uca pihañemoñeta tuprisa upe. Esepia, ndaipotai ambuae ava mbohe pare imombopri tēi nungar guayisa sui che yereco āgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramo guatasa rupi mbahe p̄itu Tūpa imboguata agüer rese. Iyavei para guasu P̄ira vahe avei osasa opacatu yuvireco aracahe. ² ěgüe ehi eté opacatu oguatase mbahe p̄ituvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata āgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ěgüe ehi Tūpa opacatu yande ramo judío upe viña, setá iteanga rumo ava ip̄ahu pendar ndahei aviye vahe ip̄iha rupi yuvireco. Ipipe sui opa omano ivi iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe água ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pīpe: “Co ava ocaru vahe, yuviroihu avei yuvinoi. Ichui yuvirōpūha, oyembovīhaño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ēgüe ehi yuvireco. Ipipe sui tēi ñepe i ari pīpe ahe opa omano veintitrés mil tupri yuvireco aracahe. ⁹ Ndayasecoãha-ãha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pīpe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ēgüe ehi yuvireco. Ipipe sui Tūpa ombou güembiguai ava yucasar iva sui ahe ava yucapa água aracahe.

¹¹ Co opacatu yande ramo i upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he água yandeu. ¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pīpe. ¹³ Pe recoãhasa rumo oyoya tupri ité ambuae ava recoãhasa rese. Pe rumo peyeroyano itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voiñora pīratasa evocoi mbahe tēi sui pe sē água, chupe pe ñemosa água.

¹⁴ Sese che rivireta, che rembiaisu, peyepipi mbahe rahanga mboeteisa sui. ¹⁵ Ava niha peico pesenducua vahe rā mbahe, evocoyase peporandu co che remimombehugüer rese peyeupe icua tupri água. ¹⁶ Yaihuse uva ricuer sovasapri, “Aviye ndeu, che Yar” yande hesa pīpe, ahese oyoya guasu Cristo rese yaico suvi pīpe sui. Yahuse co pan imboyahoyahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepe i pan sui. Sese yande ñepe i vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuavēhe mbahe caruguar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoyase ndaipotai eté caruguar upe nara tēi ēgüe peye vahe rā peico. ²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pīha yande ae yande Yar ñemoiro água yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo água

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ëgüe ehi eté niha, ndahei rumo opacatu aviye, ndahei avei co opacatu mbahe yande pītivii catu Cristo rese yande reco água. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi água. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbocarú água, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pīhañemoñetasa momaraēhi água. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ëgüe peyera pēu imombehusar rereco meguaēhi água, ava pīhañemoñetasa momaraēhi água avei. ²⁹ Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che roñorora yuvireco ahuse viña?” ehira.

³¹ Iyacatu rumo pehuse que mbahe, peihuse avei, anise que mbahe peyapose, peyapo ru

opacatu Tūpa mboeteisa pipe. ³² Supi eté ndapemboyecuai chira pe recocuerei, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo água opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro água yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rivireta, che, “Aviye ité yuvirecoi” ahe pëu yepi che rese pemahenduha vitesse iyavei peguataño vitesse che opombohe vahe agüer rupi. ³ Che rumo aicua uca tupri pota pëu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ëgüe ehi avei Tūpa Guahir Cristo upe. ⁴ Acoi cuimbahe Cristo upe ñemonuhasave oãca ndiru ndosequiise oyerure água, anise Tūpa Ñehengagüer mombehu água, ahe ëgüe ehi güerecuar Cristo mboeteiëhisa pipe. ⁵ Iyavei acoi cuña ndoyopiise oãca oyerogui água, anise Tūpa Ñehengagüer mombehu água, ahe ëgüe ehi omer mboyeroaëhisa pipe. Ahe cuña evocoyase ndoyavii oñeapipa tupri vahe. ⁶ Acoi cuña ndoyopi potaise oãca, tayapecãraisa tupri. Ochise rumo oapecãrai água, evocoyase toyopiño oãca sereco. ⁷ Cuimbahe rumo ndoyopii chira oãca sereco. Esepia, ahe Tūpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tūpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tūpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oãcapisa omer mboyeroysa mboyecua água omahese Tūpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitívii oyoya yaico. Evocoyase cuimbahe ndoicatui cuña porëhi; cuña avei ndoicatui cuimbahe porëhi yuvireco. ¹² Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tūpa suindar yuvirecoi.

¹³ Evocoyase peyapisaca tupri co rese: ¿Iya pñha cuña noñeacapii vahe oyerure Tūpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi água. ¹⁶ Acoi ava iñehenehe tēi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ëgüe ehi avei yuvireco.

Yande Yar rese yemahenduha raisa

¹⁷ Co ambuae mbahe rese rumo ndaicutui eté, “Aviye tupri yuvirecoi” che he água pëu. Esepia, aipo pe ñemonuhasave, mbahe tēi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei água pe pñhañemoñetasa ndahoyoyai pipe peico. Amove ayanduse pe rerãcua, aroya ité. ¹⁹ ¡Iya ité revo pñhañemoñetasa ndahoyoyai vahe reime água pe pñhuve Jesús reroyasar supi tupri vahe cua tupri água! ²⁰ Peñemonuhase pe pñhañemoñetasa ndahoyoyai vahe pipe pe caru água, ndahei yande Yar rese pe yemahenduhaseve ëgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiëpoi tēi yuvireco; ambuae rumo pe pñhu pendar aipo oyembosavaipoño yuvireco. ²² Pereco niha pe rēta aheve pe caru água iyavei pe ihu água. Pe rumo pe reco pipe opa peroñro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pëu!

Yande Yar rese yemahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pëu: ahe pñtu pipe acoi Jesús mboguaisar opisi água renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco água. Ëgüe peyera che rese pe mahenduhasa pipe

peico” ehi. ²⁵ Ēgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pëu Tüpa oyapora mbahe ipiasu vahe pe recorã. Che ruvi pipe rumo yaposara. Evocoyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevi rãro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tēi vahe, yuviroihuño tēi vahe avei Yar mboeteiēhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihañemoñeta rane oyacatu güecocuer rese ava co pan hu ãgua renonde, oiñu ãgua renonde avei co uva ricuer yuvireco. ²⁹ Esepia, acoi pe yemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setã pemaheasi, oime setã nipirata iri vahe avei pe pãhuve, oime avei omano vahe pe pãhu pendar. ³¹ Yande pihañemoñeta tuprise rumo yande reco ãgua rese, yande Yar evocoyase nomoime chira mbahe tēi yandeu evocoyase yande recosa pipe. ³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri ãgua rumo ēgüe ehi yandeu, ndahei yande cañi ãgua opacatu ava viroyasarēhi reseve.

³³ Sese, che rivireta, acoi peñemonuhase pe yemomahenduha ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane güētave. Ahese yuvirasose ñemonuhase, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pëu.

12

Mbahecuasa Tüpa Espiritu suindar

¹ Che rivireta, che aicua uca pota pëu co mbahecuasa resendar ñepeipei pëu Espiritu omondo vahe.

² Pe niha cūrítei peicua tupri ité yipindar Tüpa rese peicoēhi vitese, peyembopa uca mbahe rahanga ēgüe ehi tēi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tüpa Espiritu pĩratasa pipe ēgüe ehi. Iyavei ava ndoicatu chira, “¡Jesús che Yar secoi!” ohe ãgua opĩha pipe Espiritu Santo ndovirecoise.

⁴ Oime setã ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeño ité imondosar secoi. ⁵ Setã mbahe avei oime mbahe yayapo vahe yande Yar upe. Ahe yande Yar rumo ñepeño ité secoi. ⁶ Iyavei setã oime ambuae mbahe Tüpa oyapo vahe yande rese opĩratasa pipe, Tüpa rumo ñepeño ité secoi. Ahe oyapo opacatu co mbahe ñepeipei yande rese. ⁷ Ahe omboyecua yande Espiritu rerecosa ñepeipei yandeu opacatu yande reco tupri ãgua. ⁸ Espiritu pĩratasa pipe Tüpa omondo ñepeipei viroyasar upe iñehe ãgua aracuasa rese iyavei ambuae upe omondo iporombohe tupri catu ãgua ombahecuasa pipe. ⁹ Ambuae upe evocoyase omondo oyese yeroya tupri catu ãgua oEspiritu pipe sui avei. Iyavei ambuae upe omondo opĩratasa imbaheasi vahe mbogüera ãgua. ¹⁰ Ambuae oipisi pĩratasa mbahe poromondiisa oyapo vahe yuvireco. Ahe ichui avei vireco ambuae ava omombehu vahe ñehesa Tüpa suindar yuvireco. Ambuae upe Tüpa omondo mbahecuasa espíritu naporai vahe iyavei Espiritu supi tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tüpa suindar pipe oñehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe. ¹¹ Ēgüe ehi Espiritu ñepeño ité güemimbotar rupi omondo ñepeipei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeño ité yande recocuer

¹² Inungar yande retecuer resendar setã mbahe oime viña, ahe rumo ñepeño ité; ēgüe ehi avei Cristo. ¹³ Ēgüe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico

ñepei vahe nungar yande reco água Espíritu ñepei vahe pìpe. Ahe ñepei Espíritu avei opa yaipisi.

¹⁴ Supi eté yande rete resendar ndahei ñepei mbahe, setá rumo mbahe. ¹⁵ Iyavei yepe que yande pì revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasendui chietera evocoyase mbahe viña. Anise, yande rete yapisacuar pāve tēise, ndayasētui chietera evocoyase mbahe viña. ¹⁸ Tūpa rumo ñepei-pei yande rese mbahe omondo senara rupi tupri güemimbotar rupi. ¹⁹ Yande opacatu ñepei ava rete resendar nungar pāve tēise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeiño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ěgüe ere tēi vahe eico!”; anise que yande āca avei, “¡Nde ěgüe ere tēi vahe eico!” ndehi chira yande pì upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopii vahe. ěgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu secoi. ²⁵ Tipo eme pihañemoñetasa ndoyoyai vahe pe pāhuve. Oyoya pehañeco tupri ñepei-pei peyese peico. ²⁶ Evocoyase que ñepei yande pāhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. ěgüe peye ité ñepei-pei chupendar ité peico. ²⁸ ěgüe ehi Tūpa iporavo viroyasar pāhuve, “Toime rane yipindar apóstol; ipare toime ava che ñehengagüer mombehu água, ichui ambuae upe iporombohe água, ipare ambuae mbahe ndayasepiiai vahe apo água, iyavei ambuae ava imbaheasi vahe mbogüera água, ambuae ava pītiviisar tasecoi, ambuae ava recocuer reroquata tupri água tasecoi, ambuae ava evocoyase toñehe ñehesa ndicuasai vahe pìpe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiiai vahe yuvireco, ³⁰ ndahei opacatu vireco pīratasa oporombogüera água yuvireco, iyavei ndahei opacatu ndicuasai vahe ñehesa Espíritu suindar pìpe oñehe yuvireco, ndaopacatui avei oicua evocoi ñehesa renducua uca água ambuae ava upe yuvireco. ³¹ Peseca ru Espíritu suindar mbahecuasa aviye catu vahe peyeupe nara.

Yembohesa yande poroaisu água resendar

Che rumo amombehura tecocuer aviye catu vahe pēu.

13

¹ Yepe yande yañeheño tēise ambuae ava ñehe ndayaicuai vahe pìpe, iyavei Tūpa rembiguai ñehe pìpe avei viña, ndayasaisuise rumo ava ipipe, yande evocoyase ěgüe yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ěgüe yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pìpe yarosirira ivitri guasu senda sui viña, ndayasaisuise rumo ava ipipe, yande evocoyase ěgüe yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipipe yaico, ndayande pītivii eté evocoyia yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhii ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosañño opacatu uve, oyeroya vite sese, osāro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chaveira yande mbahecuasa. ⁹ Esepia niha, yaicua raimi tēi mbahe iyavei chíhi raimi tēi yamombehu Tūpa Ñehengagüer. ¹⁰ Acoi ouse rumo oicuaapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chíhivahe vite yande recose, yañehe, yandepihañemoñeta, yasenducua mbahe chíhivahe nungar; yacuacuase ité rumo cute, yaseyapa chíhivahe yande reco agüer. ¹² Cūritei yande ndayasenducua tuprii Tūpa resendar mbahe, inungar acoi yepiasa pipe yasepia hävomi tēi que mbahe; oyeovai eté yaicose rumo, yasenducua tupri catu itera mbahe evocoyase. Cūritei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapí mbahe ndopai vaheerā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapísa rumo aviye catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu āgua

¹ Peseca catu pe yeaisu tupri āgua peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu āgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pipe, Tūpa upe ité evocoyase oñehe; ndahei ava upe tēi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespíritu pipe. ³ Acoi ava omombehu vahe rumo Tūpa suindar ñehesa yasenducua vahe pipe, ahe oipītivií ambuae ava Tūpa rese iyeroya āgua, oporomonguerēhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopihañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe āgua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri āgua, ahese aviyeño oñehe Jesús reroyasar rovaque. Ipipe sui ipihañemoñeta catura Tūpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osāha yuvireco. ⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoingatu voi vaheerā ovava āgua viña. ⁹ Ēgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehe yuvireco. ¡Evocoyase peñeheso tēi eté! ¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae

tecua pendar tēi yuvirecoi vahe. ¹² Pe niha peipota ité pereco vaherã mbahecuasa Tūpa Espíritu suindar yepi. Sese peporandu catu mbahecuasa Espíritu suindar rese opacatu Jesús reroyasar p̃tívii āgua Tūpa rese yuvirecoi tupri catu vaherã.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri āgua rese. ¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroqui yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. ¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitívii chietera Tūpa rese imbopihañemoñeta catu āgua senducuaēhi pipe. ¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherã moviromi tēi ñehesa yasenducua vahe ava mbohe āgua setã ñehesa ndicuasai vahe pipe che ñehe rāgüer sui.

²⁰ Che rivireta, pepihañemoñeta eme chñhivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi āgua. ²¹ Porocuaíta resendar icuachiapri arachendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehese ava Tūpa p̃ratasa pipe, ahe Jesús reroyasarēhi yuvirecoi vahe upe nara: “¿Peicua catu, co supi tupri vahel!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducupri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¿Opacatu co ndayaracuai vahe tēi yuvireco!” ehira yuvireco p̃eu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoi nungar ava yuviraso pe pāhuve, ahe ae evocoyase, “Supi eté ayavi che recocuer Tūpa rovaque” ehira pe ñehe renduse yuvireco. ²⁵ Ēgüe ehira opihañemoñeta rai ndoyecuai vahe imboporēhipa uca oyeupe pe ñehe rendu ramosa yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco p̃eu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucui pota vahe sapucaisa Tūpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu āgua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca āgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe. ²⁹ Ēgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pāhu pendar oyapisaca tuprira sese yuvireco ‘¿supi eté p̃iha?’ ohasave. ³⁰ Que ñepeipei oñehe vitesa Tūpa oicua ucasa mbahe

ambuae ava upe, topituhuño yipindar oñehe vahe, ambuae evocoyase toñehe pëu. ³¹ Evocoyase ãgüe peyera peñehe ñepei-pei opacatu ambuae osendu vahe mbohe ãgua iyavei imonguerëhi catu ãgua. ³² Acoi omombehu vahe ñehesa Tüpa suindar, ahe oicatu oñehe mombituhu ãgua. ³³⁻³⁴ Esepia, Tüpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehe ãgua pe ñemonuhasave. Esepia, ãgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe ãgua yuvireco chupe. Iyacatu rumo ahe imboyeroyapri yuvirecoira omer upe Tüpa porocuita rupi. ³⁵ Oicua potase que mbahe, iya omer upe oporandura güëtave yuvireco. Esepia, cuña upe ndiyai eté iporandu ãgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tüpa Ñehengagüer ava upe peico, ndahei avei pëuñomi ou Tüpa suindar ñehesa. ³⁷ Acoi que pe pãhuve oimese “che Tüpa Ñehengagüer mombehusar aico” ehiño tõi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuita resendar. ³⁸ Ahe ndoyapisaca potaise rumo che ñehe rese, iñehe rese evocoyase ndapeyapiscacai chira.

³⁹ Sese, che rivireta, peyemonguerëhi catu Tüpa suindar ñehesa icuapri vahe mombehu ãgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe ãgua. ⁴⁰ Peyapora rumo opacatu mbahe ñepei-pei pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisiro peico peyemoviracuase sese. ãgüe ndapeyese rumo, peroya tupri tõi.

³ Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipã repirã Tüpa Ñehengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quinientõ sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūritei; amove rumo ambuae opa omano yuvireco. ⁷ Coiye oyemoporëhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya ãgua. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco ãgua viña. Esepia, che yipindar seroyasar aseca-seca catu vahe mara-mara tõi sereco ãgua. ¹⁰ Che rumo apóstol ité aico. Esepia, Tüpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tõi ãgüe ahe vichico, Tüpa rumo oporovasasa pipe secoi che rupi. ¹¹ Ndapepilhañemoñetai chira rumo acoi oporaviqui catu vahe rese tõi. Co ñehesa Cristo recocuer resendar ore oromombehu vahe rese rumo pepilhañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pëu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoyase ndocuerayevii chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoyase ãgüe ehi tõi etera viña. Iyavei pe yeroyasa Cristo rese ãgüe ehi tõi aveira

viña. ¹⁵ Acoi ãgüe ehise ité rumo viña, ore avei evocoyase oroñeheño tãi etera Tũpa resendar ñehesa rese oroico viña. Esepia, “Tũpa Cristo ombogũerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tũpa nombogũerayevii chiaveira Cristo viña. ¹⁶ ãgüe ehi eté, acoi omano vahe ndocuerayeviise yuvireco viña, Cristo avei evocoyase ndocuerayevii chietera viña; ¹⁷ Tũpa rese pe yeroyasa evocoyase ãgüe ehi tãi vahe itera viña; angaipa pipe viteño tãi evocoyase pe recocuer viña. ¹⁸ Iyavei acoi ãgüe ehise ité viña, evocoyase omano vahe Cristo reroyasar, ahe avei ocañi tãira viña. ¹⁹ Ndipoise yasãro vaherã Cristo suindar mbahe yamanose, yande evocoyase imbopapri tãi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pãhu sui; ahe rane yipindar ocuerayevi vahe. ²¹ Esepia, ñepei ava rembiapo sui oime manosa yandeu. Evocoyase ñepei ava rembiapo sui avei yacuerayevira. ²² Esepia, inungar acoi Adán rembiapo ai sui ava opacatu omano yuvireco, ãgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepei-pei yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pĩrata ãgüe ehi tãi vahe. Ipare omondora opovri pendar Vu Tũpa upe. ²⁵ Ahe rane ité rumo opacatu oporocuaire oico acoi Tu opase voi eté omondo opacatu yamotarẽhimbar ipovrive. ²⁶ Ahese ipa manosa opa itera. ²⁷ Esepia, Tũpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tũpa avei secoi ipovrive. Esepia, Tu ité opacatu mbahe osecopi imondo ipovrive. ²⁸ Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayevi ãgua yuvireco viña, ¿mbahe rese pĩha evocoyase omanose ava, amove chupe nara tãi ambuae oñeapiramo uca yuvireco? Esepia, omano vahe ndocuerayeviise yuvireco viña, ¿mahera ru evocoyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoyase oroyemondora mbahe tãi upe ari rupi viña? ³¹ Supi eté, che rivireta, ari yacatu aviye che amano vaherã opacatu co mbahe tãi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tãi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaĩhuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tuprisa” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pẽu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pãhu pendar oimera oporandu vahe: “¿Mara ehira pĩha omano vahe ocuerayevi irise yuvireco coiye? ¿Mara ehi angahura pĩha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tãi peico! Esepia, mbahe rãhii yañotise, ituyu rane ité sorĩ ãgua. ³⁷ Yañotise mbahe, sãhii rane ité yañoti; ndahei ihĩ opacatu reseve yañoti. ³⁸ Ipare rumo Tũpa omondo ahe mbahe rãhii upe ihiguã güemimbotar rupi, iyavei ambuae mbahe rãhii yacatu omondo ihiguã. ³⁹ Ndahoyoyai rumo que ñepei mbahe miti hi ambuae mbahe miti hi rese. ãgüe yahe avei yande yaico vahe ambuae ité yande rete mbahe mimba sui; vĩrai rete ambuae ité iyavei pira rete ambuae tãi no. ⁴⁰ ãgüe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigũer rumo ndahoyoyai eté ivi pipendar rete rese. ⁴¹ Ari rendigũer

avei ndahoyoyai yasi rendigüer rese, yasitata rendigüer rese avei. Ñepeyi yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehögüer, ahe ituyu vahe. Ocuereyevise rumo ndituyu iri chietera; apirēhi vahe ité secoira. ⁴³ Tehögüer ñotimbri nimomburusai vahe; coiye ocuereyevise rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocuereyevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co ivi pīendar tēi setecuer. Ocuereyevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri arachendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua. ⁴⁶ Yipindar oime co ivi pīendar tecovesa. Ipare rumo oime co tecovesa iva pendar yandeu. ⁴⁷ Ëgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar. ⁴⁸ Inungar yipindar ava ivi suindar, Ëgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, Ëgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; Ëgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe güetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vahe, ndoipisii chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbri moñehese voi yande resapihara inungar yande resapiqui vahe, Ëgüe ehira secuñarosapa yande rete. Aheseve avei omano vahe ocuereyevipara apirēhi vahe ité yuvireco; yande evocoyase nayamano vitei vahe, opaño tēira yande rete secuñarosa. ⁵³ Esepia, co yande rete ocañi tēi vahe, ahe yande rete niha opara oñecuñaro apirēhi vahe ité yuvireco. ⁵⁴ Ëgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuita arachendar evocoyase ombou pīratasa angaipa upe angaipa aposar mocañi uca āgua. ⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei Ëgüe ehi tēi vahe.

16

Porerecosa Jesús reroyasar pītivii āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui repri sui yapocatu āgua. Eipeve che yepotase, ndapeyemañeco iri chira guarepochi monuha āgua rese peico. ³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso āgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipiñañemoñeta oguata āgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che p̃itiviiñomira peye eipeve sui ambuae tecuave che so ãgua rese. ⁷ Ndaipotai che opoepia raimi t̃ei eipeve vicho. Yande Yar rumo oipotase, aico pucu itera pe piri. ⁸ Che rumo cūritei apitaño vitera cohava Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotar̃himbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe p̃ahuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepei yepe sepia potañehisar yuvireco, iya rumo peip̃itivii catura che piri iyepota tupri ãgua rese. Esepia, che iyavei ambuae Jesús reroyasar rese orosáro ité iyepota ãgua oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe t̃ei. Cūritei rumo niquer̃hii oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosañu catu pe cuaita upe. Peicoveño itera Tūpa p̃iratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güeta pendar reseve, ahe ranei yip̃indar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri ãgua yuvireco no. ¹⁶ Evocoyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe p̃ahu pendar Estéfanos, Fortunato iyavei Acaico cohava oyepotase che mboṽiha yuvireco. Esepia, ahe oyapo ité pe ndapeicatu tuprii vahe apo yuvireco. ¹⁸ Ahe che monguer̃h̃i catu yuvireco, ãgüe ehi avei revo p̃eu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco p̃eu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe s̃etave yuvireco, ahe avei ombou omahenduhasa yande Yar rer pipe yuvireco p̃eu. ²⁰ Opacatu Jesús reroyasar coha pendar avei omondo omahenduhasa yuvireco p̃eu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo p̃eu.

²² Acoi ava ndosaisui vahe yande Yar Jesucristo, ahe tocañi mbahe t̃ei pipe. ¡Toyevi p̃ihaivi voi yande Yar ou!

²³ Yande Yar Jesucristo tape rovasa ité yepi. ²⁴ P̃eu opacatu amondo che poroaisusa opacatu Jesucristo rese yande recosa pipe. Aipo rupive che ñehesa p̃eu.

IMOÑUVIRIOSA PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Avirave, opacatu Jesús reroyasareta Corinto pndar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachía che ñehe pēu. Co yande rivri Timoteo avei omondo omahenduhasa pēu. ² Tapeipisi catu yande Ru Tūpa, yande Yar Jesucristo porovasasa avei pe reco tupri āgua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha āgua yepi. ⁴ Ahe niha yande mbovihaño opacatu yande paraisusa pipe, yande avei evocoyase yaicatura ava iparaisu vahe mboviha āgua yuvireco. Ēgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ēgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha āgua ‘toñepisiro yuvireco’ ore yapave. Iyavei Tūpa ore mboviha pe mboviha āgua avei. Supi evocoyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe p̄tívii āgua rese. Esepia, oroicua ore paraisu agüer nungar tupri peico, ēgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoāhasa yavai vahe ité oime aheve oreu. Ndroicatu iri eté oroñemosa ore p̄rataēhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi āgua viña, ēgüe ehi rumo oreu oroyeroya catu āgua Tūpa rese, ndahei oreyese tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rāgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore p̄tíviiise peye pe yeroqui pipe. Ahese setá, “Aviye ndeu” ehira yuvireco Tūpa oporop̄tíviiisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ēgüe orohe, ndahei ava co ivi pipendar mbahecuasa pipe tēi. ¹³⁻¹⁴ Esepia, che ñehe aicuachía vahe imondo pēu, aicuachía ñepei reseve pe yeroqui tupri āgua, pe senducua tupri āgua avei no. Iyavei ore cua revo chíhi peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemoñeta aso vaheerã ñuvirío yupagüer pe repia, pe mboviha catu āgua viña. Ēgüe ahe ité, che pihañemoñeta pe piri rane che so āgua che guatasa rupi Macedonia ve. Ichui ayevei pota iri pe piri viña, ipare pe che p̄tíviiimira peye ivi Judea rupi che so āgua rese viña. ¹⁷ Ndachepihañemoñeta voiño tēi che so āgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. ¹⁸ Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa. ¹⁹ Esepia, Tūpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroico pēu, che, Silvano, Timoteo avei. ²⁰ Esepia, opacatu Tūpa remimombehugüer imboaviyesa sese. Sese niha serer pipe, “Ēgüe tehi” yahe Tūpa upe imboeteisave. ²¹ Tūpa niha opacatu yande momirata seseño ité yande reco āgua, yande poravo avei. ²² Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tūpa niha oicua acoi ndayeviise Corinto ve pe piri, ěgüe ahe pēu mbahe aviye āgua rese. ²⁴ Ndahei opocuai pota mbahe pe rembieroyarā rese. Esepia, pe Tūpa rese pe yeroyasa pīpe peyemoviracuaño ité Cristo rese. Ore rumo oroipota pe pītiviisa pe yemboviha āgua.

2

¹⁻² Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoyase che mbovihara viña? Pe ité niha che mbovihasar peico. ³ Sese che aicuachía ñehesa ipīrata vahe pēu cuese. Esepia, ndaipotai eipeve che sose, che mbovihaēhi āgua peye. Pe rumo iya ité che mboviha catura peye viña. Che ayeroya ité opacatu pe rese aviharetese, pe avei evocoyase opacatu peviharetera che rese. ⁴ Supi eté che aicuachiasse che ñehese pēu, che ae ayepihamboasi ité, ayaseho avei. Esepia, aicuachía vahe pēu ndahei pe mbovihaēhi āgua, che rumo aicuachía ‘toicua che guaisu eteprisa yuvireco’ che yapave pēu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharēhisa co mbahe tēi apo pīpe, ndahei che güeraño ndache mbovihai, pe avei rumo seni opacatu ěgüe peye. Che, “Seni” aipo ahe ité pēu. Esepia, ndaipotai che ñehese rasi āgua. ⁶ Co mbia upe setá mbahe peiporara uca ité, evocoi rupive iya ěgüe peye chupe. ⁷ Co suive ité rumo peñerora chupe, peipītivi aveira. Esepia, aviyeteramo oviharēhisa pīpe oyemocañi tēira. ⁸ Sese cūrítei opomonguerēhi ité pe mboyecua iri āgua pe poroaisusa chupe. ⁹ Cuese ambuae che ñehese aicuachía co che pe mbohesa resendar pēu pe recoāha āgua, “¿Oyapo itera pīha che remimombehu yuvireco?” ahe pēu. ¹⁰ Cūrítei cheñero avei que ava upe peñero vahecuer upe. Esepia, oimese que mbahe rese che ñero āgua, Cristo rovaque ěgüe ahe pe raisusave ¹¹ Carugar yande mbopaēhi āgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu āgua, oime ité yande Yar upe nara aheve che poraviqui āgua viña. ¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siācua vahe yasētu vahe opacatu rupi. ¹⁵ Esepia, inungar itaisi siācua vahe opacatu rupi, ěgüe yahe avei yande Tūpa upe Cristo yande reropovēhese yaico ava ipīsiropirā upe, ava ocañi tēi vahe upe avei. ¹⁶ Ahe ava ocañi tēi vahe upe evocoi ñehesa yaru vahe inungar cañi tēisa resendar; ava ipīsiropirā yuvirecoi vahe upe rumo evocoi ñehesa ombou tecovesa. Yande ae tēi rumo ndayaicatu evocoi nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisi āgua tēi rese ěgüe orohe, ore rumo ore pihañemoñeta tuprisa pīpe oromombehu co ñehesa Tūpa rovaque Cristo rese ore recosa pīpe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyecomboivate ai pota iri viña, ěgüe ndorohei rumo iyavei ndorosecai icuachía āgua ava ñehesa aviye vahe ore recocuer resendar oromondo vahe upe. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ěgüe peye peico ore pīha pīpe. Esepia, opacatu

ava pe reco tupri repiase, oicua ore poraviqui tuprisa pe pãhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espíritu Tūpa oicove vahe suindar pipe rumo yapopri ava piha pipe.

⁴ Oroyeroya ité co rese Tūpa rese ore yeroyasa pipe. Cristo niha ãgüe ehi oreu. ⁵ Ndahei oreyesui tēi orocatu co mbahe apo. Tūpa rumo ombou oreu opacatu co mbahe apo ãgua. ⁶ Ahe niha ombou opiratasa oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyeẽhisa pipe yamano tēira viña. Ahe rumo Espíritu Tūpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tūpa reco porañetesa pipe ou. Israelita evocoyase Moisés rova rese nomahe catui eté yuvireco. Esepia, sendí iteanga, yepe sendigüer ogüe mbegüeño oso viña. Ahe Moisés recosendar porocuita ava upe manosa tēi güeru vahe iporañete ai eté yipindar oico viña. ⁸ ¡Cūrítei rumo iporañeté catu ité ñehesa Tūpa remimbotar ipiasu vahe resendar Espíritu Santo ombou vahe yandeu! ⁹ Supi eté yepe iporañete ai eté Moisés porocuita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cūríteindar porañete catu vahe rese. ¹¹ Acoi mborocuita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeẽhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaẽhi ãgua ndogüe viteise sendigüer ichui aracahe. ¹⁴ ãgüe ehi ahe ndosenducua ucai eté ndoyavii sovapisa vite vahe cūrítei, ãgüe ehi vite oyerouise Moisés porocuita icuachiapri yipindar vahe pipe yuvireco. Ñomipri vahe nungar tēi chupe ahe senducuaẽhi pipe. Esepia, Cristo güeraño ité oicatu sovapisa nungar rerocua ichui senducua uca ãgua chupe. ¹⁵ ãgüe ehi vite cūrítei, senducuaẽhi pipe Moisés porocuita pipe oyerouqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri ãgua. ¹⁷ Esepia niha, yande Yar Espíritu secoi. Ahe Espíritu ava rese secoise, ndahe iri mbiguai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaẽhi ãgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ãgüe yahese, yareco catu-catu iri seco porañetesa yandeyese. Yande Yar rumo acoi Espíritu secoi vahe ãgüe ehi yandeu.

4

¹ Sese, “Ndorequerẽhi iri” ndorohei eté. Esepia, Tūpa ore poravo ore paraisuerecosa pipe ore poraviqui ãgua co ñehesa rese. ² Ore rumo oroseyapa opacatu mbahe tēi ore chí aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñhengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. ãgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa pĩsirosa resendar ore remimombehu renducua ãgua, ahe ãgüe ehi ava ocañi tēi vajerã upe. Ahe aviye oyeovapi vite vahe. ⁴ Esepia, supi eté carugar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropĩsirosar Cristo resendar porañete vahe’ oyapave. Ahe niha Tūpa recocuer mboyecuar secoi. ⁵ Esepia, oromombehuse ñehesa pēu, ndahei oreyese tēi. Ore rumo, “Jesucristo yande Yar secoi” orohe oroico. Ore evocoyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime

tesapesa pītumimbi vahe resape āgua” ehi. Ahe avei osesape uca yande pīha pīpe ‘ipīpe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pīpe ité

⁷ Co tesapesa nungar porañete vahe Tūpa suindar rumo yareco yande retecuer pīpe, inungar-ra que mbahe sepīrusu vahe yapocatupri ivi mbahemoinda ndipocopii vahe pīpe tēi viña. Ipīpe toicua opacatu ava yuvireco co pīratasa Tūpa suindar, ndahei oreyesuindar tēi. ⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañii eté oreyesui. ⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave. ¹¹ Esepia, ore recove vitesese imboguai pri oroico ore mano āgua Jesús rese. Ēgüe orohe secocuer mboyecua āgua ore retecuer ndipocopii vahe rese. ¹² Evocoyase co ñehesa mombehu pīpe ore manosa ore ropeña, ipīpe sui rumo pesopeña tecovesa apirēhi vahe peico seroyasa pīpe.

¹³ Icuachiapri aracahendar pīpe niha aipo ehi: “Ayeroya ité Tūpa rese, ipīpe sui añehe” ehi; Ēgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora. ¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipīpe sui, Aviye ndeu, tehi setá catu ava imboetisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pīpe, ahe Ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaheerā. ¹⁸ Sese ore ndorepihañemoñeta atii chira co ivi pīpendar mbahe rese; ore rumo orepihañemoñeta mbahe iva pendar ndayasepiai vahe rese. Esepia, co mbahe yasepia vahe, ahe Ēgüe ehi raimi tēi vahe; co mbahe rumo ndayasepiai vahe, apirēhi vaheerā ité.

5

¹ Yaicua niha yande retecuer ndipocopii vahe, inungar oi ndipocopii vahe avei. Sese imocañisase, aviyeño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. ² Supi eté yaicove vitesese co yande rete ndipocopii vahe rese, yande poāsesa pīpe yaipota ité yande rete iva pendar. ³ Aheve yande rete ipiasu vahe yarecose, ahese ndahei chira yande hã nani tupri vahe nungar yuvirecoira. ⁴ Ēgüe ehi eté yande retecuer pīpe vite yaicose, yande poāse yande viharēhisa pīpe. Esepia, ndayai potai yande hã nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vaheerā yande resendar tecovesa piasu, ndopai vahe rereco āgua” yahe. ⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipīpe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitesese yande rete rese, ndayaico vitei eté ivave yande Yar piri. ⁷ Esepia, cūrtei yande Yar rese yeroyasa pīpe ité yaguata, ndahei mbahe yande rembiepia pīpe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mboviha āgua yepi, que yaicove vitesese yande rete rese, anise que yasēse ichui. ¹⁰ Esepia, yande opacatu yañecuavēhera Cristo rovai iporandusave yaipisi vaheerā ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitesese.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pihañemoñeta rerova Tūpa rese ipihañemoñeta āgua yuvireco. Tūpa niha ore cua tupri, tapeicua avei ru ore recocuer. ¹² Ndoronehe pēu ore yemboivate ai āgua tēi. Ore rumo oronehe pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehe mboyevi āgua. Esepia, ahe ndahei ava piha pipendar rese oyemboiha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tūpa upe rumo ēgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgüe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirā, ipipe sui yaicua opacatu ava ocañi tēi vahe rā yuvireco viña. ¹⁵ Cristo niha omano opacatu yande repirā. Yande yaicove vite vahe evocoyase ndahe iri yandeyeupe nara tēi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pihañemoñetaēhi iri āgua que ava rese, ava tēi pihañemoñetasa rupi. Yepe yipindar inungar ava ivi pipendar tēi ēgüe orohe ore Cristo rese ore pihañemoñeta oroico viña, cūritei rumo ēgüe ndorohe iri orepihañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu āgua ambuae ava upe secocuer moingatu āgua avei. ¹⁹ Aipo oyapave aipo ehi: Tūpa ombou Guahir Cristo co ivi pipe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatusa resendar mombehu āgua ava upe. ²⁰ Ore evocoyase Cristo porocuita rupi oronehe vahe oroico, inungar Tūpa ité oñehera pēu viña. Sese, “Peyevi Tūpa upe, ahe pe recocuer moingatura oyeupe nara” orohe Cristo rer pipe pēu. ²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco īvi āgua Cristo rupi yande guatase.

6

¹ Ore pe mboetasa co Tūpa upendar mboraviqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pēu. ² Esepia, Tūpa aipo ehi icuachiapri aracahendar pipe:

“Acoi ari aviye vahe pipe niha che asendu pe yeruresa; iyavei ahe ari poropĩsirosa pipe opopĩtivii” ehi.

¡Ahe ari oyepota cute! iyavei oime ité cūritei ñepisirosa.

³ Ore niha ndoromboyecuai ore reco ai ava pāhuve. Esepia, ndoroipotai que ava Tūpa upe ore poraviquisa rese iñehe rai āgua yuvireco. ⁴ Ore rumo oromboyecua ité Tūpa rembiguai ore recosa. Esepia, ore reco mbegüesa pipe oronemosañño mbahe-mbahe tēi upe yepe ipane mbahe oreu viña, iyavei mbahe yavaise; ⁵ ēgüe orohe avei ore nupa-nupase, ore roquendase avei iyavei omonguerēhise ava rehii ore amotarēhi āgua yuvireco. Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei. ⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ēgüe orohe ité niha Espiritu Santo pĩratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa pĩratasa pipe avei oroico. Ore niha ore reco tupri pipe orosecopi mbahe-mbahe tēi. Ipipe avei oroyoepi. ⁸ Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco, oroicoveño ité rumo; iyavei amove ore mombaraisusa catu tēi, ndore yuca eté rumo ipipe yuvireco. ¹⁰ Amove ndoyavii ndorovihi vahe yuvireco chupe, ore rumo

orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu āgua orovireco ore piha pipe tuvichá pe rese. ¹² Ndorehāpisii pe rese pe raisu āgua; pe rumo ēgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ēgüe ehi eté teco ñvisa ndoyoyai teco rai rese inungar tesapesa ndoyoyai pītumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe: “Che aicovera seseve iyavei aguatarā ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“ Sese peyepēpi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei' aipo ehi yande Yar güeco pīratasa pipe” ehi.

7

¹ Che rivireta, che rembiaisu, co Tūpa remimombehu imboaviyepirā yandeu. Sese yande yamoiñgatu tuprira yande recocuer chupe yarecoēhi āgua yande retecuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri āgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei. ³ Ndahei pe recocuer rese che ñehesa raisave aipo ahe pēu. Supi eté yipindar, “Che piha ité opoaisu, pēu nara avei aicove, amano aveira pēu” ahe acoi pēu cuese. ⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhāño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehesa aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehesa tasí iteanga vahe pēu; chíhi rupi tēi rumo ndapevihai peyeroqui pare sese. ⁹ Cūrítei che avihareté. Ndahei rumo pe viharēhisa rese ēgüe ahe. Esepia, co pe viharēhisa sui pemboasi pe angaipa Tūpa upe pe yevi āgua, evocoi nungar Tūpa oipota. Evocoyase ore ñehesa ndoyapoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi āgua. Ipipe sui niha yañepisiro yande pihañemoñeta rerovaēhisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosāño pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapisaca

iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pemboviha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipisi tupri ité imboeteisave sereco. ¹⁶ ¡Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrítei che amombehu potami pēu mara ehi mbahe tupri apo Tūpa ava viroyasar upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco. ³ Supi eté oquerēhisa pipe omondo ité ocatugüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipitívii ambuae Tūpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. ⁶ Evocoyase ore aipo orohe Tito upe pēu: “Tomboyeapi iri co porerecosa monuha āgua ava upe” orohe. Esepia, yipindar ahe osose pe pāhuve, ahe pe pītívii imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecua, pequerēhi ité Tūpa upe mbahe apo āgua iyavei ore raisu ité peye. Evocoyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicua, supi eté vahe piha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. ¹¹ Cūrítei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicatugüer rupi. ¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pītiviisa pipe yuvireco” ndahei rumo pēu. ¹⁴ Cūrítei mbahe pe rembiereco eta pipe peipitívii catu ambuae ava ipane vahe mbahe yuvireco chupe. Virecomise mbahe, ahe avei pe pītivira yuvireco pēu mbahe ipanese. Evocoyase pe recocuer oyoya tupri itera. ¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporaviqui tupri aise ñehesa p̃sirosa rese yuvireco. ¹⁹ Sese opacatu oiporavo yuvireco ore rupi iguata āgua ore p̃tivii vaheṛā avei co porerecosa reraso āgua. Ore ēgüe orohe oroico yande Yar mboetei āgua rese ‘toicua ore querēhisa pipe ité oroporop̃tivii yuvireco’ ore yapave. ²⁰ Ore ndoroipotai que ava oñehe tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūrítei iquerēhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco p̃eu, “Ahe oyoya Pablo rese oporaviqui vahe pe p̃tivii āgua” peyeñora. Acoi oporanduse avei ambuae yande rivri rese yuvireco p̃eu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua āgua, pemboyecua catu pe poroaisusa supi eté vahe chupe yuvireco. Evocoyase toviroya ité che ayeroyase iyavei ayembovichase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañehe iri p̃eu. ² Esepia, che aicua pequerēhi ité ip̃tivii āgua. Evocoyase che viharetasa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta p̃tivii āgua cuese ambuae araviter suive yuvireco” ahe yuvireco chupe. Evocoyase pequerēhise ité ip̃tivii āgua, ahese setaño ité oyemonguerēhi yuvireco. ³ Che rumo amondo co yande rivri yuvireco p̃eu cūrítei ‘ēgüe tehi tēi eme che ñehesa aviye vahe sesendar yuvireco’ viya p̃eu. Pe yemoingatu tupri āgua ité aipo ahe p̃eu; ⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Ēgüe peyese ore mochi guasu uca tiētera peye. Esepia, che ayeroya ité pe rese. Pe avei evocoyase pechira. ⁵ Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuviraso āgua pe piri pe p̃tivii āgua co porerecosa aviye vahe monuha āgua rese, acoi cuese pe remimombehugüer rupi. Evocoyase ahe pe porerecosa pe remimonuha opara pemoingatu tupri ité pe avagüer mboyecua āgua, ndahei chira rumo pe recatēhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepepei iya opihañemoñetasa rupi omondora oporerecosa Tūpa upe yuvireco, ndahei chira opiha ṽracuasa pipe tēi iyavei ndahei chiaveira ambuae ava ocuai p̃ratasa pipe tēi. Esepia, Tūpa osaisu ava oviharetasa pipe omondo vahe oporerecosa chupe. ⁸ Tūpa niha oicatu opacatu mbahe aviye vahe mondo āgua p̃eu ari yacatu rupi pereco vaheṛā opacatu mbahe ipane vahe p̃eu iyavei sumbirer pipe opacatu ambuae mbahe aviye vahe rese pe porop̃tivii āgua. ⁹ Inungar icuachiapri pipe aipo ehi: “Ahe iporereco ai iparaisu vahe rese yepi. Ahe mbahe aviye vahe sembiapo nocañi chietera” ehi.

¹⁰ Tūpa niha ombou mbahe rāhii ava remitira, mbahe semihura avei. Sese ombou catura mbahe p̃eu iyavei ombouvicha catura pe rembiapo aviye vahe ava p̃tivii āgua. ¹¹ Tūpa ombou catura opacatu mbahe pe rembierecorā ava upe imondo catu āgua pe avasa pipe. Ore orovirasose porerecosa pe remimbou yande rivireta upe, ahe evocoyase, “Aviye ndeu” ehira Tūpa upe yuvireco. ¹² Esepia, co pemondo vahe yande rivireta p̃tivii āgua, ndahei peip̃tivii mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoyase omboeteira Tūpa yuvireco. Esepia, co pe porop̃tiviiisa pipe pemboyecua itera pe Cristo ñehe reroyasa peico. Ahe avei omboeteira Tūpa yuvireco. Esepia, pe pemondoño itera mbahe pe porerecosa chupe iyavei opacatu ambuae ava upe.

¹⁴ Evocoiyase ahe oyerquirira pe rese iyavei pe raisu eteprira yuvireco. Esepia, Tūpa pe p̃tivii eté oporovasasa pipe. ¹⁵ ¡Aviye Tūpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri āgua!

10

Pablo cuaita apóstol seco āgua

¹ Che Pablo añehe Cristo poroaisusa, seco asiēhisa pipe avei p̃eu. Amove ava pe p̃ahu pendar, “Seco mbegüemi t̃ei yande p̃ahuve oicose, amombri güecose rumo oñehe p̃iratá iteanga” aipo ehi t̃ei yuvireco cheu viña. ² Che rumo asose pe repia, ndaipotai che p̃iratasa mboyecua āgua pe p̃ahu pendar upe. Amove rumo ava pe p̃ahu pendar ipihañemoñeta: “Oyapo mbahe co ivi pipendar p̃ihañemoñetasa rupi t̃ei” ehi yuvireco cheu. Sese che ayemoingatuño ité evocoi nungar ava upe añehe p̃irata vaherã. ³ Supi eté, yepe co ivi pipe oroicove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tūpa p̃iratasa mbahe t̃ei seco p̃irata vahe recopi āgua ava aracuasa t̃ei recopi āgua avei. ⁵ Ahe ipipe ore opa orosecopi yepoepi-episa iyavei opacatu semiramira t̃ei vahe güeco ivate aisa pipe ndoicua uca potai vahe Tūpa recocuer ava upe. Iyavei opacatu ava p̃ihañemoñeta raisa orosecopi Cristo reroya tupri āgua yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi āgua. Pe rane rumo peroya tuprira.

⁷ Pe rumo pemaheño t̃ei ahe ava recocuer rese. Acoi ava pe p̃ahu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayecomboivate che mborerecuasa rese p̃eu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri āgua, ndahei rumo pe recocuer momara āgua. ⁹ Aní chira, “Pablo yande mbosiquiye pota güembicuachía pipe” peye cheu. ¹⁰ Esepia, amove ava pe p̃ahu pendar, “Oñehe oicuachía vahe ombou yandeu, ahe ip̃iratá, yavai avei yandeu; ahe ité rumo aní angai vahe secoi yande p̃ahuve iyavei iñehe ēgüe ehi t̃ei vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ēgüe ahe tupri aveira yapo pe p̃ahuve.

¹² Ndoromboyoyai eté ore recocuer ava oyese t̃ei oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapirasai chiera ore cuaita ore yeecomboivatesa pipe. Tūpa rumo güemimbotar rupi ombou ore poraviqui āgua oreu, eipeve pe rese ore poraviqui āgua avei. ¹⁴ Ore rumo ndoroyapirasai ore cuaita mombehusa icuachía p̃eu. Esepia, supi eté ore ranei eté oroico pe p̃ahuve, ore ranei avei oroviraso Cristo resendar ñehesa imombehu p̃eu. ¹⁵ Ndoroyapirasai avei ore ñehe pipe ambuae ava poraviquisa sui t̃ei. Ore rumo, orosãro ore oroporaviqui catu vaherã pe p̃ahuve Tūpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosãro ñehesa p̃isirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese t̃ei oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe os̃e tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe os̃e tupri güecoãhasa sui.

11

Pablo iyavei apóstol angahu t̃ei yuvirecoi vahe

¹ ¡Peñemosa iriñomi t̃eira cheu co che ñehe ndayaracuai vahe nungar pipe che ñehese! ² Esepia, che cherecat̃ehi ité pe rese, ahe tecat̃ehisa ou cheu Tūpa sui. Che aipota Cristo upe opomondo vahe pe reco maranehisa pipe, inungar cuñatai ndaseco marai vahe imondopri cuimbahe upe imenda āgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe

pïhañemoñetasa rerova ãgua Cristo mboeteisa supi eté vahe sui. ⁴ Esepia, peñemosañõ ava oñehe vahe pëu ambuae Jesús rese ndoyoyai vahe ore remimombehu rese. Ichui peipisi pe querêhisa pipe ambuae espíritu peipisi vahecuer sui. Iyavei ambuae ñehesa pñsirosa resendar peipisi avei ndoyoyai vahe ore pëu oromombehu vahe rese. ⁵ Che rumo namohai eté ivi coti catu tõi aicora evocoi supi peguata vahe apóstol yemboivate ai tõi vahe sui. ⁶ Yepe ndayembohei che ñehe tupri ãgua ité, che rumo areco che mbahecuaa, ahe oromboyecuaño ité opacatu ore rembiapo pipe pe rembiepiave.

⁷ Ndamombehui eté niha ñehesa pñsirosa resendar pe cheu imboepi ãgua; pe recocuer mboivate catu ãgua rumo Tũpa rovaque ãgüe ahe che reco yemominisa pipe. ¿Mbahe tõi pñha ayapo ãgüe ahesa pëu? ⁸ Aipisi ambuae ava Jesús reroyasar sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgüe ahe che pepoisupave pe mañecoẽhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaherã co che viharetesa che sui yuvireco. ¹¹ ¿Mbahe rese pñha aipo ahe pëu? ¿Pe raisuẽhisave pñha? ¡Tũpa rumo oicua che pe raisusa!

¹² Ayapoño itera rumo co mboraviqui cheu imboepiẽhisa pipe vichico co ambuae pe pãhu pendar ava pe mbopaẽhi ãgua yuvireco. Esepia, che nungar yuvirecoi pota tõi viña. ¹³ Ahe rumo ndahei apóstol supi tupri vahe yuvirecoi, ahe oporombopa tõi, “Ore apóstol oroico” ehi tupri tõi yuvireco. ¹⁴ Yaicua niha Carugar rerecuar oporombopa. Esepia, oyeapo inungar Tũpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tũpa ñehe mombehusar yuvireco. ¡Ahe chupe rumo oimera Tũpa ñemoirosa mbahe sembiapocuer rupi curi!

Pablo oiporara mbahe-mbahe tõi apóstol güecosa pipe

¹⁶ Aipo ahe iri pëu: tipo eme ava “ndayaracuai” ehi vahe cheu. Acoi, “ãgüe ehi oico” peyese cheu, tañeheño ayase ndayaracuai vahe nungar, che avei evocoyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaẽhisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tõi oyemboivate ai güecocuer aviye angahu vahe tõi pipe. Sese che avei ayemboivatera. ¹⁹ Esepia, yepe pe imbahecua vai vahe nungar peico, pemboyoyá catu pe querêhisa pipe ava ndayaracuai vahe. ²⁰ Pe niha pemboyoyaño acoi que mbiguai tõi nungar pe rereco vahe, que mbahe pe rembiereco sui tõi oicove vahe, que pe mbopa tẽisar, pe roerõrosar, que pe rova pete-petesar avei. ²¹ Che chĩa pipe aipo ahe co imombehu, ¡ore reco mbegüe etepri evocoi nungar apo ãgua pëu!

Acoi oñehese ambuae ava oyeupendar mbahe rese oyemboivate aisa pipe, che avei evocoyase ãgüe ahera. Aipo ahesa rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tõi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepepi rupi evocoyase che api-apisa ita pipe. Mbosapi yupagüer avei oñeapivii iar ipive che guatasa rupi cheu, ñepepi pĩtu, ñepepi arĩ avei avevui tõi para guasu aviter rupi vichico. ²⁶ Setá aguata opacatu rupi, iyavei ïai rupi mbahe-mbahe tõi oime cheu, aico avei imonda rai vahe pãhuve; che mu judío mbahe tõi vahe pãhuve avei aico iyavei ndahei vahe che mu pãhuve no. Aico avei tecua guasu pipe mbahe tẽisave, amombri vahesa rupi iyavei para guasu pipe, iyavei mbahe-mbahe tẽisave Jesús reroyasar angahu tõi pãhuve aico. ²⁷ Aporaviqui ité iyavei ayapo mbahe cheu yavai vahe;

iyavei setá yupagüer ndaquei eté; aiporara avei tieporêhi iyavei husei; setá rupi ndacarui; sôhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai ãgua cheu, co mbahe omboyecua vahe che pĩrataẽhisa rese ayeecomboivate aiño itera. ³¹ Yande Yar Jesucristo Ru Tũpa, ahe imboeteipri apirêhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaheerã che roquenda ãgua yuvireco viña; ³³ oime rumo ava iruova guasu pipe che mogüeyi vahe tecua ãchisa metana rupi yuvireco. Êgüe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tẽi oyemboeteisa pipe. Che rumo amombehuño itera mbahe asepiã vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cũritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tũpa rumo oicua. ³⁻⁴ Che rumo, “Êgüe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu ãgua yuvireco. ⁵ Evocoi nungar mbia rese ayeecomboivatera; cheyese ité rumo ndayeecomboivate ai chira. Che recocuer nipiratai vahe reseño êgüe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rãgüer sui’ viya. ⁷ Sese che yemboivate aiẽhi ãgua che quer nungar mbahe che pĩhamondii vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tẽi che rereco vahe. ⁸ Mbosapi yupagüer yande Yar upe aporandu ité teco asisa che sui serocua ãgua rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosã ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoyase che ayemboviha catuño itera che reco nipiratai vahe rese. Êgüe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava oñehe raise che rese, que mbahe ipanese cheu, ambuae che reca-reca tẽise che reco momara ãgua yuvireco iyavei que mbahe yavai vahe aiporarase Cristo sui. Esepia, ayanduse che pĩrataẽhisa, ahese che pĩrata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo êgüe ahe. Iya rumo peñehe tuprira che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco. ¹² Che ñemosã tupri pipe mboraviqui ayapo pe pãhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaheerã rese. ¿Ayavi tie che cuaita, êgüe ahese pẽu? ¡Peñero sese cheu!

¹⁴ Cũritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyepi omonuha guarepochi guahir upe, ndahei tahir tẽi êgüe ehi oyepi. ¹⁵ Evocoyase che querẽhisa pipe amondora opacatu che mbahe

areco vahe pe p̄t̄ivii āgua iyavei opacatu che recocuer rese ayemondo p̄u pe reco tupri āgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese p̄u. Amove rumo ava, “Yande mbopa āgua t̄i ēḡiē ehi Pablo yandeu” ehi t̄i yuvireco. ¹⁷ ¿Opombopa uca tie ava p̄u che remimondo pipe? ¹⁸ Che Tito upe, “Eresora ipiri yuvireco” ahe. Supi avei ambuae yande rivri T̄upa reroyasar amondo. ¿Pembopa tie Tito? Oyoya tupri mbahe oroyapo T̄upa upe ñepei ore p̄ihañemoñeta pipe.

¹⁹ Che rivireta, che rembiaisu, pe revo pep̄ihañemoñeta ore oroicuachía co p̄u, ore yoepi āgua t̄i. Ēḡiē ndorohei eté rumo. Ore rumo Cristo rese ore reco pipe oroñehe T̄upa rovaque. Opacatu ité niha mbahe oroyapo pe recocuer moviracua catu āgua. ²⁰ Che asiquiye asose eipeve pe repia, aviyeteramo ndahei chira che p̄iha rupi pe recocuer. Iyavei pe aviyeteramo ēḡiē peye aveira che repiase. Che asiquiye ité, oime revo pe p̄ahuve yepoepi-episa, pe p̄ihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe p̄ahuve ava oyeupeño t̄i mbahe oipota vahe, imahechiroi ai vahe iyavei oñehe-ñehe t̄i vahe ambuae ava rese, seco ivate ai vahe iyavei ndiporoviroyai vahe. ²¹ Asiquiye avei aso irise pe repia, omboura T̄upa pe sui che ch̄i āgua, che mboyaseho uca tiētera peye setá pe cueseve peyemboangaipa vahe rese iyavei ndapemboasii etese mbahe t̄i, yemboaguasa-guasa t̄eisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cūritei amombri aico pe sui, amombehu irira rumo co p̄u. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe p̄ahuve, ndopoparaisuereco iri chira. ³ Esepia, pe peipota ité che recoāha āgua ‘¿Cristo ité p̄iha omoñehe uca?’ pe yapave cheu. Cristo ndaseco mbegüemi p̄u mbahe apo oico. Ahe rumo omboyecua op̄iratasa p̄u. ⁴ Supi eté niha ahe yaticasa, inungar ava nipiratai vahe. Cūritei rumo ahe oicove T̄upa p̄iratasa pipe. Ēḡiē orohe avei ore seco p̄irataēhisa sereco. Oroicose rumo sese oroico T̄upa p̄iratasa pipe pe rese hañeco āgua.

⁵ Pemahecua tupri catu pe recocuer rese: ¿peico ité p̄iha pe Cristo rese yeroyasa pipe? ¿Ndapeicuai vo Jesucristo secoise pe rese, pesēse pe recoāhasa sui? ⁶ Pe revo peicuara ore ndoroçañi t̄i vahe oroico ore recoāhasa pipe. ⁷ Iyavei oroyerure pe rese T̄upa upe ‘toyapo eme mbahe t̄i yuvireco’ ore hesave. Ndahei rumo ore ivate catu vahe mbahe t̄i rasa pare mboyecuasave ēḡiē orohe; co catu ‘toyapo mbahe aviye vahe yuvireco’ ore yapave, yepe p̄u ndoyavii oroçañi t̄i vahe oroico viña. ⁸ Esepia, ndiyai mbahe supi tupri vahe amotarēhi āgua oreu; ēḡiē ehi rumo sese catu ité oroñehe. ⁹ Sese orovihaño ité norep̄irataise, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. ¹⁰ Aicuachía co che ñehe imondo p̄u pe piri che so āgua renonde. Acoi asose, namboyecua p̄iratai chira che mborerecuasa eipeve. Ahe niha yande Yar ombou vahe cheu pe reco momirata catu āgua, ndahei pe reco momara āgua.

¹¹ Imomba āgua, che rivireta, aipota pev̄iharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe. Evocoyase T̄upa oporoaisusa pipe, güeco tuprisa pipe avei secoira pe rese. ¹² Pemombehu che mahenduhasa ñepei-peipeyeupe pe yeovaupitesa pipe. ¹³ Opacatu ambuae yande rivri, T̄upa reroyasar avei omondo omahenduhasa yuvireco p̄u.

¹⁴ Peipisi yande Yar Jesucristo porovasasa, T̄upa poroaisusa iyavei Espiritu Santo tasecoi opacatu pe rese. Aipo rupive che ñehe p̄u.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohave oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá repirã. Ëgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropñisirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa pñisirosa resendar. Ëgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropñisirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai íva pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepia, java remimbotar rupi tēi mbahe ayapo vitesse, evocoyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropñisirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesse aracaco. Che pīratasa pipe tēi aseca opacatu Tūpa rembiporavo Jesús reroyasar momara água. ¹⁴ Ëgüe ahe che ayemboivate ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tūpa rumo yipive che ha vitéñhiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayeve tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi. ¹⁹ Ndasepai eté rumo ambuae apóstol. Yande Yar rivri Santiago güeraño asepa. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cūrítei omombehu Jesucristo reroya água oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi āgua. Evocoyase aso iri aheve. Ahese oroso Bernabé rese, Tito avei orovirasos oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vaherā. Evocoyase amombehu co ñehesa poropĩsirosa resendar chupe yuvireco acoi amombehu vahe ava eta ndahei vahe judío pāhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavrive tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroiopotai eté semimbotar apo āgua yuvireco chupe. Esepia, ‘tovireco viteño oyese co ñehesa pĩsirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuita virecora ivate yuvireco viña. Che rumo nañecuñaroi chietera che recocuer sui. Esepia niha, Tūpa ndahei ava rete tēi osepia.) ⁷ Ahe rumo oicua yuvireco Tūpa che cuai oñehengagüer poropĩsirosa resendar mombehu āgua ndahei vahe judío yuvirecoi vahe upe, inungar omondo Pedro oñehengagüer poropĩsirosa resendar mombehu āgua judío upe. ⁸ Esepia, inungar Tūpa omondo Pedro upe apóstol seco āgua ava judío upe nara, ēgüe ehi avei imbou apóstol che reco āgua ava ndahei vahe judío upe nara.

⁹ Sese Santiago, Pedro iyavei Juan, ahe chupe, “Oyemoviracua vahe Jesús reroyasar pāhuve” ehi yuvireco, ahe oicua yuvireco Tūpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgüe ehi yuvireco. Iyavei ipiha rupi eté ore oroporaviqui vaherā ava ndahei vahe judío pāhuve oroico, inungar ahe oporaviqui judío pāhuve yuvireco. ¹⁰ Co reseño oporandu yuvireco oreu: “Peyemomahenduhami ava iparaisu vahe pĩtivii āgua rese” ehi. Yipive ité rumo che ēgüe ahe pota vichico yepi.

Pablo oñhe pĩrata Pedro upe sembiavi rese Antioquía ve

¹¹ Iyavei osose Pedro tecua Antioquía ve. Aheve oyavi güecocuer. Evocoyase añehe pĩrata sovai eté chupe mbahe sembiavi rese. ¹² Esepia, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocarir iri ipiri. Esepia, ahe Jesús reroyasar judío yugüeru vahe “judío recocuer rupi yaguarata yande ñepisiro āgua” ehi vahe ité yuvireco viña. ¹³ Evocoyase ambuae Jesús reroyasar judío avei osiripaño tēi supive yuvireco. Bernabé avei eté supive ēgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropĩsirosa resendar supi tupri vahe rese. Ichui Pedro upe añehe opacatu Jesús reroyasar rovaque: “Nde niha judío, ereico rumo inungar ndahei vahe judío. Cūrítei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca āgua” ahe chupe.

Judío, ndahei vahe judío oyoya oñepisiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cūrítei rumo yaicua, ndipoi eté que ava seco catupri vahe Tūpa rovaque Moisés porocuita mboaviyasa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, “Co seco catupri vahe” Tūpa he āgua yandeu. ēgüe ehi eté seroya pipe, ndahei acoi porocuita tēi reroyasa pipe. Esepia, ndipoi chietera que ñepeí ava seco catupri vahe Tūpa rovaque evocoi porocuita tēi aposa pipe.

¹⁷ Yasecase yande reco catupri ãgua Cristo rese yande yeroyasa pipe, ipipe yaicuaese angaipa viyar yande reco, ¿Cristo pñha evocoyase yande mboangaipa? ¡Aní eté! ¹⁸ Che amocañise mbahe, ipare rumo amopuha irise, che evocoyase ayemboangaipa ipipe. ¹⁹ Esepia, ndaicutuise Moisés porocuita reroya tupri che ñepisiro ãgua, ahese ocañi tēi vahe aico ipipe. Ichui rumo Jesucristo reroyasa pipe asupiti Tūpa upe nara che recove ãgua. Esepia, che aviye yaticapri aico Cristo rese. ²⁰ Sese ndahe iri che ité aicove; Tūpa Rahir Cristo rumo che rese secoi. Sese ité ayeroya che retecuer pipe che recove ãgua. Ahe niha oyemondo omano ãgua che raisupave. ²¹ Naroñroi eté co Tūpa porovasasa. Esepia, ava seco catupri Tūpa rovaque porocuita tēi reroya pipe viña, evocoyase Cristo mano agüer ãgüe ehi tēi etera viña.

3

Porocuita iyavei yeroyasa

¹ ¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pēu. ² ¡Pemboyecua co che porandusa cheu! ¿Moisés porocuita mboyeroya pipe pñha peipisi Espiritu Tūpa suindar, co ñehesa pesendu vahecuer reroya pipe tie? ³ ¡Ndapembahecuai eté! Yipindar Espiritu pipe pemboipi Cristo rupi pe guata ãgua. ¿Ēgüe peye aveira pñha pe pñratasa pipe tēi pe guata tupri ãgua Cristo rupi cūrítei? ⁴ ¿Ndape pñtívimi eté vo acoi opacatu pe paraisusa Cristo recocuer rese? ¡Pe pñtívimira tarahu viña! ⁵ Tūpa niha omondo oEspiritu pe rese iyavei oyapo poromondiisa pe pñhuve. ¿Mahera pñha oyapo? Esepia, co ñehesa pesendu vahe peroya ité, sese ãgüe ehi pēu ndahei Moisés porocuita tēi reroya pipe.

⁶ Esepia, aracahe Abraham oyeroya ité Tūpa rese, ipipe sui Tūpa oipisi seco catupri vahe nungar oyeupe nara. ⁷ Sese iya ité peicuara opacatu acoi oyeroya vahe Tūpa rese yuvireco, ahe Abraham suindar supi tupri vahe. ⁸ Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri yuvireco nde sui” ehi. ⁹ Evocoyase Tūpa osovasara cūríteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuita pipe tēi yuvirecoi vahe, ahe Tūpa ñemoirosavri tēi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tūpa porocuita icuachiapri pipe yepi, ahe ñemoirosavri tēi yuvirecoira” ehi. ¹¹ Sese, co omboyecua tupri yandeu ndahei Moisés porocuita reroyasa pipe tēi Tūpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuita ndahoyoyai Cristo rese yeroyasa rese. Esepia, ahe porocuita aipo ehi: “Acoi ava oico pota vahe co porocuita pipe, tomboaviyei tupri ité opacatu porocuita güecove ãgua” ehi.

¹³ Moisés porocuita mboaviyeñhisa pipe yacañi tēira viña. Cristo rumo yande renose yande cañi tēi rãgüer sui. Ahe ae opa oipisi ñemoirosa yande repirã. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūrítei.

Porocuita iyavei Tūpa güemimombehugüer omboaviye vaheñã

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeí reseve oicuachiase güemimbotar omombehu vahe, ahese ndipoi que ambuae ava omboyeho vaheñã iyavei ndipoi que ambuae ava omboyepi iri vaheñã. ¹⁶ Ēgüe ehi avei Tūpa remimombehugüer Abraham upe aracahe. Esepia, oñhe ñepeí

reseve chupe iyavei ichuindar upe avei. Tūpa Ñehengagüer icuachiapri pīpe: “Nde suindareta upe” ndehi, inungar-ra que ava rehii upe viña. Ēgüe ehi rumo, “Nde suindar upe ité” ehi ‘ñepei ava’ ohesa pīpe, ahe Tūpa Rembiporavo Jesucristo. ¹⁷ Co mbahe amombehu pota pēu: evocoi porocuita Tūpa ombou vahecuer cuatrocientos treinta araviter pare, ndoicatui chietera Tūpa ñepei reseve Abraham upe omombehu vahecuer iyavei oñehe omboaviye vaheṛā mboyeho āgua. ¹⁸ Supi eté acoi Tūpa suindar ou vaheṛā porerrecosa Moisés porocuita mboaviyesa pīpe suise viña, ahese ndahei chiaveira Tūpa remimombehugüer sui. Ahe rumo ñepei reseve Tūpa remimombehugüer rupi Abraham upendar porerrecosa.

¹⁹ ¿Mahera pīha evocoyase aviye Moisés porocuita? Esepia, ava poreroyaēhisa cua āgua Tūpa ombou oporocuita Moisés upe aracahe. Co porocuitavrive rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembiguai iva pendar oporocuita mombehu āgua Moisés upe aracahe ‘tomombehu evocoyase Moisés che porocuita opacatu ava upe’ oyapave. ²⁰ Ñepei ava rese oñemoñetase, ndipotasai ambuae imoingatu āgua. Tūpa niha ñepei vahe secoi.

Mbahe sui Tūpa ombou oporocuita

²¹ “Moisés porocuita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuita ombou vaheṛā tecovesa apirēhi ava upe imboaviyesa pīpe, evocoyase porocuita reroya pīpe yande reco catuprira Tūpa rovaque viña. ²² Icuachiapri aracahendar pīpe rumo omombehu ité co: opacatu ava inungar mbiguai tēi oangaipa pīpe yuvirecoi. Evocoi ēgüe ehi, Jesucristo rese yande yeroyasa pīpe yasē vaheṛā ichui mbahe imombehupri pisi āgua.

²³ Yipindar rumo mbiguai nungar yaico Tūpa nomboyecua viteise Guahir rese yande yeroya āgua. ²⁴ Inungar chīhivahemi tēi, ēgüe yahe porocuitavrive yaico yipindar. Ahe porocuita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu. ²⁵ Cūrītei rumo oime Jesucristo rese yeroya āgua cute. Evocoyase ndahe iri ahe porocuitavrive yaico. ²⁶ Pe niha opacatu Tūpa rahir peico Jesucristo rese yeroya pīpe. ²⁷ Opacatu pe ñapiramombri peico vahe Jesucristo rupi pe guata āgua, secocuer avei pereco. ²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese. ²⁹ Jesucristo rese peicose, pe evocoyase Abraham suindar nungar tupri ité peico. Evocoyase pe avei peipisira Tūpa remimombehu porerrecosa yandeundar.

4

¹ Amboyoapi vitera co che ñehesa pēu: inungar que ava omanose, oseya ombahe eta guahir upe chīhivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povrive secoi imboyeroya āgua. Ocuacuase voi eté, opoira tu remimombehugüer rupi ichui. ³ Ēgüe ehi avei yandeu. Yande chīhivahemise, evocoyase mbiguai nungar yipindar vahe co ivi pipendar porocuitavrive yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoyase ahe Moisés porocuitavrive secoi. ⁵ Ēgüe ehi ou opacatu yande renose āgua evocoi mborocuitavrī sui Tūpa rahir ité yande reco āgua. ⁶ Evocoyase Tūpa omboyecua Guahir yande recose ombouse Guahir Espiritu yande pīha pīpe, “¡Che Ru!” yande he āgua chupe. ⁷ Sese yande Tūpa rahir ité yaico, ndahe iri cūrītei mbiguai tēi nungar. Tūpa rahir yande reco pīpe ahe ombou aveira oporerrecosa yande mahera.

Pablo ipiñañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pīpe. ⁹ Cūrītei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara

ehi p̄iha oyevi iri mborocuaita t̄ei pipe mbiguai t̄ei güeco iri āgua yuvireco?” ahe p̄eu. ¹⁰ Esepia, pemboetei vite ari, yasi, araviter pieta eta t̄ei peico. ¹¹ ¡Che ayembosiquiye pe rese, “Che porombohesa revo ěgüe ehi t̄ei vahe ip̄ahuve yuvireco chupe” ahe p̄eu!

¹² Iyavei che rivireta, aipota che recocuer moña peye. Esepia, cuese che as̄e Moisés porocuaita povri sui inungar pe yip̄indar ěgüe ahe vichico pe p̄ahuve. Ahese ndapeyapoi eté mbahe cheu. ¹³ Peicua niha che yip̄indar chembaheasise vichico, ahese amombehu co ñehesa p̄isirosa resendar p̄eu. ¹⁴ Yepe co che mbaherasisa yavai etepri p̄eu viña, pe rumo ndache reroĩroi eté peye iyavei ndache momboi peye. ěgüe ehi rumo aviye acoi T̄upa rembiguai eté che rereco peye viña iyavei aviye Jesucristo itera aico p̄eu viña no. ¹⁵ ¡Mahera ru c̄uritei ndapeyemboviharete vitei che rese peico eipeve! Esepia, supi eté, cuese acoi que pe resa teieté revo pemboura cheu viña. ¹⁶ ¡Evocoyase c̄uritei che amotar̄ehi tie peye acoi p̄eu mbahe supi tupri vahe mombehusa sui t̄ei!

¹⁷ Evocoi ava iquer̄ehi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua t̄ei ore sui yuvireco pe quer̄ehi āgua supi. ¹⁸ Aviye ité niha yande quer̄ehise mbahe apo ambuae ava upe, mbahe aviye vahe apo āgua rumo. Ndahei chira pe p̄ahuve che recoseño pereco pe quer̄ehisa. Iyacatu rumo pequer̄ehiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasi vahe; ěgüe aheño itera ayemombaraisu vichico ‘toico rane ité Cristo sese yuvireco’ che yapave p̄eu. ²⁰ C̄uritei r̄ägüer opoepiara viña añehe tupri catu āgua pe rese. Esepia, “¡Mara ahera revo sereco yuvireco?” ahe p̄eu.

Agar, Sara recocuer resendar yembohesa

²¹ Pe peroya pota vahe Moisés porocuaita pe reco catupri āgua, pemombehumi cheu: ¡Ndapesenducuai tie co mborocuaita aipo ehi vahe? ²² Esepia, aipo ehi: Abraham aipo vireco ñuvirío guahir, ñepei tahir aipo sembiguai Agar membri, ambuae tahir evocoyase sembireco Sara membri. ²³ Evocoi sembiguai membri oha que ava t̄ei yesu nungar; sembireco membri rumo oha T̄upa remimombehugüer rupi eté. ²⁴⁻²⁵ Co tecocuer mboyyasa yaracua vahe ité. Co ñuvirío cuña sui yayembohe ñuvirío T̄upa remimbotar rese. Yip̄indar sembiguai Agar omboyecua evocoi porocuaita imondopri Arabia pipendar ivitri Sinaí ve aracahe. Ahe cuña mbiguai t̄ei inungar Jerusalén upendar ava. Esepia, ahe Moisés porocuaityave yuvirecoi. ěgüe ehi avei opacatu Moisés porocuaita pipendar, yuviroha mbiguai nungar güeco āgua, opacatu ichuindar ěgüe ehi vite yuvireco. ²⁶ Yande rumo inungar-ra que Jerusalén iva pendar suindar yaico viña ěgüe yahe yaico mbiguaīehi. ²⁷ Esepia, icuachiapri aracahendar pipe aipo ehi: “Eyembovihareté, cuña nimembii vahe;

esapucui nde rorivetsa pipe, nde ndereiporari vahe nde membri rasicuer.

Esepia, acoi cuña seyapri imembii ati catura cuña omer vireco vahe sui” ehi.

²⁸ Che rivireta, inungar Sara membri Isaac, ěgüe yahe avei tahir ité yaico T̄upa remimombehugüer rupi. ²⁹ Co rumo aracahe sembiguai membri oha vahe ava t̄ei yesu nungar, ahe ndoyambotai sembireco membri acoi Espiritu p̄iratasa pipe sui oha vahe; c̄uritei ěgüe ehi tupri avei. ³⁰ ¡Mara ehi icuachiapri aracahendar pipe? “Pemboyepepi pe r̄eta sui cuña mbiguai t̄ei imembii reseve. Esepia, cuña mbiguai t̄ei membri ndiyai oyoya cuña ndahei vahe mbiguai membri rese vu mbahe p̄isi āgua yuvireco” ehi. ³¹ Sese, che rivireta, yande ndahei sembiguai t̄ei membri nungar yaico, yande rumo sembireco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuaita pipe pe recōehi āgua

¹ Jesucristo niha ombou yandeu mbiguai t̄ei nungar sui yande s̄e āgua. Sese peyemoviracua mbiguai t̄ei pe reco irīehi āgua.

² Pesendu che ñehe. Che, Pablo, aipo ahe p̄eu: acoi peyembocircuncida ucase, ahese ěgüe ehi t̄ei vahe Cristo pereco. ³ Che amombehu pota irimi p̄eu, que ava

oyembocircuncida uca vahe, vireco niha ocuaita opacatu Moisés porocuita mboyeroya ãgua. ⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepēpi ité Cristo sui. Evocoyase Tūpa porovasasa avei pemocañi tēi peyesui. ⁵ Yande rumo yande querēhisa pipe yayeroya yande reco catupri ãgua rese. Ēgüe yahe Espiritu yande pītiviisa pipe iyavei Jesús rese yeroyasa pipe avei. ⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pītivii eté yande reco catupri ãgua Tūpa rovaque. Co güeraño rumo yande pītivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndahei eté rumo pe poravosar Tūpa ěgüe ehi pēu. ⁹ ¿Ndapeicuai vo acoi aipo ehi vahe: “Chīhimi pan mboapeposa oso panguã rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pīhañemoñeta ãgua che pīhañemoñetasa rupi. Tūpa rumo omboura oñemoirosa que ava pe mbopīhañemoñeta yoavirati uca vahe upe.

¹¹ Che rumo, che rivireta, “Iya yayembocircuncida yande reco catupri ãgua” ahe vitese Jesús reroyasar upe viña, ahese revo ndipoi chira che amotarēhisar judío pãhuve, ahese avei ndipoi chira ñehesa curusu rese Jesús manosa resendar amotarēhimbar ipãhuve viña. ¹² Evocoi ava pe mbopīhañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepepe reseve yuvireco!

¹³ Esepia, pe ore rivireta, Tūpa niha pe renoi mbiguai tēi nungar pe recosa sui pe renose ãgua. Ndahei chira rumo pe remimbotarai tēi apo ãgua, iyacatu rumo peñepītiviiira pe yeaisusa pipe. ¹⁴ Esepia, opacatu evocoi mborocuita imboaviyesa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseño tetei rene catu; peicua catu, avieteramo ěgüe peyese, pe recocuer pemomarapa tiētera.

Yaguatara Espiritu remimbotar rupi, ndahei yande remimbotar tēi rupi

¹⁶ Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tūpa Espiritu remimbotar rese. Ndoyembohe catui eté. Sese ndapeyapo ucai mbahe pe remimbotar aviye vahe peyeupe. ¹⁸ Acoi Espiritu ité pe reroquatase, ahese ndahe iri chiaveira Moisés porocuitavriye peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yembohoyahosa, pīhañemoñeta yoyaēhisa, ²¹ iyavei ambuae ava mbahe pota raisa rese ñemoirosa, savaiposa, yembopietā tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espiritu remimbotar, yande evocoyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboyecua yande cuaita mboaviyesa, ²³ yayemominiñora iyavei yande recorã rese yañearo tuprira. Evocoi nungar yayapose, ndipoi eté que mborocuita pipe yande yeamotarēhi ãgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opīhañemoñeta raisa avei no. ²⁵ Yande yaicose Espiritu pīratasa rese, ahese Espiritu rupi eté yaguatara.

²⁶ Ndayayemboivate ai chira. Esepia, ipipe sui yayeamotarēhi, yaipota rai avei yande mboetasa recocuer nungar yande reco ãgua.

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espíritu rese, peipitívii secocuer moingatu āgua pe recocuer mbegüemisa pipe. Pe-icua catura rumo, aviyeteramo oyoya voi peyemboangaipa uca tiētera. ² Peñepitívii-tívii catu que mbahe yavai rai vahe rese. Ēgüe peyese, Jesucristo porocuita pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico. ⁴ Sese niha ñepei-pei eté yaicua tuprira yande recocuer. Aviyese, evocoyase sese yaviharetera. Ndahei acoi ambuae ava recocuer rese tēi yamboyoara yande recocuer. ⁵ Esepia, ñepei-pei eté yande yacatu yareco yande cuaita imboaviye āgua.

⁶ Acoi oyembohe vahe Tūpa ñehe pīsirosa resendar rese, tomondo ombohesar upe mbahe güembiereco ipitívii āgua.

⁷ Peyembopa eme catu pe ae. Ndipoi chietera que ava viroĩro vahe Tūpa ñemoirosa pīsīhisa pipe. Ēgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espíritu remimbotar rupi, ahe oipisira tecovesa apirēhi vahe yuvireco. ⁹ Evocoyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pēu! ¹² Acoi judío Jesús reroyasar pe mbocircuncida uca potaño tēi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tēi Ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuita yuvireco. Oipota rumo pe mbocircuncida ucara oyemboivate ai āgua pe cuaise evocoi nungar apo yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande pitívii eté Cristo rese yaico tupri āgua. Co rumo aviye vahe ité yandeu: Tūpa yande recocuer mbopiasuse. ¹⁶ Opacatu yuvirecoi vahe co ñehesa che remimombehugüer rupi iyavei opacatu Tūpa upendar supi eté vahe toipisi Tūpa suindar teco tuprisa iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tēi vaherã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pëu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri āgua pëu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoēhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipípe avei yipísuive yande pisi guahirguā Jesucristo yande pĩsirosa pipe güemimbotar rupi. ⁶ Sese yande yasapucái chupe iporoaisusa porañete vahe rese yepi. Ahe ipípe niha yande rovasa Guahir güembiaisu sui. ⁷ Tūpa yande raisu eteprisa pipe yande pĩsiro Guahir ruvi pĩyeresá pipe yande angaipa rese ñero āgua. ⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu, ⁹ iyavei oicua uca güemimbotar yipísuive ndicuasai vahe yandeu co güembiaporā mboaviye āgua. ¹⁰ Oyepotase ahe ari imboaviye āgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povrive.

¹¹ Cristo rese yaicose, Tūpa yande poravo yipísuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pĩsirosa resendar, Cristo peroya pe piha pipe sese peico vaherā. Tūpa ombou güemimombehugüer Espiritu Santo pe piha pipe ‘cheundar ité yuvirecoi’ oya. ¹⁴ Ipisisa pipe niha yaicua yande yaipisi vaherā yandeundar mbahe imoingatupri, acoi Tūpa opase oipĩsiro ava oyeupendar ‘ipípe sui tomboetei che reco ivatesa ava yuvireco’ oya.

Pablo oporandu Tūpa upe mbahecuasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, “Aviye ndeu” che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipípe peicua tupri catura semimboyecua iyavei peicua tupri catura yande Yar. ¹⁸ Ēgüe ahe ité aporandu Tūpa upe pe piha resape āgua rese. Ipípe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pendar iporañete vahe Tūpa upendar yuvirecoi vahe upe. ¹⁹⁻²⁰ Ipípe sui peicua tupri aveira Tūpa pĩratasa ndopai vahe yande seroyasar yaico vahe rese. Co pĩratasa ivaté vahe ité. Ahe pĩratasa Tūpa omboyecua, ombogüerayevisé Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pendar, ivi pendar seco ivate vahe mborerecuarecuar tēi pĩratasa sui iyavei opacatu cūríteindar sui, que oime vaherā sui avei. ²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pĩsiro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñetasa rupi tēi peico iyavei ivate rupindar caruguar rerecuar porocuita tēi avei peroya, ahe Jesús reroyasarēhi ombohe vahe. ³ Yipindar opacatu

yande avei yaguata yande remimbotar rupi tēi yande recocuerai pipe. Yande pihañe-moñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove água. Ahe oporovasasa pipe yande pisiro. ⁶ Yande mbogüerayevi iri avei niha sese. Ipare seseve yande moingue oyepiri ivave ⁷ ‘tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi’ oya. ⁸ Esepia, oporovasasa pipe pe pisiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu. ⁹ Ndahei avei ava rembiapo sui tēi ou vahe. Evocoyase ndiyai chira yayemboivate ai ipipe. ¹⁰ Tūpa niha yande recocuer mohivi Jesucristo rese yande reco água mbahe icatupri vahe apo água. Ahe mbahe icatupri vahe yipisuive Tūpa omoime yande rembiaporã.

Cristo ombou yande reco tupri água

¹¹ Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semimombehu avei ombou vahe judío upe ipitivi água; ndaperecoi Tūpa iyavei ndaperecoi sãrosa pe ñepisiro água co ivi pipe viña. ¹³ Esepia, ahese amombri Tūpa sui peico. Cūrítei rumo Jesucristo rese peico. Esepia, ahe vuvi pipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepe vahe nungar yande yeamotarēhiēhi iri água oyeupe. Yande ñemoirosa niha opa omocañi yande sui güetecuer mondose pipe. ¹⁵ Cristo omomba opacatu Moisés porocuita. Ahe oipota ñepe vahe nungar teco piasu pipe yande reco água, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri água. ¹⁶ Evocoyase ahe ae omanose curusu rese, ombou yandeu yandeyeupe ñero água judío, ndahei vahe judío ñepe vahe nungar Tūpa rupi yande reco água.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombrii vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vahe Tūpa rese Espiritu ñepe vahe pipe. ¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūrítei rumo Tūpa upendar ité peico opacatu ambuae seroyasar reseve. Yande evocoyase ñepe reseve oñemu guasu vahe nungar yaico. ²⁰ Pe inungar tūparo maranehi imopuhambri ihivipirã hari pendar peico; apóstol iyavei Tūpa ñehe mombehusar evocoyase inungar ihivipi yuvirecoi tūparo moviracua água. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oi imopuhambri oyeupi catu-catu iri vahe tūparoguã, ēgüe yahe ipehapri yaico yande Yar upe nara sese ité yande reco água. ²² Sese niha, Cristo rese peicose, pe ambuae viroyasar rese avei sētarã nungar peico. Ipipe Tūpa, oEspiritu pipe, secoira.

3

Pablo cuaita ñehesa pisirosa resendar mombehu água ava ndahei vahe judío upe

¹ Sese, che Pablo, soquendapri aico cohava Jesucristo recocuer mombehusa sui tēi. Ndahei vahe judío peico vahe pe recocuer aviye água rese ēgüe ahe. ² Peicua tupri revo co che poraviquisa Tūpa ombou vahe cheu oporovasasa mombehu água pēu nara. ³ Co ñehesa yipindar ndicuasai vahe güemimbotar resendar Tūpa omboyecua uca vahe cheu, ahe niha aicuachía chíhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava

yuvireco aracahe. Cūrītei rumo Tūpa oEspíritu pīpe omboyecua güembipeha yuvirecoi vahe upe. Ahe sembipeha apóstol, iñehe mombehúsar avei yuvirecoi. ⁶ Evocoi oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropĩsirosa resendar reroyasa pīpe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugüer arachendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opĩratasa pīpe ñehesa pĩsirosa resendar mombehu āgua. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboraviquisa ñehesa aviyé vahe Cristo recocuer resendar mombehu āgua ava ndahei vahe judío upe nara cheu. ⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pīhañemoñetasa yipīndar ndicuasai vahe. ¹⁰ Ēgüe ehi cūrītei oyesuindar aracuasa cua uca āgua viroyasareta recocuer rese opacatu mborerecuar guasu, seco pĩrata vahe íva pendar upe. ¹¹ Ēgüe ehi, Tūpa opīhañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya āgua Tūpa rese yande siquiyēhisa pīpe. ¹³ Sese aní chira, ndapequerēhi iri Cristo rupi pe guata āgua, pe recocuer rese che yemombaraisusa sui. Iyacatu rumo che paraisusa pereco pe yemboviha āgua.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pāve vireco yuvireco, opacatu seroyasareta íva pendar, ivi pendar avei ñepei oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opĩratasa yuvireco chupe oEspíritu pīpe imoviracua āgua’ viya pēu. ¹⁷ Ēgüe ahe ayeroqui pe rese pe pīha pīpe Cristo rereco āgua sese pe yeroyasa pīpe. Iyavei pe poroaisusa pīpe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yepe ndayaicatuí icuapa tupri āgua yaico viña). Ipīpe sui Tūpa tasecoi pe rese.

²⁰ Cūrītei yamboetei yande Ru Tūpa. Esepia niha, ahe opĩratasa pīpe ombouvicha catu itera mbahe yande porandusa sui, yande pīhañemoñetasa sui avei yandeu. Esepia, opĩratasa pīpe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espiritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pīpe, “Peico tuprira pe cuaita rupi Tūpa pe renoisa pīpe” ahe pēu. ² Peyemominira peico pe reco aviyesa pīpe, pe reco mbegüesa pīpe aveira iyavei peñemosañe pe yeaisusa pīpe peyeupe. ³ Peyapo opacatu pe recocuer pīpe peico tupri vite āgua peyepāhuve Espiritu Santo pe pĩtiviisa pīpe, pe reco tuprisa pīpe avei. ⁴ Yaico ñepei nungar Cristo rese iyavei yareco ñepei Espiritu. Ēgüe ehi avei Tūpa yande poravo ñepei guārosa rereco āgua. ⁵ Oime ñepei yande Yar, ñepei yande yeroyasa, oime avei ñepei poroāpiramosa. ⁶ Oime ñepei Tūpa, ahe opacatu yande Ru, opacatu yande cuaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepei-pe mbahecua ombou. ⁸ Sese aipo ehi icuachiapri arachendar pīpe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¡Mara oya aipo ehi: “Oso ivave”? Yipīndar ogüeyi co ivi pīpe. ¹⁰ Acoi ogüeyi vahe co ivi pīpe oso ivate catusave ‘taico opacatu rupi’ oya. ¹¹ Ahe niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pĩsirosa mombehu āgua, ombou avei ambuae upe viroyasar rāro āgua iyavei iporombohe āgua. ¹² Ēgüe ehi ava viroyasar mbohe oyeupe mboraviqui apo ambuae

viroyasar moviracua tupri catu água. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoyase ndahe iri chira chihivahe tēi nungar ova-ova tēi vahe yaico inungarra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, ēgüe ehi ahe yande mboyemboya oyese ñepei vahe nungar. Ñepei-pei yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe, ¹⁸ ndoicatui mbahe renducua tupri água iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetaēhisa pipe yuvireco. ¹⁹ Ndoyuvinochi iri mbahe tēi apo água iyavei oyemondo ité mbahe tēi pipe. Ndosiquiyei eté opacatu güemimbotarai apo água yuvireco. ²⁰ Pe rumo ndapeyembohei eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipindar vahe reya água. Esepia, ahe naporai vahe yande mbopa tēi yande pihañemoñeta rai apo água. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tūpa yande apo yande reco ñvi tupri água yande reco maranehi vaherā supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepei-pei mbahe supi tupri vahe rese peyeupe. Esepia niha, yande opacatu ñepei ava rete resendar nungar yaico.

²⁶ Peyemboangapai rene peñemoirose, iyavei ndiyai peñemoiro ari momba peico. ²⁷ Peipota ucai rene Caruguar upe peyeupe mbahe apo água.

²⁸ Acoi imonda rai vahe, timonda iri eme; toporaviquiño ava iparaisu vahe pñtivii água.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu água yuvireco yande Yar rese. ³⁰ Peyapoi rene mbahe Espiritu Santo mbovhaēhi água. Ahe niha Tūpa ombou yandeu 'toicua ava co cheundar oipisira ari ipa vahe pipe poropisirosa ñepei reseve vahe yuvireco' oya.

³¹ Peyepipi co nungar mbahe sui: piha vñracuasa, mbahe mboasi pñratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña água. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe sñacua vahe chupe.

³ Pe niha Tūpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese.

⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. "Aviye ndeu" peye catuñora rumo Tūpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive.

⁶ Ndapeyembopa ucai chira evocoi nungar ñehesa tecocuer ãgüe ehi tõi vahe upe. Esepia, evocoi nungar mbahe apo pipe sui ou Tũpa ñemoirosa ava seroyasarẽhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pĩtumimbisa nungar mbahe-mbahe tõi pipe. Cũritei rumo peico tesapesa nungar pipe yande Yar rese. Sese peico tupriño ité Tũpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ïvi tuprisave, mbahe supi tupri vahe pipe. ¹⁰ Sese peyembohe catu mbahe Tũpa piha rupindar apo ãgua rese. ¹¹ Peyepipi ité opacatu pĩtumimbisa nungar ava rembiapo ai, ãgüe ehi tõi vahe sui. Iya peicua uca voira co nungar mbahe. ¹² Esepia, ahe sembiapo yemochĩsa ñomipri tõi vireco yuvireco. ¹³ Acoi yamboyecua ucase rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa omboyecua tupri opacatu mbahe recocuer yandeu. Sese aipo ehi: “Peyemopoãse pe oque vahe nungar, peyepipi omano vahe nungar pãhu sui. Ahese niha Cristo pe recocuer resapera” ehi.

¹⁵ Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepei-peï ari yande Yar upe nara pe recoveseve. Esepia, cũritei tecocuer co ïvi pipe mbahe tõi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo ãgua. ¹⁸ Ndahei chira caguar tõi peico, evocoi mbahe ndoporopoisui mbahe tõi apo uca ãgua. Peico catura rumo Espĩritu Santo pe mbohesa pipe. ¹⁹ Peñehe catu Salmo pipe, opacatu Tũpa upendar sapucaisa pipe avei peyeupe; pesapucái, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tũpa upe yande Yar Jesucristo rer pipe yepi.

Omenda vahe cuaitarã mbiguai reseve

²¹ Peyemboyeroia catu ambuae rese Cristo mboeteisa pipe peico.

²² Cuña tomboyeroia omer, inungar yande Yar omboyeroia yuvireco. ²³ Esepia, imer güembireco cuai ãgua secoi, ãgüe ehi avei niha Cristo viroyasar cuai ãgua oico. Viroyasar Pĩsirosar avei secoi, inungar güetecuer ité sereco. ²⁴ Evocoiyase inungar seroyasar omboyeroia Cristo yuvireco, cuña avei niha ãgüe ehira opacatu omer mboyeroia yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ ãgüe ehi yande recocuer moatiro yande angaipa sui i pipe Tũpa Ñehengagüer reroyasave. ²⁷ Iyavei oyeupe yande rerecora yande reco catuprisa pipe iyavei yande reco quihaẽhisa pipe ‘tipo eme que mbahe tõi secocuer rese’ oia, ‘toyuvirecoi cheu nara güeraño ité güeco tuprisave’ ohesa pipe. ²⁸ ãgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua ãgua, oñearo tupri avei. ãgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava osevara vu, osi güembireco rese güeco ãgua; ñuvirío yuvirecoira ñepei ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ ãgüe ehi eté ñepei-peï pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chĩhivahe, pemboyeroia pe yesupa, pe si avei yande Yar raisu pipe. Esepia, ahe niha pe cuaita. ² Co porocuaia yipindar omombehu vahe porovasasa pisi ãgua imboaviyasa pipe aipo ehi: “Pemboeteira pe ru, pe si avei. ³ ãgüe peyese, pe rorivetera iyavei pe reco pãhumbucu catura co ïvi pipe” ehi.

⁴ Iyavei pe iyepi, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroa catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaheã viña. ⁶⁻⁷ Pe poraviqui tupri catu chupe nara, ndahei chira rumo pe repiaseño imboviha água tēi; pe poraviquira rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri água. ⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratīi yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipiratasa rese avei. ¹¹ Peñearo tupri catu Tūpa pīratasa pipe pe yemoviracua água Carugar pe mbopa tēiēhi água. ¹² Esepia, yande ndahei ava ité amotarēhisave yayepīhamoviracua. Yande rumo yayepīhamoviracua espíritu naporai vahe ndoyecuai vahe upe iyavei co ivi pipendar Carugar ipīrata vahe pītumimbisa pendar reroyaēhi água. ¹³ Sese peipisi catu opacatu mbahe Tūpa ombou vahe pēu pe yoepi água. Evocoyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tuprisa pipe. ¹⁵ Peyemoingatu voi Tūpa Ñehengagüer ñeroisa resendar mombehu água yepi. ¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipīpe peyoepira carugar uhu tata resendar nungar pe ātoisa sui. ¹⁷ Poropisirosa inungar sundao āca ndiru, ipīpe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa reroyasar rese yepi. ¹⁹ Peyeroqui avei che rese. Evocoyase Tūpa tombou che ñehe água cheu che siquiyēhisa pipe ñehesa ñepisirosa icuapi ramo vahe cua uca água ava eta upe. ²⁰ Tūpa niha che cuai co ñehesa mombehu água. Ichui tēi cūrītei soquendapri aico. Peyeroqui catu che rese che siquiyēhisa pipe co ñehesa mombehu água.

Ñehesa ipa vahe

²¹ Yande rivri Tíquico, yande rembiaisu, che pītiviisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu. ²² Sese amondo eipeve pēu ore recocuer mombehu água 'ipīpe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri água, iporoaisu água, oyese yeroya água avei. ²⁴ Tūpa tosovasa opacatu yande Yar Jesucristo raisupar saisusa ñepeī reseve vahe pipe. Aipo rupive.

PABLO REMBICUACHIA FILIPO PENDAR UPE FILIPENSES

Pablo mahenduhasa Jesús reroyasar Filipo pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pëu, pe Tūpa upendar Jesucristo rese peico vahe tecua Filipo ve, Jesús reroyasar rārosar uve, seroyasar rese ihañeco vahe upe avei. ² Yande Ru Tūpa, yande Yar Jesucristo tape rovasa pe reco tupri āgua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tūpa upe yepi. ⁴ Iyavei che ayeruresa, ari rupi ayeroqui opacatu pe rese Tūpa upe che vīharetesa pipe yepi. ⁵ Esepia, oyoya yañepitīvii Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che pīhañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave aī, anise que co coti rupi aico mborerecuar rovai co ñehesa pīsirosa resendar repi āgua iyavei amboyecua vaheñā ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri āgua yuvireco” ahe pëu. ¹⁰ Ipīpe sui peicuara mbahe aviye catu vahe poravo āgua yepi; ēgiue peye aveira pe recocuer moatiro āgua peico. Evocoyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye vahe ité Jesucristo ombou vahe pëu Tūpa mboetei āgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoyase opacatu mborerecuar guasu poraviquisa pendar iyavei opacatu ambuae ava oicuapa che roquendas Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerēhi catu Tūpa Ñehengagüer mombehu āgua osiquiyeēhisa pipe. Yande Yar rese evocoyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroirosa pipe tēi. Oime rumo amove ava oñehe tupri Jesucristo rese opīhañemoñeta tuprisa pipe. ¹⁶ Evocoi ava oñehe tupri oporoaisusa pipe, ahe oicua cohava che roquendase yuvireco, “Co ñehesa Tūpa ñehe pīsirosa resendar, ahe supi eté vahe, ndahei temira tēi” ahese. ¹⁷ Evocoi ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi viteseva. ¹⁸ Mara etemo che areco aipo mbahe-mbahe tēi viña. Yepe amove ava ipīhañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tēi sui añepisiora pe yeruresa pipe iyavei che pītiviiira Jesucristo Espiritu. ²⁰ Che aipota ité, asāro avei opacatu che recocuer sui che chīēhi āgua añehe vaheñā opacatu che siquiyēhisa pipe. Evocoyase yepe amanora, anise aicovera, tomboetei catu ava Cristo che recocuer repiase yuvireco. ²¹ Esepia, Cristo che recovesa ité secoi; amanose rumo, aviyeño itera cheu. ²² Aicove viteseva co ivi pipe, aicatura aporaviqui tupri yande Yar recocuer rese. Evocoyase ndaicuai uma revō aviye cheu. ²³ Ndaicatui co ñuvirío che pīhañemoñetasa rereco: amove amano pota che so āgua ivave Cristo piri. Ahe aviye catura cheu viña. ²⁴ Pëu nara rumo aviye catu aicove viteseva co ivi pipe. ²⁵ Sese che aicua aicove vite vaheñā pe pītivii vite āgua, pe guata tupri vite catu āgua iyavei pe vīharete

catu água pe Jesús reroyasa pipe. ²⁶ Evocoyase che rereco vitera peye pe piri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pīratasa resendar pe poreroyasave co ñehesa poropīsirosa resendar rese. ²⁸ Iyavei ndapeyembosiquiyei chira pe amotarēhimbar sui. Evocoyase ahe oicuaara yuvireco chupe ité Tūpa omondora imocañi água; pe rumo Tūpa pe p̄sirora curi. ²⁹ Supi eté ndahei Jesucristo recocuer reroya água güeraño Tūpa oipota p̄eu, sese pe yemombaraisu água avei oipota. ³⁰ Esepia, pe, che avei oyoya tupri yaporaviqui pīrata yande amotarēhimbar p̄ahuve yaico. Iyavei acoi pesepia yip̄indar che aporaviqui pīrata che amotarēhimbar p̄ahuve vichico, iyavei cūrutei peyandu mara ahe aporaviqui pīrata vite ip̄ahuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerēhi, pe mboviha oporoaisusa pipe oico, Espiritu avei secoi pe rese. Peyeaisu tupri iyavei pe yeaisusa pipe peñepitivii. ² Sese che mboviha catu peye: perecora pihañemoñetasa ñepei reseve, oyoya guasu avei peyeaisura, oyoya aveira pe pihañemoñetasa, ñepei reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri água.

⁵ Inungar Cristo pihañemoñeta, ēgüe peye tupri aveira.

⁶ Yepe ahe Tūpa recocuer vireco, “Taseya eme Tūpa recocuer areco vahe ivive che so água” ndehi.

⁷ Opa ité rumo oseya, oyemboava inungar mbiguai tēi ou.

⁸ Ēgüe ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguã ivate catu vahe opacatu ambuae rer sui.

¹⁰ Evocoyase ahe terer ivate catu vahe renduse ‘toñenopiha opacatu iva pendar, ivi pipendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tūpa mboetei água yuvireco.

Jesús reroyasar tesapesa nungar yuvirecoi co ivi pipe

¹² Evocoyase che rembiaisu, yepe che amombri aico pe sui viña, iya rumo pe che reroya vite ité peye inungar aicose pe p̄ahuve cuese. Che aipota peicora písirosa pipeño ité Tūpa mboeteisave ichui pe siquiyesa pipe. ¹³ Esepia, Tūpa ombou pe querēhisa semimbotar apo água. Güemimbotar rupi avei ombou pīratasa imboaviye água p̄eu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoyase peicora Tūpa rahir ndayangaipai vahe ava mbahe-mbahe tēi oyapo vahe p̄ahuve. Ahe ip̄ahuve pe recocuer osesapera, inungar tataendi osesape p̄itumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherã. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihañora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo p̄ihaivi vaheṛã Timoteo pe repia. Ahe omboyevisse ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che p̄ihañemoñetasa rupi tupri imahenduha vahe pe rese pe reco tupri ãgua. ²¹ Esepia, opacatu oseca güemimbotar t̄ei apo ãgua, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che p̄ítivii T̄upa Ñehengagüer mombehu ãgua, inungar ch̄ihivahe oip̄ítivii oyesupa, ãgüe ehi che p̄ítivii oico. ²³ Sese che aipota imondo ãgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso p̄ihaivi vaheṛã che teieté pe repia.

²⁵ Iyavei revo aviye catu co yande rivri Epafrodito amboyevira pe piri ahe pembou vahe che p̄ítivii ãgua mbahe cheu ipane vahe rese. Ahe che ndugüer oporaviqui p̄irata vahe T̄upa upe. ²⁶ Esepia, ahe pe repia pota ité opacatu. Iyavei ahe ehiño oico p̄eu peicuase imbaheasi. ²⁷ Supi eté imbaheasi oico, seni eté omano viña. Ipare rumo T̄upa oiparaisuereco, ndahei ahe güeraño oip̄ítivii, che avei che paraisuereco co vihar̄ehisa yeapi-ap̄iñoēhi ãgua cheu. ²⁸ Sese che amondo pota poyava ité pe piri sese pe yemboviha iri ãgua, che mboviha iri ãgua avei. ²⁹ Peip̄isi tupri p̄eu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe t̄ei porara ãgua che p̄ítivii pipe. Esepia, pe ité ndapeicatui che p̄ítivii peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri ãgua p̄eu. Iyavei aviye catu ité p̄eu nara. ² Peñearo acoi ava cave nungar t̄ei sui, oyapo vahe mbahe t̄ei iyavei güetecuer omomara t̄ei vahe. ³ Yande rumo imbocircuncidapri nungar supi eté vahe T̄upa mboyeroyasar yaico. Esepia, yayerure Esp̄iritu pipe T̄upa upe; yayemboviha avei Jesucristo reroyasar yande recosa rese. Ndahei yande retecuer rese t̄ei yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yip̄indar fariseo recocuer areco. Evocoiyase ayembohe tupri fariseo aracuasa judío porocuita resendar rese vichico. ⁶ Ipipe sui t̄ei eté aseca-seca catu ayapo vaheṛã mbahe opacatu ava Jesucristo reroyasar upe vichico. Co porocuita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviye ité cheu aracaco viña. Cūritei rumo Jesucristo rese aicose, ãgüe ehi t̄ei vahe nungar areco. ⁸ Iyavei opacatu que ambuae mbahe aviñera cheu viña, areco rumo inungar it̄i che Yar Jesucristo recocuer cuasa pipe. Opacatu ahe mbahe aseya Cristo rese che reco ãgua. Supi eté Cristo rereco ãgua areco opacatu ambuae mbahe it̄i nungar t̄ei ⁹ ‘taico sese’ che yapave. Ndahei porocuita mboaviyasa rese t̄ei aseca che reco catupri ãgua, che rumo aseca Jesucristo rese che yeroyasa pipe sui ãgüe ahe vaheṛã. ãgüe ehi eté T̄upa che p̄isi seco catupri vahe nungar Cristo rese che yeroyasa pipe. ¹⁰ Che aipota ité Cristo cua tupri catu ãgua. Iyavei areco pota p̄iratasa icuerayevi agüer resendar cheyese. Iyavei aip̄isi pota iparaisu agüer. Iyavei inungar ahe omano, ãgüe ahe pota avei. ¹¹ ãgüe tahe avei che cuerayevi ãgua omano vahe p̄ahu sui, ahe co che as̄aro vichico.

Pablo osupit̄i pota ité güeco maranehi ãgua

¹² “Asupit̄i ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorã. Esepia, Jesucristo che p̄isi ité oyeupe nara. ¹³ Che rivireta, “Che ae t̄ei co tecocuer ih̄ivi vahe opa ité ayapo vichico” ndahei chira p̄eu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, T̄upa che

renoi ivave che so água aipisi vaherã iporerecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pïhañemoñetara opacatu yande yaracua tupri vahe. Que revo yande pïhañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pēu, cūrítei amboyevi iri che yasehosa pïpe imombehu pēu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirã yuvirecoira curi. Oyemonguerēhi opacatu mbahe tēi apo água rese yuvireco yepi. Ahe niha otūpa nungar ité vireco. Iyavei güeco ivate aisa pïpe oyapo mbahe tēi yande mochi ai vahe yuvireco. Co ivi pïpendar mbahe-mbahe tēi reseño ité ipïhañemoñeta yuvireco. ²⁰ Yande rumo ivave nara ité yaico. Iyavei yasãro ité yaico iva sui ou vaherã yande Pïsirosar, ahe yande Yar Jesucristo. ²¹ Ahe opīratasa pïpe virecora opacatu mbahe opovrive. Ahe opīratasa pïpe avei osecuñaropara yande retecuer ēgüe ehi tēi vahe, ahese inungar ahe setecuer sendi yai, nimarai vahe, ēgüe yahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imboupri peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pïpe yuvireco. ³ Nde niha che pītivii tupri vahecuer che poraviquisa rese eve. Eipītivii evocoi cuña. Esepia, ahe niha oyembopihaviracua ité che pītiviise Tūpa Ñehengagüer pīsiosa resendar mombehu água yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apirēhi vahe resendar pïpe.

⁴ Peyemboviharete ari yacatu rupi yande Yar rese yepi, “¡Peyembovihaño ité!” ahe aipo pēu. ⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri água yandeu.

⁶ “¿Mara ahera pïha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoiyase Tūpa omondora güeco tupriisa pēu, pe Jesucristo rese peico vahe. Co teco tupriisa niha aviye catu ité opacatu ava pïhañemoñetasa sui. Ipïpe sui Tūpa osãrora pe pïha, pe pïhañemoñetasa avei pēu.

Yandepïhañemoñetara opacatu mbahe aviye vahe rese

⁸ Co ipa, che rivireta: yande pïhañemoñetara opacatu mbahe supi tupri vahe rese, poromboetei água rese, mbahe ihívi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pïhañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoiyase Tūpa güeco tupriisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou água cheu. “Sesarai yuvireco che sui” ndahei chira pēu. Pe rumo yipindar ndapeicatui eté che pītivii água peye. ¹¹ “Ipane mbahe cheu” ndahei chira pēu. Esepia, ayembohe che viharete água mbahe che rembiereco rese. ¹² Aicua mara yahe yande paraisusa pïpe yaico, aicua avei mara yahe mbahe rereco ati água. Ayembohe avei che viha água opacatu mbahe oimese cheu, que chehitarose, ndache riepoise, que oimese sumbire vahe mbahe

cheu, que mbahe ipanese cheu. ¹³ Aicatu opacatu mbahe uve che yemoviracua água. Esepia, Cristo ombou che pĩrata água. ¹⁴ Pe rumo peyapo mbahe aviye vahe cheu che pĩtivii eteprisave peye mbahe-mbahe tẽi oimese cheu.

¹⁵ Iyavei pe Filipino pendar peicua avei acoi yipĩndar peipisise pĩsirosa resendar Tũpa Ñehengagũer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe gũeraño pembou pe porerecosa, “Aviye” pe hesa pipe che pĩtivii água. ¹⁶ Iyavei aicose Tesalónica ve, pembou pe porerecosa cheu ñuvirío yupagũer che pĩtivii água. ¹⁷ Ndachepĩhañemoñetai mbahe arocuano tẽi vaheã pe sui. Che rumo aipota Tũpa omboyevira pẽu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi sãacua vahe, iyavei inungar mbahe seropovẽhepri aviye vahe Tũpa upe. ¹⁹ Evocoyase yande Ru Tũpa, ombahe eta porañete vahe sui omondora opacatu mbahe ipane vahe pẽu Jesucristo rese oime vahe. ²⁰ ¡Egũe tehi timboeteisa yande Ru Tũpa! ¡Ahe apirẽhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tũpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pẽu. ²² Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rõtave yuvirecoi vahe, ahe ité avei omondo omahenduhasa yuvireco pẽu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivri Timoteo reseve. ² Co aicuachía pëu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pëu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosé Tūpa ñehe supi eté vahe, aviye vahe p̄sirosa resendar pëu, peyapisaca tupri sese. Ipipe sui peyeroya ivave pe reique āgua Tūpa porerecosa p̄si āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oip̄si tupri avei yuvireco. Inungar acoi pesenduse yip̄ndar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafra pe mbohe. Ahe mb̄ia yande Yar Jesucristo rese oporaviqui vahe ore rupi, ocuaita viroya tupri vahe pe p̄ahuve. ⁸ Ahe omombehu oreu Esp̄ritu pipe pe ore raisusa resendar.

⁹ Sese avei ore aipo nungar rendu ramoséve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Esp̄ritu suindar pipe, senducua tuprisa pipe avei yuvireco’ ore yapave pëu. ¹⁰ Ipipe sui tapeguata tupri yande Yar rupi seroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata āgua güecocuer p̄ratasa pipe sui. Evocoyase oimese que mbahe tēi pëu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peip̄si āgua iporerecosa oime vahe r̄a opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande p̄siro Carugar povri sui. Ēgüe ehi yande reraso Guahir güembiaisu povrive. ¹⁴ Ahe Tahir yande p̄siro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yip̄suive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ēgüe ehi ipipe sui opacatu mbahe yapopri, chupe nara avei. ¹⁷ Ahe oicove yip̄suive aracahe opacatu mbahe reimeēhi vitesese. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yip̄ndar vahe iyavei ahe rane avei ocuerayevi. Evocoyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvi curusu rese Tūpa upe opacatu mbahe moingatu āgua.

²¹ Yip̄ndar pe p̄hañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūritei rumo Tūpa iñero pëu pe reroeyevi oyeupe Cristo mano pipe. Ahe niha Ēgüe ehi Vu rovai ipehapri pe rereco oyeupe nara, pe reco maranehi āgua mbahe aviēhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepēpi chiaveira mbahe

oime vaherã rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuairi, aico co ñehesa mombehu água.

Pablo icuaita Jesús reroyasar rese hañeco água

²⁴ Cūrítei aviha pe rese che yemomborara pipe. Ëgüe ahe iporara che rete rese cohove vichico. Ëgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar p̄tívii água niha Tūpa che cuai. Sese amombehu opacatu ñehengagüer p̄u pe reco tupri água rese. ²⁶ Ahe ñehesa aracahe suive ndicuasai vahe ité. Cūrítei rumo Tūpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherã teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri água ore aracuasa pipe ‘toyuvirecoi tupri ité Cristo rese Tūpa rovai’ ore hesa pipe.

²⁹ Co rese niha che aporaviqui etepri opacatu Cristo p̄ratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei ² ‘toyemonguerēhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu p̄u. Esepia, ichui avei peicua tuprira co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua água, mbahe renducua tupri água avei. ⁴ Aipo mbahe amombehu p̄u ava oñehe tupri aisa pipe tēi pe mbopaēhi água. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ñvisa pipe, ndapeyepēise co coti rupi Jesucristo reroyasa sui. Sese che mboviharreteño ité peye.

Jesús suindar tecocuer piasu

⁶ Evocoyase inungar acoi peipisi Jesucristo pe Yarã, Ëgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tūpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe Ëgüe ehi tēi vahe, ava suindar tēi yembohesa, ivi pipendar ava seco ivate catu vahe p̄hañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tūpa reco oyese. ¹⁰ Evocoyase pe pereco Tūpa reco Cristo rese peicose. Ahe opacatu mborerecuar ivi pipendar iyavei iba pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocuca pe recocueraí pe sui. ¹² Pe ãpiramosa pipe ndoyavii pe recocueraí ñotimbri Cristo reseve. Ëgüe ehi avei ndoyavii pe recocuer ocuerayevi vahe seseve avei, peyeroyase Tūpa p̄ratasa rese. Ahe niha ombogüerayevi vahe Guahir omano vahe p̄ahu sui. ¹³ Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese p̄u. ¹⁴ Ahe yande cañi rãgüer rumo opa omboepi. Esepia, yande iporocuaíta pipe yaico imboaviye água viña, evocoyase imocañipri tēi yaico ipovrive viña; ombou rumo Guahir curusu rese yatica água yande cañi rãgüer sui yande renose água. ¹⁵ Ëgüe ehi ahe omano pipe curusu rese caruguar, ipovri pendar mborerecuareta reseve secopi. Ëgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iba pendar mbahe pe recocuer upe nara

¹⁶ Evocoyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipindar vahe, “Ëgüe

ehira Cristo ou” hesa tēi yandeu. Co rumo Cristo ité cute. ¹⁸ Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoyase ahe omboyemboya tupri oyese, ñepei vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoyase ndahe iri co ivi pipendar pihañemoñetasavrive peico. ¿Mahera evocoyase peroya vite co ivi pipendar porocuita ãgüe ehi tēi vahe, ²¹ inungar “pepocoi rene co mbahe rese, pahui rene evocoi nungar mbahe” ehi tēi vahe? ²² Opacatu co nungar porocuita ocañi tēi vahe. Esepia, ahe ava remimbotar tēi yembohesa, iporocuita tēi avei. ²³ Co mbahe aviye angahu aracuasa supi eté vahe. Esepia, seroyasar ahe ehiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ãgüe ehi tēi vahe. Esepia, ndayande pítivii eté yande yepipi água yande remimbotarai sui.

3

¹ Cūrítei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esepia, cūrítei omano vahe nungar peico pe recocuerai upe. Iyavei Cristo reseve peico Tūpa piri, inungar-ra ivave viña. ⁴ Cristo niha yande recovesa ité secoi. Sese ahe oyevi irise curi, ãgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyañhisa pipe yuvireco. ⁷ ãgüe peye avei yipindar pe recocuerai pipe peico. ⁸ Cūrítei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombhui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipípe peyembohe ari yacatu yande Aposar Tūpa recocuer rese peico, icua tupri catu água. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidaprii aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ ãgüe peyera peñemosa oyeupe, peñero aveira opacatu oyeupe acoi pe pãhu pendar oñemoirose pēu. Inungar Cristo ñerosa ombou yandeu, pe avei ãgüe peyera ambuae ava upe. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri água. Esepia, co rese Tūpa pe renoi ñepei ava nungar pe reco água. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe

peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rembireco. Perecoi rene pihavĩracuasa pipe.

²⁰ Pe avei no chĩhivahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepia, aviyeteramo niquerẽhi iri chira ocuaise pẽu.

²² Pe avei no mbiguai: peroya tupri avei pe rereciar co ivi pipe yepi. Aní chira ahe pe repiaseño pembovĩhara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei. ²³ Opacatu mbahe peyapo vahe, peyapo pe querẽhisave yande Yar mbovĩha ãgua. Ndahei chira ava mbovĩha ãgua tẽi. ²⁴ Esepia, peicua tupri co: yande Yar omboura oporerecosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai repri. Tūpa niha nomboyoaviratii yande raisu.

4

¹ Pe avei sereciar: peyapo mbahe ihĩvi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rereciar ivave.

² Iyavei no opacatu peyeroqui catu ari rupi pe mahemohasa pipe. “Aviye ndeu” peye Tūpa upe. ³ Peyeroqui avei ore rese. Tore pĩtivii Tūpa oñehengagüer mombehu vite ãgua. Toroñehe vite avei co ñehesa Cristo resendar Tūpa omboyecua ramo vahe rese yandeu. Sese tẽi niha co che roquendas. ⁴ Evocoyase peyeroqui che rese, tamombehu tupri catu co ñehesa opacatu upe senducua tupri catu ãgua. Ëgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tuprisa pipe peñehera yepi. Iyavei peicua tupri ñehesa mboyevi ãgua ñepeipei ava uve.

Ñehesa ipa vahe

⁷ Co yande rivri, yande rembiaisu, Tíquico, che pĩtivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pẽu. ⁸ Sese co amondo pẽu ore recocuer cua tupri ãgua, pe monguerẽhi catu ãgua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirio mbia omombehura pẽu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pẽu iyavei Marcos, Bernabé rihir. Pe revo peicuaño Marcos so ãgua eipeve; osose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pẽu. Co güerañomi Jesús reroyasar pãhuve judío oporaviqui vahe che rupi yuvireco Tūpa mborerecuasave nara. Ahe niha che mbovĩha yuvireco yepi. ¹² Epafra avei omondo omahenduhasa pẽu. Ahe pe recua pendar ité, Jesucristo rembiguai. Ahe oyeroqui vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave. ¹³ Che aicua ité secocuer. Ahe oyemboaquí oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pẽu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: “Emboaviye tupri Tūpa nde cuaisa” ere.

¹⁸ Che Pablo aico. Che ité aicuachía co che mahenduhasa p̃eu. Tapemahenduha vite che roquendasave che rese. Aviye p̃eu. Yande Aposar tape p̃t̃ivii. Aipo rupive.

PABLO REMBICUACHIA YIPINDAR VAHE TESALONICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano reseve iyavei Timoteo, aiciachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pndar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruesa pipe. ³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tüpa upe, iyavei peñemosaño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai. ⁴ Ore rivireta, Tüpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa p̄sirosa resendar, ndahei ñehesa oreyesuindar tēi oromombehu pëu; Espiritu Santo reco p̄ratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe p̄huve oroicose, oroico tupriño ité, orosecaño avei pe reco tupri água.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe preparaису mbahe-mbahe tēi p̄huve peico viña, peipisiño ité rumo co ñehesa pe vihasa pipe Espiritu Santo ombou vahe pëu. ⁷ Evocoya pe reco pipe pemboyecua catu pe reco catuprisa Tüpa reroyasar Macedonia pndar upe, Acaya pndar upe avei. ⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tüpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe p̄ri, pe ore p̄si tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. ¹⁰ Omombehu avei pesāro vahe Tüpa Rahir Jesús iyevi água iva sui yuvireco oreu, acoi Tüpa ombogüerayevi vahe omano vahe p̄hu sui. Ahe niha yande p̄sirora Tüpa ñemoirosa ip̄rata vahe ou vahe rā sui.

2

Tesalónica pndar yeroyasa mboyecua

¹ Ore rivireta, pe niha peicua ore so agüer pe p̄ri ndahei égüe ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuvireco tecua Filipino ve. Tüpa rumo ore p̄tivii oñhengagüer p̄sirosa resendar mombehu água opacatu ore siquiyeēhisa pipe ore amotarēhimbar p̄huve. ³ Esepia, ndoroyavii eté ore ñehe iyavei ndoroñehei ore p̄hañemoñeta raisa tēi pipe pëu, ndahei avei ore porombopa água oroñehe. ⁴ Tüpa rumo ore recoña, ichui ore cuai oñhengagüer p̄sirosa resendar mombehu água; égüe ehi ore ñehe, ndahei ava tēi mboviha água. Tüpa yande p̄hañemoñetasa oicua vahe rumo oromboviha. ⁵ Peicua niha ore ndoroñehei ñehesa icatupri catu vahe tēi rese pe mbopa água, iyavei ndahei guarepochi potasave tēi oroñehe tupri. Tüpa niha oicua. ⁶ Ore ndorosecai eté ava ore mboetei catu água pe, que ambuae ava eta avei no. ⁷ Ehi oroyandu ucara ore mborerecuasa Jesucristo ore cuaisa pëu viña; oroyemominiño rumo oroico pe p̄huve inungar acoi cuña osāro tupri vahe omembri imboacua. ⁸ Egüe orohe avei ore pe raisu. Sese ndahei Tüpa Ñehengagüer año oromondo pota pëu, ore recocuer avei no. Esepia, opoaisú ité. ⁹ Ore rivireta, peyemomahenduha acoi ore paraису agüer rese, ore poraviqui agüer rese avei ari, p̄tu reseve. Ndahei que ñepe mañeco tēi água mbahe rese oromombehu Tüpa Ñehengagüer oroico pëu.

¹⁰ Pe niha ore repia peye Tūpa avei oicua, ore reco tuprisa, ore rembiapo supi eté vahe, ihĩvi vahe pe Jesús reroyasar pãhuve. ¹¹⁻¹² Peicua niha, inungar mbia guahir upe, ěgüe orohe pe monguerẽhi, pe mbovĩhasa avei ñepei-peĩ opacatu. Iyavei oromondo pe cuaitarã pe reco tupri āgua Tūpa remimbotar rupi. Ahe niha oñehe pẽu peico vaherã sese imborerecuasa porañetesave.

¹³ Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pẽu, peipisi ité, “Co Tūpa ñehe, ndahei ava tẽi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare. ¹⁴ Ore rivireta, acoi cuese peiporara mbahe-mbahe tẽi pe mu eta pãhuve peicose; ěgüe ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarẽhisave yuvireco. ¹⁵ Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotarẽhimbar tẽi yuvirecoi. ¹⁶ Esepia, acoi oroñehe potase ava ndahei vahe judío upe iñepisiro āgua rese, ahe rumo ndoipotai yuvireco oreu. Ipĩpe sui oyemboangaipa catu yuvireco. Cũritei rumo Tūpa ñemoirosa ipĩrata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, “Ahé” oroheño ité pẽu. Iyavei orequerẽhiño ité yepi oroso iri vaherã pe repia. ¹⁸ Orosãha tẽi ore so āgua pe repia yepi; che Pablo teieté setá yupagüer tẽi aso pota. Carugar rumo ndoipotai. ¹⁹ ¿Ava sui piha orosãro mbahe aviye vahe? ¿Uma ore vihasa? ¿Uma ore mbovĩharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovĩhara peye, iyavei oroviha catura pe rese no.

3

¹⁻² Evocoyase che nañemosa irise pe repiaẽhi rese, chepihañemoñeta yande rivri Timoteo mondo āgua pe repia; “Che güeraño tapita Atenas ve” ahe. Esepia niha, ahe oporaviqui vahe Tūpa upe ore rupi, omombehu vahe co ñehesa pĩsirosa resendar Cristo suindar ou vahe. Ahe amondo pẽu pe moviracua catu āgua, pe monguerẽhi catu āgua avei peyeroa catu vaherã Cristo rese. ³ Evocoyase tipo eme oyembosiquiye vahe co mbahe tẽi pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico vitese pe pĩri, “Yande paraisu rane itera mbahe yavai vahe” orohe voi eté acoi pẽu. Ahe niha cũritei peicua. ⁵ Evocoyase che nañemosa irise, amondo Timoteo ‘¿yuvirecoiño ité piha Tūpa rese?’ che yapave. Che asiquiye, “Aviyeteramo Carugar omondora mbahe tẽi pipe yuvireco” ahe ‘ore poraviqui agüer evocoyase ocañi tẽira’ che hesave.

⁶ Cũritei rumo Timoteo oyevi Tesalónica sui, güeru ñehesa aviye vahe pe resendar oreu pe Tūpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tẽi peye no; inungar ore pe repiasa pota tẽi avei. ⁷ Sese, ore rivireta, ore paraisusa pãhuve ore mbovĩharete peye, co oroicuase pe reco tupri Tūpa reroyasa pipe. ⁸ Cũritei ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera piha, ‘Aviye ndeu’ yande he tupri catu āgua Tūpa upe?” orohe pe reco tuprisa rese, iyavei ore yemboviha catura rese avei no ¹⁰ pĩtu, ari rupi oroporandu Tūpa upe ore so āgua pe repia eipeve iyavei Tūpa reroyasa ipane vite vahe mboaviye tupri āgua pẽu.

¹¹ Iyavei ore oroipota ore pĩtiviira yande Ru Tūpa, yande Yar Jesucristo avei ore so āgua pe pĩri. ¹² Evocoyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. ¹³ Ipĩpe sui tape moviracua pe reco maranehi pipe pe mbahe aviẽhisave yande Ru Tūpa rovai acoi oyevisse yande Yar Jesús opacatu ovoya reseve. ěgüe tehi pẽu.

4

Teco tupri Tūpa oipota

¹ Ore rīvireta, cūrītei oroñehe pota pēu pe cuaitarā rese yande Yar Jesús rer pipe: inungar cūrītei pe recocuer pereco, ěgüe peyeño ité catu peico ore pe mbohe agüer rupi Tūpa mboetei āgua.

² Pe niha, peicua acoi ore pe mbohe agüer yande Yar Jesús rer pipe. ³ Esepia, Tūpa oipota pe reco maranehi āgua oyeupe. “Tipo eme que ñepei oyemboaguasa tēi vahe” ehi. ⁴ Iyavei peico tupri pe rembireco rese pe reco ĭvisa pipe Tūpa remimbotar rupi, iyavei pemboetei tuprira sereco yepi. ⁵ Peicoi rene ava Tūpa ndoicuai vahe reco pipe pe remimbotar tēi apo āgua. ⁶ Tipo eme avei oyapo vahe co nungar angaipa yande rīvri reco momara āgua tēi. Esepia, Tūpa omondora oñemoirosa ipīrata vahe evocoi nungar ava upe. Evocoi niha yĭpĭsuive oromombehu vahe pēu. ⁷ Esepia, Tūpa niha yande poravo yande reco maranehi āgua, ndahei angaipa pipe yande reco āgua tēi. ⁸ Sese acoi ndosendu potai vahe co yembohesa, ndahei eté ava tēi viroĩro, ahe rumo Tūpa ité viroĩro yuvireco acoi ombou vahe oEspíritu Santo pēu.

⁹ Iyavei co peyepāhuve pe yeaisusa rese, ndaicuachía iri chira pēu. Esepia, Tūpa ité niha pe mbohe pe yeaisu āgua opacatu. ¹⁰ ěgüe peye niha opacatu yande rīvireta co Macedonia rupindar raisu peico. Co catu peyapo che rīvireta: pe mbouvicha vite catu pe poroaisusa. ¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi pēu cuese. ¹² Evocoyase pe mboyeroyara ava ndahei vahe Jesús reroyasar yuvireco; iyavei ěgüe peyera mbahe pēu ipaneēhi āgua avei no.

Oyevira yande Yar co ivi pipe

¹³ Ore rīvireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoyase yande avei yaroya Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pēu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira ĩva sui ou mborerecuar ĩvate vahe ñehesa pipe; ahese oyeendura Arcangel ñehe iyavei Tūpa remimbi moñehe pīratasa. Ahese seroyasar omano vahecuer rane opūhara yuvireco. ¹⁷ Ipare voi yande yaicove vite vahe, serasopri yaicora opacatu ĩva quiha rese co yande Yar rovaĩchi āgua ĩvitu rupi. ěgüe yahera yande Yar piri yaico vahe rā apirēhi. ¹⁸ Sese peyemonguerēhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu. ² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pītu pipe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirası aviyeteramo tēi, ěgüe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. ⁴ Pe rumo, ore rīvireta, ndahei pītumimbisa pendar nungar peico. Evocoyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pītumimbi pipendar yaico. ⁶ Evocoyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pītu pipe; iyavei acoi osavaipo vahe, osavaipo avei pītu pipe yuvireco. ⁸ Yande rumo yaico vahe Tūpa poroesapesa pipe. Evocoyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru

guarepochi apopri yuvireco oãca repi ãgua, yande avei tayareco yande remiaro yande ñepisiro ãgua. ⁹ Esepia niha, Tũpa yande poravo ndahei yaico vaherã inemoirosa pĩpe nara; ahe rumo yande poravo yasupiti vaherã ñepisirosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco ãgua opacatu yande recove vitesse, yamanose avei. ¹¹ Sese peyemonguerẽhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroysar oico

¹² Iyavei no, ore rivireta, pemboyeroa acoi oporaviqui vahe yuvireco pe pãhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

¹³ Pemboyeroa iyavei pesaisu tuprĩra iporaviquisa rese. Peico tupri avei peyepãhuve.

¹⁴ Iyavei ore rivireta, pe cuaisa: pemboaracua acoi ndoporaviqui potai vahe imbohe catu ãgua. Iyavei pemonguerẽhi acoi niquerẽhi iri vahe. Peipĩtivii avei acoi ndoyemoviracuai vahe Tũpa rese güeco ãgua. Iyavei peñemosañõ opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tẽi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihanõra ari yacatu peico. ¹⁷ Iyavei peyeroquira ari yacatu rupi no. ¹⁸ “Aviye ndeu” peyera Tũpa upe opacatu mbahe rese. Esepia, ahe niha Tũpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espĩritu Santo oyapo pota vahe pe rese.

²⁰ Ndapeyamotarẽhii chira Tũpa ñehe imombehupri. ²¹ Pesãhapa rane opacatu mbahe. Ichui peĩpisira mbahe aviye vahe peyeupe. ²² Peyepipi opacatu mbahe naporai vahe sui.

²³ Tũpa acoi ombou vahe teco tuprisa yandeu tape pehapa tupri oyeupe nara. Iyavei tosãro tupri opacatu pe espĩritu, pe hã, pe rete avei pe reco maranehi ãgua co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroysar rese

²⁵ Ore rivireta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pĩpe.

²⁷ Che opocuai yande Yar rer pĩpe: peyeroqui co cuachiar opacatu yande rivireta upe.

²⁸ Yande Yar Jesucristo tape rovasa tupriño pe rereco. Aipo rupive.

PABLO REMBICUACHIA IMONŪVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pëu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou pëu oporovasasa pe reco tupri āgua yande Ru Tūpa, yande Yar Jesucristo avei.

Tūpa omombaraisura viroyasarēhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pëu, peñemosañō chupe pe Cristo rese pe yeroyasa pipe. ⁵ Co niha omboyecua Tūpa reco ñvisa ava upe. Esepia, ipipe pe rereco omborerecuasave pe reique āgua. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ēgüe ehi vaherā chupe. ⁷ Pe rumo imombaraisupri peico vahe, Tūpa omondora pe pituhu āgua, ore pituhu āgua avei, acoi yande Yar Jesús oyevise tata rendigüer pāhuve iva sui opacatu güembiguai seco pīrata catu vahe reseve. ⁸ Ahe oura opacatu Vu Tūpa reroyasarēhi mombaraisu āgua iyavei oyesuindar ñehesa poropñisirosa resendar rendu tēisar mombaraisu avei. ⁹ Evocoi iparaisura yuvireco, imocañipri yuvirecoira apirēhi. Iyavei imoyepepisara amombri yande Yar reco pīratasa porañetesa sui. ¹⁰ Acoi ouse ahe ari pipe, yande Yar imboeteiprira opacatu seroyasar pāhuve; ipāhuve pe peicora. Esepia, peroya ité oromombehu vahe pëu.

¹¹ Co rese oroyeroqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyeroqui chupe, tomboaviye güeco pīratasa pipe opacatu ñepepei-mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombehu potami pëu opacatu acoi yande Yar Jesucristo yevisa resendar yande monuha vaherā oyese. ² Peicua catu, tapepihañemoñeta rerova eme iyavei peyembosiquiyei rene que ava “che añehe Espíritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pëu. ³ Peicua catu peyembopa ucai rene ñepepei yepe ava upe. Esepia, yipindar ari Jesucristo yu āgua renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecua ava yangaipa guasu vahe. Ahe ocañi tēi vaherā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe pāhuve aico vitesese cuese? ⁶ Co imombitasar peicua cūritei. Ihari oyepotase voi, oyemboyecua. ⁷ Co porocuaita amotarēhisar ndoyemboyecua vitei vahe rembiapo oime cūritei. Co güerañō ipane imombitasar renose āgua ipāhu sui, ⁸ ahese voi oyemboyecua acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyevise curi. ⁹ Yucasa renonde rumo, acoi ava yangaipa guasu vahe oura Caruguar

pīratasa pipe; güerura güeco pīratasa tuvicha vahe; omboyecua angahura poromondiisa.
¹⁰ Oyapo angahura opacatu mbahe tēi oporombopa āgua oico ava ocañi tēi vahe rā upe. Esepia, evocoi ava ndosendu potai porombohesa supi eté vahe oñepisiro āgua yuvireco.
¹¹ Sese Tūpa oseyara co porombopasa reroya āgua yuvireco ¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyembovíha catu vahe mbahe-mbahe tēi rese yuvireco’ oya.

Iporavopri ipĩsiropirã

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yipisuive pe pĩsiro āgua pe reco maranehi āgua rese Espíritu pipe iyavei porombohesa supi eté vahe reroya āgua.
¹⁴ Sese niha, Tūpa oñehe yandeu yande piha pipe co ñehesa pĩsiosa resendar pipe, ore oromombehu vahe pēu ‘tovireco che Rahir Jesucristo reco porañetesa’ oya.
¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi pēu. ¹⁶ Yande Yar Jesucristo teieté, yande Ru Tūpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro āgua, ¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vahe rā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyepota pe pāhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ĩvi vahe. Ahe pe recocuer moviracuara iyavei pe rārorā mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vahe rā rese acoi ore pe cuai agüer. ⁵ Yande Yar tape pĩtivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pāhuve, peyepipiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña āgua peico. Ore oroicose pe pāhuve, ndoroico tēi, ⁸ ndorohu tēi avei ambuae tembihu imboepipirēhi. Ore rumo que ñepe mañeco tēiēhi āgua rese oroporaviqui ore cuerai rane ité ari, pĩtu reseve. ⁹ Iya ité niha mbahe rese ore porandu āgua pēu ore pĩtivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitesse pe pāhuve, oromondo pe cuaitarã: acoi ndoporaviqui potai vahe, ahe tocaru eme. ¹¹ Oroyandu amove aipo pe pāhu pendar yuvirecoiño tēi ndoporaviqui vahe. Evocoi omañeco tēi ambuae vahe recocuer. ¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.
¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochĩ ahe. ¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri āgua pēu ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité pēu. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pīpe ereico. Che niha Jesucristo apóstol aico, yande Pĩsĩrosar Tūpa porocuita rupi iyavei yande Yar Jesucristo porocuita rupi. Ahe niha yande remiario. Tombou yande Ru Tūpa, yande Yar Jesucristo oporovasasa, oporoparisuerecosa ndeu nde reco tupri āgua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so āgua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pīhañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ēgüe ehi tēi vahe rese avei. Ahe ichui osē yeacasa naporai vahe yepi; ndayande pĩtivii rumo Tūpa remimbotar reroya tupri āgua rese.

⁵ Sese co amondo porocuita ndeu yande yeaisu āgua yande pīhañemoñeta catuprisa pīpe, yande reco yapisaca tuprisave, iyavei yande yeroyasa supi eté vahe pīpe. ⁶ Esepia, amove ava oime ichui oyearacua mocañi oñehe-ñehe tēisa pīpe yuvireco. ⁷ Oporombohe pota tēi Tūpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tūpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua āgua, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nombotei vahe Tūpa iyavei chupendar pīhañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocuva tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe poropĩsirosa resendar rese. Tūpa sovasapri secoi, ahe che cuai vahe sese.

Pablo oparaisuerecosa rese, “Aviye ndeu” ehi Tūpa upe

¹² “Aviye ndeu” ahe yande Yar Jesucristo upe. Ahe niha ombou pĩratasa co che ñehe āgua. Esepia, ahe oyeroya che rese. Sese che mondo oñehengagüer mombehu āgua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pīpe, Tūpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ēgüe ehi yande Yar ombou catu oporovasasa che rese iyavei ombou che oyese yeroya āgua iyavei che poroaisu āgua Jesucristo rese che recosa pīpe.

¹⁵ Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pīpe ava yangaipa vahe pĩsiro āgua. Che rumo acoi ivate catu vahe yipindar aico ipāhuve. ¹⁶ Sese Tūpa che paraisuereco che rese rane Jesucristo reco mbegüe tuprisa mboyecua āgua. Ēgüe ehi che recocuer upe ambuae ava seroya āgua. Ipīpe sui osupitira tecovesa apirēhi vahe yuvireco. ¹⁷ ¡Sese yamondo imboeteisa apirēhi yande Rereciar ndopai vahe upe! ¡Ahe nomanoi vahe, ndayasepia vahe, ahe ñepe vahe Tūpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua āgua mbahe tēi recopi āgua Cristo rese nde yeroyasa pīpe nde pīhañemoñeta catuprisa pīpe avei. Supi tupri cuese Tūpa reroyasar oñehe yuvireco nde rese serer pīpe. Amove

ava opihañemoñeta tupri reroyaëhisave, omocañi uca Tüpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Caruguar povrive ‘evocoyase toicua tiñehe-ñehe tēi eme Tüpa upe yamotarëhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerëhi pe yerure ãgua, peporandu, pemondo avei “aviye” pe hesa Tüpa upe opacatu ava recocuer rese. ² Iyavei peyerure opacatú mborerecuar rese. Evocoyase tayareco yande reco tupri Tüpa mboetei tuprisa pipe, yande poromboeteisa pipe avei. ³ Co aviye ité; ahe niha yande Písirosar Tüpa remimbotar. ⁴ Supi eté ahe oipota opacatu ava ñepisiro iyavei co porombohesa supi eté vahe cua tupri ãgua. ⁵ Esepia, ñepeño ité Tüpa, iyavei ñepeño ité ava oicatu vahe yande reraso Tüpa upe: ahe Jesucristo. ⁶ Esepia, Jesucristo omano opacatu ava yangaipa vahe repirã ipísiro ãgua. Ahe imombehusa chupendar ari iporavopri rupi. ⁷ Sese che supi eté apóstol, icuai pri aico Tüpa Ñehengagüer mombehu ãgua, ava ndahei vahe judío mbohe ãgua, co yeroyasa rese iyavei supi eté vahe rese. Supi eté ndopombopai.

⁸ Evocoyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiëhisa pipe, oyeacaëhisa pipe avei. ⁹ Iyavei cuña toyemonde tupriño turucuarño tēi pipe yuvireco. Aní chira rumo oãca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepí rusu vahe tomondo eme yuvireco. ¹⁰ Iyacatu rumo yuvirecoi tuprira güembiapo aviye vahe pipe, inungar cuña oyemondo tupri vahe Tüpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehii pãhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tüpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui oviapi angaipa pipe. ¹⁵ Oñepisiora rumo ocuaita mboaviyesa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tüpa reroyasar rãrosar cuaita

¹ Iyavei co supi eté: acoi amove oico pota vahe Tüpa reroyasar rãro ãgua, ahe oipota mboraviqui aviye catu vahe. ² Sese acoi vireco vahe ocuaita Tüpa reroyasar rãro ãgua, ahe secoi tuprira mbahe aviye vahe pipe yepi. Ipípe ava noñehei chira yamotarëhisave. Iyavei omendara ñepeñi cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güëtave. Oicua aveira ava mbohe tupri ãgua. ³ Iyavei ndahei chira caguar tēi. Ndosecai chiaveira ovava ãgua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tuprira güëta pipendar rãro ãgua. Ombohe aveira guahir iporeroya ãgua, iporomboetei ãgua avei. ⁵ Esepia, acoi ndoicuai vahe güëta pipendar rãro, ¿mara ehira evocoyase Tüpa reroyasar rãro? ⁶ Tüpa reroyasar rãrosar rumo ndahei chira oipisi ramo vahe Tüpa opíha pipe. Esepia, aviyeteramo oyemboivate ai tiëtera. Ipípe sui imocañipri avei secoira Caruguar nungar. ⁷ Iyavei oyecua uca tupri ranera Tüpa reroyasarëhi pãhuve. Ahese ndipoi chira imboeteiëhisa iyavei ndoviapi chira Caruguar povrive.

Tüpa reroyasar rese ihañeco vahe cuaita

⁸ Iyavei Tüpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. ¹⁰ Iyavei secoãhasa ranera. Acoi osë tuprise, ahese toyuvirecoi

Tūpa reroyasar rese ihañeco vaheṛā. ¹¹ Iyavei sembireco yuvirecoi aveira oporomboeteisa pipe, nimahechiroi chira, osãro tuprira güecocuer yuvireco, iyavei imboyeroy-apri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeño itera sembireco, oicua aveira guahir rãro tupri ãgua, güeta pipendar rãro ãgua avei. ¹³ Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyeẽhisave avei secoira Jesucristo reroyasa pipe.

Tūpa reco oyecua ramo vahe reroya tuprisa

¹⁴ Che aso pihaivi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ãgua ava Tūpa rese yuvirecoi vahe pãhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua ãgua. ¹⁶ Supi eté tuvichá etepri Tūpa reco oyecua ramo vahe reroya tuprisa:

Cristo oyemoporẽhi yande reco nungar pipe yandeu.

Ipare Espiritu pipe imboyecuasa secocuer supi tupri vahe.

Iyavei Tūpa rembiguai rembiepiave secói.

Ichui imombehusa opacatu ivi rupi; opacatu rupi avei seroyasa.

Iyavei ipisipri secói ivave nara.

4

Oimera ava oyepipi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepipira Tūpa rese oyeroyasa sui yuvireco. Omboyeroyara espiritu oporombopa tẽi vahe, porombohesa Carugar suindar avei. ² Oyapisacara ava aipo ehi tẽi vahe rese, semirañete ai vahe ñehe rese avei yuvireco. Ëgüe ehira opihañemoñetasa mocañi tẽi yuvireco. ³ Co ava niha, “Aní chira yamenda” ehi tẽi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu mbahe Tūpa rembiapo, aviye ité. Ahe ndiyai chira yaroño yaipisise, “Aviye ndeu” yande hesa pipe chupe. ⁵ Esepia, Tūpa oñehe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapiscacai chira rumo acoi mbahe aracahendar co ivi pendar yapisaca tẽisa rese. Eyembohe catu yande Yar uveño ité nde reco ãgua. ⁸ Esepia, yepe aviyeño chĩhi yande retecuer yamoviracua viña, yande Yar upe yande reco ãgua aviye catu opacatu yande reco uve nara. Esepia, ahe yande pĩtivira yande recove ãgua cūrítei iyavei curi yande recove ãgua. ⁹ Co supi eté vahe, evocoyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Pĩsirosar, iyavei viroyasar Pĩsirosar catu ité secói.

¹¹ Co porombohesa eremombehura ava pãhuve, erembohe aveira sese. ¹² Tipo eme ava nde roeroño vahe chĩhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer marañehi pipe. ¹³ Che yepota renondeve, eyeroqui catu Tūpa Ñhengagüer rese opacatu ava rovaque. Emonguerẽhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecua ombou vahe sui. Esepia, ava Jesús reroyasar rãrosar upe Tūpa omombehuse nde cuaitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua

sese ité nde hañeco. Acoi ãgüe erese, ipĩsiropri ereicora; nde ñehe rese oyapisaca vahe avei ipĩsiropri yuvirecoira.

5

Mara ehira Jesús reroyasar oyepãhuve yuvireco

¹ Eremboaracua pĩrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chĩhivahe upe ereñehe tuprĩra secocuerã rese inungar nde rivrĩ upe. ² Cuña otĩaro vahe upe avei ereñehe tuprĩra inungar nde si ité sereco; iyavei cuñatai eremboaracua tuprĩra inungar nde reindrĩ ité ererecora opacatu nde reco catuprĩsa pipe.

³ Acoi imer mano vahecuer ité ereipĩtivĩra que mbahe ipane vahe rese. ⁴ Que oimese imembri, anise que semiaro, toyembohe rane ocuaita mboaviye ãgua yuvireco chupe. ãgüe tehi guaisu mboyevi chupe, ahe niha Tũpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tũpa rese, iyavei oyeroquiño ité arĩ, pĩtu yacatu yepi. ⁶ Osecase rumo mbahe güemimbotar yuvireco, ahese omano vahe tẽi secocuer yuvirecoi. ⁷ Eyocuai tuprĩ ava co ñehesa rese; ichui ndahei chira ava ñehedora tẽi yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tũpa rese oyeroyasa rupi iyavei mbahe tẽi catu Jesús reroyasarẽhi sui.

⁹ Icuachiasara rumo ambuae cuña imer mano vahecuer pãhuve ivate catu sesenta sui iharaviter vahe, iyavei ñepeño ité omer vireco vahecuer. ¹⁰ Icuaprĩra secocuer icatuprĩsa rese, omboacua tuprĩsa chĩhivahe oyesuindar, omoinguese ava güeta pipe, ihañecose ava Tũpa reroyasar rese ipi sei ãgua, oipĩtivĩise ava iparaisu vahe, oyapo tuprĩsa opacatu mbahe aviye vahe.

¹¹ Ereicuachĩa eme iharaviter ndosupitĩ vahe sesenta cuachiar pipe. Esepia, amove güemimbotar pipe tẽi oyepepi Cristo sui, omenda yupagüe pota iri vahe. ¹² Ipipe oimera Tũpa poronupasa chupe. Esepia, yipĩndar oyemondo Tũpa upeño ité oyecuachiasa. Ipare rumo nomboaviyei eté oñehe. ¹³ Iyavei oi yacatu rupi tẽi oguatase oico, ahese virecora oatẽhisa, iyavei imahechiroi tẽira, oñangareco tẽira opacatu rese, omombehu-mbehu tẽi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembĩ iri avei yuvireco, iyavei tosãro tuprĩ güeta pipendar. Sese yamotarẽhimbar secocuer ndahei chira oñehedora tẽi vireco yuvireco. ¹⁵ Esepia, oime ité amove oyepepi vahe güemimbotar pipe Caruguar rupi güeco ãgua.

¹⁶ Acoi oimese que cuña Tũpa reroyasar vireco vahe que cuña imer mano vahecuer oyepĩri, ahe toipĩtivĩi yuvireco. Ahe sese evocoyase tũparo pendar nihañecoi chira. Ahese oicatura supi eté imu ndipoi vahe rese hañeco ãgua yuvireco.

¹⁷ Iyavei acoi Tũpa reroyasar rãrosar osãro tuprĩ vahe, ahe toipĩsi catu ava poropĩtivĩisa imboyeroyasave. Acoi oyemondo vahe Tũpa Ñehengagüer mombehu ãgua, ava mbohe ãgua avei, ahe co poropĩtivĩisa oipĩsi catura. ¹⁸ Esepia, aracahendar icuachiaprĩ pipe aipo ehi: “Ereiyuru ãpĩchi rene tĩvi oporavĩqui vahe trigo cambesar” ehi. Iyavei aipo ehi: “Mbia oporavĩqui vahe iyacatu oipĩsira oporavĩqui repĩ” ehi.

¹⁹ Iyavei nde, ndereroyai chira mbahe omombehu vahe Tũpa reroyasar osãro vahe yamotarẽhisave yuvireco. Oimese que ñuvirĩo sepiasar, que mbosapĩ, ahese ramo ereroyara.

²⁰ Acoi oimese rumo angaipa aposar ipãhuve, ahese eremboaracuara opacatu ava rovaque. Evocoyase ambuae osĩquiyera angaipa apoẽhi ãgua yuvireco.

²¹ Iyavei che orocuai Tũpa rovaque, Jesucristo rovaque iyavei opacatu Tũpa rembiguai iva pendar rovaque avei: ereyapo tuprĩra co mborocuaita, nderemomahuatĩ chira ava imboaracua nde remimbotar rupi tẽi. ²² Ndahei chira pĩhaivi eresenoĩ mbia mborocuaita rese ihañeco vahe. Aviyeteramo nde rese pãve mbahe oimera. Eñearo tuprĩ nde reco maranehisa pipe.

²³ Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tuprira güereciar yuvireco ava oñehe-ñehe tēiēhi āgua Tūpa rer rese, yande porombohesa rese avei no. ² Acoi co mbiguai virecose güereciar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güereciar yuvireco. Esepia, sereciar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pīhañemoñetasa sepīrusu vahe nungar

Eporombohe, emombehu co mbahe: ³ oimese oporombohe vahe oyesuindar pīhañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgüe ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pīpe mbahe rereco ati āgua yuvireco viña. ⁶ Yayembovīhañose mbahe yande rembiereco rese, ahese Tūpa rese yande pīhañemoñetasa inungar mbahe sepīrusu vahe yandeu. ⁷ Esepia, ndayarui eté niha mbahe yahase co ivi pīpe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovīhañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pīpe, setá mbahe pota raisave, ipīpe oyeecomomara. Ipare oyemocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pīpe oyepepi Tūpa reroyasa sui iyavei omombaraisu güecocuer ipīpe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepipi opacatu co nungar mbahe naporai vahe sui. Eico nde reco ñvīsa pīpe, ndemahenduhāño ité Tūpa rese. Eroya, esaīsu, eñemosa avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase ari imombehupri curi, ahese Tūpa omboyevira Guahir. Ahe niha ñepe vaheño ité imboeteipri, seco pīrata catu vahe. Aheño ité niha mborereciar ivate catu vahe rereciar. ¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡Ēgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pīpe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporugā. ¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pīpe. Iyavei toyemoingatuño acoi mbahe vireco vahe mboyaho āgua ambuae

ava upe yuvireco. ¹⁹ Evocoyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco ãgua.

Timoteo cuaitarã ipa vahe

²⁰ Timoteo, esãro tupri co porombohesa supi tupri vahe Tũpa ombou vahe ndeu. Ereyapisacai rene ava tēi pihãñemoñetasa ěgũe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyavi Tũpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMONUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparisuerecosa nde reco tupri āgua ndeu.

Pablo oyocuai Timoteo Cristo recocuer mombehu āgua

³ Che yeroqui pāhuve, chemahenduha nde rese p̃itu, ari yacatu rupi. “Aviye ndeu” ahe Tūpa upe nde recocuer rese. Che aporaviqui tupri ité Tūpa rese che p̃ihañemoñeta tuprisa pipe yepi inungar che ramoi eta oyapo yuvireco aracahe. ⁴ Ndacheresarai eté acoi nde yaseho agüer sui. Iyavei oroepia pota tēi che yemboṽiharete āgua. ⁵ Supi eté chemahenduhaño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yip̃indar ēgüe ehi yuvireco. Evocoyase ayeroyaño ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tūpa nombou siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua. ⁸ Evocoyase eresiquiye eme catu yande Yar recocuer mombehu. Nderech̃i chiaveira che roquendasa sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa p̃iratasa pipe. Ahe oura ndeu ñehesa p̃sírosa resendar mombehusa sui. ⁹ Tūpa niha yande p̃síro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yip̃isuive ivi apo vitehiseve. ¹⁰ Cūrítei rumo ahe omboyecua oporoaisusa yande P̃sírosar Jesucristo ouse, acoi ou vahe co ivi pipe manosa p̃iratasa recopi āgua. Iyavei ñehesa p̃sírosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. ¹² Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco p̃iratasa acoi ñehesa ombou vahe cheu imocañēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose. ¹⁴ Esāro avei co ñehesa aviye vahe Tūpa ombou vahe ndeu Espiritu Santo reco p̃iratasa pipe yareco vahe yandeyese.

¹⁵ Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes. ¹⁶ Yande Yar tomondo paraisuerecosa Onesíforo mu upe. Esepia, Onesíforo setá yupagüer che mboṽiha. Iyavei nochi eté ava rovaque che roquendasa sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo oporoparisuerecosa chupe ahe ari pipe curi. Iyavei nde ereicua tupri ité ahe mbia yande p̃tivii vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pipe ndeu. ² Acoi che porombohesa eresendu vahe ava rehii rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe āgua.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepe yepe sundao ndosirii eté ocuaita sui. Esepia, ahe oyemoingatu voi eté ocuai ãgua güerecuar upe. ⁵ Iyavei iguayi rai vahe, ndoipisii chira porerecosa oguayi tupriëhi pipe. ⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehe rese. Yande Yar niha osenducua uca tuprira opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatui eté yuvireco. ¹⁰ Sese che añemosañño opacatu mbahe-mbahe tēi upe opacatu Tūpa rembiporavo recocuer aviye ãgua rese ‘tovireco catu pñisirosa porañete, apirēhi vahe Jesucristo rese yuvireco’ che yapave.

¹¹ Co niha supi tupri vahe:

Yamanose Cristo rese, ahese yaicove aveira sese.

¹² Yañemosase mbahe tēi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co coti tēi yarovara yande recocuer seroyaëhisave, ahe rumo ndovirovai chietera güeco ñvisa.

Esepia, ndoicatui, “Ndahei che ahe aico” ehi vaherã.

Ava osē tupri vahe güecoãhasa Tūpa upe nara

¹⁴ Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ãgüe ehi tēi vahe. Esepia, omomara ambuae ava osenduse ñehe rai yuvireco. ¹⁵ Eyapo tupri mbahe opacatu nde catugüer rupi nde recocuer mboyecua ãgua Tūpa rovai inungar oporaviqui tupri vahe, nochi vahe. Ëgüe ere, eporombohe tupri ñehesa supi eté vahe rese. ¹⁶ Eyepepi ñehe tēisa, ãgüe ehi tēi vahe sui. Esepia, co nungar ñehesa tēi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichañño yepi. Ëgüe ehi Himeneo, Fileto ¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipipe Jesús reroyasar oipihañemoñeta rerova yuvireco. ¹⁹ Tūpa rumo omondo mbahe moviracua tupri ãgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Ñepe iporupirã ari imboeteisa pipe nara, ambuae rumo ari rupi iporupirã. ²¹ Acoi ava oñemoatiro vahe co tecocuera sui Tūpa upe nara, ahe ipehasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo ãgua Tūpa upe.

²² Eyepepi mbia chíhivahe pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco. ²³ Eremboyeroyai rene ñehesa porandu-randu tēisa, ãgüe ehi tēi vahe. Erecua niha ichui tēi oime yeamotarēhisa yepi. ²⁴ Iyavei yande Yar rese oporaviqui vahe, ndiyai oyecopi oñehe pipe yuvireco. Iyacatu rumo, aviyaera secocuer opacatu upe, eporombohe tuprira, oñemosaññora ombahe mboasiēhisa pipe oico. ²⁵ Iyavei omboaracuara güeco asiēhisa pipe acoi ava ndiporeroyai vahe. Esepia, aviyaeteramo Tūpa osecuñarora ipihañemoñeta raisa oyeupe yevi iri ãgua: ipipe sui porombohesa supi eté vahe oicuara yuvireco. ²⁶ Ipipe sui avei toyemopoase, toyuvinose Carugar povri sui semimbotar apo iriēhi ãgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, “Aviye ndeu” ndehi vahe ava upe. Iyavei nomboetei chira Tūpa rese pīhañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo āgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco. ⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboviha āgua yuvireco. Ipipe rumo Tūpa ndosaisui chira yuvireco. ⁵ Ahe inungar-ra Tūpa rese ité yuvirecoi vahe viña. Tūpa pīratasa rumo nomboyecuai chietera güembiapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pāhuve oime yuviroiqueño tēi vahe oi rupi cuña ndoicatu vahe angaipa rerecosar mbopa āgua. Esepia, ahe cuña opīhañemoñeta raisa pipe yuvirecoi vahe. ⁷ Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua āgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ēgüe ehi avei evocoi ava porombohesa supi eté vahe amotarēhisar yuvireco. Ahe oyemomara vahe opīhañemoñeta rai pipe yuvireco. Ndoviroyai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicuaa yuvireco imbahecuaēhi rese, inungar co ñuvirío mbia Moisés amotarēhimbar yuvirecoi aracahe.

Timoteo cuaitarã ipa vahe

¹⁰ Nde rumo che reco rupi tupri ité ereico. Esepia, ereroia tupriño ité che porombohesa, che pīhañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che pĩsiro opacatu evocoi mbahe-mbahe tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemoviracuaño itera acoi ereyembohe vahe rese. Ahe ereroia tupriño ité. Esepia niha, nde mbohesar ereicua. ¹⁵ Iyavei eyemomahenduha co rese: nde chīhivahe suive ité niha ereicua Tūpa ñehe icuachiapri eico. Ahe niha nde mombahecua vahe nde pĩsiro āgua Jesucristo reroyasa pipe. ¹⁶ Opacatu co ñehesa icuachiapri ou vahe Tūpa sui, aviye ai eté porombohe āgua, iyavei poromboyapisaca āgua, poromboaracua tupri āgua iyavei ava upe ñehe tupri āgua secocuer mohivi āgua yepi. ¹⁷ Ichui, ava Tūpa rese yuvirecoi vahe oyemoingatu vaira opacatu tecocuer tupri apo āgua yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaheñã omborerecuasa reseve oicove vahe, omano vahe recocuer rese porandu āgua. ² Emombehu Tūpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. ³ Esepia, coiye ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe āgua, güemimbotar tēi avei omombehu ucara oyeupe yuvireco. ⁴ Iyavei oyepipira co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tuprisa. Eñemosañõ mbahe naporai

vahe upe. Ndehañeco catu ñehesa p̃sirosa resendar mombehu ãgua. Emboaviye tupri avei opacatu nde poraviquisa.

⁶ Virovi ari che retecuer mondo ãgua manosave inungar mbahe seropovẽhepri yande Yar upe. ⁷ Ayapopa che recoeté pipe che poraviquisa aviye vahe che amotarẽhimbar pãhuve. Amboaviye che cuaita. Ndayepẽpi eté che yeroyasa sui. ⁸ Cũritei che rãro ivave co porerecosa che poraviqui aviye vahe resendar. Yande Yar mborerecuar seco ñvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osãro vahe upe yuvireco.

Pablo, “Eyu rane che repia” ehi Timoteo upe

⁹ Ndepoyava catu eyu che repia. ¹⁰ Esepia, Demas che reya co mbahe ivi pipendar tẽi potasave, ichui tẽi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che p̃iri. Eseca Marcos, tou nde rupi che p̃itivii ãgua mboraviqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyhasa aseya vahe Troas ve Carpo rõtave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tẽi cheu. Yande Yar rumo oicua sembiapogũer rese chupe. ¹⁵ Iyavei nde eicua catu ichui. Esepia, ahe yande amotarẽhi mbahe yande remimombehu rese oico.

¹⁶ Yipindar añehese che yoepi ãgua mborerecuareta rovai, ndipoi eté que che p̃itiviiisar; opacatuño ité che reya yuvireco. Tũpa tiñero sese yuvireco chupe. ¹⁷ Yande Yar Jesucristo rumo che p̃itivii. Che momirata co ñehesa p̃sirosa resendar mombehu tupri ãgua opacatu ava ndahei vahe judío upe. Ëgũe ehi avei che renose mbahe tẽi sui. ¹⁸ Ahe che pehara opacatu mbahe-mbahe tẽi sui iyavei che p̃sirora oyepiri ivave che so ãgua. ¡Ëgũe tehi timboeteisa catu yande Yar apirẽhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rẽta pendar upe avei. ²⁰ Erasto opita Corinto ve, Trófimo rumo imbaheasi, evocoyase aseya Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tũpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mondo āgua sembiporavo eta upe iyavei Tūpa rese pīhañemoñetasa supi tupri vahe cua uca tupri āgua. ² Esepia, tecovesa apirēhi vahe rārosa pīpe sui viroyara, oicua aveira yuvireco. Tūpa ndoporombopai vahe niha omombehu co tecovesa mondo āgua ivi apo viteēhiseve oico. ³ Ichui cūrītei ari oyepota yandeu iñehengagüer cua āgua. Sese Tūpa, yande Pīsīrosar, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pīpe. Esepia, oyoya yaroya vahe yaico. Yande Ru Tūpa, yande Pīsīrosar Jesucristo tombou oporovasasa nde reco tupri āgua ndeu.

Tito poraviquisa caha pāhu Creta ve

⁵ Che oroeya vitu co caha pāhu Creta ve mbahe opita vite vahe moingatu tupri āgua. Iyavei, “Eiporavo ava, Jesucristo viroya vahe rāro āgua ñepeipei tecua rupindar” ahe acoi ndeu cuese. ⁶ Evocoi Jesucristo viroya vahe rārosar toyuvirecoi güeco tupri āgua. Tipo eme “co oyapo mbahe” ehi-ehi tēi vahe yuvireco oyeupe. Ñepeñio güembireco virecora yuvireco; tahir evocoyase Jesucristo reroyasar pāvera. Iyavei ndoyuvirecoi chira ndoyemboaracuai vahe nungar oporeroyaēhisa pīpe ambuae ava ñeheēhi āgua sese yuvireco. ⁷ Acoi Jesucristo reroyasar rārosar yuvirecoi vahe, ahe icuaita mbahe Tūpa upendar rese. Sese taseco ñvi tupri yuvireco. Iyavei toico eme oporeroyaēhisa pīpe, toñemoiro eme avei, ndahei chiaveira caguar tēi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güētave oyepiri. Iyavei aviye aira yepi. Osāro tuprira güecocuer. Iyavei taseco ñvi güeco catupri pīpe Tūpa upe. Tosāro tupri avei opīhañemoñetasa yuvireco. ⁹ Iya oyemboya catu oyembohesa supi tupri vahe rese yuvireco. Ipipe sui tomonguerēhi catu ambuae yuvireco co ñehesa maranehi pīpe iyavei ambuae seroīrosar pīhañemoñeta mohivi āgua.

¹⁰ Esepia, oime setá nimbahe reroyai vahe; judío “peyembocircuncida pe ñepisiro āgua” ehi vahe pāhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ēgüe ehi vahe iyacatu pemonguiriri. Esepia, ahe niha setá ava oñemu vahe omboyepipi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco āgua tēi yuvireco.

¹² Ñepe mbia, otūpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mīmba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pīrata ité. Evocoyase toviroya tupri Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipīhañemoñeta rai tēi vahe upe rumo, ndipoi eté mbahe nimarai vahe. Esepia, ipīhañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaēhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoiyase mbia oñiaro catu vahe Tūpa reroyasar toñearo tupri, imboyeroyapri toyuvirecoi, tosãro tupri güecocuer, tovíreco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ēgüe tehi avei cuña oñiaro vahe Tūpa reroyasar yuvireco: güeco tupri tovíreco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyecua güecocuer aviye vahe, ⁴ ombohera cuñatai imer raisu āgua, imembrī raisu āgua avei. ⁵ Tombohe avei seco tupri āgua, iñearo tupri āgua angaipa sui iyavei sēta pipendar rese hañeco tupri āgua yuvireco. Tomboaracua avei seco aviye āgua, imer mboyeroya āgua avei. Evocoiyase noñehe-ñehe tēi chira ava Tūpa Ñehengagüer rese yuvireco.

⁶ Ēgüe ere avei emonguerēhi mbia chñivahe secocuer rese iñearo tupri āgua. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoiyase yande amotarēhimbar yuvinochira ndoicatuise, “Mbahe” ohe āgua yuvireco yandeu.

⁹ Emboaracua avei mbiguai yuvirecoi vahe: tovíroya opacatu mbahe rese güerecuar, tomboyeroya imboeteisave, toiñehepoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoiyase opacatu osepiase seco tuprisa, omboeteira yande Pñirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru pñirosa opacatu ava upe. ¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya āgua. Iyavei yande mbohe co ivi pipe yande ñearo tupri āgua, yande reco ñvi āgua iyavei Tūpa mboetei āgua. ¹³ Iyavei yasãro yande viharetisa pipe Tūpa omboaviye vaheerã güemimombehu, ahe Jesucristo yande Tūpa seco ivaté vahe, yande Pñirosar yevi irisa oporañetisa pipe. ¹⁴ Ahe oyemondo oyeyuca uca yande rese yande pñiro āgua opacatu mbahe-mbahe tēi sui yande reco moatiro tupri āgua. Evocoiyase yande yaico chupe nara güeraño ité yande querēhisave opacatu mbahe aviye vahe apo āgua.

¹⁵ Evocoi rese erembohera, eremonguerēhira, eremboaracua aveira opacatu nde porocuita pipe. Sese tipo eme que nde roñirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuita yuvireco iyavei opacatu ambuae mborerecua-recuarmi porocuita avei. Iyavei toyemoingatu tupri opacatu mbahe aviye vahe apo āgua yuvireco. ² Toñehe-ñehe tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yemboviha āgua. Iyavei yaicoño mbahe tēi pipe, yaipotaño tēi ambuae ava mbahe, yamotarēhimbrī yaico iyavei yandeyeupe ae-ae yayeamotarēhi. ⁴ Ipare rumo Tūpa, yande Pñirosar, omboyecua güeco tuprisa, oporoaisusa opacatu ava upe. ⁵ Yande pñiro, ndahei rumo yande rembiapo aviyesa sui, ahe rumo víreco oporoparisuerecosa yandeu nara. Ichui omoatiro yande recocuer yande reco mopiasu. Iyavei Espíritu Santo pipe yande recocuer recuñaro tecove piasu rereco āgua. ⁶ Iyavei yande Pñirosar Jesucristo rembiapo sui Tūpa ombou catu oEspíritu Santo yandeu, ⁷ ipipe yande reco ai sui yande renose yande reco ñvi tupri āgua oporoaisusa pipe ‘toipisi co tecovesa apirēhi güemiario yuvireco’ oya.

⁸ Aipo ñehesa supi eté vahe. Che aipota sese ereporombohera. Ipipe Tūpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaheerã

yuvireco. ⁹ Ereyepira rumo opacatu co nungar mbahe sui: yipindar ñehesa yepoepi tēisa sui, ipare aracahendar ava recocuer rese ñehesa sui. Ereyepi aveira iporomoñoiro serai vahe sui, Moisés porocuita resendar sui tēi ñehepoepi-episa sui avei. Esepia, evocoi nungar mbahe ěgüe ehi tēi vahe.

¹⁰ Acoi ava omoimese yemboyahosa Tūpa reroyasar pāhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Tereicua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaivi che repia tecua Nicópolis ve. Esepia, aheve apita pota sōhisa vahe pituhu rāro. ¹³ Eipitivi opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo āgua iyavei ava mbahe chupe ipane vahe pitivi āgua. Evocoyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohava che piri omondo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tūpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboraviqui apo āgua ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo āgua Tūpa upe nara yuvirecoi, iyavei opacatu Jesús reroyasar nde rētave oñemonuha vahe upe nara. ³ Yande Ru Tūpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai āgua viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo āgua co nde rembiguagüer Onésimo upe nara. Che niha Pablo, acuacuami vichico. Cūritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohava che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cūritei rumo ēgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vahe rã nde nungar tupri che p̄tivii āgua viña, co soquendapri vite che recose Jesucristo ñhengagüer sui. ¹⁴ Che rumo ndaipotai mbahe apo nde p̄hañemoñetasa cuaēhi vitesese. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepēpi pucu raimi nde sui oyevi iri vahe rã nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rivri niha yande rembiaisu secoi cūritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. Ēgüe ere tupri aveira co mbia p̄si. ¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoyase amboepira ndeu. ¹⁹ Che Pablo, aicuachía che po pipe ité seroya tupri āgua, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ēgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

²¹ Che aicuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tūpa che renose vahe rã che roquendasa sui pe yeruresa pipe che so āgua eipeve pe repia. Sese emoingatumi avei che pituhu āgua.

Mahenduhasa, porovasasa ipa vahe

²³ Che ndugüer, Epafra, omondo omahenduhasa ndeu. Ahe avei soquendapri cohava yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tūpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoí eta upe oñehe mombehusar upe. Iyavei ambuae mbahe rupi oseca imombehu tupri água yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secói. Ëgüe ehi eté, ahe Vu recocuer tupri ité. Ahe opacatu mbahe omoviracua oñehe pĩratasa pipe. Yande angaipagüer sui yande moatiro pare oso, oguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secói ivate catu vahe Vu rembiguai iva pendar yuvirecoi vahe sui. Ahe víreco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pipe amondo nde recove água” ndehi eté.
Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi:

“Tomboetei opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiapri aracahendar pipe:

“Ayapo che rembiguai ivitu nungar, tata nungar avei cheu oporaviqui vaherã” ehi.

⁸ Tahir rese ñehesa rumo aipo ehi icuachiapri aracahendar pipe:

“Che Yar Tūpa, nde mborerecuasa rumo apirēhi vaherã ité.

Ereporocuai nde reco ñvi tuprisa pipe yepi.

⁹ Mbahe ihñvi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherã tēi,

inungar turucuar cuacua oyearo vahe opa.

Nde rumo apirēhi vaherã ité ereico.

¹² Ipare ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherã ité” ehi.

¹³ Ndahei que ñepei iva pendar güembiguai upe Tūpa aipo ehi:

“Eguapi che acato coti, ahese che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui água, icuapri avei ava ipĩsiropirã pĩtivii água.

2

Yandemahemoha tupri yande pĩsirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiēhi água. ² Esepia, co Tūpa rembiguai remimombehugüer seroyapri ité secói, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. ³ ¡Mara yahera pĩha evocoyase yande yañemi Tūpa ñemoirosa sui viña acói ndayandemahemoha tupriise co yande pĩsirosa aviye vahe rese? Esepia,

yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyoavirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrive omondo Tūpa ivi oime vahe, acoi oromombehu vahe pëu. ⁶ Oime rumo icuachiapri arachendar pipe omombehu tupri vahe:

“Che Yar, ¿uma vo evocoyase ava?

¿Mahera ndemahenduha ava tēi rese, iyavei eresāro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboetisave chupe.

⁸ Iyavei opacatu erereco uca mbahe nde rembiapo ipovrive” ehi imombehu.

Ëgüe ehise Tūpa, ndoseyai eté que ñepe yepi mbahe ipo pendarēhi. Cūritei rumo ndaopacatu tupri vitei mbahe ipovrive. ⁹ Yaicua niha Jesús, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano āgua opacatu ava repirā. Cūritei rumo iyemombaraisu pare, omondo oporañetesa imboetisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetisave’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisrosar güeco āgua’ oya. ¹¹ Esepia, opacatu vireco ñepe Vu yuvireco co seco catupri vahe, seco mbocatuprisar avei. Sese Tahir nochi eté, “Che rivireta peico” ohe āgua viroyasar upe. ¹² Ahe aipo ehi icuachiapri arachendar pipe:

“Añehera nde rese che rivireta upe.

Asapucái aveira sapucaisa ndeu opacatu ava ndeu oñemonuha vahe pāhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; Ëgüe ehi avei Jesús vireco voho, vuvi yande nungar; omano pipe sui omocañi vahe iporoyuca ai vahe pīratasa; ahe Carugar. ¹⁵ Opacatu ava manosa sui osiquiyesa pipe mbiguai tēi nungar yuvirecoi vahe güecove vitesave, evocoi nungar sui senose āgua, Ëgüe ehi Jesús. ¹⁶ Esepia, ahe ndoui Tūpa rembiguai pītivii āgua, ahe rumo ou Abraham suindareta pītivii āgua. ¹⁷ Sese niha tivireta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirā ñeroisa reime āgua” ehi. ¹⁸ Esepia, ahe avei oiporara Carugar poroātoisa. Sese cūritei ahe oicatu ité ava Carugar remiatoi pītivii āgua.

3

Jesús ivate catu vahe Moisés sui

¹ Evocoyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. ⁴ Esepia, ñepepei oi vireco oaposar viña. Tūpa rumo opacatu mbahe aposar secoi. ⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande

yaico yayeroyaño itese Cristo rese iyavei yasãroño itese yande yembovïhasa pïpe co mbahe aviye vahe oime vaheerã yandeu curi.

*M*bituhusa Tüpa upendar yuvirecoi vahe upe

⁷ Sese inungar aipo ehi Espiritu Santo icuachiapri aracahendar pïpe:

“Co pïpeve voi, pesenduse Tüpa ñehe,

⁸ peyepïhamoatai rene catu chupe, ndapeicoi chira ava ndiava reroyai vahe nungar acoi ivi iporupirêhisa rupi Tüpa recoãhasar yuvirecoi vahe aracahe.

⁹ Aheve avei acoi che recoãha tõi pe ramoï mbahe güembiapo pïpe, yepe cuarenta aravïter rupi osepia tõi mbahe che rembiapo yuvireco viña.

¹⁰ Sese añemoïro ahe ava upe, aipo ahe:

‘Ipïhañemoñeta rai co coti tõi vahe rese yepi iyavei ndoïcua potai eté che recocuer yuvireco’ ahe chupe.

¹¹ Sese che añemoïro ahe ava upe, ‘Ñepei reseve ndapepïtuhui chietera che pïtuhusa pïpe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepei ipïhañemoñeta naporai vahe Tüpa reroyaêhisa pïpe oyepepi vaheerã ichui. ¹³ Iya rumo peyemonguerêhi catu ñepei-peï ari yacatu rupi cüriteï pe recove pïpe angaipa upe pe yembopa uca iriêhi água, pe mbahe reroya iriêhi água rese avei. ¹⁴ Esepia, yayemoviracua tuprise Cristo rese yande yeroyasa yipisuiwe yareco vahe pïpe yande mano água rupi eté, ahese yaico itera sese.

¹⁵ Supi niha acoi aipo ehi ñehesa:

“Co pïpe voi pesenduse Tüpa ñehe,

peyepïhamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pïha acoi ava iñehe mara vahe yuvireco Tüpa ñehe rendu pare chupe? Moïse remienose Egipto ivi sui êgüe ehi yuvireco. ¹⁷ ¿Ava upe pïha acoi Tüpa oñemoïro cuarenta aravïter rupi? Acoi oyemboangaipa vahe omanopa vahe yuvireco ivi iporupirêhisa rupi. ¹⁸ ¿Uma upe pïha acoi ñepei reseve, “Ndapeiquei chietera che pïtuhusa pïpe pe pïtuhu água” ehi Tüpa? Acoi viroyaêhisar upe aipo ehi. ¹⁹ Sese yaicua seroyaêhi pïpe ndoïcatui yuviroique ipipe.

4

¹ Oime vite Tüpa remimombehu yande yaique vaheerã ipiri yande pïtuhu água. Sese iya ité yañearo tupri. Aní chira que ñepei pe pãhu pendar ndoïquei chira. ² Esepia, yandeu avei imombehusa ñehesa poropïsirosa resendar inungar yande ramoï upe ivi iporupirêhi rupi yuvireco aracahe. Co ñehesa rumo ndoïpïtivii eté ahe ava yuvireco. Esepia, ahe osendu yuvireco seroyaêhisave tõi. ³ Yande rumo yaroya vahe, yaiquera yande pïtuhu água, ahe chupe Tüpa aipo ehi:

“Sese añemoïro ahe ava upe; ñepei reseve,

‘Ndoyuviroiquei chietera che pïtuhusa pïpe opïtuhu água yuvireco’ ahe” ehi.

Tüpa rumo yipive ité opa omboaviye oporaviquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pïpe:

“Tüpa opïtuhu opacatu oporaviquisa sui imbosietesa ari pïpe” ehi.

⁵ Iyavei aipo ehi iri icuachiapri pïpe:

“Ndoyuviroiquei chietera che pïtuhusa pïpe opïtuhu água yuvireco” ehi.

⁶ Ipane vite rumo amove ava yuviroique vaheerã ahe pïtuhusave. Acoi yipïndar osendu tõi vahe rumo ñehesa poropïsirosa resendar, ndoyuviroiquei eté seroyaêhisa pïpe yuvireco.

⁷ Sese Tüpa omombehu tupri iri ambuae ari, chupe ité, “Co pïpe” ehi. Ahe acoi coiye mborerecurar guasu David upe omombehu ucase aracahe yandeu icuachiapri pïpe, aipo ehi vahe:

“Co pïpe voi, pesenduse Tüpa ñehe,

peyepïhamoatai rene catu chupe” ehi vahe.

⁸ Ehi revo Josué omondose co pítuhusa israelita upe aracahe viña, Tūpa evocoyase noñehe iri chira co ambuae ari rese viña. ⁹ Evocoyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoyase pítuhusa pipe, opítuhu oporaviquisa sui inungar Tūpa opítuhu ombahe mboaviye pare aracahe. ¹¹ Sese yayemoviracua catura yande reique água evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipĩrata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande aviterve; ěgüe ehi avei ñehengagüer oñatoi eté yande hã, yande espíritu avei. Iyavei omboyecua tupri ité yande pihañemoñeta. ¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño ité yande recocuer pĩrataēhisa. Ahe avei niha yande nungar aracaco viroparaisu opacatu mbahe-mbahe tēi güecoãhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tūpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pĩtivii água mbahe tēi oimese yandeu.

5

¹ Opacatu pahi ivate catu vahe iporavopri secoi ava pãhu sui ava recocuer reropovēhe água Tūpa upe iyavei porerecosa mondo água chupe, mbahe mimba yucapri reropovēhe água avei ava angaipa repirã. ² Ahe pahi niha oiporara avei teco asisa ambuae ava nungar. Sese güeco asiēhisa pipe oipĩtivii ava ndayaracuai vahe, oyavi vahe avei. ³ Ahe rumo güeco pĩrataēhisa pipe viropovēhe mbahe mimba yucapri Tūpa upe oangaipa repirã, opacatu ambuae ava angaipa repirã avei. ⁴ Ndiyai chira que ava oyesui tēi pahi oyeapo. Tūpa ité rumo osenoira imboetei uca água inungar acoi Aarón upe aracahe. ⁵ Ěgüe ehi avei Cristo, ahe noñeenoi pahi ivate catu vahe güeco água oyesui tēi. Tūpa ité osenoi imboetei uca água acoi aipo ehise:

“Nde che rahir ereico, co pipe amondo nde recove água” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirēhi vahrã, inungar tupri mbia Melquisedec serer vahe” ehi.

⁷ Co ivi pipe Cristo oicove vitesse, oyeruqui pĩrata oyasehosa pipe Vu Tūpa upe yepi. Esepia, ahe oicatu ipĩsiro água manosa sui. Ěgüe ehi iporeroya tuprisa pipe, Tu osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya água; ⁹ evocoyia güeco pipe omboaviye güeco catuprisa. Ipipe sui güeru poropĩsirosa ndopai vahe opacatu viroyasar upe nara. ¹⁰ Esepia, Tūpa niha osenoi pahi ivate catu vahe seco água inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setá mbahe ore ñehe água pēu co mbahe tecocuer resendar rese. Yavai etepri rumo imombehu tupri água. Esepia, pe ndapesenducua tupri vitei eté. ¹² Aracacove peporombohera viña; peipota vite rumo pēu mbahe ndayavaimi vahe imombehu iri água yembohesa Tūpa suindar. Ndapeyemoviracuai rumo; peihu iri pota cambi mbahe sãta vahe hu rãgüer sui. ¹³ Esepia, acoi ěgüe ehi vahe pĩtani osi rese ocambu vite vahe nungar tēi pe recocuer. Ipipe sui ndapeyembohei eté Tūpa Ñehengagüer rese mbahe tupri pe reco água. ¹⁴ Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu ñehengagüer rese güeco tupri água yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tūpa suindar co mbahe rese yembohe iri rāgüer sui. Ahe yipindar vahe co: yande ñecuñarosa, yande reco ai sui yande poisa, manosa apirēhi vahesave yande rerasoēhi āgua, iyavei Tūpa rese yande yeroyasa, ² yembohesa poroāpiramosa resendar, po mondosa Tūpa reroyasar harive, omano vahe cuerayevisa iyavei ava recocuer rese porandusa resendar avei. ³ Tūpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osāha vahe avei Tūpa suindar porerecosa iyavei oyandu ité Espíritu Santo güecocuer pipe, ⁵ osāha vahe avei Tūpa Ñhengagüer aviye vahe iyavei osāha chíhi ipiratasa curi oime vahe rā viña, ⁶ oyepepise rumo ichui, ndayaicatu iri seco reroyevi iri āgua Tūpa upe. Esepia, yaticapri nungar iri eté vireco Tūpa Rahir iyavei ambuae ava omoñehe-ñehe tēi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoyase evocoi nungar ava oipisira porovasasa Tūpa suindar. ⁸ Ahe ivi rese yu pāve tēi oyesuse, ahe naporai eté. Evocoi nungar ava Tūpa poromocañisavrive tēi, sapipirā tēi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saisupri, yepe aipo orohe pēu viña, oromoha ité rumo mbahe aviye catu vahe pēu co ñepisirosa pare. ¹⁰ Esepia niha, Tūpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. ¹¹ Ore rumo oroipotaño ité ñepeipei pe pemboyecuaño itera arí cañi rupi eté co pereco vahe pe querēhisa pe remiaro aviye vahe rupiti āgua. ¹² Ndroipotai pe atēhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui ēgüe ehi vahe rā. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoyase Abraham osāro güeco mbegüesa pipe, ēgüe ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. Ēgüe ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi āgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ Ēgüe ehi oime ñuvirío mbahe imboyepoepipirēhi: Tūpa niha ndoporombopai vahe ité, ipipe avei yande monguerēhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese. ¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ēgüe ehi yande remiaro oique turucuar guasu tūparo asiasa cupeve oi imaranehi catu vahesave ivave. ²⁰ Aheve Jesús oique yande raperā mboi āgua. Ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mondo āgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepeipei chupe. ‘Mborerecuar guasu seco ñivi vahe’ oyapave

Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe secoi. ³ Ahe iyepa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tüpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teieté avei omondo diez sui ñepei-pei mbahe porerecosa mborerecuar guasu eta sui güembierocua chupe. ⁵ Moisés porocuita pipe rumo opacatu Leví suindar pahi eta yuvirecoi vahe vireco ité ocuita opacatu ava sui diez sui ñepei-pei iporaviquimi rerocua água yuvireco. Abraham suindar ité niha ēgüe ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vahe mbahe Tüpa remimombehu. Ēgüe ehi Melquisedec Abraham rovava. ⁷ Supi eté sovasapri sui oporovasa vahe ivate catu secoi yepi. ⁸ Evocoi levita suindar oipisi ava poraviqui repri diez sui ñepei-pei. Ahe ava rumo omano vahe mbahe tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndoiyase evocoyase opacatu pahi eta Leví suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Levi oyesuindar vireco, evocoyase ihaēhi vitesave oyepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuita pahi levita sui yuvireco; ahe Aarón suindar yuvirecoi. Supi etese rumo ava virecose Tüpa suindar güeco catuprisa evocoi mborocuita reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tüpa osecuñarose evocoi pahi cuaita, osecuñaro aveira supive mborocuita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶ Ahe rumo ndahei porocuita “uma sui osēra pahiguã” ehi vahe sui oi que pahi güeco água; güecocuer pīrata ndopai vahe reseve oi que. ¹⁷ Esepia, Tüpa ité aipo ehi oñehese: “Nde pahi apirēhi vahe ité ereico inungar Melquisedec” ehi.

¹⁸ Sese mborocuita arachendar opa ité. Esepia, ahe nipiratai, ndayande pītivii eté. ¹⁹ Esepia, Moisés porocuita ndosecocuer mbocatuprii eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tüpa rese.

²⁰ Tüpa rumo oñehese omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tüpa rer pipe. ²¹ Yande Yar rumo Tüpa osenoi ñepei reseve güerer pipe pahi seco água icuachiapri pipe aipo ehise chupe:

“Yar Tüpa osenoi ñepei reseve, sese nosecuñaro chietera:

‘Nde pahi apirēhi vahe ité ereico’ ehi”

ehi icuachiapri pipe. ²² Sese Jesús rese yaicua Tüpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomonoi chietera pahi güecosa ambuae upe. ²⁵ Sese ahe oicatu ité ñepei reseve viroyasar Tüpa rese oyemboya vahe pīsīro água apirēhi. Esepia, ahe oicove vahe ité apirēhi oyeruqui vahe Vu Tüpa upe sese.

²⁶ Supi eté Jesús pahi ivate catu vahe secoi. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimba Tüpa upe seropovēhe água yipindar oangaipa rese, ipare opacatu ambuae angaipa rese. Ñepei reseve ité rumo güete viropovēhe opacatu ava angaipa repirã. ²⁸ Moisés porocuita rupi iporavopri pahi ivate catu vahe ité ereico inungar Melquisedec; Tüpa rumo

Moisés porocuita pare osenoi ñepeí reseve Guahir seco catupri vahe ‘tasecoi pahi ivate catu vahe apirēhi vaheṛā ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe oguapí Vu acato coti omborerecuasa pipe ivave oĩ. ² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovēhe vaheṛā Tūpa upe yuvireco. Sese Jesucristo avei vireco mbahe viropovēhe vaheṛā Vu Tūpa upe. ⁴ Ahe secoise co ivi pipe viña, ndahei chietera pahi secoi viña. Esepia, cohave oime vite ité pahi mbahe viropovēhe vahe Moisés porocuita rupi yuvireco. ⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitribe amboyecua vahe rese ndeu. Ahe inungar tupri eyapo” ehi chupe. ⁶ Yandé pahi ivate catu vahe rumo, Jesús, vireco ocuaita aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sesendar Tūpa remimombehu aviye catu vahe avei.

⁷ Esepia, yipindar Tūpa remimbotar oicatusé yande recocuer recuñaro āgua viña, ndipoi chira ambuae semimbotar ipiasu vahe yandeu viña. ⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri āgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo vahe che remimbotar.

Ahese acoi opa anose ivi Egipto sui,
nomboaviyei eté rumo che porocuita yuvireco.

Sese apoi ichui’ ehi yande Yar Tūpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuita iyapisacasa pipe,
aicuachía aveira ipihañemoñetasa pipe.

Evocoyase che iTūpa aicora; ahe evocoyase cheundar yuvirecoira.

¹¹ Nombohe iri chira ondugüer, omu avei che cua uca āgua yuvireco.

Esepia niha, opacatu chíhivahe catu vahe sui,
ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar”

ehi icuachiapri pipe aracahe. ¹³ Oñehese Tūpa güemimbotar piasu rese, omombehu yipindar vahe cañi āgua; chíhimi tēi ipane icañipa āgua.

9

Tūparo ivi pipendar iyavei tūparo iva pendar

¹ Evocoyase yipindar Tūpa remimbotar vireco ava cuaitarā iñemonuha āgua Tūpa mboeteisa pipe iyavei vireco tūparo co ivi pipendar. ² Ahe tūparo pipe na ehi mbahe imoingatusa: yipindar oi Nimarai Vahe serer. Ipipe oime vera renda iyavei mesa pan sovasapri Tūpa upendar reseve. ³ Imoñuviriosa turucuar tūparo asiasa cupeve oime ambuae oi, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tūpa porocuita riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuita cuachiapri ita ipe vahe rese oime ipipe. ⁵ Ahe mborocuita riru harive

oime Tūpa rembiguai rahanga oyovai yuvinochai, “Tūpa oime ité cohave” he āgua. Ahe ipepo oyopi tupri Tūpa porocuita riru rovapisa yuvireco. Co rupive revo amombehura co mbahe pēu.

⁶ Evocoi nungar mbahe moingatupri pare, pahi eta yuviroiqueño yipindar oi asiapri pipe ari rupi ocuaita apo āgua. ⁷ Imoñuviriosa oi pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovēhe vaherā Tūpa upe oangaipa rese, ava icuaēhi pipe angaipa oyapo vahe repirā avei. ⁸ Co rese Espiritu Santo oicua uca yandeu avaño tēi ndiya vitei eté oique ipa vahe oi imaranehi catu vahe pipe Tūpa rovai oime vitesse yipindar oi yasiapri. ⁹ Co opacatu mbahe yande mbohe mbahe cūríteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuita. Ahe rumo ēgüe ehiñomi tēi yuvireco Tūpa remimbotar ipiasu vahe yu āgua renonde.

¹¹ Poropīsīrosar rumo ou cute. Iyavei ahe ité cūrítei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe vuvi ité opacatu rese; ēgüe ehi ahe ñepeí reseve oique apirēhi vahe ñepisirosa reime āgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua. ¹⁴ Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombehugüer rupi’ oya. ¹⁶ Que ava oicua ucase güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. ¹⁷ Esepia, ndiya vitei eté omano vaherā recove vitesseve mbahe imondosa iyarā upe. Imanore voi rumo aviye imondosa. ¹⁸ Sese yipindar vahe Tūpa remimbotar yaposa mbahe mimba ruvi piyere pipe. ¹⁹ Esepia, Moisés omombehupase mborocuita opacatu ava upe, oipisi ovesa ragüer pīra vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuita resendar, opacatu ava avei. ²⁰ Evocoiyase aipo ehi icuachiapri pipe: “Co mbahe ruvi oicua tupri uca co porocuita Tūpa ombou vahe omboyeroya āgua pēu” ehi. ²¹ Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. ²² Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. ²⁴ Esepia, Cristo ndoiquei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. Ēgüe ehi rumo ahe oique ité ivave. Aheve cūrítei secoi Tūpa rovai yande pītivii āgua oyeroqui pipe. ²⁵ Judío pahi ivate catu vahe niha ñepeí reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. ²⁶ Ēgüe ehise rumo, yipisuive omano pihira viña. Cūrítei rumo oyemboyecua co ipa ari rupi ñepeí reseve, apirēhi vaherā viropovēhe

ãgua güete Tūpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeeropovêhe ñepei reseve opacatu angaipa mocañi ãgua. Ipare rumo oyevi irise ou, ndahe iri chira angaipa recocuer rese. Ahe rumo oyevíra ou guãrosar p̃síro ãgua.

10

¹ Esepia, Moisés porocuita mbahe aviye vahe ou vaheṛã rahanga t̃ei, ndahei ahe eté vahe ité. Sese ahe porocuita ndoicatui eté ava Tūpa rese oyemboya vahe reco mohivi tupri ãgua mbahe seropovêhepri araviter yacatundar pipe t̃ei. ² Porocuita oicatusé pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndovirovêhe iri chiaveira mbahe ruvi Tūpa upe yuvireco viña no. ³ Co seropovêhepri rumo yande momahenduha uca ãgua t̃ei yande angaipagüer rese araviter yacatu. ⁴ Esepia, mbahe mimba ruvi t̃ei nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe:

“Ndereipota iri niha mbahe mimba t̃ei porerecosa seropovêhepirã ndeyeupe, nde rumo ereyapo che retecuer evocoi nungarã.

⁶ Ndahei niha nde piha rupi mbahe rapipri mbahe mimba yucapri ndeu seropovêhepri ñepei reseve angaipa mocañi ãgua.

⁷ Evocoyase che aipo ahe:

‘Che ayu nde remimbotar apo ãgua, che Ru Tūpa, che resendar icuachiapri remimombehu rupi tupri mboaviye ãgua’ ahe” ehi.

⁸ Yipindar aipo ehi, Tūpa ndoipotai eté, iyavei ndahei ipiha rupi mbahe mimba reropovêhepri, porerecosa mbahe sapipri avei angaipa mboyeho ãgua, yepe ahe mborocuita rupi seropovêhesa viña. ⁹ Ipare aipo ehi: “Che ayu nde remimbotar apo ãgua” ehi. Ahe ipipe omombopa yipindar vahe mbahe seropovêhepri co ambuae mbahe ipiasu vahe apo ãgua. ¹⁰ Tūpa evocoyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirêhi vaheṛã güete mondo pipe.

¹¹ Opacatu judío pahi eta ari yacatu oyapo ocuita iyavei mbahe mimba avei-vei viropovêhe Tūpa upe yuvireco. Yepe ahe viropovêhe t̃ei yuvireco viña, nomocañi catui eté rumo angaipa. ¹² Jesucristo rumo oyeeropovêhe ñepei reseve angaipa repirã apirêhi vaheṛã. Ipare oso ivave, oguapi oĩ Vu acato coti. ¹³ Aheve osãro oĩ Vu Tūpa opase voi omondo yamotarêhimbar ipovrive. ¹⁴ Esepia, ñepei reseve oyeeropovêhe pipe osecomohivi tupri Vu Tūpa rembipeha apirêhi vaheṛã. ¹⁵ Iyavei Espiritu Santo aipo ehi tupri avei icuachiapri aracahendar pipe yandeu:

¹⁶ “‘Co ari pare rumo na ahera che remimbotar apo chupe’ ehi yande Yar Tūpa, ‘Coipe amondora che porocuita ipihañemoñetasa pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe t̃ei sembiapogüer rese yuvireco” ehi aracahe.

¹⁸ Ëgüe ehi angaipa rese oimese ñeroisa, ahese ndiya iri seropovêhesa mbahe angaipa repirã.

Yayemboya catura Tūpa rese

¹⁹ Sese che rivireta, iya ité cūritei yande reique ãgua Tūpa rovai yande siquiyeēhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tūparo pipe asiasa turucuar yande reique ãgua Tūpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tūpa r̃eta rãrosar; ²² sese yayemboya catura Tūpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaēhisa pipe. Esepia, Tūpa omboaviye itera mbahe güemimombehugüer yandeu. ²⁴ Iyavei yasecañora ñepei-peí yañepitivii vaheṛã

yande yeaisu catu água iyavei mbahe tupri apo água yandeyeupe. ²⁵ Ndayamopanei chira yande ñemonuhasa Tūpa upe. Ndayaicoi chira omopane vahe nungar, iya rumo yayemonguerēhi catura ñepeí-peí yandeyeupe. Esepia, virovi ari yande Yar yevi iri água.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovēhepirā evocoi yande angaipa repirā yandeu; ²⁷ Tūpa ñemoirosa ipirata vahe güeraño oimera yandeu iyavei tata guasu apirēhi vahe opara omocañi Tūpa amotarēhimbar yuvirecoi vahe. ²⁸ Ava Moisés porocuita ndoviroyai vahe que ñuvirío, anise mbosapi rembiepiave, ahe secocuer mombehuse, ahe yucapri ité saisuēhisa pipe yuvirecoi. ²⁹ Peyapisaca tupri co rese: ipirata catu oimera Tūpa ñemoirosa tahir reroirosar upe curi iyavei acoi ava vireco vahe suvi inungar mbahe ēgüe ehi tēi vahe iyavei viroiro tēi vahe guaisusar Espiritu, chupe avei oimera Tūpa ñemoirosa ipirata catu vahe. Esepia, co tuvi rese niha seroyapri ité Tūpa remimbotar. Ipipe avei niha ahe ava Tūpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tūpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. ³³ Esepia, acoi amove pe pāhu pendar rese iñehe-ñehe tēi yuvireco, mara-mara tēi avei pe rereco opacatu ava rovaque. Ambuae pe pāhu pendar evocoiyase peipitivi pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocuva yuvireco pe sui peñemosañi avei pe viharetesa pipe peico. Esepia, peicua ivave perecora mbahe aviye catu vahe iyavei apirēhi vahe. ³⁵ Sese pemocañi tēi eme Tūpa rese pe yeroyasa. Esepia, evocoiya pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tūpa remimbotar apo água semimombehugüer oime vaheerā pisi água curi. ³⁷ Supi eté icuachiapri pipe Tūpa aipo ehi:

“Pihaivi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaheerā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasãro vahe yandeu, iyavei yaicua ité oime mbahe ndayasepia vahe. ² Supi eté amove yande ramoí arachendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepia vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoēhi viteseve, “Enoc recocuer aviye ai rane ité chupe” ehi icuachiapri arachendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vītei vahe” ehise chupe, viroya voi eté. Evocoyase seroyasave oyapo arca oyesuindar p̄siro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaheṛā vahesave, ahe amondora ndeu” ehise, omboyeroña ité. Yepe ahe ivi ndoicuai viña, osēño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pīrer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaheṛā Tūpa remimombehu ivi yuvireco. ¹⁰ Esepia, aipo Abraham osāroño ité tecua ivave ovīracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi p̄ratasa Tūpa sui guahi āgua. Esepia, viroyaño ité Tūpa oñehe omboaviye āgua chupe. ¹² Evocoyase yepe Abraham ocuacuami viña, vireco rumo guahir. Ahe ichuindar sehii eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisii eté mbahe semimombhugüer oyeupendar. Ahe mbahe amombri rupi osepiño tēi yuvireco oyeroyasa pipe, soriveteño avei sese. Ēgüe ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vīte oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochi eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahir ñepe vahe Isaac reropovēhe āgua Tūpa upe güecoñhasa pipe. Yepe Tūpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tūpa vireco p̄ratasa ava omano vahe mbogüerayevi iri āgua. Evocoyase imano rāgüer sui eté oipisi iri guahir aracahe. Ahe evocoyase omboyecua mbahe yandeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaheṛā pisi āgua.

²¹ Iyavei Tūpa rese oyeroya pipe avei Jacob omano pota āgua, osovasa ñepe-peí José rahir. Ahese opococa rese tēi eté oyemovīracua oyeroqui āgua Tūpa upe imboeteisa pipe.

²² Tūpa rese oyeroya pipe avei José, omano āgua renonde, aipo ehi: “Yande mu israelita opara yuvīnose ivi Egipto sui curi” ehi. Ipare oyocuai omu oitacuer rerova āgua aracahe.

²³ Tūpa rese oyeroya pipe avei, ohase Moisés, iyesupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuita yuca āgua sui.

²⁴ Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he āgua. ²⁵ Ahe rumo oipota catu mara-mara tēi güereco āgua Tūpa reroyasar reseve chīhi rupive mbahe tēi rese yemboviha rāgüer sui. ²⁶ Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepīrusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaheṛā.

²⁷ Tūpa rese oyeroya pipe avei osē ivi Egipto sui osiquiyeēhisa pipe mborerecuar guasu roriēhise. Oyemovīracuaño ité oyese mbahe apo āgua; aviye osepi vahe ité Tūpa acoi ndoyecuai vahe. ²⁸ Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mīmba ruvi Tūpa rembiguai oporoyuca vahe ava israelita rahir ipi yucaēhi āgua.

²⁹ Tūpa rese oyeroya pipe avei ava israelita osasa para guasu Pīra Vahe ivi ipiru vahe hari rupi yuvīraso. Ipare yamotarēhimbar Egipto pendar, “Ēgüe yahe avei” ehi yuvireco viña, i rumo opaño oyopi.

³⁰ Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

³² ¡Setá vite ambuae ava recocuer oime amombehu vaheerã pēu! Ipane ité rumo ari imombehupa āgua: Gedeón, Barac, Sansón, Jefté, David, Samuel iyavei opacatu Tūpa ñehe mombehugar recocuer. ³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñvisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua. ³⁶ Ambuae iparaisu catu ava upe oñeeroirosa pipe, onupasa pipe, oapichi-pichisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiassa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pিরer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vaheerã oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri āgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tupri ira yande yeroyasa pipe Jesús rese

¹ Sese yande, yaicuase setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepia, ahe oicua ité oparaisu pare virecora oviharetasa, oguapise omborerecuasave Vu acato coti oī.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyei chira. ⁴ Esepia, pe ndapemano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voiño Yar nde mombaraisusa upe nde reco mohivi tupri āgua, iyavei, ‘Ndachequerēhi iri’ nderei chiaveira chupe ndeu oñehe pīratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco āgua” ehi.

⁷ Peñemosañu catu pe mombaraisusa upe pe reco mohivi āgua. Esepia, Tūpa ēgüe ehise pēu guahir ité pe rereco. ¿Oime pīha que ñepeí ava guahir upe noñehe pīratái vahe secocuer mohivi āgua? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chíhivahe ndiyesupai vahe, ēgüe peye tēi peico chupe. ⁹ Iyavei, chíhivahe tēi vite yaicose, yande yesupa co ivi pipendar yande nupa yande recocuer mohivi āgua, ahese yamboetei. Sese yamboetei catura yande Ru Tūpa

iva pendar tecovesa rereco āgua. ¹⁰ Yande yesupa co ivi pipendar opihāñemoñetagiē rupi tēi yande nupa yaicove raimi tēise co ivi pipe; Tūpa rumo yande mombaraisi yandeu mbahe tupri āgua rese yande reco maranehi āgua inungar ahe ndaseco marai vahe. ¹¹ Supi eté yipindar, poronupasa yaipisi ramosē, tasi yandeu. Coiye rumo yande imboyeroyasa pipe yayapo catura mbahe ihīvi vahe. Ahe evocoyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopose iri pe reco pīratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihīvi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava piha pipe; avieteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroñro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirā tēi vivri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasehó iteanga viña, ndiya iri eté rumo mbahe sembierecovi rāgüer mboyevi āgua chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigüer; oime pītu, pītumimbi vahe, ivitu ai avei sese. ¹⁹ Iyavei ndapesendui mimbi imoñehēpri, Tūpa ñehe avei. Aracahendar rumo osendu ité yuvireco. Ñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evocoi porocuita aipo ehi vahe sui: “Acoi opīro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave aririi eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei āgua yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohivi tupri sereco. ²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherā acoi pēu oñehe vahe upe. Esepia, Moisés reroyaēhisa pipe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Ēgüe ehise chupe yuvireco aracahe, Ēgüe ehi catu iri tiētera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboririi eté ivi aracahe; cūritei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiapo Tūpa ‘topita apirēhi mbahe nomii vahe’ oyapave” ehi. ²⁸ Tūpa mborerecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepeí reseve mbahe omocañipa vahe.

¹ Ndapepoi chietera pe yeaisusa sui ñepei-peí oyeivri nungar pe recosa pîpe. ² Iyavei peresarai eme pe avasa sui ava oyepotase pe piri. Esepia, co nungar apo pîpe amove ava omoingue Tûpa rembiguai güêtave icuaêhi pîpe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara têi serecopri rese. Esepia, avieteramo êgüe ehi aveira pëu.

⁴ Pe opacatu pemboetei avei mendasa, iyavei peico pe reco maranehisa pîpe mendasa rese. Esepia, Tûpa oicuaara oyemboaguasa têi vahe upe.

⁵ Ndahei guarepochi têi peipota raira. Iya rumo peyembovihanõ mbahe pereco vahe rese. Esepia, Tûpa aipo ehi: “Ndoroeyai chietera, ndapoi chietera nde sui” ehi aracahe.

⁶ Evocoiyase aipo yahera Yar rese yande yeroyasa pîpe:

“Che Yar che pîtivii, ndasiquiyei chietera ava têi sui oyapo potase mbahe cheu” yahera.

⁷ Peyemomahenduha pe rerogatasar rese, pëu Tûpa Ñehengagüer mombehugar rese avei. Pepihañemoñeta tupri secocuer rese, seco apri rese avei; iTûpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirêhi vahe. ⁹ Peyembopa ucai rene yembohesa co coti têi vahe upe. Aviye catu yayemomirata Tûpa poroaisusa rese que mborocuaita tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tûpa upe seropovêhepri. Ahe niha ndiyai eté pahi tûparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi têi Tûpa rêta oi imaranehi catu vahe pîpe seropovêhe ava angaipa rerocua água; ahe mbahe mimba rete rumo osapi tecua ivii yuvireco yepi. ¹² Êgüe ehi avei niha Jesús iparaisu, omano tecua ivii ava reco mbocatupri água vuvi pîpe. ¹³ Êgüe yahe aveira yasora Jesús upe yande paraisu água supi ava yande roñrosa pîpe yaico. ¹⁴ Supi eté, co ivi pîpe ndayarecoi eté tecua apirêhi vahe. Yande rumo yaseca evocoi tecua oime vahe yanderã yandeu curi. ¹⁵ Sese Jesús rembiapo rese iyacatu yamboeteira apirêhi vahe yanderã yanderã Yar Tûpa. Co imboeteisa inungar mbahe seropovêhepri ari rupi chupe. ¡Êgüe yahera imboetei yande ñehe pîpe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovêhepri Tûpa upe. Ahe niha Tûpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rãro yuvireco. Esepia, oicua Tûpa oicuaara mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tûpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pîpe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihavi água rese ité aporandu pe yeruresa rese pëu Tûpa remimbotar rupi.

Mahenduhasa ipa vahe

²⁰ Tûpa mbahe tupri rerecosar, ahe niha ombogüerayevi vahe yande Yar Jesucristo yande rãrosar ivate catu vahe, suvi pîpe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo água; iyavei ahe toyapo mbahe opacatu güemimbotar yande rese Jesucristo rembiapo sui. ¡Êgüe tehi imboeteipri apirêhi tasecoi Cristo yepi!

²² Che rivireta, peñemosañõ co che opomboaracua vahe rese, moviro têi niha co ñehesa aicuachía pëu. ²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tûpa upendar ava upe avei. Ivi Italia rupindar avei ombou omahenduhasa yuvireco pëu.

²⁵ Aipo rupive, yande Ru Tũpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosãgua rese peico. ⁴ Peicoño ité pe reco ñemosasa pìpe pe reco mohivi tupri catu ãgua. Evocoyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoyase ahe omboura chupe. Esepia, ahe opacatu upe mbahe ombou güecatêhiêhisa pìpe iyavei ombahe mboasiêhisa pìpe avei. ⁶ Iyacatu rumo evocoi ava oporandura Tūpa upe sese oyeroyá pìpe, ndahei chira opihañemoñeta rerova-rova tẽisa pìpe inungar acoi ivitu i ombohitu-hitu tẽi vahe. ⁷ Acoi êgüe ehi-ehi tẽi vahe ava ndoipisii chira mbahe yande Yar sui yuvireco. ⁸ Esepia, ñepei ari ipihañemoñeta ñepei mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pãhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri êgüe ehi raimi tẽi vahe yuvireco. ¹¹ Evocoyase acoi ari osẽse, sacú iteangase, ahese caha opa ipiru; ipotri avei opa oviapi ichui iyavei iporañetesa opa ichui. Êgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirêhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tẽi apo ãgua, “Tūpa revo êgüe ehi cheu” ndehi chira. Esepia niha, Tūpa ãtoisar ndipoi eté mbahe tẽi oyapo uca vaherã chupe. Iyavei ahe noñatoi avei mbahe tẽi apo ãgua ava. ¹⁴ Co rumo ava opihañemoñeta rai upe oñeato uca mbahe tẽi apo ãgua yepi. ¹⁵ Güemimbotarai pìpe evocoyase oyapo angaipa. Ipare angaipa apo pìpe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pìpe ‘toyuvirecoi inungar yipindar mbahe miti ha seropovêhepri cheu opacatu che rembiapo sui’ ohesave yandeu.

Tūpa rese yande pìhañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehese rese: peyapisaca tupri vaira ambuae ava ñehese rese, mbegüe rupi rumo peñehera chupe iyavei ndapembahemboasi voi tẽi chiaveira. ²⁰ Esepia, yambahemboasi voi tẽise, ndayayapoi Tūpa remimbotar. ²¹ Evocoyase peseya teco raisa, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tūpa ñehese omoingue vahe pe pìha pìpe. Ahe niha vireco pìratasa pe pìsiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tẽira. Esepia, pesenduño tẽise, pe ae peyembopara. ²³ Supi eté acoi ava osenduño tẽise Tūpa Ñehengagüer, ipare rumo ndoviroyai, ahe inungar acoi ava osepiãño tẽi vahe vova yepiasa pìpe. ²⁴ Ipare rumo oyepepise ichui, cūruteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi

mbahe-mbahe tēi sui yande rerocua vahe rese iyavei oyemoviracuaño ité vahe oyapo vaheã iporocuaita, ahe oviharetera opacatu güembiapo tupri rese.

²⁶ Amove ava, “Che aguata tupri Tūpa rupi” ehi tēi. Ndoicuai rumo oñehe monguiriri ãgua. Evocoyase ahe ae oyembopa oico. Sembieroya evocoyase êgüe ehi tēi vahe. ²⁷ Yarecose rumo yande rembieroya icatupri, nimarai vahe yande Ru Tūpa rovai, ahese yaip̄t̄iviira co tirēhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoaviratii chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oiquese pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiquese pe pãhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evocoyase êgüe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravosar nungar peico pe pihañemoñeta raisa pipe.

⁵ Che rivireta, che rembiaisu, pesendu aipo ñehesa: Tūpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimombehugüer rupi che mborerecuasa oyeupe nara’ oyapave guaisupar upe. ⁶ Pe rumo seroñrosa pipe pemochi ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tēi seroñrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuaita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tēise rumo, ahese yayapo angaipa, yayavi mborocuaita Tūpa rovai. ¹⁰ Esepia, acoi ava viroya vahe opacatu mborocuaita, ipare rumo oime que ñepe nomboaviye tuprii vahe, ahe oyavi opacatu mborocuaita. ¹¹ Esepia, Tūpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyuca chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuaita. ¹² Evocoyase peñehe tuprira iyavei peico tupri aveira. Esepia, oporandura yande recocuer rese yande Yar oporocuaita pipe güeru vahe yande reco tupri ãgua. ¹³ Supi eté acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rivireta, ¿aviyera piha acoi ava, “Ayeroya yande Yar rese” ehi tēi vahe, ndoyapoise mbahe aviye vahe yuvireco? ¿Oicatura piha ahe oñepisiro aipo ohe pipe tēi yuvireco? ¹⁵ Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. ¹⁶ Evocoyase que pe aipo peyeñora chupe viña: “Aviye, eso tupri eico. Eyeao eso sōhisagüer sui, ecaru tupri” peyera. Ipare rumo ndapemondoise mbahe ipane vahe chupe, ¿aviyera piha ava upe aipo yande he tēi viña? ¹⁷ Êgüe ehi avei, “Ayeroya yande Yar rese” yande hesa; ndayayapoise rumo mbahe aviye vahe aipo yande hesa pipe, aipo vahe tēi yaico.

¹⁸ Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoēhi pipe. Evocoyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepe Tūpa” ere. Supi eté aipo ere. Co rumo caruguar avei oicua. Ichui osiquiyepave rumo

ahe oririi eté yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoẽhisa nde yeroyasa ãgüe ehi tẽi vahe? ²¹ Esepia, Tũpa oipisi yande ramoi Abraham seco tuprisa pipe oicuavẽhese porerecosa nungar guahir Isaac chupe aracahe. ²² Indó, Abraham yeroyasa omboyecua ité güembiapo catupri reseve. Evocoyase ãgüe ehi ahe güembiapo tupri pipe omboaviye tupri oyeroyasa oico aracahe. ²³ ãgüe ehi yaviye icuachiapri aipo ehi vahe: “Abraham viroya ité Tũpa, evocoyase, ‘Co seco catupri vahe’ ehi Tũpa ipisi” ehi. Ahese ava, “Abraham Tũpa mboripar ité” ehi yuvireco chupe.

²⁴ Indó, Tũpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ ãgüe ehi tupri avei cuña ndipihai vahe Rahab upe. Esepia, ahe omoingue ñuvirio ava ivi repiasar imondopri güeta pipe, ipare oñomi imondo ambuae peri rupi yamotarẽhisar sui. Ipipe sui Tũpa oipisi inungar-ra seco ñvi tupri vahe viña. ²⁶ ãgüe ehi yande rembiapo catupri ndayamboyecuaise yande yeroyasa pipe, ahe inungar avei Espiritu ndasecoise yande rese, yande yeroyasa evocoyase omano tẽi eté oico.

3

Yande ñehe resendar

¹ Che rivireta, yipindar ndapeyeapoi chira setá etepri oporombohe vahe peyepãhuve. Esepia, peicua niha yande oporombohe vahe yaicose, Tũpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe rese yepi. Oimese que ava ndoyavii vahe oñehe, ahe ava seco ñvi tupri vahe. Iyavei oicua tupri opacatu güeco rereco tupri ãgua. ³ Inungar acoi yamondose cavayu yuru penda sese seroguata ãgua. Ahese opacatu cavayu retecuer yaicatu imboyahuva ãgua. ⁴ Inungar tupri avei carite guasu, yepe tuvicha iyavei yepe ivitu omoañi opĩratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ ãgüe ehi avei yande ãpecu, yepe chĩhimi tẽi viña, ipipe rumo yayapo tẽi mbahe tuvicha vahe ava upe. Inungar avei que tata chĩhimi vahe sui tẽi yuvi guasu opa ocai. ⁶ ãgüe ehi yande ñehesa tata nungar. Iyavei yande ãpecu pipe opacatu mbahe-mbahe tẽi yamombehu. ¡Evocoi mbahe-mbahe tẽi mombehusar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehe tẽisa caruguar suindar. ⁷ Ava oicatu opacatu mbahe mĩmba nimasoi vahe mboaracua ãgua, vĩrai, mboi iyavei mbahe ipi para guasu pipendar avei no. ⁸ Ndipoi eté rumo que ava oipoepi vaherã oñehe. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tẽi eté. ⁹ Co yande ãpecu pipe yamboetei yande Yar Tũpa, ipipe avei rumo yamomara ava, ahe ava rumo Tũpa oyapo onungar. ¹⁰ ãgüe ehi eté, yande ñehe pipe yamboetei Tũpa, ipipe avei yaroĩro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pĩha osẽ ñepei i ohẽ vahe sui sẽhe vahe, iro vahe avei viña? ¹² ¿Ihara pĩha higuera ivira rese aceituna viña? ¿Iyavei oicatura pĩha uva hi rese oha higo viña no? ¡Aní, ndoicatu eté! Iyavei ndoicatu ñepei i ohẽ vahe sui osẽ i, sẽhe vahe sẽhe así vahe reseve.

Mbahecuasa supi eté vahe

¹³ Acoi oimese pe pãhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecuata tuprisa pipe. ¹⁴ Oimese rumo pe pĩhave pe poroamotarẽhisa mbahe pota raisa pipe, iyavei peyeupe nara tẽi mbahe peseca, ahese ndiyai peyembovĩha tupri tẽi ‘che yaracua vahe aico’ pe yapave. Esepia, peremira tẽira supi eté vahe mbahe rese. ¹⁵ ãgüe ehi eté evocoi nungar aracuasa ndahei Tũpa suindar. Ahe rumo co ivi pipendar tẽi vahe, ava pĩhañemoñeta sui tẽi osẽ vahe iyavei caruguar suindar tẽi avei. ¹⁶ Esepia, poroamotarẽhisa yande mbahe pota raisa pipe yarecose iyavei yaipotase mbahe yandeyeupe nara tẽi, ichui osẽ ñehepoepisa iyavei opacatu mbahe tẽi. ¹⁷ Acoi vireco vahe rumo Tũpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chaveira. Iyavei oyemoingatu voi vahe, ahe oporoparisuereco vahe, nomboyoaviratii

vahe güecocuer. Ahe ipihañemoñetasa ñepeí reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opiha pipe teco ñvisa.

4

Co ivi pipendar mbahe raisusa

¹ ¿Que sui pïha ou vavasa iyavei ñehepoepi-episa pe pãhuve? Ahe ou pe mbahe pota raisa sui pereco vahe pe pïhañemoñetasa pipe. ² Pe peipota rai mbahe. Ipare rumo ndapeicatui sereco ãgua. Evocoyase peporoyuca pe mbahe pota raisa pipe. Ndiyai eté rumo pëu sereco ãgua. Ipipe sui peyeecoãha, pevava avei no. Ndapeyosui eté rumo mbahe pe remimbotar. Esepia, ndapeporandui Tüpa upe. ³ Acoi peporanduse rumo sese, ndapeipisii. Esepia, peporandu rai tēi, peipota pe yemboviha ãgua rese nara tēi. ⁴ ¡Pe mbia, peyavi vahe pe recocuer! ¿Ndapeicuai vo acoi ava Tüpa cuaparēhi mboripar tēi yuvirecoi vahe, ahe Tüpa amotarēhimbar yuvirecoi? Ēgüe ehi eté acoi oipota vahe co ivi pipendar mbahe-mbahe tēi pipe güeco ãgua, ahe oyeapo Tüpa amotarēhimbar. ⁵ Supi eté Tüpa Ñehengagüer aipo ehi: “Tüpa osaisu güecatēhisa pipe o Espiritu omondo vahe yande pïha pipe” ehi. ⁶ Ahe rumo yande pñtivii catu oporoaisusa pipe. Esepia, icuachiapri aracahendar pipe aipo ehi: “Tüpa oyamotarēhi ava oyeecomboivate ai vahe. Oipñtivii rumo seco mbegüe vahe saisusave” ehi. ⁷ Sese pemboyeroya catu Tüpa. Peyemoviracua caruguar remimbotar apoēhi ãgua. Ahese ahe oyepepira pe sui. ⁸ Peyemboya Tüpa rese, ahe evocoyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pïhañemoñetasa ñuvirio pereco vahe sui! ⁹ ¡Tatasi pëu, tapeyaseho, perorivete iri eme, pemboasi pe angaipa pe yemboviharēhisave! ¹⁰ Peñenopiha Yar rovai imboyeroiyasa pipe. Ahe evocoyase pe reco mboivatera.

Peroñiro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroñiro vahe ambuae Jesús reroyasar, ahe oñehe rai tēi aveira mborocuita rese seroñrosave. Ēgüe peyese, evocoyase seroyaēhisa pipe peyemboivate catura mborocuita sui viña. ¹² Oime rumo ñepeño ité ombou vahe mborocuita yandeu iyavei oporandu vahe yande recocuer rese. Ahe güeraño avei oicatu oporopñsiro iyavei oporomocañi ãgua no. Evocoyase pe, ¡ndiyai pe cotindar reroñiro ãgua pëu!

Ndayaicuai mbahe oime vaherã yandeu ayihive

¹³ Pesendu pe aipo peye vahe: “Cūritei, anise ayihive yasora que tecuave, anise que tecua guasuve revo. Aheve yaicora ñepeí araviter yande poraviqui ãgua. Ahese yamogana catura guarepochi” aipo peye vahe. ¹⁴ ¡Ndapeicuai rumo mbahe oime vaherã pëu ayihive! ¿Mara ehi pïha yande recocuer? Ahe inungar ñvichi oyecua raimi tēi vahe, ipare opaño ocañi. ¹⁵ Iyacatu aipo peyera viña: “Oipotase yande Yar yande reco ãgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tupri apo ãgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ¡Pe mbahe yar, pesendu co: peyaseho iyavei perãse! Esepia, peiporarara mbahe tēi peico. ² Opacatu pe mbahe eta ocañi tēi vaherã. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ãgua, omboyecua vahe mbahe tēi pëu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pëu

nara yuvireco, chupe ndapemboepii eté. Sese sāsé tēi yuvireco. Ahe rumo yande Yar ipĩratá vahe, ivate catu vahe oicua. ⁵ Co ivi pipe tēi pe peyeecomoendiyai peico iyavei peyembovaha co ivi pipendar mbahe rese inungar guaca imonguirapri yuca āgua. Ipipe peyemoingatu pe cañi āgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rĩvireta, peñemosañō yande Yar yevi iri āgua rese. Inungar ava omaheti vahe osāro rane güemiti poho āgua. Esepia, ahe osāro yipĩndar oqui vahe iyavei ipa oqui vahe mbahe miti aviye āgua. ⁸ Pe avei peñemosañō, peyemonguerēhi catu. Esepia, cōimi eté yande Yar yevi āgua cute.

⁹ Iyavei che rĩvireta, peñemoĩroi rene peyeupe. Evocoyase Tūpa ndoporandui chira co mbahe rese pēu. Esepia, mborerecuar guasu iva pendar oyemoingatu voi ohā yandeu porandu āgua. ¹⁰ Che rĩvireta, peico catu inungar Tūpa ñehe mombehusar arachendar yuvirecoi vahe. Ahe oñemosañō mbahe rasicuer upe yande Yar rer pipe oñehe āgua yuvireco. ¹¹ Yande rumo yaicua sovasapri ava oñemosa vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparisuereco vahe.

¹² Che rĩvireta, peyapisaca tupri catu co che ñehe rese. Pe ñehe āgua ndapeiporui chietera que iva rer iyavei que ambuae mbahe pe ñehe reroya uca āgua. Iyacatu rumo, “Supi eté” peyese, supiño itera; “Ani” peyese, aní chiño itera Tūpa poronupasa pisiēhi āgua.

¹³ Aviyeteramo que pe pāhu pendar iparaisura oico; toyeroqui. Aviyeteramo oimera que sorivete vahe oico; ahe tosapucái Tūpa upe. ¹⁴ Aviyeteramo que ava imbaheasira oico, toñehe evocoyase Jesús reroyasar rārosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa vírecose, oime aveira ñerosa chupe. ¹⁶ Sese pemombehu pe angaipa peyeupe, peyeroqui avei peyese pe yembogüera tupri uca āgua. Ava aviye vahe oyeroyasa oquerēhisave opacatu güecocuer pipe, ahe iyeroquisa ipĩratá ité. ¹⁷ Acoi Tūpa ñehe mombehusar Elías yande nungar avei. Ahe oporandu oyeroyasa pipe Tūpa upe, “Toqui eme” ehi. Aipo ehise, ndoquii eté ivi harive mbosapí araviter imombitesa rupi. ¹⁸ Ipare oyeroyasa iri, ahese oqui iyavei mbahe miti iha iri.

¹⁹ Che rĩvireta, acoi oimese oyahuva vahe supi eté vahe sui pe pāhuve, ipare ambuae víroyevise Jesús upe, ²⁰ tapeicua pe acoi víroyevi vahe angaipa viyar secocuerai sui, oipĩsiro ihā imano rāgüer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoyase oEspíritu Santo pipe pe peha oyeupe nara viroyasar pe reco água ‘imoatiropri toyuvirecoi che Rahir ruvi pipe oangaipagüer sui’ oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ ¡Imboeteipri tasecoi Tüpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipípe sui yaicuaño ité oimera mbahe aviye vahe Tüpa suindar yandeu. ⁴ Ipípe sui avei Tüpa oipisi ucara pëu pe mombahesa ivave yapocatupri nocañi vaherã, ndituyui vaherã iyavei ndopai vaherã ité. ⁵ Pe peyeroya ité Tüpa rese. Sese niha ahe opiratasa pipe pe repi mbahe tõi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyembovihareteño peico, yepe cūrítei pe reco pipe peparaisu pucu raimi tõi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pïha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tõi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaëhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropisirosa apirëhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropisirosa resendar yuvireco ‘¿mara ehi eté pïha co tecocuer?’ oyapave yuvireco. Iyavei oñemoñeta yuvireco Tüpa oporoaisusa pipe pëu mbahe ombou vaherã rese. ¹¹ Cristo Espiritu senondeve oicua uca mbahe Tüpa ñehe mombehusar upe aipo ehi: “Poropisirosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pïha evocoi mbia?” ehi; “¿Mbahesera vo oimera co Espiritu remimombehu yandeu?” ehi yuvireco. ¹² Tüpa rumo omboyecua chupe, ndahei chupe nara ité imombepri yuvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cūrítei, Espiritu Santo pīratasa pipe imboupri iva pendar yandeu. ¡Tüpa rembiguai avei oicua tupri pota tõi cūrítei yuvireco viña!

Tüpa yande poravo yande reco maranehi água

¹³ Sese pe pihamoñeta tuprisa pipe pemahemoha tuprira peyese Tüpa porovasasa pëu ombou vaherã rese pe yeroya catu água acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tüpa recocuer cuaëhi viteseve. ¹⁵ Peicora rumo pe reco maranehisu pipe ité. Esepia, Tüpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tüpa niha opacatu ava upe secocuer rese nomboyoaviratii chira oporandu curi, sese pe, “Che Ru” peye vahe chupe peyembosiquiyera mbahe tõi apoëhi água imboeteisave

co ivi pipe peico vïtese. ¹⁸ Esepia, Tūpa pe p̄siro aracahendar pe ramoï suindar aracuasa ěgüe ehi tēi vahe sui. Peicua tupri ité niha co porop̄sirosa repri nimboep̄isai eté que mbahe ocañi tēi vaheṛā pipe inungar oro, anise guarepochira viña. ¹⁹ Imboep̄isa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoēhi vïteseve ěgüe ehi vaheṛā. Cūritei rumo oyemboyecua p̄eu mbahe tupri āgua. ²¹ Secocuer sui niha peroya Tūpa peico, ahe ombogüerayevi vahe omano vahe p̄ahu sui, ipare omondo oyemboeteisa, güeco porañetesa avei chupe. Ip̄ipe sui peyeroya Tūpa rese iyavei pesāro co mbahe aviye vahe p̄isi āgua ichui.

²² Cūritei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaheṛā ambuae Jesús reroyasareta. Evocoyase ěgüe peyera peyeaisu catu opacatu pe p̄ihañemoñeta tuprisa pipe, iyavei opacatu pe p̄iratasa pipe. ²³ Pe niha pereco tecovesa p̄iasu, ndahe pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. ²⁴ Esepia, icuachiapri aracahendar pipe aipo ehi: “Opacatu ava inungar caha, iyemboeteisa evocoyase inungar ipotri.

Ip̄pare ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vaheṛā ité yepi” ehi.

Ahe co ñehesa imombepri porop̄sirosa resendar p̄eu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar p̄itanimi ocuacua āgua oipotā cambi; ěgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua porop̄sirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroñroño yuvireco. Tūpa rumo ahe ita oiporavo aviye catu vahe. ⁵ ěgüe ehira pe rereco oyeupe inungar ita ndopai vahe; ip̄ipe sui omopuhara otūparoguā pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Esp̄iritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pipe aipo ehi: “Che amondo ñepeï ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochí chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oï aposar rumo viroñroño co ita yuvireco.

Ahe ita rumo coiye v̄iracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. ěgüe ehi vaheṛā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahi, iyavei chupendar ava seco maranehi vahe peico. ěgüe peye Tūpa reco p̄iratasa mombēhu āgua peico. Esepia, ahe pe renose p̄tumimbisa nungar pe recocuerai sui tesapesa aviye vahe pipe pe reique āgua. ¹⁰ Yip̄indar ndahe v̄itei eté Tūpa upendar ava peico, cūritei rumo ahe ité peico; yip̄indar ndaperecoi Tūpa poroparisuerecosa, cūritei rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe p̄ihañemoñeta raisa sui. Esepia, pemomara uca tēi pe recocuer ip̄ipe.

¹² Pereco tupri pe recocuer aviye vahe ava Tūpa ndoicua v̄itei vahe rovaque. Yepe ava

remieroïro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tuprisa pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe rese pe secocuer moña āgua. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ĩvi vahe oicuaru chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ĩvisave’ oyapave yandeu. Ahe niha yapichapri secoi pe recocuer moingatu āgua. ²⁵ Esepia, pe niha yipindar inungar ovesa ocañi tēi vahe peico viña. Cūrítei rumo peyevi Cristo upe. Ahe pe recocuer osāro cūrítei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Ēgüe peye aveira cuña, pemboyeroya itera pe mer. Esepia, amove ndoviroya vitei Tūpa Ñehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiēhisa pipe. Evocoi nungar aviye catu ité Tūpa rovaque. ⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ēgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepe oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe.

Evocoi nungar mbahe apo āgua niha Tūpa pe poravo ‘toipisi che porovasasa’ oyapave.
¹⁰ Esepia,

“Peipotase pe recocuer aviye tupri āgua pe yemboviharetosa pipe, pemombituhu pe
 ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

¹² Esepia, supi eté, yande Yar osāro ava seco catupri vahe iyavei osendu oyeupe yeruresa.
 Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui. ¹⁵ Pemboeteñora rumo Cristo pe Yar secosa rese pe pīha pipe. Peyemoingatu voira ava pe remiaro rese oporanduse pēu pe querēhisa pipe imombehu tupri āgua. ¹⁶ Ēgüe peyera rumo pe reco mbegüesa pipe imboeteisave. Peico tuprira pe pīhañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui. ¹⁸ Esepia niha, Cristo teieté omano yande angaipa repirā ñepeí reseve. Güeco maranehi pipe ēgüe ehi ava recocuerai rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tūpa remimbotar ava hā soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu āgua viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. ²¹ Ahe i osāhangapo i poroāpiramosa, ahe omboyecua yande ipīsiropri yande recosa. Poroāpiramosa rumo i pipe ndahei yande rete moatiro āgua. Co rumo yaporandura Tūpa upe, yande pīhañemoñetasa moatiro āgua. Ipīpe sui evocoyase yañepisiora yande Yar Jesucristo cuerayevisa pipe. ²² Ahe oso ivave oguapi oī Vu acato coti. Opacatu sembiguai eta, mborerecuareta, opacatu imborerecuasa ipīrata vahe avei ipovri pendar yuvirecoi.

4

Yandehañeco yandeyese mbahecuasa Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi ēgüe peye vaheñā peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipīpe sui ndoyuvireco iri chira ari rupi ava tēi pīhañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitesve. ³ Ēgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pīhañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cūrítei rumo pe mboriparer, ndoyembovihai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. ⁶ Sese niha co ñehesa pīsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

⁷ Virovi rumo ari ipa vahe oico, sese pe yapisacasa pipe pepīhañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe pīha pipe. Esepia, ēgüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuvirasos vahe pe rētave; “¿Mbahe rese pīha co ou?” peyei rene pe pīhañemoñeta pipe pe piri ou vahe upe. ¹⁰ Ñepeí-peí yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tuprira co Tūpa porovasasa setá vahe yande cuaita mboaviye tupri āgua. ¹¹ Acoi

pemombehuse Tūpa suindar mbahe, pemombehura inungar iñehe ité; acoi peporop̄itivii potase, peyapoño op̄iratasa p̄eu Tūpa ombou vahe pipe. Opacatu mbahe peyapo vahe peyapo ‘tombotei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ēgüe tehi apir̄ēhi vaherā ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe t̄ei yande recoãhasa p̄eu ‘ndoyavii, ndipoi chietera evocoi nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoyase yayemboviharete itera acoi yande Yar oyevise güeco p̄iratasa pipe. ¹⁴ Iñehe marase yuvireco p̄eu Cristo reroyasar pe recosa rese, sovasapri peico. Esepia, Tūpa Espíritu güeco porañetesa pipe secoi eté pe rese. ¹⁵ Acoi pe p̄ahu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe t̄ei aposa rese. Ndahei chiaveira que ambuae ava mbahe rese iñemañeco t̄eisa sui ēgüe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapech̄i chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité ar̄i Jesús reroyasar upe rane ité tecocuer rese porandu āgua. Ēgüe ehise yandeu, mbahe t̄ei catu itera Jesús reroyasar̄ēhi upe. ¹⁸ Yavaise seco catupri vahe upe iñepisiro āgua, ¿mara ehira p̄iha ava ndaseco p̄orai vahe ava angaipa viyar yuvirecoi vahe upe? ¹⁹ Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe h̄a r̄aro āgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe p̄ahu pendar Jesús reroyasar r̄arosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ēgüe ahe aveira acoi yande Yar oyevise curi. ² Pes̄aro tupri catu Tūpa upendar ava eta pe remiaro co omondo vahe p̄eu inungar ovesa rese yangarecuar os̄aro tupri vahe ovesa; peyapora pe quer̄ehisa pipe ité. Ahe niha Tūpa oipota, ndahei ambuae yande cuaisa pipe t̄ei, ndahei avei guarepochi pota raisave yayapo. Yayapora rumo mboraviqui yande quer̄ehisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai p̄irata vahe. Pemboyecuar rumo pe recocuer aviye vahe chupe imbohesa tupri pipe. ⁴ Evocoyase acoi oyevise yande Yar, yande r̄arosar ivate catu vahe, ahese peipisira mbahe porerecosa, teco or̄i porañete apir̄ēhi vahe.

⁵ Iyavei no pe mbia ch̄ihivahe, pemboyeroyara ava pe r̄arosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotar̄ēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa p̄iratasa povrive. Evocoyase pe reco mboivatera curi. ⁷ Opacatu mbahe rese pe p̄ihañemoñeta atisa pemombehura Tūpa upe. Esepia, ahe pe r̄arosar ité secoi.

⁸ Pearacua cañii rene peyesui, pemahemoha ar̄i rupi peyese. Esepia, pe amotar̄ēhimbar Carugar pe reco momara pota yepi inungar yaguar oñaro vahe oguata t̄ei oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tuprira, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vaherā supi

teco ori ndopai vahesave yande Yar rese yande recosa p̄ipe. ¹¹ Ĕḡie tehi tasecoi güeco p̄iratasa ap̄ir̄ehi vahe p̄ipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che p̄it̄iviisa p̄ipe co ayapo imondo che rembicuachía ndipucuimi vahe pe mboaracua catu āgua ‘ip̄ipe toicua tupri catu yuvireco co porovasasa oip̄isi vahe, sup̄i eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco p̄eu. Marcos, che rah̄ir nungar avei imahenduha pe rese. ¹⁴ Peyeovaupite “avirave” apo pe yeaisusa p̄ipe.

Tapereco tecocuer tupri yande Yar Jesucristo rese peico vahe. Aipo rupive.

IMONŪVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tūpa, yande Pĩsirosar Jesucristo seco ĩvi vahe yuvirecoi. ² Tapeipisi catu porovasasa iyavei teco tupriisa Tūpa, yande Yar Jesús cua tupri pipe.

Jesús reroyasar recocuer

³ Tūpa ombou güeco pĩrata pipe opacatu mbahe ipane vahe yande recove āgua, sese yande pihañemoñeta catu āgua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. ⁴ Ipípe avei oseya oñehe imboaviyepirā yandeu; ahe ñehe ěgüe ndehi tēi vahe, aviye catu vahe ité. Co yandeu ñehesa pipe sui perecora Tūpa reco aviye vahe peyese pe yepēpi āgua mbahe tēi sui. Ahe acoi oime vahe co ivi pipe ava remimbotar tēi sui. ⁵ Sese pe peyeroya vahe Jesús rese, peyemomirata catu aveira peyapo vaheerā mbahe aviye vahe. Peseca aveira Tūpa remimbotar cua tupri catu āgua. ⁶ Iyavei peñearo tuprira. Ipāre peñemosañe aveira mbahe tēi upe. Ipípe sui peyemondo tupri catura Tūpa upe. ⁷ Ipāre peyeaisura peyeivri nungar pe recosa pipe. Ipípe sui peseca catu viterā ava raisu tupri āgua.

⁸ Esepia, perecese evocoi nungar mbahe pe recocuer pipe, pembouvicha catusavei, ahese pe recocuer ěgüe ndehi tēi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapiso vahe, anise mbahe ndosepia tupri vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tūpa pe renoisa mboyecua āgua iporavopri pe recosave. ěgüe peyese, ndapeviapi chietera mbahe tēi pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Pĩsirosar Jesucristo.

¹² Sese niha opomomahenduhāno itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cōimi che mano āgua cheu. ¹⁵ Opombohera rumo opacatu che catugüer rupi co tecocuer rese che manore pe mahenduha āgua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pĩratasa resendar, iyevi iri āgua resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tūpa omboeteise Guahir iyavei omondose chupe seco porañete iri āgua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. ¹⁸ Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa arachendar Tūpa ñehe mombehusar remimombehugüer supi tupri vahe Cristo resendar. Iya ité pëu pe yapisaca tupri āgua sese; inungar que tataendi pĩtusave osesape vahe oico acoi osēse voi cōhe rerusar yasitata guasu ou, ěgüe ehi co ñehesa pe piha pipe sesape. ²⁰ Peicua catu co mbahe, co ñehesa arachendar icuachiapri Tūpa suindar ité, ndahei yandeyesui tēi yaicua imombehu āgua. ²¹ Esepia, ndahei ñehe mombehusar oyesui tēi omombehu yuvireco. Ahe rumo ava seco catupri vahe ité. Tūpa ité omombehu uca oñehe chupe Espiritu Santo pĩratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opĩsirosar. Co rumo güecocuer momba pihaivi āgua tēi ěgüe ehira yuvireco. ² Setá ava oguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirā yuvirecoi.

⁴ Esepia, aracahe Tūpa niñeroi eté güembiguai oyemboangaipa vahe upe. Ahe opa ité omondo mbahe tēisave. Ěgüe ehi seyapa pĩtumimisave, inungar ñapichimbri carena pipe yapocatupri yuvireco cañisave nara. ⁵ Iyavei acoi Tūpa niñeroi avei ava aracadendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihĩvi vahe resendar iyavei ava siete yuvirecoi vahe supindar, ahe güeraño ité oipĩsiro. ⁶ Iyavei opa omocañi tata pipe tecua Sodoma, Gomorra avei; ěgüe ehi imbotanimbu tupri 'na ahe aveira niha ambuae ava che reroyaēhisar upe curi' ohesave. ⁷ Lot güeraño rumo ahese oipĩsiro. Ahe mbia aviye vahe secocuer; ndoyembovĩhai tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroĩro vahe yande Yar mborerecuasa, oyecomboivate ai vahe güemimbotar aposa pipe, acoi osiquiyeēhisa pipe oñehe rai vahe seco ivate, ipĩrata vahe rese. ¹¹ Tūpa rembiguai eta iva pendar rumo yepe ipĩrata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tēi, "Yayembovĩha mbahe yande rembiapo ai rese" ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe piri, güeco rai reseve oyembovĩha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. "Yayapoño mbahe" ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaherā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepipi tecocuer aviye vahe sui mbahe tēi apo āgua guarepochi pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaēhisa sui.

¹⁷ Co ava oporombohe vahe inungar ivicuar ipiru vahe. Iva quiha ivitu remimombo nungar tēi avei. Apirēhi vahe ité imombopirā yuvireco pĩtumimbi catu vahesave nara. ¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua. ¹⁹ "Opacatu mbahe apo yaicatu yande reco pipe" ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvĩnose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca. ²⁰ Esepia, acoi oicua vahe yande Yar, yande Pĩsirosar Jesucristo yuvireco, ipipe oyepipi co ivi pipendar mbahe-mbahe tēi sui, oyeiti

uca irise rumo co nungar mbahe tēi pipe, ichui ndoicatu iri yuvínose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuita imondopri aviye vahe cua pare oyepēpise ichui, aviye catura revo ndoicuaise co tecocuer ihīvi vahe yuvireco viña. ²² Supi tupri ité yaviye ñehesa sesendar: “Cave rumo ohu iri ogüēhe. Iyavei cuchi oyasu pare, oyevi iri tuyuve oyemboavaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. ² Peyemomahenduha arachendar Tūpa ñehe mombehusar seco catupri vahe ñehengagüer rese, yande Yar Poropĩsirosar porocuita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñrora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaherā curi? Esepia, yande ramoi opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co arachendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. ⁶ Coiye i pipe avei opa omocañi ivi, ombouse amarusu aracahe. ⁷ Cūríteindar rumo iva, ivi imoingatupri tata uve nara Tūpa porocuita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepei ari inungar mil araviter; mil araviter evocoiyase inungar ñepei arimi tēi chupe. ⁹ Esepia, yande Yar ndiaracahe eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pipe yandeu. Esepia, ndoipotai que ñepei yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pĩtu pipe yepi. Ahese iva ocañi tupri tēira viapugüer ipĩrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tēi etera.

¹¹ Opacatu ité niha co mbahe yapopri ocañi tēi vaherā. Sese, ¡peyemoviracuaño itera pe reco maranehisa rese Tūpa rese pe pihañemoñetasa pipe! ¹² Pesāroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipipe sui opacatu mbahe yapopri ticupa tuprira curi. ¹³ Yande rumo yasāro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesāro viteseve co tecocuer, ēgüe peyera opacatu peicatugüer rupi pe reco tupri āgua pe angaipaēhi pipe, pēu Tūpa, “Peyavi mbahe” ehiēhi āgua. ¹⁵ Tapeicua co: yande Yar seco mbegüe yandeu yande pĩsiro āgua. Ēgüe ehi avei yande rembiaisu Pablo icuachía oyeupe Tūpa ombou vahe mbahecuasa pipe pēu. ¹⁶ Opacatu ocuachiar pipe omombehu evocoi nungar mbahe pēu, yepe amove yavai senducua āgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipipe güecocuer omocañi tēi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaēhi āgua ava ndiporeroyai vahe upe Tūpa rese pe recocuer yemoviracuasa sui pe yepepiēhi āgua. ¹⁸ Peicua tupri catura rumo yande Yar Poropĩsirosar Jesucristo iyavei peicoveño itera iporovasasa pipe. ¡Ēgüe tehi imboeteipri tasecoi cūrítei apirēhi vaherā! Aipo rupive che ñehe pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombehu pëu co yipisuive secoi vahe. Ahe orosendu, orosepia avei ore resa pipe ité iyavei oropoco ité sese. Ahe niha Tüpa Ñehese tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirëhi oromombehu vahe pëu. Ahe Vu rese secoi vahe oyemboyecua vahe oreu. ³ Oromombehu co orosepia vahe, orosendu vahe ñepei vahe nungar pe reco ägua ore rese inungar ore oroico yande Ru Tüpa rese, Tahir Jesucristo rese avei. ⁴ Evocoyase cüritei oroicuachía evocoi mbahe pëu yande yembovîharete catu ägua.

Tüpa tesapesa secoi

⁵ Iyavei Jesucristo ore mbohe co ñehesa rese, ahe oromombehu pëu: yande Ru Tüpa niha tesapesa secoi; ndipoi eté pîtumimbisa sese. ⁶ “Che aico tupri Tüpa rese” yahese, yaicoño rumo angaipa pipe, ahe inungar pîtumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tüpa secoi tesapesa, evocoyase yaico tuprîra yandeyeupe. Iyavei suvi yande moatîro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tüpa upe, ahese ahe omboura oñeroisa yande angaipa rese yandeu iyavei omoatîrora opacatu mbahe-mbahe tēi yande sui. Esepia, ahe seco ñvi vahe. ¹⁰ Iyavei, “Che ndacheangapai eté” yahe tupri tēise yaico, evocoyase Tüpa semirañete ai vahe nungar yareco. Ipipe ndayaroyai iñhengagüer.

2

Jesucristo yande reco moingatusar

¹ Che rahireta, co aicuachía pëu pe angaipañi ägua. Que revo ava oime oyemboangaipa vahe pe pâhuve, yareco rumo yande Pîtiviisar yande Ru rovai. Ahe Jesucristo, seco ñvi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ägua yande sui.

³ Acoi yayapo tuprise Tüpa porocuita, ahese supi eté yaicua Tüpa. ⁴ Oime amove ava “che aicua Tüpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboaviyese iñhengagüer, ahese supi eté yasaisu Tüpa. Ipipe sui yaicua yande reco tupri Jesucristo rese. ⁶ Acoi “aico tupri Tüpa rese” ehi vahe, ahe secoira Jesucristo nungar.

Mborocuita ipiasu vahe resendar

⁷ Iyavei, che rivireta, ndaicuachiai mborocuita ambuae ipiasu vahe pëu. Aheño ité mborocuita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pîtumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarëhiño rumo ambuae omboetasa Tüpa reroyasar. Evocoi nungar recocuer pîtumimbisave tēi vite. ¹⁰ Acoi osaisu vahe ambuae omboetasa Tüpa reroyasar, ahe secoi tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pîtumimbisa pipe tēi secoi, ndoicuai avei que rupi güecocuer virecora. Esepia, pîtumimbi vahe nomboesapisoi.

¹² Che rahireta, co aicuachía pëu nara. Esepia, Tüpa iñero pe angaipa rese pëu Jesucristo recocuer pipe. ¹³ Pe, yesupa peico vahe upe co aicuachía. Esepia, peicua

yipisuive oicove vahe. Aicuachía avei pëu, mbia chihivahe. Esepia, pesecopi Carugar.
¹⁴ Iyavei pe tahireta aicuachía opacatu pëu. Esepia, peicua vahe niha yande Ru Tūpa. Aicuachía avei pëu, pe iyésupa. Esepia, peicua yipisuive oicove vahe. Aicuachía avei pëu, mbia chihivahe. Esepia, peyemoviracua etepri, peipisi avei Tūpa Ñehengagüer pe piha pipe. Ipipe pesecopi Carugar.

¹⁵ Evocoyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vahe ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarēhimbar” ehi vahe, ahe cūritei setá oyemboyecua yamotarēhimbar yuvireco. Sese yaicua ari ipa vahe yepota āgua. ¹⁹ Ahe oyepēpi yande pāhu sui; ndahei eté rumo yande rivri yuvireco Tūpa rese. Esepia, acoi yande rivri itese, ahese opitara yande piri yuvireco viña. Ēgüe ehi oyecua ndahei opacatu yande rivri yuvirecoi.

²⁰ Cristo omondo Espiritu Santo pëu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pëu. Esepia, mbahe supi eté vahe sui ndoui temira. ²² Acoi “Jesús ndahei Poropñisrosar imboupri” ehi vahe, ahe semira tēi vahe, yamotarēhimbar yuvirecoi. Ahe niha ndoviroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Ēgüe peyese, ahese peico tupri Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirēhi vahe peyese” ehi yandeu.

²⁶ Sese co ava pembopa pota vahe resendar aicuachía pëu. ²⁷ Pe pereco Espiritu Santo Jesucristo ombou vahe pëu. Sese ndiyai eté ambuae pe mbohera. Espiritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espiritu Santo pe mbohesa rupi.

²⁸ Iyavei che rahireta, peicoño ité Cristo rese yareco vahe ité sese yande yeroyasa. Acoi ogüeyise íva sui curi, ahese nayachí chietera sovai ichui. ²⁹ Pe niha peicua Jesucristo seco ívi vahe. Iya peicua avei opacatu oyapo vahe mbahe ihívi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatu eté yande recocuer cua āgua. Esepia, ndoicuai Tūpa recocuer yuvireco. ² Che rivireta, yaico ité Tūpa rahir. Yande rumo ndayaicua tupri vitei yande reco āgua ipare. Cūritei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. ³ Iyavei opacatu osāro vahe Jesucristo yuvireco, oyepēpiño ité opacatu angaipa sui güeco catupri āgua, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuita. Esepia, angaipa Tūpa porocuita mboaviyeēhisa yepi. ⁵ Pe rumo peicua Jesucristo ou co ivi pipe yande angaipagüer mocañi āgua. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe

angaipa, ahe Carugar suindar. Esepia, Carugar yipisuive ité oyapo angaipa. Sese ou Tūpa Rahir Carugar rembiapo mocañipa água.

⁹ Opacatu yuvirecoi vahe Tūpa rese ndoyapoi angaipa. Esepia, ahe vireco ité Tūpa recocuer oyese yuvireco. Sese ndoicatu iri angaipa apo água yuvireco. Esepia, ahe Tūpa rahir ité yuvirecoi. ¹⁰ Icuapri ité Tūpa rahir yuvireco, icuapri avei Carugar rahir yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tūpa reroyasar, ahe ndahei eté Tūpa rahir yuvirecoi.

*Yaya*isura ñepei-pei yande yacatu

¹¹ Co niha ñehesa, acoi pesendu vahe yipisuive, ahe co yaya^{is}ura ñepei-pei. ¹² Ndayaicoi chira inungar Caín, ahe Carugar remimbohe oyuca vivri. ¿Mahera pñha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tūpa ndoicuai vahe pe roerose yuvireco. ¹⁴ Yande rumo yaicua aracacondar yande hã cañi tēi agüer. Cūrítei rumo yasē evocoi nungar sui tecovesa apirēhi vahe pipe yande reco água. Esepia, yande niha yasaisui yande rivireta Tūpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava ndoyambotai vahe yande rivri, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apirēhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei egüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vivri upe mbahe ipane vahe, iyavei ndoipitívii, ahe ndovirecoi Tūpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Egüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pñhañemoñetasa sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande pñha pipe yande reco tupri Tūpa rese, ahese yayeroyaña itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroyá iporocuaíta iyavei yayapo semimbotar yaico. ²³ Co ité iporocuaíta: yaroyara Tahir Jesucristo iyavei yaya^{is}ura ñepei-pei Tūpa yande cuaisa rupi tupri. ²⁴ Acoi yaroyase iporocuaíta, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

4

Espiritu Tūpa suindar iyavei espíritu Cristo amotarēhimbar

¹ Che rahireta, aní chira peroya opacatu “Espiritu pipe añehe” ehi vahe. Iyacatu rumo pesãha rane ‘¿Tūpa suindar ité pñha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité. ³ Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vahrã resendar. Ahe cūrítei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipirata catu Carugar sui. ⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepei-pei. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa seci. ⁹ Ēgüe ehi omboyecua oporoaisusa yandeu. Ahe niha, ombou Guahir ñepei vahe co ivi pipe ichui yande recove āgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirã. Ahe niha poroaisusa supi eté vahe.

¹¹ Che rivireta, che rembiaisu, ěgüe ehi Tūpa yande raisu. Evocoyase ěgüe yahe aveira yande yayeaisu ñepei-pei yepi. ¹² Ndipoi eté ava osepia vahe Tūpa. Yayeaisuse rumo, Tūpa seci yande rese. Iporoaisusa evocoyase oime ité yande rese. ¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar pĩsiro āgua. ¹⁵ Acoi ava “Jesús niha Tūpa Rahir” ehi vahe, ahe seci eté Tūpa rese; Tūpa evocoyase seci sese.

¹⁶ Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei seci sese. ¹⁷ Ēgüe yahe Tūpa poroaisusa mboaviye tupri ichui yande siquiyeēhi āgua acoi oyepotase ari cañi yandeu. Esepia, yande yaico co ivi pipe inungar Jesucristo. ¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporoaisu tupri eté.

¹⁹ Yipindar Tūpa yande raisu. Sese cūrítei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroĩro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepia, ndoicatu Tūpa ndayasepia vahe raisu āgua. ²¹ Jesucristo ombou co porocuaita yandeu: acoi osaisu vahe Tūpa, tosaису avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Poropĩsirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuaita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuaita, ahese yamboyecua Tūpa raisusa yaico. Iyavei iporocuaita ndahei yavai etepri yapo āgua. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei oseci mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecuar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opiha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehe Tahir resendar. ¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese seci. ¹² Acoi oipisi vahe Tūpa Rahir opiha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tũpa remimbotar rupi chupe, ahese ahe yande ñehe osendu. ¹⁵ Evocoyase yaicuase ahe osendu yande yeruresa, yaicua avei mbahe yande porandusa ombou vaheã yandeu.

¹⁶ Acoi osepia vahe yande mboetasa Tũpa reroyasar oyemboangaipa vahe, ahe rumo ndahei manosave nara, oyeroquirã sese. Evocoyase Tũpa omondora secove água chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pẽu. ¹⁷ Opatatu mbahe-mbahe tẽi ahe angaipa. Oime rumo angaipa ndayande rerasoi vahe manosave.

¹⁸ Yaicua Tũpa rahĩr ndoyapoi angaipa yuvireco. Esepia, Tahĩr osãro evocoi nungar. Ichui Caruguar ndopocoi sese. ¹⁹ Sese yaicua yande Tũpa rahĩr yaico. Iyavei opacatu ava ndovĩroyai vahe Tũpa, ahe Caruguar povri pendar tẽi yuvirecoi. ²⁰ Iyavei yaicua Tũpa Rahĩr ogũeru oaracuasa yandeu Tũpa supi eté vahe cua água iyavei yaico co supi eté vahe rese. Ahe niha Tahĩr Jesucristo, ahe avei Tũpa supi eté vahe iyavei tecovesa apĩrẽhi vahe. ²¹ Che rahĩreta, peñearo tupri tũpa angahu tẽi sui. Aipo rupive co che ñehesa amombehu pẽu.

IMOÑUVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuairpri, aicuachía co che ñehe pëu pe Tūpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherã ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparaisuerecosa pëu nara. Tombou avei güeco tuprisa, güeco supi eté vahe pipe oporoaisusa pipe avei pëu.

⁴ Che mboviharete aicuase pe pãhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tūpa porocuita yandeu. ⁵ Iyavei, che rivireta, che rembiaisu, tayayeaisu catu ñepei-peí. Co aicuachía vahe ndahei porocuita ipiasu vahe. Ahe niha acoi yipindar icuachiapri pëu. ⁶ Co yande yeaisusa, yande guata tupri ãgua Tūpa porocuita rupi. Co Tūpa porocuita yipisuive pesendu vahe, ahe omombehu yande yeaisu tupri ãgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviqui repri mocañi tēiēhi ãgua. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pëu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pëu. Namombehu potai rumo cuachiar pipe. Che teieté aso pota pëu che ñehe ãgua. Ahese yayemboviharetera oyese.

¹³ Iyavei Tūpa rembiporavo oñemonuha vahe cohava opacatu omondo omahenduhasa yuvireco pëu. Aipo rupive co che ñehesa amondo pëu.

IMOMBOSAPIISA JUAN REMBICUACHIA SAN JUAN

Gayo recocuer aviye vahe resendar

¹ Che, icuapri, aicuachía co che ñehe ndeu, che mboripar, che rembiaisu, Gayo. Che supi eté oroisu yepi.

² Che rembiaisu, che rívrí, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu. ³ Che aviharete asenduse yande rívrí ñehe nde recocuer resendar yugüeruse cohava. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rívrí, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipítivii catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opítivii āgua yuvireco ava Tūpa reroyasarēhi sui. ⁸ Sese yande ēgüe yahera yaico evocoi nungar upe ñehesa supi eté vahe rese ipítivii āgua.

Diótrefes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güētave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. ¹¹ Che rívrí, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. ² Tüpa tombou catu pëu pe paraisuerecosa pe reco tupri ãgua pe raisusa pipe.

Oporombohe vahe ava mbopa tēi ãgua resendar

³ Che rivireta, che rembiaisu, yipindar chepihañemoñeta ité yande p̃sirosa resendar cuachía ãgua pëu viña. Ipore rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepe reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Nehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepe vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoi eta Egipto sui. Ipore rumo opa omocañi viroyasarēhi. ⁶ Inungar avei Tüpa rembiguai yipindar vahe yuvirecoi, nomboaviyei vahe ocuaita. Ipape sui Tüpa osoquenda p̃tumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasaguasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipape sui oiporara tata guasu apirēhi vahe yuvireco. Ahe opita opacatu yande yembosiquiye ãgua.

⁸ Ēgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco.

⁹ Aracahe Tüpa rembiguai ivate vahe Miguel oyepoepi-epi Carugar rese yuvireco Moisés retocuer rese. Yepe ahe Tüpa rembiguai rerecuar viña, ndiyai rumo chupe iñehe mara ãgua Carugar upe. Evocoyase aipo ehi chupe: “¡Tüpa oicuara co rese ndeu!” ehiño. ¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano opereroyaēhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pãhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quihā ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoyase ahe sapohopri.

¹³ Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso p̃tumimbisave, ěgüe ehi aveira ava Tüpa sui oyepopi vahe p̃tumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che

queraisa nungar pipe yande Yar turi iva pendar rehii reseve ¹⁵ opacatu ava recoãha ãgua iyavei icañi mombehu ãgua opacatu mbahe-mbahe tõi aposar upe, opacatu oñehe-ñehe tõi yamotarẽhisave yuvirecoi vahe upe avei” ehi. ¹⁶ Ahe mbia niha oporoviroĩro yuvireco. Iyavei oseca oyeupe nara mbahe güemimbotar tõi apo ãgua. Ahe oyemboivate ai vahe oñehe pipe tõi yuvireco. Iyavei oñehe tupri ai angahu tõi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co arí cañi renonde oimera ava viroĩro ai vahe Tũpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyaho-yaho ucara ava Jesús reroyasar yuvireco. Güecocuer ivi pipendar tõi vireco vahe. Ahe niha ndovirecoi Tũpa Espĩritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espĩritu Santo pe rãrosa pipe. ²¹ Peñearo tupri Tũpa pe raisusa pipe. Iyavei pesãro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepeyi yangaipa pipe pe viapiẽhi ãgua.

Tũpa mboetei tupriisa

²⁴⁻²⁵ Tũpa yande Pĩsirosar ñepeyi vahe vireco pĩratasa pe rãro angaipa pipe pe viapiẽhi ãgua. Ahe avei pe rerecora güecocuer porañetesave pe reco angaipãhisa pipe. Ichui peicora pe viharetesa pipe. Ahe imboeteipri tasecoi. Ēgüe tehi timboyeroyasa seco pĩratasa iyavei imborerecuasa yande Yar Jesucristo sui, yipĩsui, cũritei apirẽhi vaheã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirã pëu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembigui che recose cheu.

² Che supi eté amombehu opacatu mbahe asepia vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerogui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovi ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; siete espíritu suindar avei no, ahe senda rovai yuvinohai vahe,

⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande p̄siro yande angaipa sui vuvi pipe,

⁶ iyavei yande rereco mborerecuarã, pahiguã avei no Vu Tūpa upe yande poraviqui āgua. ¡Ēgüe tehi imboeteipri tasecoi opiratasa pipe apirēhi vaheerã!

⁷ ¡Esepia, Cristo iva quihã rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yande Yar Tūpa opacatu mbahe mboavaisarēhi evocoi yipivé vahe ité, cūrteindar apirēhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riqehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. ¹⁰ Acoi yande Yar ari pipe Espíritu povrive aicose, asendu che raquicuei oñehe p̄rata vahe aviye acoi mimb̄i ñehe ¹¹ aipo ehi: “Eicuachía mbahe eresepia vahe. Ipape emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava p̄ha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipāhuve mb̄ia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer. ¹⁵ Ipi evocoyase sendi yai eté, aviye acoi bronce ocai vahe horno pipe, iyavei ñehe ip̄ratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osē quise pucu saimbe yoya vahe. Sova evocoyase aviye ari rendigüer ip̄ratá vahe.

¹⁷ Sepia ramosave, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyei chira. Esepia, che yipindar ité aico, ipandar avei. ¹⁸ Aicove vahe ité; yepe amano viña, cūrtei rumo aicove iri ndopai chivaherã ité aico. Che areco che mborerecuasa ava recocuer mocañi āgua. ¹⁹ Sese eicuachía co mbahe

erese pia vahe: cūrteindar oime vahe mbahe iyavei mbahe oime vahe rã curi. ²⁰ Co acoi ndereicuai vahe erese pia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rãrosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rãrosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vahe rã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco. ³ Che aicua peñemosañ peyemombaraisu peico che raisupave; ndapecuerai eté ipipe. ⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. ⁵ Sese peyemomahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeaisu iri catu inungar yipindar. Anise ayevira pẽu, arocuapara pe vera hi senda sui acoi ndapeyeviise Tūpa upe. ⁶ Co rumo mbahe pe rembiapo aviye cheu: ndapeipotaise nicolaĩtas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espĩritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar oime vahe teco orisave che Ru piri, ehi’ erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rãrosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi: ⁹ Che aicua pe yemombaraisusa, pe paraisusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tūpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi. ¹⁰ Ndapesiquiyei chira pe paraisu ãgua sui. Esepia, Carugar osoquenda ucara amove pe pãhu pendar secoãha ãgua; pe paraisu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porrecosa tecovesa pẽu. ¹¹ ¡Acoi osendu pota vahe, toyapisacaño Espĩritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoiporarai chira imoñuviriosa manosa pipe, ehi’ erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rãrosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Carugar oguapi oĩ; mborerecuar guasu nungar imboyeroyapri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tẽi che recocuer mombehu tuprisar Antipas evocoi tecua Carugar recosave. ¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovẽhepri mbahe rahanga upendar tẽi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pãhuve ndoyepipi potai eté nicolaĩta porombohesa sui yuvireco. ¹⁶ Sese pemboasi pe recocuerai, peyevi Tūpa upe, anise che aso poyava voira pẽu, ahese avavara chupe yuvireco che yuru pipe sui osẽ vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espĩritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tẽi apoẽhi ãgua, semihura amondora ndasepiasai vahe maná. Iyavei

amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuara, ehi' erera icuachía.

Ñehesa Tiatira pendar upe

¹⁸ “Eicuachía avei Tüpa rembiguai Tiatira pendar che reroyasareta rãrosar upe: ‘Tüpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosañõ evocoi cuña Jezabel pe pãhu pendar upe, ahe acoi oñehe tẽi angahu vahe Tüpa rese viña. Ahe rumo ombopa tẽi oporombohesa pipe che rembiguai iyemboaguasa-guasa tẽi uca ãgua sereco iyavei ohu uca mbahe roho mbahe rahanga tẽi upe seropovẽhepri yuvireco chupe. ²¹ Che amondo vite tẽi ari chupe, tomboasi oangaipa Tüpa upe oyevi ãgua, che yapave viña. Ahe rumo ndopoi potai eté oyemboaguasa tẽisa sui. ²² Evocoiyase cūritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembrĩ ichui. Ëgüe ehi opacatu che reroyasar oicuara yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pẽu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Caruguar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuita. ²⁵ Peyemoviracuañõra rumo evocoi mbahe pereco vahe rese, acoi che ayevisẽ voi vitu curi. ²⁶ Acoi ava oyemoviracua vahe mbahe-mbahe tẽi apoẽhi ãgua, oyapo vahe che remimbotar mano rupi eté, chupe amondora mborerecuar seco ãgua opacatu ivi rupi ²⁷ inungar che Ru ombou che mborerecuarã cheu; Ëgüe ehi aveira oporocuai opacatu tecua rupi inungar acoi vara guarepochi, mbahe riapiipa uca ãgua, aviyaera acoi mahemoinda ñaihu apopri viña. ²⁸ Iyavei amondora yasitata cõhe rerusar chupe. ²⁹ ¡Acoi ava osendu pota vahe, toyapisacañõ Espiritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tüpa rembiguai Sardis pendar che reroyasareta rãrosar upe: ‘Acoi ava vireco vahe siete tupri Tüpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tüpa upe nara, ehi pẽu viña; omano vahe nungar tẽi rumo peico. ² Peyemopoase catu peico iyavei pemonguerẽhi catu acoi viroya vite vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tüpa upe. Ndapeyemopoaseise rumo, asora pẽu inungar imonda rai vahe, Ëgüe ahera vicho pe resapiha. ⁴ Oime rumo amove ava pe pãhu pendar ndoyapoi eté angaipa yuvireco, evocoiyase inungar ava oguata vahe oturucuar morochi vahe rese, Ëgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tẽi apoẽhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacañõ Espiritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tüpa rembiguai Filadelfia pendar che reroyasareta rãrosar upe: ‘Co seco maranehi vahe, supi tupri vahe ité, vireco vahe mborerecuasa arachendar mborerecuar guasu David nungar, acoi omboise que oquenda, ñepeipei yepe que ava nomboyai chietera; iyavei acoi omboyase, ñepeipei yepe que ava nombõ chiete aveira, ahe

aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pëu pemombehu vaheã che recocuer. Ahe que ñepepe yepe ava nomboyai chietera yuvireco. Esepia, yepe pe nipirata tuprii vahe, peroya ité rumo che ñehe iyavei ndacheñomi eté ava sui peye. ⁹ Co Carugar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaita, peyemoviracua ité evocoi mbahe tēi upe peico. Evocoyase che opoepira acoi ari tecoãhasa ouse opacatu ivi rupindar upe curi. ¹¹ Ayevi poyavara. Peyemoviracua catu Tūpa reroyasa pereco vahe rese. Evocoyase ñepepe yepe que ava ndovirocua chietera Tūpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vaheã iva pendar che Ru Tūpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espiritu remimombhugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rārosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. † sacu raimi tēi vahe nungar peico pe rembiapo pipe. ¡Ñepepe reseve vahe rumo aipota, ndahei iguayī tēi vahe! Pe recocuer rumo iguayī tēi vahe nungar, sese opomboyeviñora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paradisusa che Ru rovaque inungar ndasesapisoi vahe peico. Iyavei ndapeyavii nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paradisuehi iri āgua che Ru rovaque; peseca avei turucuar morochi vahe teco tuprisa peyeupe che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. ¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. ²⁰ Esepia, inungar que ava oquenda omotara oquendipive ohā viña, ēgüe ahe pe pihave vichico; pesenduse che ñehe, pemboira cheu. Che evocoyase aiquera pe piri, yacarura oyepiri. ²¹ Acoi ava oyemoviracua vahe mbahe-mbahe tēi apoēhi āgua yuvireco, ahe ambogupī ucara che ipive imoi che porocuaisave, inungar che mbahe tēi reco reroyī pare, aguapī che Ru ipive vīte. ²² ¡Acoi ava osendu pota vahe, toyapisacaño Espiritu remimombhugüer rese che reroyasareta upe! ehi imombehu pëu' erera icuachía” ehi Jesús cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipīrata vahe mimbī nungar yipindar oñehe vahe cheu, ahe asendu iri: “Eyeupi ave. Che evocoyase mbahe amboyecuara ndeu mbahe imboaviyepirā curi” ehi.

² Ahe pipeve voi, Espiritu pīratasa pipe aico iyavei asepia tenda ivave, ahe iharive ñepepe oguapī oī. ³ Co oguapī vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendí vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapī yuvinoi veinticuatro avei icuapri yuvirecoi vahe; iturucuar morochí vahe yuvireco iyavei oāca rese omboyere tupri oro apopri yuvireco. ⁵ Evocoyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete

tupri tataendi sendipa yuvireco evocoi tenda rovai, ahe co siete tupri Tūpa espíritu.
⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipindar yuvirecove vahe pāhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pĩtu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūrteindar, apirēhi vahe!”

ehi yuvireco.

⁹ Evocoi yuvirecove vahe omboetei yuvireco, “Aviye ndeu” ehi co uguapi vahe oĩ tenda harive ndopai vahe upe. ¹⁰ Ēgüe ehise evocoyase veinticuatro tupri icuaiipri yuvirecoi vahe, ahe oñenopiha imboeteisa pipe sovai yuvireco. Ipare oseQUII oāca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

5

Ovesami upe güeraño iyacatu cuachiar imboyapri mboi āgua

¹ Che asepia cuachiar Tūpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipare asepia Tūpa rembiguai seco ivate vahe, ahe oporandu pĩrata oico aipo ehi: “¿Ava upe vo iya cuachiar mboi āgua iyavei sello imboyeroyapri monodoro āgua no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherā cuachiar pipira sepia āgua viña. ⁴ Evocoyase che ayasehó iteanga. Esepia, ndipoi eté que ñepeí yepe oime angara aviye vahe cuachiar pipira sepia āgua viña. ⁵ Ahese icuaiipri pāhu pendar ñepeí aipo ehi cheu: “Ereyaseho iri eme. Esepia niha, evocoi ava yagua pĩta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello monodoro cuachiar pipira āgua” ehi.

⁶ Evocoyase, asepia Tūpa rovai iva pendar irungatu yuvirecove vahe pāhuve, icuaiipri yuvirecoi vahe mbiterve, ñepeí ava Ovesami nungar ihāi, aviye seropovēhepri. Ahe niha vireco siete tupri sāchi, siete tupri avei sesa; sesa evocoyase siete tupri Tūpa espíritu yuvirecoi opacatu ivi rupi imboquatapri. ⁷ Ipare evocoi Ovesami oso, oipisi cuachiar evocoi tenda harive uguapi vahe yacato coti sui; ⁸ ipisi pare, evocoi irungatu yuvirecove vahe, iyavei veinticuatro tupri icuaiipri, ahe oñenopihapa Ovesami rovai yuvireco. Oyacatu ñepeí-peí vireco arpa yuvireco, itaisi riru oro apopri, ahe avei vireco yuvireco, ahe itaisi niha Tūpa reroyasar yeruresa. ⁹ Osapucái ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi āgua,

imboyapri monodoro āgua avei no.

Esepia niha, nde yucapri seropovēhepri ereico.

Evocoyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepeí-peí tecua yacatu rupindar, ivi rupindar avei yuvireco.

¹⁰ Iyavei eremborerecuá uca Tūpa upe nara,

erembopahi uca avei no, ipare ahe oporocuíra opacatu ivi rupi yuvireco” ehi osapucái yuvireco.

¹¹ Ipare asepia, asendu avei Tūpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuapri ñehe avei asendu setá iteanga yuvirecoi. ¹² Ahe aipo ehi pīrata yuvireco no:

“¡Co Ovesami yucapirer, ahe chupe iyacatu ité mborerecuasa pisi āgua, opacatu Tūpa suindar porerecosa pisi āgua, mbahecuasa, pīratasa, mboyeroyasa, poromboeteisa, iyavei sapucaisa pisi āgua avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pīpendar, ivivri rupindar iyavei para guasu pīpendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei pīratasa, ahe timondosa apirēhi vaheřā Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuapri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omondo yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “¡Erio!” ehi cheu. ² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco reroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Erio!” ehi vahe cheu. ⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pīpendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Erio!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa. ⁶ Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepei ari resendar mboraviqui repri pipe, mbosapi kilo cebada evocoyase serocuasa avei ñepei ari resendar mboraviqui repri pipe no. Pemocañi eme mbahe quira iyavei uva ricuer avei no’ ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu. ⁸ Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavrive ava hā, ahe yucasa vahe yuvireco Tūpa Ñehengagüer mombehusa sui tēi iyavei Jesús reroyasa sui tēi avei no. ¹⁰ Ahe aipo ehi pīrata yuvireco: “Ore Yar Tūpa seco marañehi, supi tupri vahe, ¿mbahese vo eremombaraisura ore yucasarer yuvirecoi vahe ivi pīpendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi ririri ipīratá vahe. Ari evocoyase sū, aviye acoi turucuar sū vahe mano sendar yemondesa iyavei yasi pīrá inungar tuvi, ¹³ yasitata evocoyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborerecuareta avei co ivi pīpendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate

vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata vahe oreu! ¹⁷ Esepia, oyepota ité Tūpa ñemoirosa oreu. Ndipoi chintera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai iva pendar yuvinochai vahe irohi coti, norte coti, ari sēsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuēhi āgua, que para guasu pipe angara viña, que ñepei yepe ivira ro angara viña no. ² Ipare asepia avei ambuae Tūpa rembiguai iva pendar ou vahe ari sēsa coti sui, ahe vireco oyese Tūpa oicove vahe rer mondose. Ahe niha osapucái pīratá evocoi irungatu tupri Tūpa rembiguai iva pendar yuvirecoi vahe upe, oipisi vahe pīratasa ivi, para guasu momara āgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehii iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa āgua. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no.

¹⁰ Ipare opacatú guasu oñehe pīrata yuvireco aipo ehi:

“¡Poropīsirosa yande Ru Tūpa suindar, ahe oguapí vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaipri rese avei yuvinocha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pīratasa avei tasecoi yande Ru Tūpa upe!

¡Ēgüe tehi apirēhi vahe ité yepi!” ehi.

¹³ Ahese icuaipri ipāhu pendar aipo ehi cheu cute: “¿Ereicua vo co ava rehii iturucuar morochi vahe pāve yuvirecoi, ereicua que sui pīha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinohe tupri vahe ité teco asisa sui yuvireco, inungar oyosei, omomorochi vahe oturucuar, ěgüe ehi avei güecocuer imomorochi Ovesami ruvi pipe yuvireco.

¹⁵ “Sese Tūpa renda rovai yuvirecoi, chupe mbahe apo āgua ari, pītu rupi avei sēta pipe. Güendave oguapí vahe oĩ, güecocuer pipe osepira.

¹⁶ Evocoi ndiyumbiasí iri chira yuvireco,

ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa secoi Vu renda rovai,

ahe osārora ava rehii sereco inungar ovesa rārosar.

Ipare opara viraso tecovesa resendar i ndopai vahesave imboihu āgua.

Tūpa evocoyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sñu tupri ivave ñepei hora yemombitesa rupive. ² Ichui asepia siete tupri Tūpa rembiguai iva pendar yuvinochai vahe Tūpa rovai, chupe opa imondosa siete tupri mimbì. ³ Ipare ou ambuae Tūpa rembiguai iva pendar oro itaisi rapisa reseve, iyavei ou ohã itaisi rapisa renda rovai; ipare imondosa tuvichá itaisi chupe oicuvêhe vaherã oyoya tupri opacatu ava Tūpa upendar yeruresa rese oro mbahe reropovêhepri renda harive; ahe Tūpa renda rovai chini vahe. ⁴ Itaisi râtachi evocoyase oso Tūpa rembiguai iva pendar po sui. Ëgüe ehi oyepota oso Tūpa recosave, oyoya tupri chupendar yeruresa rese. ⁵ Ipare evocoyase Tūpa rembiguai iva pendar opoco itaisi rapisa rese, omboapipo mbahe reropovêhepri renda pendar tâtapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbì

⁶ Evocoyase siete tupri Tūpa rembiguai iva pendar oyemoingatu voi güemimbì moñehe ãgua yuvireco.

⁷ Yipindar vahe Tūpa rembiguai omoñehe güemimbì, ahese imombosa ivi hari rupi amanda iyavei tata oyeseha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocai.

⁸ Imoñuviriosa Tūpa rembiguai omoñehe güemimbì. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbì, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi ïai mombosapisa yahocuer pipe iyavei ivi sui i ohẽ vahe mombosapisa yahocuer pipe avei no. ¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoirungatusa Tūpa rembiguai omoñehe güemimbì. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pñtu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbì yuvireco!” ehi.

9

¹ Tūpa rembiguai imbopoyandeposa omoñehese güemimbì, ahese asepia yasitata oviapi vahe iva sui ou ivive. Ipare chupe imondosa ivicuar picucu pñtumimbì vahe mboisa. ² Ipare omboise ivicuar rovapisa, ichui opñha tâtachi, inungar acoi horno guasu pipe sui osẽ vahe. Evocoyase evocoi tâtachi ndosesape uca iri ari upe, niporẽhi iri eté mbahe. ³ Iyavei evocoi tâtachi sui opa yuvinose tucru guasu rehii oñemosai opacatu ivi rupi; chupe avei imondosa seco pñrata ãgua inungar acoi mbaherumbiquiãpe. ⁴ Icuaisa rumo opacatu capihi mbahe rocri iyavei ivira momaraẽhi ãgua, Ëgüe ehi rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuai chupe ava yuca ãgua. Ëgüe ehi rumo ‘tomombaraisu pucu rane poyandepo yasi rupi sereco’ oyapave tẽi, inungar tupri acoi mbaherumbiquiãpe rasicuer.

⁶ Evocoi ari rupi ava oipota tẽira omano ãgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingatupri vavasave nara yepi; oãca rese evocoyase vireco ndoyavii yeguaca oro apopri, iyavei sova aviye tupri ité ava repiaca.

⁸ Iha ndoyavii cuña ha, sai evocoyase ndoyavii tupri yagua p̃ta r̃ai. ⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cãreto riapugüer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiãpe popiar. Ahe niha vireco op̃ratasa poyandepo yasi rupi ava momara ãgua t̃ei. ¹¹ Evocoi tucru guasu rerecuar, ahe icuaipri ivicuar ipicucu vahe mboi ãgua. Ahe serer hebreo ñehe pipe Abadón; griego ñehe pipe evocoyase Apolión ehi.

¹² Opa yipindar vahe mbahe-mbahe t̃ei; oime vite rumo co pare ñuvirío mbahe tasi vahe.

¹³ Imoñepei ovasa Tüpa rembiguai omoñehese güemimbi, ahese asendu ñehesa itaisi rapisa renda oro apopri Tüpa rovindar irungatu sãchi vahe p̃ahu sui. ¹⁴ Ahe aipo ehi evocoi imoñepei ovasa Tüpa rembiguai upe: “Eyorapa evocoi irungatu Tüpa rembiguai ñapichimbri iai guasu Eufrates ivirindar” ehi. ¹⁵ Evocoyase opa yorasa ava mombosapisa yahocuer yuca ãgua yuvireco. Esepia, evocoi imoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ëgüe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer p̃ira vahe tata nungar, sovi vahe, iyu vahe avei no. Cavayu rehii ãca evocoyase aviye tupri yagua p̃ta ãca, iyuru sui evocoyase yuvinose-nose tata, tãtachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu p̃ratasa iyuru rese chini, suguai rese avei no; ahe suguai ndoyavii tupri ité mboi ãca, ipipe avei ava omomara.

²⁰ Ava rumbirer rumo nomanopa vitei vahe co mbahe t̃ei sui yuvireco, nosecuñaroi eté güecocuerai yuvireco. Ndopoi potai eté carugar mboetei aisa sui, iyavei opacatu mbahe rahanga t̃ei oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tüpa rembiguai ìva pendar vireco vahe icuachiapri cuachiarmi

¹ Ipare asepia ambuae Tüpa rembiguai ìva pendar ip̃ratá vahe ogüeyise ìva sui ou mbahe p̃tu p̃ahuve; ahe ñaca rese arco iris oyere tupri. Sova sendí aviye ari, setima evocoyase ndoyavii tata rendigüer op̃uha tupri vahe. ² Cuachiarmi oyemboi vahe vireco opove. Op̃i oacato cotindar pipe op̃iro para guasu rese, ambuae op̃ive evocoyase op̃iro ìvi rese. ³ Evocoyase sãse p̃ratá, inungar yagua p̃ta r̃ase; sãse, evocoyase siete tupri osunu vahe ñehe oyendu yuvireco. ⁴ Oñehepase, ahese ñehe che aicuachia ra viña; asendu rumo ìva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoyase Tüpa rembiguai asepia vahecuer, ahe acoi op̃iro vahe para guasu rese, ìvi rese avei opo oacato cotindar omopuha ìva coti. ⁶ Ichui Tüpa ndopai vahe rer pipe evocoi oyapo vahe ìva, ìvi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tüpa rembiguai upe güemimbi moñehe ãgua, ahese imboavíesara Tüpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Ñehesa asendu vahe ìva sui oñehe iri cheu aipo ehi: “Eso, tereipisi cuachiarmi imboipri Tüpa rembiguai vireco vahe evocoi op̃iro vahe para guasu rese ohã, ìvi rese avei no” ehi. ⁹ Evocoyase aso Tüpa rembiguai upe, aporandu cuachiarmi rese, ahese ahe aipo ehi cheu: “Ndo co, eipisi, eh. Nde yuru pipe evocoyase s̃ehera eiri nungar, nde aviterve rumo irora” ehi cheu.

¹⁰ Ahese aipisi cuachiar mi cute Tūpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. ¹¹ Evocoyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pipendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipore ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tūparo, mbahe reropovēhepri renda avei, ipare opara ereipapa ipipendar Tūpa mboeteisar retacuer” ehi. ² “Nderesāhai chira rumo ñachimbrī pipe tūparo rocar rupi. Esepia, evocoi opa imondosa ava Tūpa ndoicuai vahe upe, ahe opīrora tecua nimarai vahe rese yuvireco cuarenta y dos yasi rupi” ehi. ³ “Ipore ñuvirío ava amondora che recocuer mombehu āgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osēra tata sapīpa āgua; ēgüe ehira ava omano que che reco mombehusar reco momara potasar. ⁶ Co ñuvirío vireco opīratasa oqui vahe mombita āgua, acoi ari rupi che reco mombehu vitesese yuvireco; iyavei vireco pīratasa i recuñaro āgua tuvī pipe yuvireco, imombaraisu uca āgua avei ivi opacatu-catu tēi mbaherasi pipe güemimbotar rupi.

⁷ Omboaviyepase rumo Tūpa reco mombehusa yuvireco, ahese osēra ivicuar guasu ipicucu vahe sui mbahe ipi vai. Ahe ovavara sese, osecopīra, ichui oyucara. ⁸ Sehögüer evocoyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipore mbosapi ari yemombitesa rupi, ava-ava tēi tecua rupindar, ava ambuae-ae tēi vahe, iñehe ambuae vahe iyavei ambuae-ae ivi rupindar osepiāño tēira sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporeredora oyese yuvireco. Esepia, evocoi ñuvirío ava Tūpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tūpa opa ombogüerayevi, ahese opūhapa yuvireco. Evocoyase ava opacatu osepiā vahe osiquiyé iteanga yuvireco ichui. ¹² Ipore ahe ñuvirío osendu yuvireco ñehesa ipīrata vahe iva suindar aipo ehi vahe: “¡Peyepipa ave ivate!” ehi. Evocoyase opa oyeupi ivave yuviraso iva quiha pāhu rupi oamotarēhisareta rembiepiave. ¹³ Aheseve voi oime ivi riri tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tēi osapucui Tūpa iva pendar upe imboeteisa pipe yuvireco.

¹⁴ Opa mbahe-mbahe tēi moñuviriosa cute; ou poyava irira rumo imombosapisa.

Imoñuvirío ovasa Tūpa rembiguai omoñehe güemimbi

¹⁵ Imoñuvirío ovasa Tūpa rembiguai omoñehese güemimbi, ahese oyeendu ñehesa ipīrata vahe iva suindar aipo ehi vahe:

“Yande Yar Tūpa, Sembiporavo Poropīsīrosar avei vireco co ivi pipendar mborerecuasa opovrive yuvireco cute.

Ahe evocoyase mborerecuar apirēhi vaherā itera secoi” ehi.

¹⁶ Evocoyase veinticuatro tupri icuapri, evocoi oguapi vahe yuvinoi Tūpa renda rovai, ahe oyeaivi omboya ité osiva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tūpa mbahe mboavaisarēhi, nde acoi yipisuive vahe ité, ereicoveño avei cūrītei.

Esepia, nde pīratasa tuvichá vahe pipe ereporocuai eico.

¹⁸ Ambuae tecua rehii pendar nde amotarēhí ité yuvireco. Nde ñemoirosa rumo cūrítei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe, ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oririi, amanda osururú avei no.

12

Cuña iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendigüer, aviye opïro vahe yasi rese ohã, oãca yeguaca rese doce tupri yasitata vireco. ² Co cuña ipuruha oico, sãsé tēi omembri iha pota água oyesui. Esepia niha, oiporará ité tasicuer. ³ Ipare coiye oyecua iva rese ambuae mbahe mboyecua tuprisa: mbahe ipi pïra vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotiriri yasitata iva pendar imombosapisa sui ñepeí yahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembri oha ramoseve” ehi viña. ⁵ Ipare co cuña membri oha cuimbahemi, ahe mborerecuar virecora mbococa guarepochi apopri, ipïrata catu vahe secoira opacatu ava ivi rupindar upe. Ichui serocuasa voi serasosa Tūpa rovai. ⁶ Cuña evocoyase oñemi ivi iporupirēhisave oso. Aheve omoingatu Tūpa iyemboerecua água, eipeve icaru água mil doscientos sesenta ari rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco.

⁸ Ndoicatui eté rumo Miguel recopi água yuvireco. Sese ndipoi eté ivave seco água yuvireco chupe. ⁹ Ēgüe ehi imboyepepisa mbahe ipi oporomocañi vahe reco pïratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopambopa tēi vahe opacatu ivi pipe yuvireco.

¹⁰ Evocoyase asendu ñehesa ipïrata vahe ivave, aipo ehi vahe: “Cūrítei oime poropïsirosa, pïratasa iyavei yande Tūpa mborerecuasa, Poropïsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tūpa reroyasareta recocuer momara água pïtu, ari yacatu rupi yande Ru Tūpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyei eté güetecuer mocañi água yuvireco.

Ahe rumo oyemoingatu voi eté omano água.

¹² ¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pēu oñemoirosa pipe, oicuse güeco pucuēhi água” ehi.

¹³ Ipare mbahe ipi oporomocañi vahe oicuse imombopri güecose ivi rese, ahese omoña cuña imembri cuimbahemi reseve yamotarēhisa pipe. ¹⁴ Evocoi cuña upe rumo imondosaño ñuvirío vira guasu pepo iveve água chupendar ivi imoingatupri ava porēhisave seco água, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. ¹⁶ Ivi rumo oime co cuña pïtiviisa, ahe oyeca. Ipare opa omoco iai evocoi mbahe ipi oporomocañi vahe rembiapo.

¹⁷ Evocoyase, oñemoiró iteanga cuña rese, ipare oso ovava ambuae ichuindar rehii rese,

ahe omboyeroya vahe ité Tūpa porocuaita yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohã.

13

Ñuvirío mbahe ipi vai

¹ Ipare asepia para guasu pipe sui osese mbahe ipi vai, ahe siete tupri ñaca vahe iyavei diez tupri sãchi. Guãchi yacatu evocoyase vireco ñepei-peí oyeguaca, iyavei oãca yacatu rese vireco terer Tūpa upe mbahe tēi vahe. ² Co mbahe ipi vai aviye tupri acoi yaguar iparaũ vahe; iyavei ipi aviye tupri oso pi, iyuru evocoyase aviye yagua p̃ta yuru. Mbahe ipi oporomocañi vahe evocoyase omondo opĩratasa iyavei omborerecuasa chupe. ³ Ñepei mbahe ipi vai ãca oyeapicha guasu vahe ndoyavii omano vaheã ité viña; ahe rumo ocuera tupri iriño evocoyase opacatu guasu ava sepiase, ndoyembovihai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborerecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheã sese” ehi yuvireco.

⁵ Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tūpa reroĩro ãgua avei no, iyavei mborerecuar guasu seco ãgua cuarenta y dos yasi rupi. ⁶ Ëgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca ãgua Tūpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoẽhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaheã, oyeoquenda ucaño itera; iyavei acoi ava omano vaheã quise pucu pipe, ipipeño ité omanora.”

Co pipe oyecua Tūpa rese yeroyasa iyavei ipĩratasa ava chupendar rese.

¹¹ Ipare asepia ambuae mbahe ipi vai osē vahe ivivri sui. Co vireco ñuvirío guãchi ndoyavii tupri Ovesa rãchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rãgüer sui. ¹³ Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. ¹⁵ Ipare imondosa pĩratasa chupe tecovesa mondo ãgua evocoi sahanga upe ‘toñehe, toyuca uca avei ava opacatu omboeteiẽhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachía opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mondo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri ãgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, êgüe ehi siapugüer. ³ Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaipri eta rovai avei no. Ñepeí yepe que iva pendar ndoicatui eté evocoi sapucaisa rese oyembohe vahe. Êgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pīpendar pāhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pīpe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yīpīndar mbahe seropovēhepri Tūpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapī Tūpa rembiguai omombehu iñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsirosa resendar ndopai vahe imombehu āgua opacatu ava co ivi pīpendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe pīrata aipo ehi: “Pesiquiye Tūpa sui iyavei pesapucaí seco ivatesa rese chupe no. Esepia niha, cūrītei oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pīpe!” ehi.

⁹ Ipare ambuae Tūpa rembiguai iva pendar imombosapīsa, saquicue moña aipo ehi pīratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que opo rese no, ¹⁰ oipisi itera Tūpa ñemoirosa ipīrata vahe ité; ipare omombaraisura setecuer azufre ocai vahe pīpe güembiguai iva pendareta reco maranehi rovaque, Ovesami rovaque avei no. ¹¹ Tātachi icaigüer pendar evocoiyase oyeupira ndopai vahe, ahese ndipoi chīetera pītuhusa pītū, ari pīpe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Êgüe ehira Tūpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pīpe suive sorivete catura acoi ava omano vahe yande Yar rese yuvireco” ehi.

“Êgüe ehi eté —ehi Espīritu imombehu—, opītuhura oporaviquisa sui yuvireco. Esepia, mbahe sembiapo rerācua osora ivave supī” ehi.

Ivi pīpendar recoñhasa

¹⁴ Ahese asepia iva quiha morochí vahe; iharīve ndoyavii ava oguapī vahe oī. Vireco niha oyeguaca oro apopri oāca rese iyavei mbahe miti asiasa saimbé vahe vireco opove.

¹⁵ Ipare osē ambuae Tūpa rembiguai tūparo sui. Ahe osapucaí pīrata evocoi iva quiha harīve chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evocoi chini vahe oyasia güemiti ivive oico, ahese opa omonuha güembiasia.

¹⁷ Ipare osē ambuae Tūpa rembiguai tūparo sui, ahe avei vireco mbahe miti asiasa saimbé vahe. ¹⁸ Ipare ambuae Tūpa rembiguai osē mbahe reropovēhepri renda sui, ahe tata rese hañecosar secoi. Iyavei oñehe pīrata evocoi vireco vahe mbahe miti asiasa upe aipo ehi: “¡Eyasia uva ha apacuar, evocoi oime vahe ivi pīpe! ¡Esepia niha, opa yaviye!” ehi. ¹⁹ Evocoiyase co Tūpa rembiguai inungar oyasia vahe uva ha êgüe ehi opa ava ipeha ivi pīpendar. Ipare opa oyapocatu Tūpa ñemoirosa rāro āgua. ²⁰ Ipare inungar uva ha

icambepri tecua cupeve, ãgüe ehi co ava imombaraisu; ichui osẽ tuvi evocoi tipigüeru oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tüpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tüpa rembiguai, siete tupri mbaherasi ipa vahe vireco vahe, ahe ipá vahe ité Tüpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía ãgua yuvireco oyese. Ahe vireco Tüpa upendar arpa yuvireco. ³ Ipare osapucaí Tüpa rembiguai Moisés sapucaisa yuvireco, iyavei Ovesami sapucaisa aipo ehi: “Tuvichá opacatu mbahe nde rembiapo, che Yar Tüpa opacatu mbahe mboavaisarẽhi; nde recocuer supi tupri vahe ité; seco ñivi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tüpa rëta imaranehi vahe. Aheve acoi yapocatusa mborocuita resendar. ⁶ Evocoyase ichui yuvino-sepa evocoi siete Tüpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoyase oyeumbicua opochiha rupi tupri yuvireco. ⁷ Ipare ñepeí evocoi irungatu iva pendar yuvirecove vahe pãhu pendar omondo siete tupri Tüpa rembiguai upe siete Tüpa ñemoirosa riru oro apopri, ahe oicove vahe ité, ndopai vahe. ⁸ Ipare Tüpa rëta omboapipo tãtachi, evocoi ou vahe Tüpa reco porañetesa iyavei ipĩratasa sui. Aheve ndiyai eté que ava upe seique ãgua acoi opase voi eté omomba siete tupri mbaherasi vai vireco vahecuer siete Tüpa rembiguai.

16

Siete Tüpa ñemoirosa riru

¹ Evocoyase asendu ñehesa ipĩrata vahe osẽ vahe Tüpa rëta pipe sui. Ahe aipo ehi siete Tüpa rembiguai yuvirecoi vahe upe: “Peso, tapeipiyerepa ivi hari rupi evocoi siete tupri mbahe riru pipendar Tüpa ñemoirosa” ehi.

² Yipindar vahe Tüpa rembiguai opa oipiyere igua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tẽi avei, ahe chupe oime setá caracha vai tasi vahe.

³ Tüpa rembiguai imoñuviriosa opa oipiyere igua riru pipendar para guasu pipe. Ahe evocoyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tüpa rembiguai imombosapisa opa oipiyere igua riru pipendar iai pipe, i ohẽ vahe pipe avei no. Ipare opa ahe oyeapo tuvi yuvireco. ⁵ Co pare asendu Tüpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembouse nde ñemoirosa, che Yar Tüpa, seco maranehi vahe.

Nde yipisuiendar ité ereico.

⁶ Esepia, ahe opa oyuca ndeundar ava iyavei nde ñehe mombehusar yuvireco.

Cüritei rumo eremboihu uca tuvi pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovêhesa renda sui aipo ehi vahe: “Supi eté, che Yar Tūpa, opacatu mbahe mboavaisarêhi, nde ava recocuer mombaraisusa supi tupri vahe ité iyavei nde reco ñvi vahe ité no” ehi.

⁸ Tūpa rembiguai imoirungatusa, opa oipiyere mbahe riru pipendar ari rese, ipare ari upe imondosa pīratasa ava rapīpa āgua. ⁹ Ipare opacatu ité ava yuvirocaipa tupri; ndoyevii eté rumo Tūpa upe iyavei nomboeteiño ité yuvireco. Ēgüe ehi rumo iñehe mara-mara tēiño mbaherasi rerecose Tūpa upe yuvireco.

¹⁰ Tūpa rembiguai imbopoyandeposa oipiyere mbahe riru pipendar mbahe ipi vai renda rese. Ahese aviyeteramo tēi serecuar ipovri pendar avei pītumimbisave yuvirecoi. Ava evocoyase oñeapecusuhu-suhu tēi yuvireco mbahe rasicuer pāhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo iñehe mara-mara tēiño Tūpa ivate vahe rese oyeupe mbahe tasi vahe pāhuve yuvireco.

¹² Tūpa rembiguai imoñepei ovasa oipiyere mbahe riru pipendar iai guasu Eufrates pipe. Ahe evocoyase opa ipiru peri apo āgua añihivei coti sui mborerecuareta yu āgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Tūpa ñehe mombehusar supi vahe avei, ahe yuvirecoi vahe yuru rupi yuvinose mbosapi carugar vireque nungar. ¹⁴ Co Carugar suindar yuvirecoi, ahe oyapo poromondiisa mbahe mboyecuasa yuvireco. Ipare opa yuvinose opacatu ivi rupi mborerecuareta monuha āgua vavasave nara, acoi ari cañi pipe Tūpa mbahe mboavaisarêhi amotarêhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoyase imbosietesa Tūpa rembiguai oipiyere iñemoirosa mbahe riru sui ivitu rupi. Ipare iva pendar Tūpa rēta pipe sui osē ñehesa ipīrata vahe evocoi ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ivi oririi ipīrata catu vahe opacatu ivi ririi sui ava yuvirecove viteseve ivi pipe. ¹⁹ Tecua guasu oyeca-yeca mbosapi rupi, opacatu tecua evocoyase opa onduru ivi pipendar. Ipare Tūpa oyemomahenduha evocoi tecua guasu Babilonia pendar rembiapo ai rese, evocoyase omondo oñemoirosa ipīrata catu vahe chupe. ²⁰ Opacatu caha pāhu, ivitri avei ocañipa ité yuvireco. ²¹ Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tēiño vite ité Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepei ou aipo ehi cheu: “Erio, amboyecuara co cuña yaguasa serai vahe upe ñemoirosa ndeu, ahe evocoi oguapi i harive oī” ehi. ² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espiritu omboyecua vahe cheu, Tūpa rembiguai iva pendar che reraso ava porêhisave. Aheve asepia cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarêhisa sereco oyese, iyavei vireco siete tupri oāca, diez tupri guāchi. ⁴ Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipipe omboapipo mbahe yavaeté vahe sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. ⁶ Ipare aicua evocoi cuña osavaipo vahe

oĩ Tũpa reroyasar ruvi pĩpe iyavei acoi Jesús recocuer mombehusa sui tẽi yucapri vahe ruvi pĩpe avei no.

Co asepiase che quer nungar pĩpe, ndache mbovĩhai eté. ⁷ Ahese ahe Tũpa rembiguai iva pendar aipo ehi cheu: “¿Mahera vo nderevĩhai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oãca, diez tupri avei acoi sãchi” ehi. ⁸ “Acoi mbahe ipi vai eresepia vahe ahe yĩpive secoi vahe, cũritei rumo ndipo iri; osẽra rumo ivicuar guasu ipicucu vahe sui omano ãgua renonde curi. Acoi ava ivi pĩpendar ndovirecoi vahe güerer cuachiar tecovesa resendar pĩpe yuvireco yĩpive ivi apoẽhiseve, ahe ndovĩhai chira yuvireco osepiase evocoi mbahe ipi vai yĩpive oicove vahe viña, ndoicove iri rumo, oyevĩ irira curi.

⁹ “Co rese icuasara uma vireco mbahecuasa senducua ãgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapĩ oĩ iyavei ahe siete ñaca avei omoporẽhi ‘siete tupri mborerecuar’ oyapave. ¹⁰ Cinco tupri mborerecuar evocoi ipãhu pendar ndipo iri yuvireco, ñepeĩño evocoyase oporocuai cũritei oico, ambuae rumo ndou vitei. Ouse rumo ipandar, ou raimi tẽira. ¹¹ Mbahe ipi vai secoi vahe yĩpindar, ndoicove iri cũritei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi tẽi vahe rã secocuer” ehi.

¹² “Evocoi diez tupri vahe sãchi, ahe mborerecuar diez tupri ndoyuviroique vitei vahe oporocuai vahe rã yuvireco. Oyoya rumo oporocuai raimi tẽira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vahe rã pĩratasa iporocuai ãgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata ãgua yuvireco” ehi.

¹⁵ Iyavei Tũpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tẽi vahe oguapĩ oĩ, ahe ‘ava rehii tecua yacatu rupindar, iñehe ambuae-ae vahe iyavei opacatu ambuae tẽi vahe ivi rupindar’ oyapave. ¹⁶ Evocoi eresepia diez tupri vahe sãchi mbahe ipi vai rese, ahe ndoyambotai chira cuña yaguasa-guasa tẽi vahe; iyavei osequiĩ tuprira seya; ohupara soho, ipare opara osapi. ¹⁷ Tũpa niha omondo ipiha pĩpe mbahe güemimbotar apo ãgua ‘ahe toyemonguerẽhi yuvireco omborerecuasa mondo ãgua mbahe ipi vai upe; tomboaviye rane ité che remimombehugüer yuvireco’ oyapave. ¹⁸ Iyavei evocoi cuña yaguasa-guasa tẽi vahe eresepia vahe, evocoi niha tecua guasu ivi pĩpendar mborerecuareta vireco vahe opovrive yepi” ehi Tũpa rembiguai cheu.

18

Babilonia viapi agüer

¹ Ipare asepia ambuae Tũpa rembiguai ipĩrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi. ² Iyavei oñehe pĩrata oico aipo ehi:

“¿Oviapi tecua Babilonia cute!

Carugar yuviroique sese, opacatu carugar naporai vahe iyavei vĩrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pĩpendar oyapo mbahe tẽi yuvireco sese, iyavei mbahe mboepisar ivi pĩpendar oyemombahe eta imbahe porañete ai vahe pota raisa pĩpe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyoyaẽhi ãgua.

Iyavei ñepeĩ yeperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ãgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opiha pipe oico:

‘Cohave che aguapi vñte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaherasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepiase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que virocua vaherã imbahe yuvireco ichui, ¹² co opacatu mbahe sepi vaherã ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape sñacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe sñacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cãretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repiase yuvireco. Oyaseho tēira iyavei ndoyembovīhai tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi, pīra vahe; oro pipe oyemboetei vahecuer,

itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehi ivirindar carite guasu reroquatar, i rupi oporaviqui vahe oyeupe nara mbahe rereco ãgua, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucaí pīrata tēi yuvireco: “¡Ndipoi eté niha yipisui tecua na ehi vahe!” ehi yuvireco. ¹⁹ Ipare imboasipave omondo ivi cuhi oãcave yuvireco, oyaseho iyavei ndoyembovīhai tēi, ipare osapucaí tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovīhaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe, opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipape ndapesepia iri chietera apirēhi vaheerā” ehi.

²² “Ndasendusa iri chietera ocar rupi arpa moñehesar, mimbī moñehesar, iyavei mimbī guasu moñehesar avei no; ndererecoi chietera ava oporaviqui vaheerā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepepe yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehii ñehe pīrata ivave aipo ehi vahe:

“¡Imboeteipri yande Yar tasecoi!

Poropñisirosa, teco porañetesa iyavei ipīratasa ahe yande Ru Tūpa suindar.

² Esepia niha, ahe oyapo mbahe supi eté vahe,

‘Tocañi’ ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepi oyeupendar” ehi.

³ Ipape aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rātachi ndopai chietera” ehi.

⁴ Evocoiyase veinticuatro tupri iva pendar icuapri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipape aipo ehi yuvireco no: “¡Ēgüe tehi! ¡Imboeteipri yande Yar tasecoi!” ehi. ⁵ Evocoiyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroa āgua!” ehi.

Pieta mendasa Ovesami resendar

⁶ Asendu avei ava rehii ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

⁷ Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esepia niha, cūrítei oyepota mendasa ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe ‘Tūpa rese yuvirecoi vahe recocuer ihivi vahe’ oyapave aipo ehi” ehi.

⁹ Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipape añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe rerogatasar

¹¹ Evocoyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa. ¹² Sesa evocoyase ndayaviyei eté acoi tata rendigüer; iyavei oāca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoyase imopirapri tuvi pipe; serer evocoyase, “Tūpa Ñehe” ehi. ¹⁴ Sundao rehii iva pendar saquicuerive yuvirecoi. Iturucuar secose vahe pāve morochí vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osē quise pucu saimbe vahe opacatu ambuae-ae tecua rupindar momara āgua. Ahe oyocuaира oamotarēhisar guarepochi apopri opo pendar pipe. Iyavei osecoāhara inungar uva opive otiamii vahe yuvireco iyavei ombohura evocoi uva ricuer paraisu catusa resendar pipe. Ahese Tūpa mbahemboavaisarēhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecuar guasu iyavei ava Yar ivate catu vahe” ehi.

¹⁷ Ipare asepia Tūpa rembiguai opūha vahe arisave. Ahe osapucui pīrata opacatu vīrai mbahe rohoguar upe oveve vahe iva rese: “¡Perio! ¡Peñemonuha Tūpa suindar carusa guasusave; ¹⁸ pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava āgua evocoi cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendasa, oyoya evocoi Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoyase co mbahe ipi vai iyavei Tūpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoyase evocoi cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoyase opacatu vīrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou iva sui ivicuar guasu ipicucu vahe mboysar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriēhi āgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evocoi oipisi vahe omborerecuasa yuvireco ava upe mbahe rese porandu āgua. Iyavei asepia ava hā evocoi opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñhengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tūpa upendar ité yuvirecoi!

Imoñuviriosa manosa evocoyase chupe ndipo iri eté. Ëgüe ehira rumo ahe Tūpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil araviter rupi.

Caruguar recopisa

⁷ Acoi osupitise rumo mil araviter cute, ahese Caruguar yorasara soquendasa sui. ⁸ Ichui osēra opacatú ava ivi pipendar mbopa-mbopa tēi oico; osēra ivi Gog mbopa tēi āgua, ivi Magog mbopa tēi āgua avei. Ipare omonuhara vavasave nara isundao eta. Esepia niha, ahe sehii etepri yuvireco inungar ivi cuhi para guasu popi rupindar.

⁹ Ëgüe ehi yugüeru ati amombri sui, oyerepa tupri Tūpa recua rese yuvireco no, evocoi tecua Jerusalén sembiaisu rese avei. Tūpa rumo ombou tata iva sui, ahe ipipe opa tupri ité osapi. ¹⁰ Caruguar evocoyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tūpa ñehe mombehugar angahu tēi vahe avei no. Aheve iparaisura pñtu, ari yuvireco apirēhi vaheerã.

Tūpa oguapira güendave ava recocuer rese porandu āgua ari ipa vahe pipe

¹¹ Evocoyase asepia tenda imboetepri, morochi vahe. Iharive oime ava oguapi vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepia omano vahecuer seco ivate vahe, seco mbegüemi vahe avei no opūha yuvinoha Tūpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tūpa sui ou. Opacatu imoingatusa tupri vahe, inungar acoi cuña omenda āgua oyemboetei tupri omevi upe. ³ Ipare asendu ñehesa pñrata tenda suindar aipo ehi vahe: “Tūpa cūrítei oicove ava rehii pñhu rupi oico. Ahe oicove vaheerã ité sese yuvireco yepi, ahe ava evocoyase chupe nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira vñharēhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboihuño tēira i tecovesa resendar ndasepii vahe pipe. ⁷ Acoi ava oyemoviracua vahe ité mbahe-mbahe tēi apoēhi āgua, ahe oipisira co mbahe opacatu omahera yuvireco. Evocoyase che aicora chupendar ité, ahe evocoyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuviraso ipa nungar azufre ocai pñrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoyase ou ñepeii siete Tūpa rembiguai pñhu pendar acoi siete tupri igua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecua cuña

omenda vahevi ndeu, Ovesami rembirecovi” ehi. ¹⁰ Evocoi che quer nungar pipe Espíritu osepia uca vahe cheu, che reraso ivitri guasu ivate vahesave. Aheve omboyecua tecua guasu Jerusalén nimarai vahe cheu, ogüeyi vahe Tüpa sui. ¹¹ Ahe tecua sendí iteanga Tüpa rendigüer pipe. Sendigüer evocoyase oyoya tupri ita iporañete vahe rese, oyoya avei ita jaspe serer vahe ipĩrerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoyase ñepeipei Tüpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu áchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tüpa rembiguai oñehe vahe cheu vireco vara oro apopri tecua rãha água, opacatu soquendipi rãha água, ñachisa rãha água avei no. ¹⁶ Tecua guasu pucucuer oyoya tupri ipigüer rese. Evocoyase Tüpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no. ¹⁷ Ipare osãha ñachisa: osãhase ipigüer sesenta y cinco metro tupri. Evocoi Tüpa rembiguai osãha ava rembiporu pipe.

¹⁸ Tecua áchisa ahe ita porañete vahe Jaspe serer vahe apopri; tecua evocoyase oro pãve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tẽi iporañete vahe pãve: yipindar ivĩracuasa jaspe, imoñuviriosa zafiro, imombosapisa ágata; imoirungatasa esmeralda; ²⁰ imbopoyandeposa ónice; imoñepe ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohir; ñepeipei oquenda ñepe mbohir sui yapopri. Calle guasu tecua aviter rupindar evocoyase oro pãve, inungar vidrio yande porẽhi tupri vahe ipipe.

²² Ndasepiai eté evocoi tecua guasu pipe ñepeipei yupe tũparo. Esepia niha, yande Yar Tüpa mbahe mboavaisarẽhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape água. Esepia niha, Tüpa ité osesape güendigüer pipe, iyavei Ovesami tataendi nungar seci aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pĩtu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Tüpa remimbotarẽhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acoi ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tüpa rembiguai omboyecua iai tecovesa resendar cheu, tĩpiu, oyecua tupri, osẽ vahe Tüpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepeipei araviter pipe. Iyavei evocoi ivira ro aviye ai ava opacatu rupindar mbogüera água. ³ Ndipoi chietera aheve que mbahe tẽivri pendar. Tüpa renda porañete vahe iyavei Ovesami renda avei chinira evocoi tecua guasu pipe. Aheve sembiguai eta omboeteira yuvireco. ⁴ Osepia sova iyavei virecora serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape água yuvireco. Esepia niha, yande Yar Tüpa teieté osesapera. Ipare ahe ava mborerecuar apirẽhi vahe rã ité yuvirecoira sese.

Cõimi eté Jesucristo yevi água

⁶ Ipape Tūpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yande Yar Tūpa acoi omboyecua tupri vahe mbahe oyesuindar oñehe mombehusar upe, ahe ombou güembigui iva pendar mbahe omboaviye poyava voi vaheñā mboyecua āgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaheñā resendar co cuachiar pipe!” ehi.

⁸ Che, Juan, asepiya iyavei asendu ité co mbahe. Sendu pare voi, añenopiha evocoi Tūpa rembiguai rovai imboetei āgua viña. ⁹ Ahe rumo aipo ehiño cheu: “Aní ereñenopiha che rovai. Esepia niha, che Tūpa rembiguai tēi aico, nde nungar, nde rivireta nungar avei evocoi oñehe vahe Tūpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaheñā resendar sereco, evocoi icuachiapri cuachiar pipe. Esepia niha, ari cōimi secoi imboaviye āgua. ¹¹ Acoi ava mbahe tēi aposar, toyapoño mbahe tēi; iyavei acoi ava seco rai vahe, taseco raiño ité oico; acoi ava seco tupri vahe rumo, ahe toyapoño mbahe tupri oico; iyavei acoi ava Tūpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepepei-pei ava rembiapogüer rupi-rupi amondo vaheñā chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirēhi vaheñā” ehi.

¹⁴ “Sorivete catura acoi ava omoatiro vahe güecocuer. Esepia, ahe oipisira ivira ha tecovesa apirēhi vahe resendar. Ipipe sui oiquera tecua guasu pipe. ¹⁵ Ava rehii ndiporeroyai vahe rumo opitapara ocarve tēi yuvireco, iyavei ava ipaye serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyeroku vahe, iyavei opacatu ava oipota rai vahe oporombopa-mbopa tēi āgua yepi” ehi.

¹⁶ “Che, Jesús, amondo che rembiguai iva pendar mbahe mombehu āgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaheñā resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pipendar mbahe-mbahe tēi imombehupri. ¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco āgua iyavei co tecua maranehi pipe seique āgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ēgüe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.